

AMOENITATES LITERARIÆ,


Quibus
VARIÆ
OBSERVATIONES,
Scripta item quædam anec-
dota & rariora Opuscula
exhibentur.

Editio altera correctior



FRANCOFURTI & I
Apud DANIEL. B. &
& FILII
M DCCXXX

ÆI





S. R. I.

LIBERÆ ET INCLYTÆ
REIP. MEMMIN-
GENSIS

PROCERIBUS,
VIRIS MAGNIFICIS,
PERQUAM GENEROSIS,
MAXIMÉ STRENUIS, JURIS-
CONSULTISSIMIS, PRÆ-
NOBILISSIMIS, AMPLIS-
SIMIS, PRUDEN-
TISSIMIS.

DOMINIS CONSULI-
BUS, PRÆTORI, SECRETIO-
RIBUS, TOTIQUE SENATO-
RUM ORDINI,

NEC NON CONSILIARIO
ET TABULARUM PUBLICA-
RUM PRÆFECTO,

MÆCENATIBUS ET
PATRONIS OPTIMIS
MAXIMIS,

Se suumque Libellum

ea, qua par est animi submissione dicat.

J. G. S.

Jam



JAm pridem gestiit animus,
Vobis, MÆCENATES
SUMMI, maximorum be-
neficiorum memoria obstri-
ctus, publicum aliquod de-
voti mei in Vos obsequii de-
bitæque gratitudinis monu-
mentum erigere. Aures
enim sæpenumero mihi vel-
licabat Seneca, quem sapi-
entiæ patrem dixere vete-
res, hoc effato ruborem mi-
hi injiciens: *Quidam fugitive*
) (3 . *agunt*

DEDICATIO.

agunt gratias, & in angulo & ad aurem. Non est ista verecundia, sed inficiandi genus. Ingratus est, qui remotis arbitris agit gratias. Calidissimis vero meis desideriis hactenus defuit occasio, quam nunc tandem oblatam avidè teneo, Vobisque in sanctissimi cultus tesseram & mentis devotæ pignus hoc, quicquid est libelli, venerabundus offero, dico, consecro. Levidense est, fateor, id munusculum, nec par aut dignum Vestris Personis & beneficiis, in me uberrime collatis, quibus ceu compe-
dibus

DEDICATIO.

dibus & numellis Vobis me devinxistis totum : haud tamen prorsus displiciturum esse, Vestra me, tot documentis mihi cognita, sperare jubet benignitas. Vobis potissimum, MÆCENATES, omnes meos qualescunque in literis profectus debeo. Vester favor jam adolescentulum fovit, crescentibusque postea annis simul crevit. Vestris subsidiis sustentus, in Academias, illas bonarum artium palæstras & scientiarum officinas, me recepi. Vos literis commendatitiis primos mihi adi-

DEDICATIO

tus in famigeratissimo illo
Salanarum Musarum contu-
bernio ad D. Jo. Franc. Bud-
deum, Virum meo elogio
longe superiorem, cujus ede-
cumatæ vires & eximia in
omnem rem literariam &
factam merita per totum,
quaqua patet, orbem eru-
ditum celebratissima sunt,
muniistis. Cumque Athe-
nas Noricas petere, Me-
ster etiam me favor comi-
tatus est, referamque præ-
buit admissionalem ad D.
Gust. Georg. Zeltnerum,
Theologum Philologum-
que summum, Virum

πολ-

DEDICATIO.

πολλων ἀνδραξιων ἄλλων, in quo rarissima pietas cum consummata eruditione certat.

Tantum Virorum per Vos non auditoria duntaxat sed & musea mihi patuerunt: His ducibus per Vos mihi conciliatis musarum castra, sequi mihi licuit: fidissima Horum institutione & præstantissimis consiliis adjutus, formatus, excitatus, directus fui, quod in præcipua felicitatis parte me ponere gratus profiteor. Nec deinceps vero Vestra me destituit benevolentia, tot luculentis speciminibus mihi

)(5 com-

DEDICATIO.

comprobata, quæ religioso
potius silentio & memori
mente, quam balbutienti
præconio, venerabor. Ve-
stra insuper quotidie meis
usibus exposita est Biblio-
theca, quæ in dies Vestris
auspiciis læta capit incre-
menta, nuper adeo cum
aliis, tum Bernardi Mont-
fauconii opere immortalī
vereque aureo, quo Anti-
quitates jucunda explana-
tione & schematibus niti-
dissimis illustrantur, libera-
liter locupletata. Nihil
jam dicam de reliquis bene-
ficiis, quæ cum singulis Ve-
stris

DEDICATIO.

ſtris civibus mihi ſunt communia: nihil de Veſtra fide, pietate, vigilantia, ſapientia, conſilii præſentia, juſtitia, cum lenitate amico juncta connubio, aliisque virtutibus, quibus, Deo clementer annuente, Patriæ noſtræ commoda in dies amplificatis, & civium felicitatem omni niſu provehitis. Supplex divinum Numen imploro, ut Vos, MÆCENATES SUMMA OBSERVANTIA COLEN-
DI, in Reipublicæ & Eccleſiæ noſtræ ſolamen atque præſidium ſalvos & incolu-
mes,

DEDICATIO.

mes, ac omni rerum optandarum adfluentia cumulatos quam diutissime servet!

Ita precor, ita voveo, meque & mea studia perennanti Vestro patrocinio demissa mente commendo.

Scribebam Memmingæ
A. R. S. cío idcc xxiv. VII.
Kalend. Novembris.

PRÆ-



PRÆFATIO.

L. B. S.

PAUCIS Te volo, Amice Lector. Rariorum librorum notitiam, Virorum literis illustrium vitas, variasque amœnioris argumenti dissertatiunculas per otium mihi natas tecum communicaturus, hisce primitiis nunc tuos subeo oculos, quas si Tibi haud prorsus ingratas fuisse animadvertero, plures in posterum bono cum Deo partes subsecuturæ sunt. Ut vero meis commentationibus, quas tenues & incomptas esse meæ imbecillitatis probe conscius, novi, aliquam conciliem gratiam, pretiosam semper panno meo subtextam exhibere purpuram decrevi, rariora videlicet, nec ubivis obvia, quædam opuscula, & nonnulla monumenta anecdota diversi generis, quibus subinde notatiunculis meis lucem affundere conabor. Vale, ac consiliis symbolisque, si placet, Tuis meum institutum adjuva.

OWE.

OWENUS.

Qui scribit, laudatur ab his, cul-
patur ab illis :

Lectoris vultu statque cadit-
que fui.

Semper agit causam, nec tempo-
re transiget ullo :

Semper enim sub te iudice ,
Lector, erit.



SYLLABUS

rum, quæ hoc libello continentur.

- I. *Notitia libri rarissimi, sub ipsis typographiæ primordiis excusi. pag. 1.*
- II. *Commentatio de vita, moribus & scriptis Marsilii Ficini. p. 18.*
- III. *Apologia pro Marsilio Ficino, Magiæ postulato, p. 119.*
- IV. *Literæ Leon. Lauredani, Venet. Ducis ad Reip. Memmingensis Optimates. p. 137.*
- V. *Jo. Christ. Wagenseilii Dissertatio inedita de Joana Papissa. p. 142.*
- VI. *Argumenta contra Joannæ puerperium. p. 195.*

VII. Re-

- VII. *Recensio & fata secundæ editionis
Novi Testamenti ab Erasmo Rot.
curatæ. p. 222.*
- VIII. *Epistola de Magistris nostris Lova-
niensibus. p. 248.*
- IX. *Observatio de literis Caroli Ludovici,
cct. Palat. & Degenfeldiæ Ba-
ronissæ amœbæis. p. 262.*
*Julii Cæs. Scaligeri Epistolia duo.
p. 269.*
- X. *Epistolæ aliquot ineditæ. p. 287.*
- XI. *Recensio vetustæ Lactantii Operum
editionis. p. 312.*





I.

Notitia Libri rarissimi, sub ipsis typographiæ inventæ initiis excusi.

Ta fere omnes natura comparati sumus, ut magnam capiamus voluptatem, cum quædam venerandæ antiquitatis reliquiæ oculis nostris conspiciendæ manibusque tractandæ exhibentur : & oblectatio inde resultans eo dulcius afficit animum, quo rariora sunt ista vetustatis monumenta, quæ visu percurrere atque digitis contingere nobis licet, præsertim si ex inopinato & præter omnem spem hæc talia sub aspectum veniant. Illud ipsum & mihi aliquo abhinc tempore accidit, quum manibus meis bonis avibus illaberetur liber mole quidem exiguus, sed raritate & præstantia gravissimus. Inveni eum forte fortuna, aliud agens

in angulo quodam, ubi hætenus cum blattis & tineis, putidis illis ac invisis animalculis, inexpiabile bellum gesserat, delitescentem, & vix me continui, quin tenerrimis ipsum exciperem osculis, cum primo statim intuitu magna mihi suspicio de libri pretio suboriretur, nisi pulvere fuisset oblitus, atra caligine plenus, sordidaque veste indutus. Nec mea me opinio fefellit: defixis enim oculis & attento animo eum perlustrans, illo tempore impressum esse deprehendi, quo aurea ista & divina ars typographica,

- - sine qua si forte fuisset,

pestum cum Musis isset Apollo suis, adhuc in cunis vagiit. Quam vero rari carique sint hujus generis libri, inter *κειμελίας* literaria merito suo ponendi, vel triviales norunt pueri. Numero vix, quod ego quidem sciam, supersunt totidem, quot Thebarum portæ, aut divitis ostia Nili. Vel in ipsis augustissimis bibliothecis, quæ invidendis superbiunt gazis, frustra hujus notæ volumina plerumque quæres. Julius Cæsar Scaliger olim possedit Horologium beatæ Mariæ, pagellis ligneis incisis impressum in membranis, literis inter se colligatis & connexis, in hunc censum jure referendum, nisi a cane leporario discerptum fuisset; quod diu

diu is doluit, & magno illud damnum redemisset (*a*). Celeberrimus Annalium typographicorum conditor Michael Maittaire (*b*) quatuor ejus generis libros in exquisitissima Pembrokiæ Comitibus Bibliotheca sibi visos, eleganter & accurate nobis descriptos dedit. Parisiis in duabus tantum Bibliothecis, Sorbonica nimirum & Fratrum Cœlestinorum (*c*) Speculum humanæ salvationis, quod primigenia illa typographia luci exposuit, extare dicitur: quod penes se etiam habuere quondam P. Scriverius, M. Z. Boxhornius, Mallincrotius & Andreas Chevillierius (*d*). In illustris quoque Norinbergensis Reip. Bibliotheca idem illud cum paucis aliis ejus notæ visitur (*e*). In Harlemaensium vero curia tanta Speculum istud adservatur solitudine, serico involutum, & argenteæ capsulæ inclusum, ut ejus curam aliquot e senatorum ordine gerant, quorum singuli peculiarem ad capsulam illam referendam clavem tenent, ne unus absque alterius ope

A 2

x51-

(*a*) vid. Jos. Scaligeri Confutat. fabulæ Burdon. p. 245. edit. Lugd. Bat. 1608.

(*b*) vid. ejus Annal. Typ. Tom. I. p. 13. & 17.

(*c*) cf. Dan. Maichelii Introd. ad Hist. lit. de præcipuis Bibliothecis Paris. p. 107.

(*d*) vid. Maittaire l. c. p. 13. seqq.

(*e*) cf. Jo. Sauberti Hist. Biblioth. Norib. p. 116.

κειμελιον hoc contrectare, aliisque ostendere queat (f). Præter hæc autem impressa tantæ vetustatis volumina ego quidem novi nulla. Ciceronis enim de officiis libri a Joanne Fusto Moguntia 1466. excusi ad eam antiquitatem haud assurgunt. Eorum exemplum aliquod splendidissimam Bibliothecam Augustanam ornat, in membrana expressum, cui hoc distichon inscriptum est:

Artis Chalcographæ primordia Biblio-
thecæ

Weissius hæc David dat monumenta sui:

Anno 1572. Calendis Augusti. (g)

At ea editio primis illis nobilissimæ artis tentaminibus & rudimentis annumeranda non est, siquidem tum jam ad aliquam maturitatem pervenit: imo A. 1465. præcessit alia ejus operis editio, in eadem officina curata. (b) Nostrium vero libellum, cujus gratia hæc præfati sumus, intrepide, si non primum artis inventæ foetum, certe inter primos fuisse asseveramus. Agedum! dabimus jam opusculi hujus rarissimi, adhuc nemini, quod

(f) Misson in Itiner. per Italiam. Tom. I. p. 34. edit. Lips. 1713.

(g) vid. Ehingeri Catalog. Biblioth. August. f. 642.

(b) cf. Maittaire l. c. p. 60. nisi forte hæc editio cum priore una eademque sit.

quod sciam, observati dilucidam & accuratam, quantum fieri poterit, notitiam, gaudiique nostri te etiam reddemus participem. Res sane delectationis plena est, jucundo hoc aspectu pascere oculos, & prima illa aureæ artis contemplari experimenta. Ipsa typorum ruditas, ipsa illa atra crassaque literarum facies belle tangit sensus, nobisque vivis veluti coloribus gradus istos delineat, per quos paulatim a teneris unguiculis & ipsis crepundiis in masculam illam, qua nunc floret, ætatem ars excusoria crevit. Nempe in folio minori expressum triginta absolvitur paginis, haud opisthographis: una enim duntaxat cujusque folii facies typis vel figuris ornata est, ad deformitatem vero vitandam duæ semper paginae glutino commissæ cohærescunt. Tam vocum quam figurarum characteres tabulis insculpti sunt, ut adeo vel ex hoc appareat, in antiquissimarum editionum classem codicem nostrum referendum esse, cum typis ligneis, haud mobilibus & sejunctis, quorum inventionem Petro Schoeffer debemus, impressus sit. Sunt equidem inter eruditos, qui hujus notæ libros, utpote in tabulis sculptos atque incisos, e typographicorum operum numero eximunt; at immerito id fieri mihi persuasum

sum est. Illud enim negari haud facile posse arbitror, hunc excudendi morem viam ad commodiorem imprimendi rationem, quæ nunc viget, paravisse. Utrumque autem modum eodem autores, Germanos scilicet nostros, agnoscere existimo, qui sensim sensimque artem a se excogitatam perfectiorem reddere allaborarunt. Juvat heic ex Jo. Arnoldi Bergellani poemate encomiastico de Chalcographiæ inventione (i) quædam, huc facientia, decerpere :

Addidit ac operi lucem, sumptumque
laboris

Faustus, Germanis munera fausta
ferens.

Et levi ligno sculpunt hi grammata
prima,

Quæ poterat variis quisque referre
modis.

Materiam bibulæ supponunt inde papyri.

Aptam quam libris littore Nilus alit.

Insuper aptabant, mittit quas sepia,
guttas,

Reddebat pressas sculpta tabella no-
tas.

Sed

(i) vid. W. E. Tenzelii Curiosam Bibliothecam Tom. I. p. 992. ubi hoc carmen integrum legitur.

Sed quia non poterat propria de classe
character

Tolli, nec variis usibus aptus erat;
Illis succurrit Petrus, cognomine Schoe-
fer,

Quo vix calando promptior alter erat.
Ille sagax animi præclara torcumata
finxit,

Quæ sanxit matris nomine posteritas.
Et primus vocum fundebat in ære figu-
ras,

Innumeris cogi quæ potuere modis.

Vocum character Gothicus est, majusculus, ater, crassus, rudis, informis. Videas hic nonnunquam literas atramento confluenti deformatas, ventremque illarum, alias album & vacuum, atramentaria macula repletum, ut scilicet inde artis agnoscas infantiam. Nec desunt crebra literarum compendia. Quindecim folia hujus libelli textum continent, reliqua figuras, textui respondententes. Ad lacunas quasdam paginarum explendas nunc literarum ductus longius prolatati sunt, nunc asterisci adjecti, nunc animalium, nescio quorum, effigies ornamenti loco expressæ. In calce singulorum ipsius textus foliorum literæ alphabeti

8 *De Libro sub Typographia*

per ordinem circa ultimæ lineæ extremitatem appositæ ad seriem chartarum designandam, ut prima pagina literam a, secunda b, &c. appictam gerat. Anni, loci, ac typographi notam frustra hic quæris: nec eam desiderabis, si priscum illum primarum editionum morem habueris compertum. Liber averso folio incipit, adverso desinit, utraque autem pagina, prima & ultima, glutine tegmini vel involucro affixa est. Opusculum vero hoc (k) compendiosam rationem potissima quatuor Evangeliorum argumenta memoriæ mandandi tradit. Hinc cuilibet textus folio e regione appositam conspicias paginam, figuras tabulis ligneis incisas continentem, quæ textui respondent, numero ubique capitum annotato. Accipe jam integrum primum folium, quod viginti duabus constat lineis: *Ars memorandi notabilis per figuras Evangelistarum hic ex post descriptam quam diligens lector diligenter legat & practicet per signa localia ut in practica experitur.* (En horridum & incomitum dicendi genus; Priscianumque misere vapulantem!)

(k) Annumerandum igitur est Introductionibus mnemonicis in S. Scripturam, de quibus peculiari Dissertatione Altorfii 1697. egit Jo. Mich. Langius, & Jo. Christoph. Wolfius in Biblioth. Hebr. P. II. p. 247. sqq.

lantem!) *Evangelium Johannis* (id enim primum tenet locum) *babet viginti unum capitula. Primum. In principio erat verbum de eternitate verbi & de trinitate. Secundum capitulum. Nupcie facte sunt in Chana Galilee Et qualiter Christus subvertit mensas nummulariorum. Tertium capitulum. Erat autem homo ex Phariseis Nycodemus nomine. Quartum capitulum. Qualiter Ihesus peciit a muliere Samaritana bibere circa puteum Jacob & de regulo. Quintum capitulum. De probatica piscina ubi dixit Ihesus infirmo. Tolle grabatum tuum & vade. Sextum capitulum. De refectiōe ex quinque panibus & duobus piscibus Et de ewkaristia.* Jam figuram quoque male tornatam delineabimus. Ea hanc inscriptionem in media fere paginæ parte gerit: *Prima ygo (imago) Johannis.* Heic conspicis Joannis insignia, aquilam, ruditer sculptam, expansis aliquatenus alis, & distortis pedibus. Ejus fronti insidet columba, capiti utrinque appositæ sunt duæ virorum, senis scilicet barbati & juvenis facies, nota primi numeri adjecta, ut sic capitis primi argumentum indigitetur. Aquilæ cor onerat cithara, appensis, ni fallor, tribus tintinnabulis, & numeri secundi indicio adscripto, ut nimirum sic nuptias, Canæ celebra-

tas, acute innui scias. Forte tamen ea, quæ tintinnabulis haud videntur dissimilia, numulariorum loculos & pecuniæ receptacula referunt. Circa ventrem, nonnihil apertum & profectum, numeri 3. nota comparet. Nescio, an eo digitus intendatur in Nicodemii verba: nunquid homo senex potest in ventrem matris suæ iterato introire & renasci? Aquilinæ caudæ situla vel hydria, hauriendis e fonte aquis apta, imposita est, nec non corona, qua ὁ βασιλικός, Sospitatoris nostri opem implorans, significatur, addito numeri 4. signo. In superiori alæ dexteræ parte quinti capitis nota & piscis, ad piscinam probaticam designandam, spectatur: sinistræ vero alæ supremam partem duo pisces & quinque panes ornant, annotato numero 6. apposita insuper figura quadam, oblatam forte eucharisticam adumbrante.

Sed liceat alteram quoque textus paginam, quæ septendecim tantum absolvitur lineis, describere. *Septimum capitulum. De cenophya seu festa tabernaculorum in Iherusale ubi dixit Ihesus ascendite vos ad diem festum. Si quis sitit &c. Octavum capitulum. De muliere deprehensa in adulterio Ego sum Lux mundi &c. Nonum capitulum. De ceco a nativitate quem Christus illuminavit &cetera.*

cetera. *Decimum capittulum. De pastore bono per totum Ec. Undecimum capittulum. De suscitacione Lazari a monumento. Duodecimum capittulum. De Maria Magdalena que unxit pedes Ihesu.* Tabula sculpta iterum aquilam variis ornamentis, jam a nobis recensendis, conspicuam repræsentat. Videlicet fronti infixum est vexillum, adjecta tuba & cyatho cum numeri 7. nota. Pectori insident nudis corporibus juvenis ac mulier, mutuis se amplexibus & osculis foventes: foemina manu dextera tenet candelam, cui adscriptus est numerus 8. (mirare sanctæ simplicitatis documentum, & risum cohibe.) Circa aquilæ ventrem apparet oculus cum numeri 9. indicio. In caudæ extremitate jacet baculus pastoralis, quem facile Herculis clavam esse existimes, appicto numeri 10. signo. Dexteræ alæ impositum est hominis demortui caput, vermibus jam corrosus, utroque lumine, cute & carne orbatum cum numero 11. sinistræ vero myrothecion & numeri 12. nota. In paginæ umbilico conspicitur inscriptio: *Imago Johannis secunda.* Sequitur deinde, addita itidem figura, tertium textus folium, quo Evangelii Joannis argumenta absolvuntur. Post hæc Matthæi summa quinque paginis ac totidem

tidem imaginibus comprehensa traditur, quam Evangeliorum Marci & Lucæ compendia excipiunt: illi tres, huic quatuor paginae, totidemque figurarum tabulae destinatae sunt. Matthæi figuras angelo, Marci leoni, Lucæ bovi appictas insculptasve esse scito. Fateor, in sola antiquitate & raritate ponendum esse omne hujus libri pretium, cetera incompti, barbari & horridi, immanemque illam squalorem, quæ ea ætate linguas bonasque artes obsedit, ubique referentis. Scilicet primi typographi, homines elegantis literaturæ plane rudes, inventum suum, quoad ejus fieri poterat, celantes, ne lucrum inde speratum ab aliis sibi præriperetur, inconsultis doctioribus, quorum tum parva admodum seges erat, nubem plerumque pro Junone amplexi sunt, & ex tam immensa præstantissimorum operum, quæ id temporis in variis Bibliothecis latebant, copia sæpenumero fuitiles & levioris vel nullius momenti libros elegerunt, in quibus prima tyrocinii rudimenta ponerent, suo tantum judicio usi, ne arcanum proderetur. Et hæc præcipua tantæ eorum raritatis causa mihi esse videtur, quod postea in tam fecundo optimorum authorum proventu neglecti sint asperi & squalidi hi libri, in obscuros

scuros projecti angulos, gliribusque & tineis in lapidissimum pabulum relictī. Servandæ tamen sunt & quovis studio colligendæ paucæ istæ venerandæ vetustatis reliquiæ in nobilissimæ artis gloriam, ipsa sua incomta ruditate jucundum oculis spectaculum præbentes. Nihil est simul & inventum & perfectum (1). Rudia sunt plerumque initia artium, quæ paulatim magis magisque excultæ & ornatæ, ad summum tandem perveniunt. Sic de pictoribus vetustis Ælianus (m): ὅτε ὑπῆρχετο ἡ γραφικὴ τέχνη, καὶ ἦν τρόπος ἵνα ἐν γαλαξί, καὶ ἐν σπαργανοῖς, ἔτως ἀρα ἀτεχνῶς εἰκαζόν τα ζῶα, ὥς ἐπιγραφεῖν αὐτοῖς τὰς γραφεάς, τὸ το βῆς, ἐκείνο ἵππος, τὸ το δένδρον. Interprete Justo Vultejo: *Quum ars pingendi jam ortum duceret, & quodam modo in lacte fasciisque versaretur, adeo rudi & impolito stylo depinxerunt animantia, ut adscribere ad ea pictores necesse esset: hoc est bos, illud equus, hoc arbor.* Cæterum non possum non mirari, eo demum tempore, quo penitus fere bonæ literæ jacebant neglectæ & prostratæ, ac grandis barbaries orbem subegerat, nobilissimam imprimendorum libro.

(1) Cicero de Claris oratoribus Cap. 18.

(m) Var. Hist. lib. X. Cap. X. cf. Schefferi & Kuhnii notas in h. l. p. 505. edit. Argent. 1685.

Martia Romanis Germania clara trium-
phis

Bello, armis, animo, nobilitate po-
tens.

Cui favet ingenio Pallas, cui pectora
Mavors

Fortia victrici dexteritate dedit.

Quodque acri passim studio sibi vendi-
cat orbis,

Hoc se Germanus gaudet habere
simul.

Nec prius inventas aliis hic excolit artes
Ingenio vafro sollicitaque manu.

Et nova Dedaleo concinnat acumine
mentis

Miraturque suum sæpius auctor opus.
Primus hic ære notas plumboque incu-
dere chartis

Instituit, calamo non agitante ma-
num.

Primus hic incisus componere rite me-
tallum

Litterulis docuit, compositumque
premit.

Hic ubi consuescunt vigilatum ferre la-
borem

Chalcographi instantes, turba ope-
rosa nimis :

Hic

Hic partita simul sua quisque negocia
tractat,

Is componit, at hic corrigit, ille
premit.

Nec mora, nulla quies, nulla est cessa-
tio, fervet

Semper continuæ sedulitatis opus.

Intendunt nervos, irritanturque vicis-
sim,

Inque vicem stimulant alter in alte-
rius.

Atque operas inter quamvis magis illa
fatigat,

Quæ cupiat mendis emaculare li-
bros :

Attamen illa sua (quodcunque est) fal-
litur arte,

Et studio proprio raro nitere pot-
est (*p*).

(*p*) Reliqua septem disticha missa facio, cum in
iis poëta tantum erratorum in hac dialogi editione
commisforum excusationem afferat.



Martia Romanis Germania clara trium-
phis

Bello, armis, animo, nobilitate po-
tens.

Cui favet ingenio Pallas, cui pectora
Mavors

Fortia victrici dexteritate dedit.

Quodque acri passim studio sibi vendi-
cat orbis,

Hoc se Germanus gaudet habere
simul.

Nec prius inventas aliis hic excolit artes
Ingenio vafro sollicitaque manu.

Et nova Dedaleo concinnat acumine
mentis

Miraturque suum sæpius auctor opus.
Primus hic ære notas plumboque incu-
dere chartis

Instituit, calamo non agitante ma-
num.

Primus hic incisus componere rite me-
tallum

Litterulis docuit, compositumque
premit.

Hic ubi consuecunt vigilatum ferre la-
borem

Chalcographi instantes, turba ope-
rosa nimis :

Hic

Hic partita simul sua quisque negocia
tractat,

Is componit, at hic corrigit, ille
premit.

Nec mora, nulla quies, nulla est cessa-
tio, fervet

Semper continuæ sedulitatis opus.

Intendunt nervos, iritanturque vicif-
sim,

Inque vicem stimulant alter in alte-
rius.

Atque operas inter quamvis magis illa
fatigat,

Quæ cupiat mendis emaculare li-
bros :

Attramen illa sua (quodcunque est) fal-
litur arte,

Et studio proprio raro nitere pot-
est (p).

(p) Reliqua septem disticha missa facio, cum in
iis poëta tantum erratorum in hac dialogi editione
commissorum excusationem afferat.



II.

*De vita, moribus & Scriptis Marfilii
Ficini (*) Commentatio.*

SUMMARIUM.

Ficini annus Diesque natalis, parentes, & de iis quædam singularia. §. 1. Felicitas seculi, quo vixit. §. 2. Cœmi Medicis beneficia in ipsum adhuc juvenem profusa. §. 3. Præceptores, genus scribendi. §. 4. Studia, quibus operam dedit. §. 5. Diligentia. §. 6. Scripta juvenilia. §. 7. Patroni Medices. §. 8. 9. Continentia animi, & mens paucis contenta. §. 10. Officia, quibus functus est. §. 11. 12. Familiares & auditores. §. 13. Honor, ipsi a Germanis habitus. §. 14. Favor Principum, virorumque illustrium, quo gavisus est. §. 15. Rusticatio & secessus literarius. §. 16. Staturâ, & corpus imbecillum, morbisque sæpe vexatum. Item temperamentum. §. 17. Mores : & quidem primo virtutes. §. 18. Nævi dein & vitia. §. 19. Immodicus Platonis

(*) Vitam Ficini Dominicum Mellinum descripsisse memorat Alexander Natalis in *Histor. Eccles. Tom. VIII. f. 182.* At eararius obvia est, & hætenus a me frustra quæsitæ.

tionis amor, & absona quædam ejus dicta & facta, obscuritas item in scribendo. §. 20. An Pandectarum Florentinarum inventioni interfuerit? §. 21. Scripta Ficini, & speciatim Platonis versio. §. 22. 23. Plotini, Theophrasti, Synesii, Pselii aliorumque translationes. §. 24. Epistolæ. §. 25. Brevis omnium ejus operum conspectus. §. 26. Libri promissi & inediti. §. 27. Mors & Epitaphium. §. 28. Apparitio post mortem. §. 29. Elogia. §. 30.

§. I.

MAgnum inter eruditos seculi XV. quo literarum studia, antehac depressa atque afflicta, in Italia iterum caput erigere coeperunt, nomen habet Marsilius Ficinus, philosophiæ Platoniciæ suo ævo instaurator, præclara eruditione ac doctrina vir, de cujus vita, moribus rebusque gestis brevi hac commentatione, bona, ut spero, cum Lectoris venia, agere animus est. Omnia vero, quæ a nobis collecta sunt, ex ipsis potissimum ejus scriptis petita esse videbis.

Marfilius Ficus (*a*) Florentinus lucem hanc primum adspexit A. R. S. MCCCCXXXIII. d. 19. Oct. honestis parentibus progenitus (*b*), patre medico & chirurgiæ præcipue perito, Cosmi, primicelssimæ familiæ Medicæ Statoris Archiatro (*c*), matre Alexandra (*d*): de quibus hæc, quorum memoriam filius apud posterosextare voluit, ex ipsius epistolis excerpere juvat. Sed penes autorem fides esto. Scilicet de patre sequentia ad Franciscum Marefcalchum Ferrariensem (*e*) perscribit:

„Pater meus Ficus Chirurgicus Florentiæ
 „suo seculo singularis, ductus olim fuit a
 rustico

(*a*) An cognomen suum ex Fighinio, (ubi cum ipsum Marfilium annis juvenilibus, tum patrem ejus aliquamdiu habitasse ex illius epistolis perspicio) traxerit, dicere non habeo. Fighinium autem unum idemque oppidum cum Ficino esse suspicor, quam urbem Florentinos A. 1298. condidisse tradit Raphael Volaterranus in Comment. Rerum Urbanarum f. 54. edit. Basil. 1530.

(*b*) Diem annumque natalem suum ipse Ficus notavit Epistolarum Lib. IX. fol. 162. (utor autem editione Veneta A. 1495. fol.) quin & horam nativitatibus ibidem addidit, eamque unam supra vigesimam, juxta computationem Italis solennem, fuisse ex matris verbis se conjicere meminit. Designavit quoque l. c. astrorum situm nativitatibus suæ tempore.

(*c*) Epist. Lib. I. f. 21.

(*d*) Epist. L. I. f. 5.

(*e*) Epist. L. I. f. 21.

rustico quodam nomine Pasquino ad curandum filium ejus Thomam caput gravissime vulneratum. Medicus inspecto incurabili vulnere puerum paulo post procul dubio periturum existimans recessit, idem tanquam non rediturus. Parentes infirmi a Medico destituti divam Mariam pro nati sanitate supplices obsecrarunt. Igitur eadem, qua illi orabant, hora Ficino in itinere sub quercu vel oscitanti vel certe levissime dormienti mulier quædam visa est aspectu admodum veneranda, ita eum compellans: Quid ingratus erga Deum es Ficine? Quæ ab eo gratis accipisti, non das gratis. Respondit ille: pauperem do quotidie mendicantibus. Subjunxit illa: artis quoque tuæ munera egenis abunde largire. Post triduum rediit ad Medicum rusticus ille orans, ut ad filium curandum reverteretur: quod quidem valde miratus est Ficinus; nam obiisse illum arbitrabatur. Accessit gratis tum præterito somnio, tum voto parentum admonitus. Narravit enim rusticus, quæ vota & qua hora fecisset. Denique puer præter spem Medici artemve medendi sanus evasit. Ex eo tempore Ficinus sæpe pro salute eorum, qui curæ suæ com-

B 3

,,missi

„missi sunt, vota Mariæ fecit, feliciterque
„successit.

De matre vero & avis hisce ad Matthæum
Corfinum (f) utitur verbis : „ Alexandra
„ mater mea nata est ex patre Joanne & ma-
„ tre Angela. Alexandra Fighini erat, Jo-
„ annes Juvarchii oppido : Angela vero Flo-
„ rentiæ. Hæc ad Joannem & Alexandram
„ scripsit, se bene valere, ac die sequenti re-
„ dituram : illi lectis literis & nocte facta
„ dormientes Angelam viderunt eadem hora
„ ambo. Alexandræ quidem in vestibulo
„ domus apparuit, & cum filia matri tan-
„ dem revertenti congratularetur, mater
„ filiæ amplexus effugiens, Vale, ait, & da
„ operam, ut pro me Sacerdotes Deum
„ orent. Joanni autem inquit : O quantum
„ fortunam tuam doleo mi Joannes! vale,
„ & jube pro me Deum orari. Repente
„ ambo iis visis excitati exclamaverunt, eam
„ mortuam judicantes. Florentiam mise-
„ runt : renunciatum est, illam ea nocte ex
„ hac vita migrasse. Miraris hæc, Corfine,
„ pergit ibidem Ficinus. Audi & aliud æque
„ mirandum. Mater mea filium statim na-
„ tum nutrici rusticæ tradidit. Decima septi-
ma

(f) Epist. L. I. f. 5.

ma inde die dormiens meridie videtur,,
 ipsa sibi maxima cordis anxietate premi,,
 atque a matre sua jam pridem mortua sub,,
 levari, dicente: noli te afflictere filia. Se,,
 quenti die rustici ad eam filium a nutrice,,
 suffocatum referunt. Mitto, quod somni,,
 ans prævidit futurum mariti ejus Ficini me,,
 dici casum ex equo, & locum, ubi casu,,
 rus erat, & singula mitto & alia multa.,
 Utrumque hunc Marsilii parentem An.
 MCCCCLXXV. d. 4. Dec. in rebus huma-
 nis adhuc fuisse, ex ejus epistolis (g) com-
 pertum habeo: tum enim Franciscus Car-
 dinalis Senensis pro nostro illiusque annosis
 parentibus a Summo Pontifice jubilæi gra-
 tiam se impetrasse scripsit. Immo matrem
 A. 1493. tum octuagenariam, adhuc vi-
 xisse, ipse refert filius (b).

§. 2.

Natus igitur est Ficinus eo seculo, quo
 immanis illa & horrida barbaries, quæ lite-
 ras bonasque artes obsederat, Græcorum
 præsertim exulum opera feliciter dispelli
 cœpit. Hinc ipse fortunatum illud ævum

B 4

sic

(g) Epist. L. I. f. 36.

(b) Epist. L. XII. f. 191.

sic (i) celebrat : „ Quæ poëtæ quondam de
 „ seculis quatuor cecinerunt, plumbeo, fer-
 „ reo, argenteo, aureo : Plato noster in li-
 „ bris de Rep. ad quatuor hominum inge-
 „ nia transtulit, disputans, aliis hominum
 „ ingeniis plumbum quoddam, aliis ferrum,
 „ aliis argentum, aliis aurum naturaliter in-
 „ situm. Si quod igitur seculum appellan-
 „ dum nobis est aureum, illud est procul du-
 „ bio tale, quod aurea passim ingenia pro-
 „ fert. Id autem esse nostrum hoc seculum
 „ minime dubitabit, qui præclara seculi hu-
 „ jus inventa considerare voluerit. Hoc
 „ enim seculum tanquam aureum liberales
 „ disciplinas ferme jam extinctas reduxit in
 „ lucem, Grammaticam, Poësin, Oratoriam,
 „ Picturam, Sculpturam, Architecturam,
 „ Musicam, antiquum ad Orphicam lyram
 „ carminum cantum : idque Florentiæ &c.
 Cum primis vero in maxima seculi hujus fe-
 licitatis parte ponendum esse arbitror divi-
 num illud artis typographicæ inventum, quo
 tot scriptis immortalitate dignissimis, lux &
 vita, obstetricantibus præcipue Germanis, au-
 spicato restituta est : quod gratus quoque
 agnovit Marsilius, testis *συγχερονος* adeoque
 classicus,

classicus, pro gente nostra (k), cui hæc gloria nullo modo eripi poterit, ita pronuncians: *In Germania temporibus nostris imprimendorum librorum inventa sunt instrumenta :*

B 5

tabula

(k) l. c. Honorem hunc, quod in transcurso mœno, Germaniæ nostræ habuerunt etiam alii exteri, quorum, utpote a partim studio hic alienorum, testimonia nobis gravia acceptaque esse debent. Belgæ certe, licet pro gloria hac Harlemensibus suis vendicanda speciosis haud destituantur argumentis, paucorum extraneorum calculum suffragiumque meruerunt. Ipse Naudæus, at quantus vir ! Addit. a l' Histoire du Roy Louis XI. p. 120. edit. recentissimæ, lectis jam Hadriani Junii aliorumque hac de re disquisitionibus, a partibus nostris stare non veretur, sententiam suam plurimum eruditorum auctoritate muniens. Producemus & nos hac occasione nonnullos externos, pro gente nostra pugnantes, ab aliis, quod ego quidem sciam, hætenus neglectos. En verba Hieronymi Nigri Veneti, Canonici & Jcti Patavini (pag. 57. Epistolarum Orationumque Patavii 1579. in 4. edit.): *Quis nesciat, tormenta bellica, quibus nostri utuntur exercitus, & impressorum librorum artem, duo stupenda rerum miracula, quæ veteres nostri nunquam sommarunt, Germanicum inventum fuisse ?* Cujus judicium etiam sequitur sublimis ingenii vir Octavius Ferrarius (pag. 249. Operum variorum, Wolfenbuttelii curante summe venerando Abbate Jo. Fabricio 1711. editorum Tom. I.) *Præsto est, inquit, innoxium Germaniæ munus, quo ne majus quidem optare a superis possimus, munus superis ipsis invidendum, ipsa si dicere licet æternitate fraudata. Hoc est typographiæ beneficium, ingeniorum vita ac literarum tutela, mora præcipitis ævi, adversus oblivionem ac vetustatis injurias fortissimum pharmacum &c.* Huic jungimus

tabula præterea, quibus bora, ut ita dixerim, una per omne seculum tota cœli facies aperitur.

Accedit, quod tum Florentiæ præsertim

Domus

mus Stephanum Forcatulum Jctum Gallum, quem, licet alias haud raro splendide nugetur, vera hac in re dixisse tot eruditissimorum virorum consensus comprobat. Non enim semper mentiuntur Cretenses. Ita autem ille Lib. IV. de Gallorum Imperio & Philosophia p. 283. Germanorum gloriam paulo superiore seculo vehementer extulit ac dilatavit fructuosa solertia clarissimorum inventorum, quæ olim divinitatem quibusdam mortalibus communi gentium consensione adscripsit. -- Nec vero dubium est, superatam rerum naturæ fere munificentiam excogitata librorum typis excudendorum ratione Moguntia a Joanne Gutembergio equite: cujus inventum nullo vitæ miraculo, si verum fatemur, postponendum, ne novem quidem Musæ æquabunt, licet cuilibet suæ artis disciplinæ institutionem veteres assignaverint &c. Nec Celeberrimus Maittaire in Annal. Typogr. p. 8. 31. 36. &c. Germanis inventæ artis gloriam denegat. Non possum vero, quin adhuc ejus rei testem laudem omni exceptione majorem, non quidem extraneum, sed domesticum, Imperatorem videlicet gloriosissimæ memoriæ, Maximilianum I. quem Philib. Pirkheimerus in Dedic. commentarii de ratione scribendæ historiæ p. 51. inter bellicosos Imperatores doctissimum, & inter doctos bellicosissimum nominat. Is in privilegio, editioni Livii Moguntinæ An. 1518. in fol. præfixo, ita Joannem Schefferum, Petri filium, & Jo. Fausti nepotem, compellat: Cum, sicut docti & moniti sumus fide dignorum testimonio, ingeniosum calcographiæ authore avo tuo inventum felicibus incrementis in universum orbem promanaverit -- proinde volentes tibi, tum ob avum tuum, omni vel ob hoc divinum inventum suum favore & commendatione dignum, tum pro damni tui recuperatione

Domus Medicea literas atque literatos mira complexa fuerit benevolentia, iisque excitandis, fovendis ac provchendis maximopere studuerit. *Æternis idcirco fastis mandanda sunt magna Cosmi potissimum & Laurentii nomina, qui regiis sumtibus incomparabilem instruxere Bibliothecam, eamque thesauris pretiosissimis exornatam, & libris undique, ex ipsa etiam Græcia, conquistis refertam publico dicavere usui. Paulus Jovius (†) ejus his verbis meminit: Hanc Cosmus instituerat, auxerat Petrus, & Laurentius postremo, tota pene Græcia rarissimis libris spoliata, expletisque tandem studiosorum desideriiis magna sui fama claritateque condiderat. Speciatim Laurentius tanto librorum colli-*

cuperatione — opportuno remedio succurrere — inhibemus, ne Titum Livium &c. conf. ibidem Erasmi Roterd. præfationem, & Nicolai Carbachii postfationem. Sibilo certe excipiendi sunt Pomponius Lætus & Matthæus Lunensis, qui artis hujus autorem Saturnum extitisse perhibent. vid. G. Naudæum l. c. p. 106. Ridiculus quoque est Antonius del Corno, qui typographiam a Pamphilio Castaldi, Poëta Feltriensi, inventam fuisse nugatur in Memoire Istoriche di Feltre. vid. Neuer Bücher-Saal. vol. I. p. 643.

(†) Historiarum sui temporis Lib. I. p. 14. edit. Venedæ 1566. in 4. Brevem celeberrimæ hujus bibliothecæ historiam tradidit vir doctus, qui nuper adeo vernacula lingua Petri Lambecii vitam descripsit, pag. 42. fqq.

colligendorum flagravat desiderio, ut majus illud esse nequierit. Audiamus de eo Nicolaum Leonicensem, qui ita Angelum Politianum (††) affatur: *Laurentius Medices, maximus hac tempestate studiorum patronus, missis per universum terrarum orbem nunciis, in omni disciplinarum genere libros summa ope conquirat, nulli sumptibus parcat, quo tibi ac reliquis praeclaris ingeniis bonarum artium studia emulantibus instrumenta abundantissima paret. Audivi te referente vocem illam praeclaram ex Laurentii ore prodisse: optare tanta sibi abs te ac Pico nostro ad libros emendos praestari incitamenta, ut tandem deficientibus sumptibus totam suppellectilem oppignorare cogatur. Idem ille ad ultimum usque halitum isto in literas affectu constanter usus est. Discimus id ex voce, quam inter extremas praeclarissimam edidit. Advocaverat, scribit Philippus Wannemakerus (†††), eximium conculum Joan. Picum, illum Mirandula comitem, ut iterum ei liceret frui divino isto animo, priusquam natura satisfaceret: nam gravissimo & supremo morbo laborabat. Advenit, & simul*
cum

(††) In Libro de Plinii & aliorum Medicorum erroribus, Basil. 1529. in 4. excuso, pag. 1.

(†††) In Triumpho Litteratorum p. 97. conf. Angeli Politiani Epistol. Lib. IV. pag. 130. & 132.

*cum Politiano lecto adfedit. Post varia colloquia, Dux : O mei ! inquit, utinam summus ille Deus ad hoc tantum me reservasset, ut Bibliothecam vestram absolverem. O desiderium ! extruebat eam, & pene finierat, in ipso Florentiæ civitatis meditullio. Sed desit & simul virtus & fortuna sua gentis in aliquot annos. Nam pulsi Medicei, & literarum iste thesaurus (heu furor !) & omnis illorum memoria ab infelici populari statu deleta. Hæc Wannemakerus. Marsilius quoque noster, Laurentio fati functo, apportatos esse adhuc libros, quos coëmi curaverat in Græcia, testis est in literis ad Martinum Uranium An. 1492. 3. Aug. scriptis (††††) Post discessum ex Italia tuum advecti sunt & Græcia mox ad magnanimum Petrum Medicem libri multi, ex quam plurimis electi nuper, electore Lascari Græco admodum elegante, pro regia illa bibliotheca jam pridem a magno Laurentio feliciter instituta. Ego autem inter
multa*

(††††) Epist. Lib. XI. f. 182. Laudes Profapiæ Medicæ, cum primis Laurentii, & Bibliothecæ ab ipso instructæ, prolixè decantat Joannes Lascaris Græcus in epistola ad Petrum Medicem, bonæ frugis plenissima, editioni Anthologiæ Epigrammatum Græcorum rarissimæ, quæ Florentiæ A. 1494. in 4. prodiit, subjuncta, quam jure meritoque integram Annal. Typogr. Tom. I. p. 271. seq. Celeb. Maittaire inseruit.

multa, ut soleo, semper inprimis legi Platonica, primaque inter hac commentaria Procli in sex Platonis de Rep. libros principiumque septimi &c. Felices vero illos, imo terque quaterque beatos, quibus tum hisce cime-
liis, hisce egregiis ad eruditionem acqui-
rendam subsidiis & adjumentis affatim uti
licuit !

§. 3.

Bona indoles & ingenium ad summa quæ-
que a natura faulrice effectum in teneris an-
nis Marsilio nostro favorem Cosmi, incom-
parabilis illius literarum literatorumque Pa-
troni, conciliavit, qui in ipsum, dum vive-
ret, indulgentissime contulit omnia. Fuit
hic, ut verbis Plinii (1) utar, vir optimus,
& inter præcipua seculi ornamenta nume-
randus, coluit studia, studiosos amavit, fo-
vit, provexit, multorum, qui aliqua com-
posuerunt, portus, sinus, præmium, omnium
exemplum, ipsarum denique literarum jam
senescentium reductor ac reformatior. Do-
mum suam recitantibus præbuit, nec eru-
ditis defuit unquam. Neque vero in in-
gratum

(1) Hoc encomio ornat Plinius Tittinium Capito-
nem Epist. L.-VIII. num. 12.

gratum ceciderunt beneficia, a Cosmo largiter in Ficinum profusa: illorum enim memoriam nonnisi cum vita ipsa deposuit. Isto curante, sumtusque præbente munifice, puer doctissimorum virorum disciplinæ traditus, ingenuisque artibus instructus fuit. Ejus potissimum auspiciis juveni instillata sunt Platonis præcepta ac dogmata, quæ dein in omni vita summo nisu tuitus, ferventissimoque studio omnium animis insinuare conatus est. Ipsum Marsilium idoneum, gravem, gratumque hujus rei producarn testem. Is ita ad Laurentium Medicem in dedicatione Plotini, a se Latine redditi & observationibus illustrati: *Magnus Cosmus Senatus consulto Patriæ Pater, quo tempore concilium inter Græcos atque Latinos sub Eugenio Pontifice Florentiæ tractabatur, Philosophum Græcum nomine Gemistum, cognomine Plethonem, quasi Platonem alterum de mysteriorum Platonis disputantem frequenter audivit. E cujus ore ferventi sic afflatus est protinus, sic animatus, ut inde Academiam quandam alta mente conceperit, hanc opportuno primum tempore pariturus. Deinde dum conceptum tantum magnus ille Medices quodammodo parturiret; me electissimi medici sui Ficini filium adhuc puerum tanto operi destinavit. Ad hoc ipsum*

ipsum educavit indies. Operam præterea dedit, ut omnes non solum Platonis, sed etiam Plotini libros Græcos haberem &c. Hinc noster Cosmum alterum suum parentem vocavit, in præfatione librorum de vita. Ego, inquiens: Sacerdos minimus, patres habui duos, Ficinum Medicum, Cosmum Medicen: ex illo natus sum, ex isto renatus: ille quidem me Galieno tum medico tum Platónico commendavit: hic autem divino consecravit me Platoni. Et hic similiter atque ille Marsilium Medico destinavit: Galienus quidem corporum, Plato vero medicus animorum. Fallitur ergo, quod ὡς ἐν παροδῷ observo, Hénricus Wharton, qui in Appendice ad Historiam Literariam Scriptorum Ecclesiasticorum Guil. Cavei fol. 112. Marsilium Laurentii Medicis sumtu literis excultum esse tradit (m).

§. 4.

In Grammatica Præceptores habuit Lucam Geminianensem & Comandum (n), quem posteriorem Wharton l. c. Commodum vocat: nescio, an rectius. Priorem in

(m) Hoc ante Whartonum etiam Janus Jac. Boissardus in Jcon. virorum doctrina illustrium. P. I. p. 155. retulit.

(n) Epist. L. I. f. 13.

in epistola ad Matthæum Palmerium his prædicat verbis : *Huic ego tantum debeo, quantum loqui ex arte præstantius est, quam casu verba inania fundere.* Dicendi tamen scribendive ratione non semper usus est noster adeo terſa ac eleganti, ut quibusvis delicatulis cenſoribus ex omni parte ſatisſaceret. Ludovicus certe Vives, politiſſimæ doctrinæ vir, diſtinctionem ejus invenuſtam & moleſtam nominat. Nec diſſiteor, illius ſermonem nonnunquam aff. ſata quadam obſcuritate involutum eſſe, ac a linguæ Romanæ caſtimonia & nitore aliquantulum abhorrere. Sed in iſſis forte rebus illius obſcuritatis cauſa quærenda eſt. Platoni uni- ce addiſtus erat Marſilius, hunc habebat in deliciis, atque animo toto effuſiſſime complectebatur. Omnes ejus ſcriptiones, epiſtolæ, libri, decreta Platonica venerantur & ſpirant. Hæc autem quam fuerint ſæpe tenebriſoſa atque intorta, nemo ignorat, niſi qui nihil novit.

ſ. 5.

Præter ſtudioſum philoſophiæ, cujus amore totus, quantuſcuſque fuit, incaluerat noſter, amavit quoque ac excoluit medendi artem ſcientiamque diviniorem, quam
C theo-

theologiam vocamus. Musicæ etiam non-nihil operæ impendit, citharaque, blanda sonante carmina, sæpiusculè usus est ad animum laboribus curisque fractum suaviter reficiendum, pellendamque mœsto de pectore ægritudinem. De his Marsilii studiis testimonia quædam ex ipsius epistolis petamus. Lib. I. fol. 21. ad Thomam Valorium de nobilitate & utilitate medicinæ pluribus agit, subque finem earum literarum Hieronymum Amatium comitem suum in medicinæ citharæque studio valde jucundum appellat. In Epistola ad Antonium Canisianum scripta fol. 24. seq. rationem reddit, cur tam frequenter medicinæ & musicæ studia misceat, ibique præter alia, *Ego autem, inquit, eo consilio post theologia vel medicinæ studia gravioribus fidibus cantibusque frequenter incumbo, ut cetera sensuum oblectamenta penitus negligam, molestias animæ corporisque expellam, mentem ad sublimia Deumque pro viribus erigam, autoritate Mercurii Platonisque fretus, qui musicam nobis a Deo concessam dicunt, ad domandum corpus, temperandum animum, Deumque laudandum (o).* §. 6.

(o) cf. præterea Epist. L. I. f. 37. L. III. f. 70. L. V. f. 100. artis musicæ, literis conjunctissimæ, desiderium a Marsilio etiam Laurentio Medici instillatum fuisse, scribit Steph. Forcatulus de Gallorum Imperio & Philof. L. IV. p. 232.

§. 6

Egregiis igitur animi dotibus liberalique Cosmi Medicis benevolentia ita usus est, ut totum se daret literis, & enixa diligentia præstantissimas solidioris doctrinæ opes sibi conquireret. Indefessam & stupendam ejus industriam loquuntur tot scripta, ab ipso elucubrata, de quibus posthac dicendi erit occasio. Videlicet nihil pretiosius æstima- bat tempore : cujus jacturam maximam & gravissimam judicare consuevit. Testis est hujus rei epistola, ad Laurentium Medicem (p) exarata, qua ipsi temporis parsimoniam etiam atque etiam commendat. Ibi inter cætera : *In hac mea infirmitate* (tum enim ex incommoda valetudine emerferat) *nihil acrius animum affligebat, quam inutiliter transacti temporis recordatio: nihil rursus re- stabat, quod me aliquantum consolaretur præ- ter eorum memoriam, qua didiceram, quam- vis non multa didicerim. Solo enim divino ve- ritatis pabulo revera divinus animus oblecta- tur, alitur, augetur: cætera volantium nuga- rum deliramenta immortalem non implent men- tem, naturali quodam instinctu aterna & im- mensa poscentem. Obsecro te igitur, carissime mi patrone, per aeternum Deum, ut pretiosissimum*

C 2

simum

simum temporis hujus quam brevissimi minimum parce prudenterque expendas, ne quando frustra te prodigalitatis irreparabilisque jactura pœniteat. Jactura temporis Theophrastum annos octuaginta natum frequenter deducebat ad lacrymas: jactura temporis magnum Cosmum natum annos plures quam septuaginta saepe me presente graviter suspirare coëgit, &c. Aurea sunt isthæc verba, digna, quæ decies legantur & relegantur, animoque penitus inculcantur!

§. 7.

Hac autem cura & sedulitate id effecit, ut in eo adhuc juvene literæ essent plurimæ, præcocibus ingeniis jure quodam suo accenseri mereretur. Nec desunt eruditionis specimina, quæ ab eo adolescente fuerunt profecta. *Argonautica*, scribit ad Martinum Uranium (q), & *hymnos Orphei & Homeri atque Procli, theologiamque Hesiodi*, quæ adolescens, nescio quomodo, ad verbum mihi soli transtuli, quemadmodum tu nuper hospes apud me vidisti, edere nunquam placuit, ne forte lectores ad priscum deorum demonumque cultum jamdiu merito reprobatum revocare viderer: quantum enim Pythagoricis quondam

cura

(q) Epist. L. XI. f. 180.

cura fuit, ne divina in vulgus ederent, tanta mihi semper cura fuit, non divulgare profana, adeo ut neque commentariolis in Lucretium meis, quæ puer adhuc, nescio quomodo, commentabar, deinde pepercerim. Hac enim sicut & Plato tragædias elegiasque suas Vulcano dedi. Maturior enim ætas exquisitiusque examen, ut inquit Plato, sæpe damnat, quæ levitas juvenilis vel temere credidit, vel saltem, ut par erat, reprobare nescivit. Misit tamen simul Marsilius cum hac epistola Uranio quædam Orphei carmina, a se Latinis versibus heroicis expressa, quæ tutiora esse judicavit. Alius etiam operis, a se juvene compositi, meminit in literis ad Philippum Valorem A. 1491. d. 5. Nov. datis, his verbis: Anno salutis humane MCCCCLVI. quo ego quidem annos ætatis agebam tres atque viginti, tu vero natus es, primitias studiorum meorum auspicatus sum a libris quatuor institutionum ad Platoniam disciplinam: ad quas quidem componendas adhortatus est Christophorus Landinus amicissimus mihi, vir doctissimus. Cum autem ipse & Cosmus Medices pellegissent eas, probaverunt quidem, sed ut penes me servarem consuluerunt, quoad Græcis literis erudirer, Platonicaque tandem ex suis fontibus haurirem. Eas enim partim fortuita quadam inventionem,

partim Platoniorum quorundam Latinorum lectione adjutus effeceram. Platonem deinde Platonicosque Græcos aggressus, institutiones illas paulatim libris sequentibus emendavi. Neque tamen librum ipsum placuit abolere, quem tanquam liberum primogenitum meum eo anno genueram, quo tu natus es &c. (r) Liber quoque ejus de voluptate hac ornatus est coronide: Marsilii Ficini Florentini liber de voluptate absolutus est Figini 3. Kalendas Januarias MCCCCLV II. anno ætatis sue XXIII. Juvat ex hujus opusculi præfamine ad Antonium Canisianum, Civem Florentinum, pauca decerpere, ut inde, quibus deliciis juventutem suam oblectare consueverit, constet: Memini, cum adessem una tecum in campo Litano vestro, & cum regionis illius præcipua amœnitate, tum variorum pomorum, quibus ea villa imprimis abundat, suavitate duceremur, nos in voluptatis disputationem incidisse, quam ipse a me requisisti, ut, cum primum daretur otium, literis traderem. Hoc ergo ad te de voluptate opusculum, ut primum Figinum redii, summa ipse cum voluptate conscripsi.

§. 8.

§. 8.

Ob virtutem itaque & eruditionem suam Ficinus perpetuo Medicæ Domus favore gavifus fuit. De beneficiis, a Cosmo ipsi puero exhibitis, jam superius §. 3. actum est: nunc alia memoranda erunt. Montem Vechium ab eo sibi donatum, in epistola ad Gregorium Epiphanium Sacerdotem (s), gratus profiteur Marsilius. Familiarissime præterea illo utebatur idem Musageta. *Nemo magno Cosmo me familiarior fuit, nemo carior:* scribit noster ad Nicolaum Michellotium (t): & ad Laurentium Medicem (u): Ego una cum illo (Cosmo) annos plures, quam duodecim feliciter philosophatus, sum: tam acutus erat in disputando, quam, prudens & fortis in gubernando. Multum, equidem Platoni nostro debeo, sed Cosmo, non minus me debere fateor. Quam enim, virtutum ideam Plato semel mihi monstraverat, eam quotidie Cosmus agebat —, Solonem Philosophum imitatus, cum per, omnem vitam vel in summis negotiis philosophatus esset, illis tamen diebus, quibus, ex hac umbra migravit ad lucem, quam, maxime philosophabatur. Itaque post, quam

C 4

quam

(s) Epist. L. I. f. 6. L. VII. f. 131.

(t) L. I. f. 9. (u) l. c. f. 23.

„quam Platonis librum de uno rerum prin-
 „cipio ac de summo bono legimus, sicut tu
 „nostis, qui aderas, paulo post decessit, tan-
 „quam eo ipso bono, quod disputatione gu-
 „staverat, reipia abunde jam potiturus. En
 ipsas Cosmi literas, benevolentiae in Marsi-
 lium testes (x): „Contuli heri me in agrum
 „Charegium, non agri, sed animi colendi
 „gratia. Veni ad nos Marsili quam primum,
 „fer tecum Platonis nostri librum de sum-
 „mo bono, quem te isthic arbitror jam e
 „Graeca lingua in Latinam, ut promiseras,
 „transtulisse. Nihil enim ardentius cupio,
 „quam, quæ via commodius ad felicitatem
 „ducat, cognoscere. Vale & veni non
 „absque Orphica lyra.

§. 9.

Laurentius vero Medicus, Cosmi nepos,
 omnium seculorum, iudice Nicolao Reuf-
 nero (y) & gentium heros, maximus inge-
 niorum liberalium educator, artium omni-
 um & elegantiarum pater, virtutis veræ
 æstimator unicus, præclarus vatum hospes
 & æmulus, quam studiose nostrum foverit,
 quam effusa cum benevolentia fuerit prose-
 cutus,

(x) l. c. f. 1. (y) In Iconibus literis clarorum
 virorum. F. 6.

cutus, clamant tot epistolæ, merum spirantes amorem (2), atque beneficia divite manu in illum collata, quæ passim Ficinus memori prædicat mente. *Multa abs te, sunt ejus verba (a), quondam & magna accepit beneficia Laurenti: nuper vero maximum atque gratissimum, videlicet divi Christophori templum.*— Nunc primum tibi gratias ago. O quantas, non quantas Marsilius capit pusillus homo, sed quantas vir grandior Laurentius, imo quantas ingentissimus gigas ille divus Christophorus &c. Scriptæ autem sunt hæc literæ Florentiæ A. 1478. d. 13. Jan. Sed ingenue fateor, me hæc verba parum intelligere. Accepisse se a Laurentio D. Christophori templum prædicat Ficinus: forte Sacerdotium in eo obeundum? vel domum quandam, Christophori imagine insignitam, ipsiusque patrocinio dicatam, & exin minus proprie templum Christophori a nostro appellatam? Posterius vero propius mihi esse

C 5

vide-

(2) v. g. Epist. L. I. f. 7. sqq. 22. &c. quanti nostrum æstimaverit Laurentius, ex hoc etiam colligere potes, quod is duobus circiter ante obitum suum mensibus se destinasse dixerit, reliquam ætatem in Philosophiæ & literarum studiis cum Politiano, Ficino & Pico Mirand. præcul ab urbe & strepitu consumere. vid. Ang. Politiani Epistol. Lib. IV. p. 133.

(a) l. c. f. 8. cf. Epistolam ad Robertum Salviatum L. IX. f. 162.

videtur. Et forsitan hoc sensu accipienda sunt verba Laurentii (b): *Cum semper ante oculos divum Christophorum, cui adest tua dicata est, habeas, ea ipsius est magnitudo corporis, ut caterarum omnino rerum tibi prospectum auferat, atque inter te & nos quodammodo faciat eclipsin quandam.* Sed transeant hæc. Hoc unum adjicio, totius Medicæ gentis propensam in se voluntatem Ficinum passim dilaudare. Hinc in literis ad Jacobum Cardinalem Papiensem (c) se antiquissimum Medicæ domus alumnum nominat. Et alibi (d) singulos ex illustrissima hac prosapia patronos suos sic recenset: *Primum summumque inter amicos locum patroni nostri Medices jure optimo sibi vendicant: Magnus Cosmus: gemini Cosmi filii, viri præstantes Petrus atque Johannes: gemini quoque Petri nati, magnus Laurentius & inclitus Julianus: tres Laurentii liberi, magnanimus Petrus, Joannes Cardinalis plurimum venerandus, Julianus egregia indole præditus: ac ne in longum singulorum laudes prosequar, una Medices omnes communi laude complectar, Genus heroicum.*

§. 10.

(b) Epist. L. I. f. 9.

(c) Epist. L. III. f. 76.

(d) Ep. L. XI. f. 182.

§. 10.

Non tamen ita usus est illa, qua apud Medicos plurimum valebat, gratia, ut abutere-
tur. Ea enim fuit continentia animique
moderatione, ut in angusta & tenui etiam
re, si tempora sic ferebant, serenam tran-
quillamque mentem retineret. Familia ve-
ro, quam domi suæ alebat, nepotes nimi-
rum neptesque (ex fratribus, an sororibus
nescio: proprios enim liberos (e), utpote
sacerdos & canonicus, non habuit) eo ade-
gerunt aliquando hominem, quem vere-
cundia alias nova semper petere beneficia
prohibuit, ut in amicorum sinum nonnullas
effunderet querelas. Sic A. 1485: d. 17.
Jan. hisce Petrum Leonem (f) compellavit:

Vixi

(e) Testis ipse est Marsilius, Ego, Epist. L. VII. f. 137.
inquiens, nullos unquam genui liberos, nisi libros.

(f) Epist. L. VIII. f. 147. Hic, quem alii Leonium
nominant, Medicus fuit insignis, sed astrologicæ va-
nitati, pro more fere illorum temporum, nimium
deditus: quum subitæ sibi mortis periculum (vide Nic.
Reusnerum l. c. F. 8.) in aqua portendi ex astris præ-
sagiret, fluminum publicorum ac navigationum occa-
sionis evitandæ gratia, mutata sede e Patavio, Vene-
tiisque in Umbriam ac Spoletum demigrans, fati ni-
hilominus viam invenientibus, Florentiæ demum,
quo medicinæ faciendæ causa a Laurentio Medice su-
prema valetudine tentato accitus fuerat, exitiali ob
ejus mortem furore correptus, præceps in proximæ

Core-

Vixi haëtenus, atque etiam vivo, quod maxime philosophum decet, tenui facultate contentus. Sed non eadem domi contenti vivunt nepotes orphani neptesque jam nubiles: inimici hominis domestici ejus. Vixi equidem philosophantis more, semper hodie nec unquam crastinum cogitavi: sed hodie domestica turba me compellit invitum, quod Deus vetat, cogitare de crastino. Tentavi fortunam meam hoc anno Laurentio nostro sapius aperire, sperans mihi apud illum significatione tantum opus fore, non precibus: subrusticus vero pudor me saepe cobibuit; sed epistola vel amicus minus forsitan erubescet. Eandem fere querelam in literis ad Philippum Valorem, tum Florentinorum apud Pontificem oratorem, (g) repetiit: Inimici hominis domestici ejus: domestici quidem mei, qui mihi sunt multi, multumque molesti, quoniam neque philosophici, neque philosophico victu supellectilique contenti, frequenter objiciunt: ceteros Medicea domus clientes atque clientulos paucis aëis inde quam plurimum accepisse, me vero amplissima hujus familia familiarissimum, ac, ut ita dixerim, clientissimum, multis annis reportasse non multum.

Sed

Coregiæ villæ puteum, sponte anillata vi incertum, datus fatali merfus aqua periit.

(g) Epist. L. XI. f. 186.

Sed audi parumper, mi Valor, nostram banc ad meos apologiam: Cateri quidem amici Medicum nondum, quantum voluerant, acceperunt: ego vero, quantum voluisssem, si modo petisssem. Et habeo certe, quantum volo: illi plerumque precario, ego gratis. Medices, item aliis aliena dederunt, mihi sua. Nos, igitur ita causam apud domesticos nostram, perbelle probamus: at illi, quod mihi, molestissimum est, non comprobant: oportuerat enim jamdiu vel meos una mecum, quandoque fore philosophos, vel me non, fuisse philosophum., Imo aliquando eo adactus est noster, inimicorum, credo, opera, (raro enim contingit, ut eminens virtus fugiat invidiam) & inscio forte Laurentio Medice, ut de exactorum insolentia graviter conqueri necessum haberet, publicis oneribus nimium pressus. Ipsum audiamus hac de re Marfilium in epistola ad Bernardum Divitium, Laurentii amanensem (b): Tanta mihi est erga magnanimum Laurentium reverentia, ut vel epistola, quæ minus erubescere solet, jam erubescat. Hæc, igitur nunc Laurentium aditura, interim, rubore cohibita, ad te saltim, dilectissime, mi

(b) Epist. L. X. p. 168.

„mi Bernarde, confugit. — Sed querula
„venit, & queri præterea nesciens, videlicet
„a philosopho veniens, querelis minime
„omnium assueto. Quid ergo? narrabit sal-
„tim. Publica literatis stipendia ubique dari
„solent, ne dixerim, & in patria debent: am-
„plissima certe Florentiæ dantur & peregrinis
„& civibus: ego vero literosus senex stipen-
„dium literarium ut excipiam, nihil postulo.
„Non enim tantum mihi arrego: sed satis
„mihi factum fuerit, si non dederò. Re-
„cepi me nuper in secessum montis Vechii,
„ne frequentes amicorum salutationes præ-
„sens hoc meum, cui totus nunc incum-
„bo, Dionysiacum opus interpellarent.
„At vero quod longe molestius est,
„non interpellant quidem me amici mei,
„quos jam desidero, sed interturbant quo-
„tidie exactores improbi & vexant, ut ve-
„rius dixerim, extortores post decimas illas
„mox studii Pisani nomine Florentinum ho-
„minem certe studiosissimum a divino circa
„Dionysium studio separantes. Fortuna stu-
„diis inimica bonis, ne divinum opus id
„producam, & multis me id genus injuriis
„agitat, & crebris interea corporis languo-
„ribus afficit. „ Præterea accidit quandoque,
„ut Medicea familia variis adversantis fortu-

næ insultibus affligeretur, qui plerumque, uti fieri assolet, in ejus clientum etiam capita ruebant. Hinc A. 1478. quo Laurentius Florentia pulsus a solo patriæ extorris erat, diro Pontificis Sixti IV. anathemate perculsus, Ficinus quoque noster miseriis & ærumnis pressus fuit: quas tamen æquo cum animo pertulisse, ex his epistolæ ad Joannem Nicholinum Archiepiscopum Amalphitanum (i) verbis elucet: Deus humilem mi,, hi fortunam dedit: fortuna olim tenuem,, nunc tenuissimam facultatem. Deo pa,, reo: fortunæ cedo: consentio facultati:,, exigua sum sorte contentus, modo tuta., Fortunatus, cui fortuna obtigit mediocris,, felix, qui sua est fortuna contentus.,

§. II.

Nunc, quibus muneribus noster functus sit, enarrandum est. Scilicet Sacerdotio præditum fuisse indicat ipse in epistola ad Petrum Leonem A. 1485. scripta, quam modo §. præcedenti citavimus. Ita enim ibi Marsilius: „ Tu quidem optabas his tan,, dem pactis multos Hippocratis libros me,, „Latinos

(i) Epist. L. VI. f. 116.

„Latinos efficere : ego autem Plotino mox
 „absoluto medicum cogor non jam interpre-
 „tari, sed agere. At sacerdotem, inquires,
 „non decere. Quid sacerdotem? Sacerdotem
 „præstat referre quam ferre medicum. Vixi
 „hactenus &c. Sequuntur enim jam verba
 paulo ante allegata. Nempe necessitatibus do-
 mesticis ad medendi artem exercendam se, li-
 cet sacerdos sit, fere compelli pro pane suis
 lucrando, falsè innuit. E suggestu sacro
 publica eum verba fecisse; nobis persuadent
 aliquot homiliæ, Epistolis ejus insertæ, qua-
 rum una (*k*) hoc gaudet titulo : Oratio
 Marfilii Ficini de charitate habita in collegio
 Canonicorum (†) Florentinorum ad popu-
 lum, cujus parte, ut specimen aliquod ha-
 beas, prima docet, Deum charitatem esse,
 parte secunda, eum, qui manet in charitate,
 in Deo manere, tertia denique, Deum vi-
 cissim in eo manere, qui in charitate ma-
 net : Epilogus est patheticus, exhortationem
 atque consolationem complectens.

Abusos esse alios Ficini, hominis haud
 ambitiosi; sorteque sua contenti. modera-
 tione, honoresque & pinguiora sacerdotia
 im-

(*k*) Epist. L. VIII. f. 150.

(†) Canonicis enim in Ecclesia Cathedrali Floren-
 tina adscriptus fuit.

impudenti ambitu ipsi præripuisse, ex literis ad Jo. Nicholinum Archiepiscopum Amalphitanum (l) auguror. Sub earum enim finem ita Riarium Cardinalem affatur: Tu vero, mi Domine, memento jam servi, tui, si qua videtur memoria dignus. Venisti enim in regnum tuum. Heu quam, invitus nunc petere cogor, temporum malignitate compulsus, quæ nunquam alias, censui philosophantibus esse petenda. Dicamne? Quod forte philosophum minus, at vero decet egenum. Dispeream hercle, nisi dixerò. Surgunt e cœno quotidie, qui rapiant nobis cœnam, Alio tempore (m) contra adversariorum scommata & criminationes causam suam Leonardo Jcto commendare coactus fuit (n). „Causam, nostram pluribus verbis amicissimo commendare superfluum arbitramur. Cum, non solum apprime doctus sis atque facundus, sed etiam Jovialis & cras pro nostra causa pugnaturus, sole feliciter Jovem aspiciente, speramus, si modo ingenii tui nervos

D

inten-

(l) Epist. L. VI. f. 116.

(m) Nescio quo? Nam Ficinus tempus, quo hanc epistolam scripsit, non notavit. Dolendum est certe, compiures ejus epistolas dici annique indicio destitui.

(n) Epist. L. IX. f. 165. Quænam vero fuerint istæ adversariorum cavillationes, Marsilius haud memorat.

„intenderis, te iniquas adversariorum no-
„strorum cavillationes expugnaturum. „
Sed feliciter omnia isthæc nubila tandem fa-
vore Joannis Medicis tum Cardinalis, quem
postea ad ipsum summi Pontificatus fasti-
gium, nomine Leonis X. assumpto, ascendisse
novimus, dispulsa sunt. Ipse nobis Marsilius in
literis A. 1492. d. 25. Apr. exaratis (o) gratissima
celebrat mente ea, quibus a laudato Mæcena-
te suo insigniter ornatus fuerat, beneficia :
„Cum quartum Medici gradum maximum
„arbitrentur, tu vero quartus a Cosmo in ge-
„nerosa Medicum familia mihi sis patronus,
„es procul dubio maximus. Quod quidem
„hinc plane perspicio, quod non aliena mihi
„das, sed tua. Tuo jamdiu canonicatu me
„ornasti : æde nunc Martiana tibi dono con-
„cessa subito me donasti. Quamobrem
„obitu magnanimi Laurentii nostri neque
„fortunam meam deflere mihi licet, qui
„deinceps tanto patrono me videam maxi-
„me commendatum, neque sortem ejus
„commiserari, quem multis evidentibus-
„que argumentis translatum ad superos esse
„cognoscimus.

§. 12.

§. 12.

Officium præterea docendi philosophiam in Academia Florentina, cui adhuc puer a Cosmo destinatus erat (p), nostro bonis auspiciis commissum fuit. Quanta vero fide & dexteritate, quanta cura & industria hanc, quam nactus erat, spartam exornaverit, clamant tot discipuli, qui ex ejus scholis prodierunt doctissimi. Principem inter illos locum occupat Angelus Bassus Politianus, istud Musarum & Apollinis delictum, qui hoc præconio (q) doctorem suum maectat: Ego tenera adhuc ætate sub duobus excel-, lentissimis hominibus, Marsilio Ficino Flo-, rentino, cujus longe felicitior quam Thra-, cens Orphei cithara veram, ni fallor, Euridicen, hoc est amplissimi judicii Plato-, nicam sapientiam revocavit ab inferis, & Argyropylo Byzantino, Peripateticorum, sui temporis longe clarissimo, dabam qui-, dem philosophiæ utrique operam &c. Quamvis enim, qua erat modestia, Marsilius summum hunc virum e numero auditorum suorum eximat, familiaribusque duntaxat

D 2

suis

(p) Vide supra §. 3.

(q) In Miscellaneis p. 123. edit. Basil. 1522. in 8.
Idem Ficinum Epist. L. VI. p. 231. philosophum principem in secta principem appellavit.

luis adscribat, ego tamen in hac re ipsi Politiano (r) fatenti fidem adhibere malim.

§. 13.

Non alienum ab hoc loco erit, recensum familiarium atque auditorum celebriorum, ab ipso Ficino institutum & cum Martino Uranio suo (s) communicatum, exhibere. „Præter patronos, ait, duo sunt nobis amicorum genera. Alii enim non auditores „quidem omnes, nec omnino discipuli, „sed consuetudine familiares, ut ita loquar, „confabulatores atque ultro citroque confiliorum disciplinarumque liberalium communicatores. Alii autem præter hæc, quæ „dixi, nos quoque legentes & quasi docentes audiverunt; etsi ipsi quidem quasi discipuli, non tamen revera discipuli; non „enim tantum mihi arrogo, ut docuerim „aliquos aut doceam, sed Socratico potius „more (†) sciscitor omnes atque hortor, foecun-

(r) Ejus vitam nobis eleganter descriptam dedit Vir Clarissimus Wern. Jac. Clausius Magdeb. 1718. Conferri tamen quoque de eo omnino meretur Eruditissimi Henrici Brenemannii Historia Pandectarum Florentinarum, Trajecti ad Rhenum 1722. edita, p. 306. sqq.

(s) Epist. L. XI. f. 182.

(†) Hac docendi ratione, sicut & in aliis suum Platonem imitatus est Marsilius, qui itidem ea utebatur via, in

fœcundaque familiarium meorum ingenia,,
ad partum assidue provoco. In primo ge-,,
nere sunt Naldus Naldius a tenera statim,,
ætate mihi familiaris: post hunc in ado-,,
lescentia nostra Peregrinus Allius, Christo-
phorus Landinus, Baptista Leo Albertus,
Petrus Pazius, Benedictus Accoltus Areti-
nus, Bartholomæus Valor, Antonius Cani-
gianus: paulo post Joannes Cavalcantes, Do-
minicus Galectus, Antonius Calderinus,
Hieronymus Rossius, Amerigus & Thomas
ambo Bencii, Cherubinus Quarqualius Ge-
minianensis, Antonius Seraphicus, Michael
Mercatus ambo Miniateses, Franciscus Ban-
dinus, Laurentius Lippius Collensis, Bernar-
dus Nuthius Comandus, Baccius Ugolinus,
Petrus Fannius Presbyter, „Horum plurimi,,
exceptis Landino & Baptista Leone & Bene-,,
dicto Accolto primas nostras lectiones non-,,
nunquam audiverunt. „ In ætate vero mea
jam matura familiares non auditores: An-
tonius Allius, Ricciardus Anglariensis, Bar-
tholomæus Platina, Oliverius Arduinus,
Sebastianus Salvinus amitinus noster, Lau-
rentius Bonincontrus, Benedictus Biliottus,
Georgius Antonius Vespucius, Joannes

D 3

Baptista

in Cratylo pronuncians, illum esse perfectum dialecti-
cum, qui bene interrogare, & recte respondere sciat.

54 *Ficini familiares & auditores.*

Baptista Boninsegnius, Demetrius Bizantius, Joannes Victorius Federinus, Angelus Politianus, „Pierteonus Spoletinus, Joannes Picus Mirandula. In secundo genere, id est in ordine auditorum sunt Carolus Marsupinus, Petri quinque, Nerus, Guicciardinus. Soderinus, Compagnius, Parentus: Philippi duo, Valor scilicet & Carducius: Joannes quatuor, Canacius, Nefius, Guicciardinus, Rosatus: Bernardi quatuor, Victorius, Medices, Canisianus, Micheloëtius: Francisci quatuor, Berlingierius, Rimicinus, Gaddus, Petra Sancta: Amerigus Cursinus, Antonius Lanfradinus, Bindacius Reconsolanus, Almannus Donatus, Nicolaus Michelotius, Matthæus Rabatta, Alexander Albitius, Fortuna Hebræus, Sebastianus Presbyter, Angelus Carduccius, Andreas Cursus, Alexander Borsius, Blasius Bibiennius, Franciscus Diacetus, Nicolaus Valor. Facile plures amicorum & discipulorum Ficini ex ejus epistolis colligere possem; sed vereor, ne jam nimius fuerim. Unde nec observationes, quæ de horum multis in promptu essent, adjicio.

§. 14.

Sed circumscribi ejus fama angustis Italiæ finibus non potuit, ad ipsos quoque nostros Ger-

Germanos deferenda, quibus venerabile gratissimumque fuit Marfilii nomen. Impense colebatur, oculitusque amabatur a Martino Uranio Præningero Constantiensi, quem vicissim tanto prosecutus est affectu, ut illum alterum vocare Marfilium (u) consueverit. Non splendidis tantummodo donis (x) Uranius propensam suam in nostrum declarare solitus fuit voluntatem, sed & natalem ejus & doctorum cœtu & magnifico sumtu in Germania celebravit (y). Jussu insuper quorundam Germaniæ Principum laudatus Martinus, Ludovicus Naclerus & Joannes Reuchlinus Phorcensis, summi ingenii, maximæque eruditionis & immortalium in orbem literatum meritorum vir, aliquot adolescentes, in patriæ spem formandos, illius curæ & institutioni A. 1491. commendaverunt (z), inter quos fuit Joannes Stræler, Suevici foederis deinceps Triumvir (†).

Quanto autem honore hoc
D 4 tan-

(u) Epist. L. X. f. 168. 173. &c. in hujus sui amoris *ἡλικίου* ipsi dicavit Epistolarum Librum nonum, & apologos de voluptate, qui l. c. f. 173. sqq. leguntur.

(x) Epist. L. X. f. 166. 168. add. L. XI. f. 177.

(y) Epist. L. XI. f. 177.

(z) l. c. f. 176. 177.

(†) Inter Henrici Bebelii Opuscula, Argentinæ 1509. in 4. excusa, existat Epistola & Elegia ad hunc Strælerum

tantorum hominum iudicium Marsilium affecerit, quilibet facile videt. Nimirum in tam immensa eruditissimorum virorum, quos eo tempore Italia sinu suo complectebatur, copia unus Ficinus videbatur dignissimus, cujus fidei pretiosissima patriæ pignora crederentur, cujusque doctrina egregiæ indolis & optimæ spei juvenes, amplissimis tandem muneribus præficiendi, imbuerentur.

§. 15.

Sicuti vero principibus placuisse viris non ultima laus est: ita nec hac in parte nostrum desti-

lerum, Jurisconsultum Ulmensem & Suevici fœderis Triumvirum, cujus hac occasione epitaphium, per Joannem Casselium Geislingensem Sacerdotem compositum, ex MSto appingam:

Quis jacet hic? Stræler Doctor censuræ utriusque:

Qualis vita fuit? sobria, casta, pia.

Quis status officii? Suevorum in fœdere iudex:

Rektor & in Dirkhaim pavit oves Domini.

Quis vocitatus? Joannes: Quos laude ferebat?

Vates, philosophos, doctiloquosque viros.

Cui patuit domus, & quem comiter excipiebat?

In quo virtutes noverat esse sitas.

Quo delectatus nimis est, quove otia trivit?

Libris, quorum illi copia magna fuit.

Quem mirabatur? qui clarus ab arte nitebat,

Qualis Praxiteles Protegenesque fuit.

Defuncti quis partatulit? Loca sacra, sodales,

Cognati: exhibita gaudet inopsque stipe.

Quidnam ex præmissis modo commoditatis habebit?

Fama & imago manent, spiritus astra tenet.

destituisse fortunam, ex jam dictis abunde liquet. Verum plura adhuc supersunt ejus rei documenta, satis illustria. Gratiā illum tenuisse Innocentii VIII. Summi Pontificis, testis est barbariæ suo tempore, Salmasii judicio, victor Hermolaus Barbarus, in literis ad eum Romæ Kalendis Sextilibus A. 1490. datis (a) scribens: *Quod rogas, ut quemadmodum tu me Deo, ita ego te vicario ejus commendem: scito, id me non solum fecisse, verum etiam ex animo diligenter ac sapius fecisse. Atque ut hoc verissimum esse intelligas, respondit, per Laurentium stetisse, quominus huc te arcefferet: multa de te mitissimus Pontifex honorificentissime locutus, in sententia sua permanet videndi te apud se. Quod quidem si futurum aliquando est, opto, ut in legationis meæ tempus cadat. Quamvis enim coram illo Romanorum Præsule ab obtrectatoribus hæreseos vel ipsius forte magiæ crimen ei impactum fuisse, e nonnullis haud obscuris indiciis colligi queat: attamen amicorum & patronorum suorum opera, e quibus præcipue Hermolaum Barbarum, Antonium Calderinum, Franciscum Soderinum Episcopum Volaterranum, Rainaldum Ur-*

D 5

sinum

(a) Epist. L. X. f. 168.

linum Archiepiscopum Florentinum, & Marcum Cardinalem D. Marci dilaudat, hanc suspicionem ex ejus animo feliciter dimovisse videtur, qua de re in subsequenti observatione plura differendi locus erit. Nunc memorandum quoque nobis venit, Matthiam Corvinum, Hungariæ Regem, qui felici conjugio arma & literas, Lansio (b) iudice miscuit, & in togæ sagique proceres liberalissimus extitit, nostrum in Pannoniam invitasse, ut ejus commercio frui, ex ipsiusque ore Platonis dogmata imbibere posset. Voluntatis regiæ hac in re interpretes fuerunt Nicolaus Batoreus Episcopus Vaciensis, & Franciscus Bandinus. At Marfilius, sorte sua contentus, & corpusculi imbecillitate prohibitus, Florentiam suam deferere noluit. *Scribis, sunt ejus verba (c) ad Batoreum, Matthiam invictum Pannoniæ Regem præsentiam nostram desiderare, quod & tu valde desideres, aliique nonnulli, Platonicæ mentis explicandæ gratia. Rogas, si minus ipse venire valeam, ut aliquem saltem mittam ad vos meorum, qui vestro hac in re satis desidio faciat. Ego vero curabo pro viribus, ut*
ad

(b) Consultat. de principatu inter provincias Europæ. p. 448. sq.

(c) Epist. L. VIII. p. 152. cf. L. IV. p. 27.

ad vos Sebastianus noster amittinus accedat, aut si per occupationes suas ipse non possit, iter ad vos meorum alius agat. Me vero patrias mutare sedes mirum fuerit, siue mutationem prohibeat Saturnus in aquario nobis ascendens — seu vetet aliquis genius — siue corpusculum ineptum laboribus impediatur iter, seu mens contemplationi semper intenta quiescere jubeat. Ex epistola vero ad ipsum Regem A. 1489. sexto Februarii exarata Philippum Valorem nostri vices in itinere ad Corvinum suscipiendo expediisse (d) edoceor. Taceo jam alios multos, a fortuna in celso constitutos loco, qui maximi Marsilium fecerunt, eumque singulari benevolentia & amore prosecuti sunt: quales fuere ex purpuratis Romanæ Ecclesiæ patribus præter ante memoratos Bessarion (e), Franciscus Salviatus (f), Jacobus Papiensis (g), Raphael Riarius (b):

(d) Epist. L. IX. f. 158.

(e) Trapezunti natus, Rom. Eccl. Cardinalis Nicenus & Patriarcha Constantinopolitanus. vid. Ep. L. 1. f. 5. 6.

(f) Cardinalis & Archiepiscopus Pisanus. vid. Epist. L. I. f. 23. 36. 37. L. V. f. 102. Hic idem ille fuit, qui initæ contra Medicæam domum factionis particeps, imo vero præcipuus autor, Julianum in ipsis sacris interfici curavit, ipse dein in medio urbis foro a Florentinis in episcopali ornatu ignominiose suspensus.

(g) Epist. L. III. f. 76. sq.

(b): ex Episcoporum ordine Joannes Nicholinus (i), Gentilis Aretinus (k), Jacobus Rondonus Arimensis (l) aliique bene multi. Ne quid dicam de Ramberto Malatesta, Sogliani Principe (m), Bernardo Bembo, Patricio & Senatore Veneto, Petri Cardinalis patre (n), & cæteris, quorum nomina passim in nostri epistolis obvia sunt.

§. 15.

Cæterum cum nemo facile fuerit, qui literas fervidiori cura coluisse dici queat, quam Ficinus noster: apprime in omnem ejus vitam Ciceronis verba convenire mihi videntur: *Studia adolescentiam alunt, senectutem oblectant, secundas res ornant, adversis perfugium ac solatium præbent, delectant domi, non impediunt foris, pernoctant nobiscum, peregrinantur, rusticantur* (o). Otium quidem amavit Marsilius, sed literarium, & nunquam magis negotiosus fuit, quam in isto otio. Secessum ac rus sæpius quæsit, sed

(b) Cardinalis S. Georgii. Epist. L. V. f. 105. 108. L. VI. f. 113. seq. 123.

(i) Archiepiscopus Amalphitanus. Ep. L. I. f. 34. L. V. f. 110. L. VI. f. 113. (k) Ep. L. VI. f. 125.

(l) Ep. L. XII. f. 193. (m) Ep. L. XII. f. 191.

(n) L. I. f. 25. L. III. f. 64. 73. L. IV. f. 85. 91. 97. &c.

(o) Orat. pro Archia.

sed nunquam non Musis stipatus, quas secum quoque rusticari iussit. Prædiis, a Medicibus sibi donatis, hoc fine usus est, ut deliciis ruralibus suavibusque amicorum confabulationibus animum reficeret, ac eum tot vigiliis exantlandis, tantis libris solerter conscribendis redderet servaretque parem. Ipsam Ficini vocem audire mihi videor, quotiescunque elegantissima Plinii (p) verba menti meæ obversantur, vivis coloribus mellitissima isthæc gaudia delineantia. *In Laurentino meo aut lego aliquid, aut scribo, aut etiam corpori vaco, cujus fulturis animus sustinetur. Nihil audio, quod audisse; nihil dico, quod dixisse pœniteat. Nemo me apud quenquam sinistris sermonibus carpit: neminem ipse reprehendo, nisi unum me, cum parum commode scribo: nulla spe, nullo timore sollicitor, nullis rumoribus inquietor. Mecum tantum & cum libellis loquor. O rectam sinceramque vitam! O dulce otium, honestumque ac pene omni negotio pulchrius! O mare, O litus, verum secretumque μυστιον, quam multa invenitis, quam multa dictatis! Et profecto absque hoc si fuisset, tot scriptis concinendis haud suffecisset Marfilii corpusculum. Majanus certe, Celanus & Caregianus ager*

mons-

monsque Vecchius plurimos ingenii ejus fructus protulerunt (q). Nec minus solus erat, quam cum solus esset, quod Cicero (r) de Scipione Africano seniore dixit. Tum enim a cœtu hominum remotus cum Platone aliisque suavem instituit sermonem, per viridesque saltus & amœna vireta sophorum devolavit: tum studiis genium devovit omnem, cunctosque animi nervos. *Secessi*, scribit ad Bernardum Bembum (s), *Nonis Septembribus in montem Celanum nostrum procul ab urbe remittendi, imo potius intendendi animi gratia: nam solitudo philosophantibus non tam remissio mentis quam intentio esse & solet & debet.* Et ad Petrum Nerum (t): *Abesse me jam ab urbe diutius, ut opinor, una cum aliis nostris & ipse conquereris. Sed desine conqueri. Nunquam enim minus absum ab Academia, quam cum ab urbe absum. Urbana quidem a vobis saepe me distrabunt, rustica vero restituunt: vester hic totus sum atque expeditus. Sive enim deambulo, vobis mihiq; passim ipsi floreo: sive dormio, vos mihi semper somnia nostra reducunt. Quod si vero in suo secessu amicorum fruebatur consortio, eruditis*

(q) Epist. L. I. f. 5. L. III. f. 70. L. VII. f. 131. L. VIII. f. 148. L. X. f. 166. (r) L. III. Offic. Cap. I.

(s) Epist. L. V. f. 100. (t) Epist. L. VII. f. 139.

ditis confabulationibus tempusterere otium
que fallere consuevit. *Cum ego ac tu, verba
sunt nostri ad Laurentium Medicem (u),
nuper in agro Charegio multa de felicitate ul-
tro citroque disputaviffemus, tandem in sen-
tentiam eandem duce ratione convenimus, ubi
tu novas quasdam rationes, quod felicitas in
voluntatis potius quam intellectus actu consistat,
subtiliter invenisti. Placuit autem tibi, ut tu
disputationem illam carminibus, ego soluta ora-
tione conscriberem. Tu jam eleganti poemate
tuum officium implevisti: ego igitur nunc ad-
spirante Deo munus meum exequar quam bre-
vissime.* O vero felicia ista tempora, qui-
bus literis, jam jam caput erigentibus, haud
sui defuere Mæcenates, tam jucunda earum
cultoribus & restauratoribus parantes otia!
Tum suave erat, viridi sub tegmine fagi,
inque locis, strepitu vacuis atque alti ple-
nis silentii litare Musis: tum eruditi in cam-
pis læto gramine decoratis & spicis frugeque
flavescentibus sociabantur amico commer-
cio, ut rei literariæ fines adunitis viribus
quam longissime provererent. Altorum
nemorum umbræ, jucundaque sylvarum
vireta Phoebi choro patebant: rivis, rauco
mur-

murmure leniter strepitantibus, Castalidum grex, magnatum gratia fota, secure assidebat. Non possum a me impetrare, quin, huius materiæ suavitate illectus, huc transferam Angeli Politiani (x) verba, quibus Marsilium in villam suam Fæsulanam invitavit, ut inde istius temporis mores aliquatenus cognoscas. Ita autem ille: *Tu velim, quando Caregianum tuum Sextili mense nimis astuat, rusculum hoc nostrum Fæsulanium ne fastidias. Multum enim hic aquarum habemus, ut in convalle minimum solis, vento certe nunquam destituimur. Tum villula ipsa devia, cum pene media sylva delitescat, totam tamen aestimare Florentiam potest. Et cum sit in proximo celebritas maxima, semper apud me tamen solitudo est mera, qualem profecto secessus amat: uti poteris autem duplici spe. Nam sæpius e querceto suo me Picus invisit improvisus obrepens, extractumque de latebra secum ducit ad cœnulam, qualem nosti frugi quidem, sed & scitam, plenamque semper jucundi sermonis & joci. Tu tamen ad me potius, non enim pejus hic cœnabis, bibes fortasse vel melius.*

(x) Epist. L. X. pag. 394. edit. Basil. 1542: in 8. cf. Ficini Epist. L. IX. f. 157.

lius: nam de vini quidem palma cum Pico quoque valde contenderim (y).

§. 17.

Quam vero vellem, ut totum nunc tibi Marfilium intus & in cute notum reddere, illiusque cum corporis tum animi accuratam effigiem viva colorum luce depingere possem! Sed contentos nos esse decet pauculis & rudibus lineis, usque dum aliquis forte Apelles plenam ejus imaginem docta nobis manu exprimat. Ingenti Ficini animo breves natura artus finxit, ejusque ingenio haud par corporis augmen concessit. Fuit enim pusillus admodum, & tam brevi

E

corpo-

(y) De secessu & otio literario plura legere, scio, prænitebit neminem in Theophili Spizelii Dissert. de Bibliothecis p. 169. sqq. collect. Schmid. P. II. Adjicere vero mihi hic liceat verba, quibus Guilielmus Budæus, Gallix suæ lumen, secessus sui literarii delicias in literis ad Ludovicum Vivem prædicat: Hortorum, pascuorum, arborum conspectum nullis officientibus ædificiis liberum quanti esse æstimas? Quanti villarum amœnitatem, ambulationes inter opaca abstrusas, meditando, commentando, recitando implicitas, rhapsodiis canoras, numeris omnibus securitatis tranquillitatisque solutas? Quanti denique illud otium fruendæ felicitatis, quum interordiniis arborum obeundis, quibus ipse metandis non pridem, in versusque oblongos porrigendis interfui, velut operis curator, opera-

rum

66 *Ficini Statura & Corpus imbecillum.*

corporis statura (z), ut ad viri solitæ magnitudinis lumbos vix pertingeret. Hinc in epistola (a) ad Joannem Cavalcantem amicum conjunctissimum sic in seipsum jocatur: *Neminem latet, quam libenter imaginem suam speculis intueantur omnes vel homunculi. Amicus autem in amico non imaginem suam tantum inspicit, sed seipsum. Ego certe & si quasi bellus in me homuncio sum, tenuisque brevisque, in heroico tamen speculo, ex quo amavi, lustra jam quinque procerum me video procerem non homunculum.* Valetudine haud semper usus fuit commoda, morbis sæpiuscule tentatus. Sic A. 1474. dum librum de

rumque exactor, vivere me sentio? Eos autem, quibus vel in fori strepitu vel in aulæ ambitu consenescere contingit, aura quidem vesci ac spirare, non etiam frui vita, cœlique suspiciendi compotes esse censeo: quibus utique ipsis (o miseram vivendi conditionem!) nec licet unquam, nec libet secum vivere, & suo versari cum genio. Ibi unam demum experior ægritudinem, cum mihi subit scilicet repetendæ urbis memoria, non aliter atque si jugum rursus subeundum sit equo in pascuis soluto. Enimvero lætitandi, commentandi, scriptitandi voluptatem, iis quidem certe, queis ea res sub manu succedit numine aliquo aspirante, nec ære nec auro permutandam esse censeo, ne sceptris quidem ipsis, nedum fascibus, & infulis ad vulgus splendorem suum venditantibus. vid. Ejus Epistolas Basil. 1521. in 4. editas pag. 35. sq.

(2) If. Bulliart. in Academia Scientiarum.

(a) Epist. L. III. f. 74. cf. L. IV. f. 91. L. X. f. 165.

de Christiana Religione emendaret, mense Augusto in febrem incidit atque diarrheam, quæ eum vitæ dubium reddidit. *In tantam*, scribit ad Mareschalchum Ferrariensem (b), *debilitatem prolapsus sum, ut salutem pene jam desperarem: meditabar igitur, quæcunque annis triginta magna legissem, si quid forte mihi occurreret, quod agrum animum consolaretur. Scriptores humani, exceptis Platonis, nihil penitus conferebant, Christi autem opera multo magis quam philosophorum verba consolabantur. Feci insuper divæ Mariæ vota signumque salutis aliquod postulavi. Respiravi subito aliquantum, ac manifestum in somniis nuncium salutis accepi.* Ita quoque A. 1480. mense Julio graviter ægrotavit, in summum vitæ discrimen conjectus; sed præter omnem suam medicorumque spem, cunctis mirantibus, iterum convaluit, Deo soli, quod vivat, se debere grata piaque mente professus (c). Alibi vero (d), male ne, an bene valeret, semper se ambigere, & fortunam nunquam amplam & perpetuam quandam corporis imbecillitatem suis plerumque libris vel scribendis obstitisse vel edendis, ait. Haud, spero, divitiarum erit,

E 2

lege-

(b) Epist. L. I. f. 21. (c) Epist. L. VI. f. 123.

(d) Epist. L. IX. f. 162. L. XII. f. 191.

68. *Ficini Statura & Corpus imbecillum.*

legere heic ejus verba, quibus (e) de valetudine sua amicis rationem reddidit. *Quid totiens, amici, quæritis, quomodo valeam? Interrogate potius, nunquid denique convaluerim? Cateri siquidem ad hoc nati videntur, ut bene valerent. Ego autem contra ob hoc ipsum natus videor, ut male continue valeam. Nam mihi imbecillitate quadam natura datum est ab initio, ut nunquam diem integrum firmam corporis valetudinem sim expertus. Sed largissimo quodam Dei munere invidæ natura damna rependo, ut quam male nonnulli bonam valetudinem ferunt, ferme tam bene ipse malam. Quantum ergo quidam possessionis prosperæ gratia natura debent, tantum ego gratia usus ipsius debeo Deo. Quando Deus ipse nostra firmitas est, infirmi undique esse non possumus. Hoc præcipue silentio nobis involvendum non est, A. 1476. nostrum oculorum morbo, quo eruditis tristior esse nequit, haud absque visus amittendi periculo laborasse (f), de quo hæc ad Laurentium Medicem perscribit: Cum Novembris Superioris Calendis epistolam alteram de raptu ad tertium cælum Pauli ad Joannem Cavalcantem, alteram de cælesti & supercælesti lumine ad*
Phæ-

(e) Epist. L. IV. f. 85. (f) Epist. L. IV. f. 82.

Phæbum Capellam composuissem, mox in eum oculorum morbum infelicitè incidi, quem imaginum nomine phyci nuncupant, proximamque asserunt portendere cecitatem. Etsi expertus sum pene omnia, quæ tractantur a medicis Apollinis successoribus, nondum tamen Medicorum pater Apollo lucens pristinam restituit mihi lucem. Quo fuerit temperamento præditus noster, hæc ejus verba (g) aliquatenus nos edocent: Dei solius aeterno quodam munere mortalium bonorum minime cupidus sum; quod vero circa mala nimium formidolosus sum, complexionem quandam accuso melancholicam, rem, ut mihi quidem videtur, amarissimam, nisi frequenti usu citræ nobis quodammodo delinita dulcesceret. Quam mihi ab initio videtur impressisse Saturnus in medio ferme aquario ascendente meo constitutus, & in aquario eodem recipiens Martem, & Lunam in capricorno, atque aspiciens ex quadratura Solem Mercuriumque in Scorpio nonam cœli plagam occupantes. Huic forte nonnihil ad naturam melancholicam resisterunt Venus in libra Jupiterque in cancro.

E 3

§. 18.

(g) Epist. L. III. f. 70. Lib. de Vita sana Cap. X. Ego, inquit, quantum adversus atræ bilis amaritudinem dulcedo lyræ cantusque valeat, domi frequenter experior.

§. 18.

Nunc breviter delineare conabor Ficini mores, quales ex ejus epistolis cognovisse mihi videor. Scilicet in amicitiae cultu fuit constans & humanus, nec, licet familiares nonnunquam dissiderent a se sententiis, concordiae vincula dirupit, quod alias frequenter fieri inter eruditos, contradictionis impatientes, solet. Neque vero, scribit ad Hermolaum Barbarum (b), *putare quenquam volumus, Hermolaum atque Marsilium ob id forsitan minus vel esse vel fore conjunctos, quod alter quidem Aristoteli favere potius videatur, alter vero Platoni. Nam in eodem veritatis virtutisque cultu sumus unum, in quo Plato & Aristoteles non esse unum non potuerunt. Perge itaque, Latinissime & Attice Barbare, atque, ut coepisti, Atticum Aristotelem a diuturna barbarie strenue vendica: ego vero Platonem nostrum a Lethea quadam oblivione vel somno pro viribus exciso.*

Nimirum

Diversum sentire duos de rebus iisdem,
Incolumi licuit semper amicitia.

Animi lenitate, moderatione ac mansuetudine nemini facile secundus, procul abfuit

(b) Epist. L. VIII. f. 145.

fuit ab eorum more, qui vel verbulo laceſſiti, miras excitant tragœdias, immenſos clamores tollunt, ventofamque rabioſa injurgia linguam acuunt. Ut adeo optime in illum, pauculis mutatis, conveniant, quæ Ovidius (i) de ſe cecinit :

Tempus ad hoc luſtris fere ter mihi quin-
que peractis

Omne fuit Muſæ carmen inermæ meæ :
Nullaque, quæ poſſit, ſcriptis tot millibus,
extat

Litera Marſilii, ſanguinolenta legi.

Et hoc quidem in noſtro eo magis laudari meretur, quod alias ii, qui ſectæ cuiſdam unice addiſti ſunt, inque verba & dogmata alicujus veluti jurarunt, haud facile ferunt adverſantes, omnibuſque conſenſum, vel rixis & litibus, extorquere volunt. Platonem Marſilius quaſi ex inferis revocavit, eique, pene ad ſuperſtitionem uſque, deditus fuit : at dogmata illius non canina facundia, ſed mira modeſtia propagare contendit, longe diverſus a Georgii Trapezuntii moribus, qui eadem fere ætate, ut Ariſtotelem extolleret, indigne Platonem depreſſit, ac peracerbe inſolenterque inſectatus eſt ; quem tamen, Platonis amore
E 4 ductus,

(i) in Itin.

ductus, pari propemodum vehementia & mordacitate depexum dedit Bessarion. Temperantiæ & sobrietatis laus adeo nostro denegari nequit, ut hac præcipue imbecille suum corpusculum inter tot exhausto labores tamdiu sustentasse videatur. Nec vanæ ambitionis ipsi dica merito scribi potest, nisi forte eam callide dissimulasse dixeris: ejus certe epistolæ penes me quidem a nimia gloriæ cupidine tumentique fastu Marsilium absolvunt: quod oppido rarum est in eo homine, cujus adhuc vivi magnum jam & memorabile nomen fuit, qui summorum favorem meruit virorum, quique tot monumentis ære perennioribus inclaruit. Ne quid nunc amplius dicam de ejus tranquillissima morum temperie, laudabili æquanimitate, & indefessa industria, quæ ex superius memoratis jam patent. Pietatis in Deum haud pauca in nostri scriptis extant vestigia: nec facile quid in fervida ejus & devota oratione desideraverint vel rigidissimi censores, qua Deum se quotidie compellare (k) meminit, ut suæ fulgeat menti, & voluntati faveat. Quanquam nec hoc inficiandum est, ad superstitionem Ficinum fuisse aliquanto proclivior, & vanitatibus astro-

(k) Integrae legitur Epist. L. I. f. 33.

astrologicis nimis additum : quod tamen seculi illius genio adscribendum esse arbitror, quo magna quidem literis oriebatur lux, at densissimæ tenebræ religionem obscurabant. *Rei philosophica nimium deditus*, Henrico Whartono (1) indice, *religionis & pietatis curam posthabuisse dicitur*, donec Savonarola Florentiam advenientis eloquentiam admiratus, concionibus ejus audiendis animum adjecit, dumque flosculis Rhetorices inhiavit, pietatis igniculos recepit: reliquamque dein vitam religionis officiis impendit. Notissimus est hic familiæ Dominicanæ Monachus per δύο Φημιας & εὐφημιας, qui jussu Alexandri VI. Pont. Max. Florentiæ A. 1498. primum strangulatus ac deinde cum duobus sociis crematus fuit (m). Licet vero diversissima de eo (n) prostent judicia, hoc tamen

E 5

nega-

(1) In Append. ad Hist. liter. Script. Eccles. Gu. Cavei f. 112. Idem fere L. E. Du-Pinius Biblioth. Eccles. Tom. XIV. p. 111. memorat.

(m) Ejus vita a Jo. Francisco Pico Mirandulano descripta, inserta est collectioni Batesianæ pag. 107. sqq.

(n) Præter innumeros alios consuli de eo possunt Naudæus in Apologia magnorum virorum, magiæ postulorum, Gallice scripta p. 319. sqq. edit. Amstelod. 1712. Petrus Bayle in Dictionario Historico & Critico f. 3058. editionis tertiæ, & Jo. Franc. Buddeus in Diss. de artibus tyrannicis Hieronymi Savonarolæ, ejusque Retratactione, quæ utraque Parergis ejus historico-theolog. p. 277. sqq. indita est.

negari nequit, optimum fere quemque ab ejus tum stetit partibus, illumque maximo cum bonorum luctu neci datum esse. Hac occasione verba Ficini (o) referre placet, e quibus, quanti Savonarolam fecerit, palam est. Videlicet in epistola ad Jo. Cavalcantem A. 1494. d. 12. Dec. data plenius de eo, cur divina providentia permittat adversa, deque vaticiniis & remediis malorum differit, virumque hunc sibi amicissimum tandem sic compellat: *Nonne propter multa delicta postremum huic urbi hoc autumno exitium imminebat, nulla prorsus hominum virtute vitandum? Nonne divina clementia Florentinis indulgentissima integro ante hunc autumnum quadriennio nobis istud prænunciavit per virum sanctimonia sapientiaque præstantem Hieronymum, ex ordine Prædicatorum, divinitus ad hoc electum? Nonne profagiis monitisque divinis per hunc impletis certissimum, jam jam supra nostrum caput imminens exitium, nulla prorsus virtute nostra, sed præter spem opinionemque nostram mirabiliter evitavimus? A Domino factum est illud, & est mirabile in oculis nostris. Reliquum est, optime mi Joannes, ut deinceps salutaribus tanti viri consiliis obse-*

obsequentes, non solum ego atque tu, sed omnes etiam Florentini, Deo nobis clementissimo gratissimus, & publica voce clamemus: Confirma opus hoc Deus, quod operatus es in nobis.

§. 19.

Auriculas afini quis non habet? vere pronunciat Persius: adeoque nec in Marsilio defunt, quæ jure quodam suo carpenda veniunt. Mentem ad superstitionem proniorem jam tetigimus: nunc & alia quædam candide recensebimus. Pudendæ adulationis notam ipsi inurunt nonnullæ ejus epistolæ. Sic ampullosis assentatunculis Sixti IV. Pont. Max. gratiam aucupari annisus, hisce inter alia ipsi supparasitatur (p): *Hic omnes Christianorum populi proclamabunt: quisnam est iste? cui tam facile obtemperant elementa, cui sidera parent. Hic est profecto legitimus ille clementissimi Christi vicarius, qui clavibus acceptis a Christo statutis ab eo temporibus Jani Plutonisque ostia claudit — Sixtus sublimis theologiæ Phœnix, excelsas Palladis arces ante alios possidens, divinum ibi oraculum in singulis consulit. — Cantate Sixto canticum novum, & reliqua, quæ exscribere tædet. Forte tamen*

(p) Epist. L. VI. f. 115.

tamen ex hoc capite excusari posset Ficinus, quod hæc in difficillimis patriæ suæ temporibus, gravissimisque calamitatibus effuderit. Scripsit enim eas literas A. 1478. mense Decembri, posteaquam Laurentius Medices a Pontifice diro anathematis fulmine percussus, graveque contra Florentinos bellum a Papa & Ferdinando Neapolitanorum Rege decretum esset. Earum calamitatum causas atque originem ex Jacobo Philippo Bergomate (q) paucis narrabimus. Franciscus Salviatus, Florentinus civis & Archiepiscopus Pisanus, multarum machinationum artifex, conjuratione contra Medicæam familiam inita, Florentiam magno comitatu venit, ibi per eos, qui sceleris conscii erant, Laurentium & Julianum fratres Medices aliosque ex optimatibus interfici curaturus. Quare urbis Magistratu ad solemnem missam in

(q) Supplement. Chronic. f. 310. edit. Venet. A. 1513. Hac de conjuratione brevem commentarium Latine ornatissime perscripsisse Angelum Politianum, ex Vossio commemorat. W. J. Clausius in ejus vita. p. 70. conf. Raph. Volaterrani Geograph. Lib. V. qui eam conjurationem ipso Sixto IV. Pontifice conscio & adjuvante initam esse narrat, illiusque speciales quasdam circumstantias curate persequitur. adde Steph. Forcatulum de Gallorum Imperio & Philos. L. IV. p. 234. & Fr. Hotomanni Brutum Fulmen Sixti V. p. m. 172. nec non Historiæ Florentinæ Scriptores.

in S. Liberatæ templo celebrandam invitato, in ipsis sacris Julianus nutu illius obtruncatus fuit : Laurentius vero , vulneribus acceptis , ut erat vir prudentissimus , e sicariorum manibus elapsus , fuga sibi consuluit. Florentini igitur, Archiepiscopi fraude cognita , multis conspirationis hujus conscijs trucidatis, cum cum plurimis comprehensum in medio urbis foro , ipso episcopali habitu ornatum, ignominiose suspenderunt. Quas ob res Sixtus Laurentium excommunicavit, omnibusque dignitatibus privavit , cum Ferdinando Rege bellum Florentinis indicens. Verum re deinceps curatius cognita cum cum Florentinis absolutum , in pristinos honores restituit. (†) Hoc itaque tempore Marsilius supplices istas ad Romanorum sacrorum arbitrum literas pro Mæcenate suo Laurentio & patria urbe exaravit, animum ejus assentatiunculis & adulatorio sermone expugnandum ratus. Præterea communi fere illius ævi labe majestas Pontificis propemodum divina haberi solita est. Quid ? quod Patroni ærumnæ etiam in clientis Ficini caput ruisse videntur. Parum enim abest,

(†) Alii tamen Florentinos , Ferrariæ Duce in belli societatem adscito , Papam ad revocandam excommunicationem minis armisque compulisse volunt.

abest, quin nostri quoque res in maximo
 rum versatas fuisse discrimine credam (r).
 Hinc ergo illæ lacrymæ! sed ad alia prope-
 rat calamus. Nisi de Marsilii pietate aliunde
 mihi constaret, facile in eam ingrederer
 suspicionem, profana illum mente fuisse
 præditum. Turpiter enim nonnunquam
 abutitur divinæ Scripturæ oraculis, cujus quæ-
 dam tibi nunc specimina exhibebimus. *Fuit*
apud nos, scribit ad Sixtum Pontificem (s),
hactenus Nicholinus Antistes plenus gratia &
veritatis, homo nuper isthuc missus a Deo, cui
nomen est Joannes. Hic Romam venit in te-
stimonium, ut testimonium nobis inde perbibe-
ret de numine Sixti, quam gratiosa mente
Sixtus noster filiam suam Florentiam comple-
ctatur — O legitimum Petri Apostoli Succes-
sorem! o verum hominum piscatorem! Proinde
si dicere fas est, in hoc uno retium jactu vide-
tur quodammodo Petrum ipsum superavisse:
non enim centum quinquaginta tres pisces hic
cepit, imo fere, quodcunque Arnus alit aquor-
que Pisanum &c. In proœmio in Jamblichum
his ineptissime utitur (t) verbis: Est homo
Flo-

(r) Vid. Epist. L. VI. f. 116. (s) l. c. f. 115.

(t) Epist. L. IX. f. 159. Puduit profanæ hujus paro-
 diæ eum, qui versionem Jamblichi, aliorumque Plato-
 nico-

Florentia missus a Deo, cui nomen est Joannes, heroica Medicum stirpe natus: hic venit in testimonium, ut de summa patris sui magnanimi Laurentii apud omnes auctoritate testimonium perhiberet. Huic ergo Et tu, precor, (Jambliche) de singulari meo erga eum amore testimonium perhibeto. En turpissimam adulationem, & profanum divini oraculi abulum! sed pejus adhuc luxuriatur in procemio Procli & Porphyrii (u): Deus,, omnipotens Joanni Bicio Medici — quasi,, cuidam Abrahæ, quantum fas est confer,, re, quondam promisisse videtur: proles,, o Joannes, tua fulgebit in seculum, sicut,, stellæ cœli, feminibus tuis benedicent po,, puli, in semine tuo tandem benedicentur,, omnes

nicorum, a Ficino factam cum ejus opusculo de voluptate Venetiis in ædibus Aldi A. 1497. excudi curavit. Nam ibi hæc verba in Dedicatione ad Joannem Cardinalem Medicem prorsus omissa sunt.

(u) Epist. L. IX. f. 159. Integra hæc dedicatio, ad Joannem Medicem directæ, impiis istiusmodi lusibus scatet, ab Aldo in laudata Editione Veneta prorsus omissa. *Ἐν παροδοῖς* tamen notare juvat, Ficini divinationem de summi pontificatus honoribus, aliquando in Joannem conferendis, non fefellisse. Paulus Jovius quoque in Vita Leonis X. Lib. III. Marsilium, quem eximix autoritatis astrologum vocat, ex fortunata & regia genesi Joanni Medici sacrorum principatum, quum adhuc esset puer, nec plane sacris initiatus, omnino detulisse refert.

„omnes gentes: hæc illi Deus. Semina
 „vero Joannis, quibus benedicunt populi,
 „Cosmus quidem primo, deinde Petrus
 „Cosmi filius, tertio magnanimus Lauren-
 „tius Petro natus: Semen autem Joannis
 „ejusdem, in quo benedicentur omnes gen-
 „tes, est Joannes Laurentio genitus, cui
 „adhuc adolescentulo divina providentia
 „mirabiliter Cardineam contulit dignitatem
 „futuri pontificis auspiciū, in quo quidem
 „vīce Christi benedicantur omnes gen-
 „tes &c.” Sic penitus transversum egit
 nostrum adulandi libido. Sed & nimius
 Platonice sectæ amor quandoque illum co-
 adegit, ut hac ratione insaniret. Ita verbi
 causa in præfatione, Plotino præmissa, au-
 ditores & lectores suos his affatur: *Vos Pla-
 tonem ipsum exclamare sic erga Plotinum exi-
 stimetis: Hic est filius meus dilectus, in quo
 mihi undique placeo, ipsum audite.* Episto-
 lam vero de concordia Mosis & Platonis ad
 Braccium Martellum (x) hac coronide ob-
 signat: *Tu vero, postquam Academiam in-
 gressus mysteria hæc ab his heroibus intus acce-
 peris, ac insuper alia plura atque majora,
 qua non capit epistola, forsitan Petri voce
 clama-*

(x) Epist. L. VIII. f. 144.

clamabis : Bonum est hic esse , faciamus tria tabernaculorum millia. Plura hujus generis (γ) referre nolo, ne & tibi & mihi molestus sim.

§. 20.

Cæterum res nota & pervulgata omnibus est, Marfilium studiosissimum Platonicae Scholæ sectatorem, summumque ejus admiratorem fuisse. Noli autem a nobis expectare, ut hypotheses, quas foverit, jam prolixè repetamus: integrum enim Platonicae philosophiæ systema nobis explicandum foret. Generatim vero hoc de ipso salva veritate pronunciare nos posse confidimus, opiniones eum suas adeo tenebricosis allegoriarum involucris & dicendi genere plusquam poëtico, qui fere Academicorum mos erat, plerumque proponere, ut sæpe, an seipsum intellexerit, valde dubitem. Ipse Ficinus hanc suam in scribendo obscuritatem haud diffitetur, in literis ad Loctarium Neronium (z) A. 1477. d. 15. Apr. exaratis, *Quantum*, inquit, *ab initio studiorum meo-*

F

rum

(γ) cf. Epist. L. VII. f. 131. L. VI. f. 129. L. IX. f. 162. L. V. f. 109.

(z) Epist. L. IV. f. 82. Poëtici vero, quo usus est, dicendi generis rationes reddere annititur L. III. f. 65.

rum mea mihi verba scriptaque placebant omnia, tantum ferme deinde in dies mea mihi omnia displicent. Scribere tamen nonnihil quotidie nescio quo sive fato sive spiritu vel intuitus impellor. Ergo id mihi primum semper est in scribendo propositum, ut quam minime Marsilium ceterosque offendam, quam brevissime loqui. Sed dum nimia brevitate studeo prolixitatis devitare fastidium, interim obscuritate quadam nonnunquam quodammodo confundo me ipsum, certe alios saepe perturbo. Hoc autem jure iis solet accidere, qui modum in rebus tenere non didicerunt. Solenne quoque ipsi Platoniorum ritu est, abdita ubique crepare mysteria: immo nonnunquam ejus ingenium uberiori phantasia abreptum ita luxuriatur, ut fere in fanaticorum classem conjici mereat. Haud enim rarum est ipsi, raptus quosdam & visiones, vaticiniaque ac somnia divinitus sibi inspirata jactare, nisi forte oratorum & poetarum consuetudine hæc finxisse dicendus sit (a). Effuso vero ejus & immodico in Platonem aliosque veteres

(a) Vide tamen egregium, quod haud ita pridem elegantissimi vir ingenii D. Jo. Laurentius Moshemius, Theologus nunc Helmstädiensis, de Platonis tulit, judicium in pererudita de felicitate eorum, qui pure sunt ad Matth. V. 8, dissertat. primitiis ejus Juliis inserta, p. 20.

teres studio tribuendum est, quod Dialogum illius, qui Critonis titulo insignitur, religionis Christianæ fundamentum continere in præfamine ipsi præmissio dixerit, magnamque in præcipuis Mosis & Platonis ejusque sectatorum concordiam videre sibi visus fuerit (b). Trinitatis equidem mysterium in ipsis Platonis libris nunquam esse prudens (c) fatetur, sed nonnulla verbis quidem, quamvis non sensu, quoquo modo similia: similia vero in sectatoribus ejus, qui post Christum natum floruerunt. Nec adeo mirum est, nostrum philosophorum ante Christi adventum salutem propugnasse. Quod quibus rationibus fecerit, breviter jam nobis exponendum est. Scilicet (d) præcepta Mosaica in duo apud Theologos genera distinguui, alia ad naturale moraleque jus pertinere, alia ad ceremonias & judicia bene asserit. Prima illa a Deo Mosis data esse atque populo, secunda Mosen ipsum constituisse divinitus inspiratum: rursus prima omni hominum generi semper servanda mandari, secunda Judæos solos adstringere,

F 2

vide-

(b) Epist. L. VIII. f. 144. Magno conatu post Ficinum præter alios hoc agere allaboravit Augustinus Steuchus Eugubinus in Libris de perenni Philosophia.

(c) Epist. L. XII. f. 193. (d) Epist. L. V. f. 111.

videlicet usque ad Messia ipsius adventum : prima adeo communia esse , ut cuique etiam minus liberaliter instituto vel solo naturali iudicio cognita esse potuerint. Pythagoram igitur , Socratem , Platonem atque similes alios Dei unius cultores optimisque moribus institutos , ejusmodi sive Mosaica sive naturali disciplina inferos devitasse , superna vero sine superni Christi gratia mereri non potuisse : ea propter in mediam quandam regionem perlatos , in ipso Limbo de Messia adventu sive per prophetas , similiter ibidem servatos , sive per angelos certissimos esse redditos , atque hinc gentiles pariter ac Judæos sub ipsa Christi spe primum , deinde præsentia Christi superos repetiisse. Alibi vero (e) ita deliravit Marsilius , ut Socratem dulcissimi nostri Servatoris typum constituere haud erubuerit. Quamquam enim præfamine & colore quodam hanc insaniam velare velit , re ipsa tamen illum præsignavisse Christum censet. *Nisi vereretur* , scribit ad Paulum Ferobantem , *fore nonnullos , qui vel pravitate ingenii vel parvitate iudicii alio , quam nos loquamur , sensu captēt singula , demonstrarem Socratem etsi non figura , qua Job atque Joannes Baptista , tamen adumbratione forte quadam*
Chri-

Christum salutis auctorem quasi, ut ita loquar, præsignavisse. Posthæc comparisonem Socratis cum Sospitatore nostro instituit, eumque sapientissimum, magnorum philosophorum & Apollinis oraculo judicatum, singulari mentis excellentia, divinitate insuper vaticinioque ingenito æterna bona caducis præposuisse, incommodaque corporis, inediam, nuditatem atque fortunæ mala ultro sustinuisse, uni pietatis charitatisque intentum officio, propria negligentem commoda, nulloque deterritum periculo, tanquam animorum medicum mentibus hominum ubique purgandis incubuisse, mansuetudinem & charitatem aliasque virtutes, ambitiosa scientiarum professione exclusa, commendavisse, divinis ubique nisum testimoniis, nullum præmium humanum sperantem, certo periculo & morti se subjecisse, ab iis ipsis tandem impietatis accusatum, quibus ipse palam pietatis officium prædica-
verit, in judicio se, cum potuisset, non defendisse neque excusasse, & cum e carcere abire quivisset, noluisse tamen, injustamque necem libentissime, summæ constantiæ patientiæque posteris exempla daturum, sustinuisse, non alio consilio tradit, quam ut cum infano ausu cum Christo conferat. Ultra

hæc Christi figuram invenisse sibi videtur in triginta nummorum pretio de Socrate facto, ipsius Socratis vaticiniis, & vindicta divinitus ejus necem subito consecuta; lotione vesperi paulo ante obitum instituta a Socrate, exhortationeque ejus ad pietatem hora cœnæ. *Quid? quod*, exclamat Marsilius, *in eadem hora de calice atque benedictione & in obitu ipso de Gallo fit mentio! Mitto præterea*, addit, *multa Socratis tam facta quam dicta, non ab ipso quidem, sed a discipulis ejus quatuor præcipue scripta.* Ut nimirum sic quatuor Evangelistas præsignificatos esse scias, quamvis hæc non diserte exprimat Ficinus.

O Corydon, Corydon, quæ te dementia cepit!

Luciano potissimum se hæc opposuisse ait noster, sed eo ipso commento dignum se præstitit, quem facetus ille homo sale suo acriter perfricet, nasoque adunco suspendat. Verum nondum satis ineptiarum. Eo etiam progressus est Marsilius, ut philosophiam Platoniceam tanquam sacram legendam in sacris, inque templis docendam asseverare non dubitaverit (f): imo ipse jam
ca

(f) Epist. L. VIII. f. 153. Haud ergo fidem excedit, quod ex Bazovii Annalibus Jo. Lomejerus Lib. de Biblioth.

ea in re aliis exemplum prævisse videtur, oratiuncula, qua id suadet, in ædibus sacris habita. Quid autem, quæso, per febrim somnari ineptius unquam posset? adeo verum est, quod Tullius olim (g) dixit: *Nescio, quomodo nihil tam absurde dici potest, quod non dicatur ab aliquo philosophorum.* Sed his longius immorari nolo. Verbulo duntaxat meminisse liceat, nostrum illos, qui eodem secum in Platonem studio & amore ducebantur, suos in Platone fratres (b) nominavisse.

§. 21.

Antequam vero ad scripta Ficini enarranda accingar, paucis observare lubet, ejus

F 4

aucto-

oth. C. IX. p. m. 177. de Ficino refert, eum, cum nullam Christi aut beatæ Virginis aut alicujus Sancti imaginem domi coleret, Platonis tamen simulacrum in cubiculo habuisse, antequam illud perpetuo dies noctesque ardentem lampadem suspendisse.

(g) Lib. II. de Divinat.

(b) Epist. L. IX. f. 157. Fratres istiusmodi Platonicos plures, præsertim Florentiæ, habuit Ficus. Ipsi Medices aliquando natalitia Platonis solenniter celebraverunt cereali pompa, convivio opiparo, convocado doctorum cœtu, cui noster quoque interfuit. Sermones iis in epulis habiti recensentur prolixè in prolegomenis, Platonis convivio ab ipso præfixis. Franciscus etiam Bandinus genethliacum Platonis festum in urbe Florentina suis sumptibus & apparatu regio celebrasse dicitur a Ficino Epist. L. IV. f. 97.

auctoritate nonnullos eruditos in designanda exemplaris Pandectarum Florentini, toto orbe celebratissimi, ætate abuti. Nempe post primum illarum Pandectarum volumen recenti manu ex ejusdem voluminis initio repetitum inveniri Epigramma Græcum, quod plerumque digestorum editionibus præmitti solet, cum versione interlineari, refert post alios Henricus Brenemannus⁽ⁱ⁾, testis ocularis idemque gravissimus, subscriptaque sequentia: *Epigramma hoc superius sex versuum reperitur in precedenti volumine in fine tabula voluminis. Christophorus Landinus Secretarius manu propria.* Sequitur autem in continenti eadem manu, ut laudato Brenemannum cum cura examinanti visum est: *Ego Marsilius Ficinus interfui, dum hoc reperiretur, idque manu propria scripsi, die 9. Aprilis 1486. Petro Berardi de Berardis sedente vexillifero iustitia. Quapropter perspicuum judicamus, hoc volumen proprie fuisse ab ipso Justiniano compositum, neque solum transcriptum. Sed pia, nimis tamen crassa fraude id confictum esse non dubitat l. c. vir doctissimus. Nec, si verba, Ficino afficta, de ipso Pandectarum exem-*

(i) In nitidissima Historia Pandectarum Florentinarum Lib. III. C. I. p. 199.

exemplari primum reperto accipere velis, patitur id ratio temporis, nisi Marsilium seculo XII. quo Pifas illud delatum est (*k*), vixisse simul absone concedas. Quanquam Jo. Mabillonius (*l*) Landinum & Ficinum iis verbis tantum testatos esse existimet, quod interfuerint, dum epigramma illud reperiretur.

§. 22.

Scripta Marsilii tot numero, tamque diversa sunt, ut iis recensendis eam, quam velim operam præstare nequeam. Ad vitandum igitur nimix prolixitatis tedium de præcipuis duntaxat, quæ notatu non indigna nobis videbuntur, commemorabimus, nudum dein omnium ejus operum catalogum subjeçturi. Eminent inter ea Platonis editio, quem integrum in Latinum primus convertit sermonem, commentariisque illustravit, vel hoc solo, si nihil aliud fecisset, nominis immortalitatem meritus. Quo autem anno, Ficino obstetricante, Platonis opera, Latine reddita, publicam lucem primo viderint, præcise determinare haud possum.

F 5

Quam.

(*k*) l. c. L. I. Cap. VII. sq.

(*l*) In Museo Italico ad diem 16. April. 1686. citat. Brenem. l. c. p. 455.

Quamvis enim jam versare manibus, Bibliotheca Memmingensium publica eam mihi suppeditante, primam illam editionem mihi liceat, anni tamen indicio ea destituta est, his tantum in fine verbis adjectis: *Impressum Florentiae per Laurentium Venetum.*(†) Ex præfatione tamen, qua Plotinum Laurentio Medici Noster dedicavit, colligo ante annum 1490. Platonis opera in publicum prodiiſſe. Quo tempore, scribit ibi Ficinus, *Platonem Latinis dedi legendum: heroicus ille Cosmi animus heroicam Joannis Pici Mirandula mentem nescio quomodo instigavit, ut Florentiam, & ipse quasi nesciens quomodo perveniret. Hic sane quo anno Platonem aggressus fueram natus, deinde quo die & ferme quæ bora Platonem edidi Florentiam veniens, me statim post primam salutationem de Platone rogat. Huic equidem Plato noster, inquam, hodie liminibus nostris est egressus. Tunc ille & hoc ipso vehementer congratulatus est, & mox nescio quibus verbis, ac ille nescit quibus ad Plotinum interpretandum me non adduxit quidem, sed potius concitavit. Divinitus profecto videtur effectum, ut dum Plato quasi renasceretur,*

(†) Hunc eundem esse opinatur Maittaire Annal. Typ. T. I. p. 374. qui Laurentius Francisci de Alopa Venetus dictus fuit.

retur, natus Picus beros sub Saturno suo Aquarium possidente, sub quo & ego similiter anno prius trigesimo natus fueram. Ex his verbis edocemur, multorum annorum labore Platonis versionem a nostro confectam esse: verisimile enim est, Picum intra A. 1480. & 1490. primo Florentiæ Ficinum conuenisse. Natus est is A. 1463. diemque supremum obiit mense Novembri A. 1494. ætatis 32. Aliquot vero annis ante inter eos amicitiam & familiaritatem viguisse, ex epistolis novi. Quin imo ex literis nostri ad Callimachum (m) die 8. April. 1485. scriptis conjicio, tum vel paulo ante Platonem vulgatum fuisse: nam in iis laudato amico suo eum Latine loquentem offert. Difficilem autem Lucinam Platonis foetus experti, inque ipso fere partu suffocati esse videntur. Epistola Marfilii ad Hieronymum Cancianum Urbinatis Ducis Oratorem (n) hunc gerit titu-

(m) Epist. L. VIII. f. 145. His jam ita annotatis, deprehendi ex Epist. L. IX. f. 162. Anno circiter 1482. vel 1483. Platonem prodiisse in lucem: ibi enim septimo ætatis suæ septennario eum se edidisse ait Ficinus, nisi forte his, tum hæc opera se prelo subiecisse, indiget, quæ tamen anno vel biennio post eo liberari demum potuerunt.

(n) Epist. L. VII. f. 141. Dein L. VIII. f. 142. eidem gratias agit pro Platonis libris ab occupatore redemptis.

titulum: *Obsecratio, ut Platonis libri in Latinum a nobis translati ex ejus manibus, qui occuluerat, redimantur.* Integram eam, cum brevis sit, adjiciemus. Divum Platonem in *Agina* venditum *Anniceris* Cyreneus a servitute redemit, & in *Sicilia* in summo vite discrimine constitutum *Architas* Tarentinus ab exitio liberavit. Platonis autem liberi, cum relicta *Gracia* a Barbaris occupata sese in *Italiam* contulissent, in carcerem sorte conjecti sunt, integrumque biennium, prob nefas! in vinculis detinentur. Sed ecce jam insignis pietate vir *Cancianus Hieronymus* a compedibus eos solvet lucique restituet. Quantum ergo quondam Cyreneo & Tarentino pro Platone *Gracia* debuit, tantum *Canciano* pro Platonis liberis debebit *Italia*. Tibi divinandum relinquo, quodnam fuerit fatum Platonis operum, de quo heic loci conqueritur. Nisi tamen memoria me fallit, alicubi in Ficini epistolis legisse puto, manuscriptam versionem cum commentariis ab eo cum *Federico, Urbini Duce*, communicatam, & plus justo ab hoc retentam fuisse, amicorum tandem precibus ipsi vix rursus extortam; sed locus ille, summo licet studio quaesitus, nunc non succurrit. Paulo adhuc obscurius aliud sinistrum eorum operum subaccusat fatum in literis ad *Carolam*

roloꝝ Ristoruꝝ (o) scribens: *Pius Plato noster his diebus ab impio quodam Germano transcribebatur, qui nuper sacrilegis manibus sacrum ante aras sanguinem fudit; ille, ut ita dixerim, sacricida miles repente sacerdote caso fugam arripuit, ipsaque fuga alterum videtur sacrilegium patravisse, dum videlicet urbanum Platonē inter rusticos relinqueret vagabundum, tertium insuper sacrilegium patraturus, si sacrum cruentis manibus Platonem reversus aliquando ausit attractare. Da igitur operam queso, vir optime, ne Plato aut diutius in sylvis oberret, aut forte, quod foret crudelius, aliquando contaminatis profani illius manibus polluat.*

Minus vero elegans est prima illa Platonis editio, caractere Gothico minuto expressa, multis præterea mendis deturpata, quorum catalogus, a Ficino illi annexus, septem fere plagulas integras implet. Hinc noster ad Franciscum Bandinum (p): *Quod Platonis libri tandem ab impressoribus sint expressi, pia Philippi Valoris opera & magnifica manu factum est. Quod autem minus eleganter expressi, id partim negligentia impressorum, sic potius*

(o) Ep. L. VII. f. 138.

(p) Epist. L. VIII. f. 146.

potius oppressorum, partim, si dictu fas est, malignitate fortune nobis accidisse putato. Dolens autem, quæ tua pietas est, senem hunc nostrum ad vos squalidum accessisse. Desine precor mi Bandine dolere. Sic enim & natura comparatum est, & sorte datum, ut qui e carcere diuturno solvuntur, profundisque tenebris eruantur, squalentes prodeant, macieque confecti. Alibi vero Laurentium Medicen in literis ad Martinum Uranium (q) A. 1491. d. 24. Nov. exaratis celebrat, quod magnifico sumtu formaque regia Platonis libros eleganter denuo exprimi iusserit; simulque se pro viribus curaturum, ut emendatior sit expressio secunda quam prima, librosque singulos in capita distincturum, & inscriptionibus certissimis tanquam formulis declaraturum promittit. Aliam quoque editionem Venetiis curari, eodem anno ad eundem mensem Julio (r) meminit: & hæc illa est, quam Whartonus loco sæpius citato annotat. Multoties vero Ficini versio deinceps recusa est, quod ex Summi Polyhistoris D. J. A. Fabricii Biblioth. Græc. Lib. III. C. I. p. 33. patet.

S. 23.

(q) Epist. L. XI. f. 178. cf. L. X. f. 171.

(r) Epist. L. XI. f. 177.

§. 23.

Non possum hic silentio prætermittere, quæ idem nunquam satis deprædicandus D. Fabricius l. c. memorat, ad hujus versionis historiam omnino pertinentia. Nempe dicitur Ficinus translationis suæ primum specimen ostendisse Marco Musuro, & ejus censuram rogasse. At hic inspecto Ficini labore, digitos atramento protinus immerisit, iisque prima Ficinianæ versionis pagina oblitterata demonstravit, alia versione opus esse, hanc nonnisi una litura posse emendari, ut refert Menagius T. II. Antibailleti p. 157. Itaque Ficinus denuo rem majori studio adorsus, illam, quæ in omnium manibus versatur, composuit Platonis versionem. Hæc vir laudatus. Ut vero scias, quanta solitudine, quantaque industria Marsilius in altera illa versione conficienda usus fuerit, ipsa ejus verba appingam, quibus lectorem suum ita affatur: *Ne forte putes, tantum opus editum temere, scito cum jam composuissem, antequam ederem, me censores huic operi plures adhibuisse, Demetrium Atheniensem, non minus philosophia & eloquio quam genere Atticum, Georgium Antonium Vespantium, Joann. Baptistam Boninsegnium, Florentinos, Viros Latine*
lin-

lingua Græcæque peritissimos, usum præterea acerrimo Angeli Politiani doctissimi viri iudicio, usum quoque consilio Christophori Landini & Bartholomæi Scala, virorum clarissimorum. Nec certe laude sua defraudandæ sunt hæ Ficini vigilæ, etsi, ut sunt hominum res, omnes numeros non habeant. *Multam quidem, censente doctissimo autore historię philosophicæ doctrinæ de Ideis (s), quem Jac. Bruckerum Augustanum esse novimus, Platonica philosophia Platonisque operibus impendit operam, indeque magnam laudem meruit: sæpe tamen ubi litera sententiæ suæ non favet, nescio quæ mysteria allegoriarum subsidio quaerit, totusque Platonis amore captus est, unde ei non omnino fidendum esse monet Franc. Picus de Vanit. Astr. L. V. C. 6. & post eum Jo. Baptista Crispus in rarissimo opere de Ethnicis Philosophis caute legendis Distrib. II. L. VI. p. 270.*

§. 24.

Platone absoluto, Ploſinum, Jo. Pico Mirandulano potissimum instigante, aggressus, eum Latino Idiomate publicæ luci exposuit A. 1492. Auspiciis quidem & sum-
tibus

(s) pag. 33. 34.

tibus Laurentii Medicis, magni illius herois & Musagetæ, cui etiam consecratus est, excudi coëptus, prelo tamen demum exiit, eo jam fatis functo, quod ex allocutione Marsilii ad Petrum filium, ad calcem subiecta, perspicimus. Præmissa est vita Plotini, a Porphyrio composita, & a nostro traducta, nec non isagoge satis prolixa in ejus opera, qua in faciliorem illorum lectionem nos introducere, eaque subinde illustrare satagit Ficinus. In fine hæc verba leguntur: *Magnifico sumtu Laurentii Medicis Patriæ Servatoris impressit ex archetypo Antonius Miscominus Florentiæ An. MCCCCLXXXII. Nonis Maji.* Vere splendida est hæc editio, nitidissima charta & perquam elegantibus typis lectoris oculos jucunde adficiens, magnificentiæ Medicæ monumentum, quibusvis imaginibus, statuis, marmoribus illustrius, ut parum absit, quin de hac editione dici posse existimem, quod de Josephi & Philonis operibus in Gallia & Germania excusis pronunciavit (†) Michael Neander, ea scilicet scripta adeo pulchris typis esse expressa, ut si angelis tales literæ pingendæ essent, non sint picturi & effecturi pulciores.

G

poris

(†) In præfat. Theologiæ Bernhardi & Tauleri præmissa.

poris, dum in Plotino transferendo, & commentariis illustrando occupatus esset, alia quoque emisit opera, præsertim versiones veterum quorundam autorum, quæ hoc intervallo lucem adspexisse primum videntur. Proœmia enim in Theophrastum de anima (u), Synesium atque Psellum (x) &c. A. 1489. conscripta sunt. Junctim vero dein, politissimo habitu induti, ex ædibus Aldi Venetiis A. 1497. mense Septembri in fol. prodierunt ex Latina Ficini versione Jamblichus de Mysteriis, Proclus de anima & dæmone, sacrificio item & magia, Porphyrius de divinis atque dæmonibus, Synesius de somniis, Psellus de dæmonibus, Theophrastus de anima, phantasia & intellectu, cum Prisciani & Marfilii expositione, Alcinous de doctrina Platonis, Speusippus de Platonis definitionibus, Pythagoræ aurea verba & symbola, ac Xenocrates de morte (hunc tamen librum Æschini Socratico alii tribuunt): additus est quoque Marfilii Liber de voluptate, ab ipso adhuc juvene concinnatus, in quo varias philosophorum de voluptate sententias brevi sermone percurrere satius esse duxit, quam suam exprimere. De his

(u) Epist. L. IX. f. 159. (x) l. c. f. 160.

his vero Ficini versionibus nihil annoto, nisi unum hoc, quod ipse Jamblichum se non ad verbum expressisse sed ad sensum dicat (y), non tam, quod tunc in Plotini commentariis totus fuerit occupatus, quam quod unicum ejus habuerit exemplar, mendarum & fragmentorum plenum. Habentur autem ex ejus quoque translatione Dionysius Areopagita, Mercurii Trismegisti (†) Pœmander & Asclepius, Athenagoræ Atheniensis de Resurrectione Excerpta. De ratione vero interpretandi, quam tenuit noster, Petrus Daniel Huetius (z) sic judicat: *Marsilium Ficinum religiosum & fidelem dicit Nannius, summaque cura verbis instituisse, sententiam quoque reddidisse, in indole vero defecisse: nos aliter judicamus, nam verborum quidem curam negligit Ficinus, sententias dilatat nonnunquam, vel contrahit, id quod alibi sæpe, maxime vero in Trismegisti interpretatione deprehendas.*

G 2

§. 25.

(y) Epist. L. IX. f. 163.

(†) Trismegistus Ficino interprete primum prodiit Tarvisii A. 1471. in 4. ex officina Gerardi de Lifa, notante Maittaire. l. c. p. 90.

(z) Lib. de Claris Interpret. pag. 270. edit. Stad. 1680. Idem l. c. p. 212. quædam Trismegisto falso afficta opera Ægyptiace & Græce ab eodem Hermete utriusque Linguae perito scripta absurdissime credidisse Ficinum ait.

§. 25.

Epistolas Marsilii quod attinet, editæ sunt eæ, in Libros XII. distinctæ, Venetiis A. 1495. in fol. In earum calce hæc verba legimus: *M. F. Florentini Eloquentissimi Viri Epistola familiares feliciter finiunt: impensa providi Hieronymi Blondi Florentini, Venetiis commorantis, opera vero & diligentia Matthæi Capcæ Parmensis impressæ Venetiis, æquinoctium vernale Phæbo introeunte, as. Leon. die & hora Mercurii, vigilia divi Gregorii, Anno Salutis MCCCCLXXXV.* Aliquos earum libros jam antea prodiisse, e nonnullis locis colligo, nisi forsan in manuscripto tantum circumlatæ fuerint. De suarum vero Epistolarum ratione ipse Marsilius ad Angelum Politianum hæc (a) perscribit: *Circumferuntur, ut ais, epistola quadam meo nomine quasi Aristippica & quadam ex parte Lucretiana potius quam Platonica: si meæ sunt, non sunt tales, si tales sunt, non meæ illæ quidem, sed a detractoribus meis confictæ. Ego enim a teneris annis divinum Platonem, quod nullus ignorat, sectatus sum. Sed facile hoc signo scripta nostra discernes ab alienis. In Epistolis meis sententia quadam semper pro*
inge-

(a) Epist. L. I. f. 6.

ingenii viribus aut moralis aut naturalis est, aut theologica. Quodsi quid interdum quodammodo amatorium inest, Platonicum illud quidem & honestum, non Aristippicum & lascivum, laudes autem veræ & tales, ut exhortentur atque admoneant, non adulentur, verba pene nulla superflua: statui enim ab initio studiorum meorum semper, quam brevissime possem, scribere. Sed ut quæ mea de his epistolis sit sententia, paucis exponam ingenue, non in illarum censum referendas esse eas arbitror, quæ animum, seriis & gravioribus studiis aliquantisper sepositis, oblectamen & remissionem quandam appetentem multis pascere & demulcere deliciis queant. Hac enim virtute alias pollent eruditorum Epistolæ, ut non plura solum nos doceant recondita, sed & mira quadam jucunditate mentem legentium exhilarent atque impleant. Ego quidem literario doctorum commercio nihil animo recreando accommodatius fingi posse mihi persuadeo, & omnium fabularum Romanensium lectioni, qua alias tempus decipere mentem otio quodam refecturi solent, longe præfero dulcissima isthæc gaudia, quæ inde uberrime fluunt. In Ficini vero epistolis, licet illas etiam delicias quæsierim, spe tamen mea me frustratum esse sæpius

comperi. Et fateor, iis aliquoties a me gustatis, fere eas attentius perlustrandi desiderium extinctum in me fuisse, nisi animum obdurassem, isto præcipue scopo mihi proposito, ut inde, quæ ad viri hujus historiam, cujus cognoscendæ avidus valde eram, attingent, omni adhibita diligentia haurirem. Pauca sunt in his, quæ ad historiam literariam illius ævi illustrandam facere queant; ambagibus plerumque allegoricis ea, de quibus disputat, proposuit Marsilius, nebulis & caligine sua ex industria tecturus, involucrisque canoras & bullatas, quas sæpe crepat nugas obsepturus. Ne quid de tricis Astrologicis dicam, quibus & hic crebro ad delirium usque indulget. Sed forte aliorum palato gratiora sunt, quæ nobis, ut variant hominum judicia, fastidium nausæque concitant. Per me ergo quivis suo abundet sensu. Has epistolas etiam Norimbergæ A. 1497. in 4. impressas esse, notat Whartonus l. c. conf. Maittaire Annal. Typ. T. I. p. 348.

§. 26.

Nunc brevem omnium ejus operum, junctim Basileæ 1561. duobus tomis in folio
edi-

editorum , conspectum exhibebimus (b).
Volumine primo continentur.

1. De Religione Christiana & fidei pietate liber.
2. Theologia Platonica : de immortalitate videlicet animorum ac æterna felicitate Lib. 18.
3. In epistolas Pauli Apostoli commentaria (c) & ascensus in tertium cœlum, ad Paulum intelligendum.
4. Prædicationes aut conciones Marfilii.
5. De quinque panibus Lucæ IX.
6. De illo Pauli ad Coloss. Si consurrexistis cum Christo.
7. De duobus discipulis euntibus in Emaus.
8. De laboribus ac ærumnis D. Pauli Apostoli.
9. De passione Domini.
10. De Stella Magorum, cujus ductu pervenerunt ad Regem Israël jam natum.

G 4

11. De

(b) Ex Eliæ Ehingeri Catalogo Bibliothecæ Augustanæ. f. 632. Hi vero tomi omnes Ficini libros complectuntur, exceptis versionibus Platonis & Plotini.

(c) Quicquid vero tituli opus illud in fronte gerat, nonnisi Epistolam ad Romanos explicatam dat: sunt verba Whartoni l. c.

11. De cantico Simeonis ac vera fidelium pace.
12. De creatione rerum.
13. De vita libri III. nempe sana, longa & coelesti.
14. Apologia, in qua de medicina astrologica, vita mundi & de magis Christum salutantibus agitur.
15. Quod necessaria sit ad vitam securitas tranquillitasque animi.
16. Epidemiarum antidotus, tutelam bonæ valetudinis continens (d).
17. Epistolarum Libri XII.
18. Dialogus inter Deum & animam theologicus (e).
19. De divino furore.
20. De felicitate.
21. Oratio ad Deum theologica.
22. Quæstiones quinque de mente.
23. Compendium Platonice Theologiæ.
24. Dia-

(d) Hunc librum Italica lingua scripsit noster. vid. Epist. L. IX. f. 160. Ab Hieronymo autem Riccio, teste Whartono, Latine versus est. Prodiit etiam Italice Venetiis 1556. hoc titulo: Il consiglio di Marsilio Ficino Fiorentino contra la Pestilentia. Con altre cose aggiunte appropriate alla medesima malatia. vid. Ehingeri Catal. p. 901.

(e) Hic dialogus & sequentes libelli ac orationes usque ad num. 44. insertæ quoque sunt editioni Epistolarum Ficini Venetæ A, 1495.

24. Dialogus inter Paulum & animam, quod ad Deum non ascendatur sine Deo.
25. Exhortatio ad bellum contra barbaros.
26. Oratio una de laudibus philosophiæ & altera de laudibus medicinæ.
27. De philosophia Platonica.
28. Vita Platonis.
29. Apologia de moribus Platonis.
30. Disputatio contra judicia Astrologorum.
31. De institutione Principis.
32. Oratio Christiani Gregis ad pastorem Sixtum Pontificem.
33. Oraculum Alphonfi Regis ad Regem Ferdinandum, inter illos quidem angelica lingua pronunciatum, deinde vero in humanam a Marsilio translatum.
34. Orphica comparatio solis ad Deum atque declaratio idearum.
35. Philosophica principis institutio.
36. De Christianæ legis divinitate.
37. De Platoniorum contemplationibus.
38. Oratio de charitate habita in collegio Canoniorum Florentinorum ad populum.
39. De adoratione divinæ virtutis.

106 *Conspectus omnium Ficini Operum.*

40. Apologi de voluptate.
41. Excerpta ex Proclo in Remp. Platonis.
42. Apologia in librum suum de sole & lumine.
43. Oratio ad Carolum Magnum Gallorum Regem.
44. De providentia, vaticiniis remediisque malorum.
45. De Sole Lib. I.
46. De lumine Lib. I.
47. De voluptate Lib. I.

Altero volumine hæc exhibentur.

1. Dionysii Areopagitæ translatio una cum suis argumentis.
2. In Platonem epitomæ seu argumenta, commentaria, collectanea & annotationes.
3. In Plotini libros 54. de rebus philosophicis argumenta, quibus tota ejus philosophia comprehenditur.
4. Expositio Prisciani & Marfilii in Theophrastum de sensu, phantasia & intellectu.
5. Mercurii Trismegisti Poëmander de potestate ac sapientia Dei: item Asclepius de voluntate Dei.
6. Athenagoras Atheniensis de Resurrectione. Nunc porro usque ad num.

17. sequuntur illæ variorum autorum versiones, quas Aldum Venetiis junctim vulgasse A. 1497. supra §. 24. diximus.
18. Sententiæ pulcherrimæ cum multarum rerum definitionibus, ex Marfilii Ficini operibus collectæ, & secundum ordinem alphabeti distributæ. Cæterum opera hæc prodiisse etiam Venetiis 1516. Basil. 1576. & Paris. 1641. Whartonus l. c. observat.

§. 27.

Restat, ut de libris quoque Ficini ineditis nonnihil differamus. Nimirum in epistola ad Angelum Politianum (f) se Theonis Smyrnæi mathematica in Latinum convertisse sermonem narrat, physiognomiamque & œconomica composuisse. Meminit quoque passim commentarii sui in Platonis Philebum de summo bono elaborati, quem A. 1489. d. 12. Jun. in literis ad Martinum Uranium (g) nondum prorsus absolutum scribit, eidem simul, Hermiam in Platonis Phædrum utcunque se traduxisse, nuncians.

Hæc

(f) Epist. L. I. f. 7. (g) Epist. L. IX. f. 160.

Hæc Hermiæ versio postea in Lucæ Holsternii Bibliothecam, quæ multa habuit *avendola*, migravit, quod index manuscriptorum ejus, Morhofiano Polyhistori (*b*) inditus, declarat. An exin in Civitatis Hamburgensis Bibliothecam, cui multos codices possessor moribundus legavit, cum aliis pervenerit, me quidem fugit. Nescio quoque, num Michael Pocciancius in Catalogo Scriptor. Florent. p. 123. quem Whartonus allegat, præter hæc alia Marsilii opera hætenus non edita enumeret, quia is mihi haud ad manus est. Fortetamen anecdotis ejus accensendus erit Liber contra vana Astrologorum judicia, cujus proœmium Epist. L. IV. f. 96. legitur. Inter scripta ejus juvenilia, de quibus §. 7. itidem quædam videntur esse inedita. Henr. Wharton l. c. Ficinum etiam pro Savonarola eruditissimam Apologiam scripsisse perhibet, quam parum abest, quin inter inedita referam. Operibus certe ejus junctim excusis inserta haud est. Nec unquam videre mihi contigit loca ab aliis ex illa citata. Nau-dæus, Bailius ac Buddeus recte quidem nostrum inter Savonarolæ hyperaspistas referunt, at nullus eorum, si recte memini, ad

(b) Tom. I. Lib. I. Cap. VII. p. 72.

ad librum pro isto vulgatum provocat. For-
san epistola supra §. 18. laudata ab iis indi-
gitatur.

§. 28.

His igitur laboribus perfunctus, in fata
concessit A. 1499. in villa sua Corregiana,
in quam alias secedere otioque literario ani-
mum recreare suum consueverat: febre ex-
tinctus, & sepultus Florentiæ in æde S. Ma-
riæ, teste Nic. Reusnero (*i*), qui tamen in
hoc fallitur, quod Septuagenario provectio-
rem eum obiisse scribat. Si enim præstan-
tissimorum virorum Auberti Miræi, Natalis
Alexandri, Henrici Whartoni, J. A. Fabricii,
J. F. Buddei, L. E. Du-Pinii, aliorumque
authoritatem secuti, A. 1499. nostrum e
vita emigrasse dicamus, annum ætatis 66.
tantum attigisse patet. Gravius vero errat
Janus Jacobus Boissardus (*k*), qui supremum
diem

(*i*) In Elogiis Clar. Virorum. H. 7.

(*k*) In Icon. virorum doctrina illustrium. P. I. p. 156.
Eleganter equidem sculptæ sunt hæc imagines a Theo-
doro de Bry, at plerasque non ad vivum, ut in titu-
lo promittitur, factas esse nonnulli judicant, vid. Ob-
servat. Halens. Lat. P. IV. p. 36. Ipsa, quæ iconibus
adjiciuntur, elogia, quanquam haud spernenda sint,
breve vitam delineationem præcipuorumque li-
brorum titulos complectentia, verumtamen in multis,
præsertim chronologicis, litura & correctione opus
ha-

diem cum explevisse A. 1483. ætat. 71. tradit, & Hieron. Cardanus, qui octogesimo ætatis anno illum decessisse vult (1). Post mortem autem Florentinis charam gratamque fuisse civis hujus sui memoriam, fidem facit Epitaphium, quo eum annis supra viginti post elapsis decorarunt, his constans versibus jambicis senariis:

En hospes, hic est Marsilius Sophiæ Pater:
Platonicum qui dogma culpa temporum
Situ obrutum illustrans, & Atticum decus
Servans, Latio dedit: fores primus sacras
Divino aperiens mentis actus numine.
Vixit beatus ante, Cosmi munere,
Laurique Medicis nunc revixit publico.

S. P. Q. F.

Anno M D XXI. (m).

Cinellus insuper statuam ipsi positam esse in ecclesia cathedrali Florentina (n) refert §. 29.

habent. Haud pauca quoque elogia magnam partem ex Nic. Reusnero exscripta sunt, nulla tamen ejus mentione facta, ut fere plagiariis annumerandus mihi videatur Boissardus.

(1) Notante D. J. A. Fabricio ad Trithemium de Script. Eccl. f. 211. In Jacobi le Long Bibliotheca Sacra Tom. II. f. 725. edit. Paris. 1723. Ficinus obiisse dicitur A. 1489. errore forsan typographico.

(m) Hoc Epitaphium legitur in Reusneri, & Boissardi Iconibus, Missonii Itiner. per Italiam &c.

(n) Nelle Belleze di Firenze f. 49. citante D. Jov. Fabricio in Historia Bibliothecæ suæ P. III. p. 200.

Sed nondum rerum a Ficino gestarum finis est. Cui adhuc superstiti nullus per otium dies exiit, qui vivus, inexplebilis laborum heluo, in studio & opere suo nunquam cessavit, nec post mortem statim quiescere potuit, sed Michaeli Mercato visendum se præbuit, earum rerum de quibus vivens cum ipso disputaverat, fidem facturum, si Cæsari Baronio Cardinali (o) credendum, cujus verbis rem, prout gesta esse fertur, exponemus. Haud inexplorata, inquit, referam,, sed quæ complurium eruditorum virorum,, scimus assertionem firmata, imo & a religio-,, sis viris ad populum pro concione sæpe nar-,, rata. Ego vero, a quo accepi, auctorem,, proferam, nempe integerrimæ fidei virum,, Michaellem Mercatum S. R. E. Protonota-,, rium, probitate morum atque doctrina,, spectatum: ipse enim narravit de avo suo,, eodem quo ipse nomine nuncupato, Mi-,, chaele Mercato Seniore, cui cum Marsilio,, Ficino nobilissimi ingenii viro summa in-,, tercedebat amicitia consuetudo, parta &,, aucta philosophicis facultatibus, in quibus,, Platonem ambo affectabantur auctorem.,,
„ Acci-

(o) In Annal. Eccles. ad Ann. 411. Tom. V. f. 371.
edit. Colon. A. 1624.

„Accidit autem aliquando , ut ex more ;
 „quidnam post obitum superfit homini , ex
 „ejusdem Platonis sententia , sed non sine
 „tamen trepidatione deducerent , quæ la-
 „bantia Christianæ fidei Sacramentis sufful-
 „cienda essent : eo enim argumento extat
 „ejusdem Marsilii ad ipsum Michaellem Mer-
 „catum erudita quidem epistola (p) de ani-
 „mi & Dei immortalitate . Cum vero inter
 „differendum eorum progressa longius fuif-
 „set disputatio , eam ad calcem perductam
 „illo clauferunt corollario , ut juncta simul
 „dextera pacti fuerint , uter eorum ex hac
 „vita prior decederet (si liceret) alterum
 „de alterius vitæ statu redderet certio-
 „rem . Quibus inter se conventis , ambo jurati
 „ab invicem discessere . Interlapso autem
 „haud brevi temporis spatio evenit , ut cum
 „summo mane idem Michael Senior in
 „philosophicis speculationibus vigilaret , ex
 „inopinato strepitum velociter currentis
 „equi , ejusdemque ad ostium domus cûr-
 „sum sistentis audiret , vocemque simul Mar-
 „sili clamantis : O Michael , o Michael , ve-
 „ra , vera sunt illa . Ad vocem amici Mi-
 „chael admiratus , assurgens , fenestramque
 ape-

(p) Epist. L. I. f. 1. 2. Epistola hæc dialogum inter Deum & animum theologicum exhibet.

aperiens, quem audierat, vidit post terga,, ad cursum iterum aſto equo candido, can,, didatum: proſecutus eſt cum voce, Marſi,, lium, Marſilium invocans: proſecutus &,, oculis; ſed ab eis evanuit. Sic ipſe novi,, caſus ſtupore affectus, quid de Marſilio Fi,, cino eſſet, ſolicitiuſ perquirendum cura,, vit (degebat ille Florentiæ, ubi diem clau,, ſit extremum) invenitque eundem illa ipſa,, hora deſunctum, qua eo modo auditus &,, viſus eſt ſibi., Haſtenus Baronii verba. Ego rem narraſſe contentus, quicquid ejus eſt, lectoris iudicio permitto, hoc unicum addens, plura iſtiusmodi exempla recenſeri in D. Jo. Frid. Majeri Programme de Paſto adparitionis poſt mortem, D. J. A. Fabricii Diſſertationi inaugurali de Recordatione animæ humanæ poſt fata ſuperſtitis ſubjuncto, ubi etiam de moralitate huius generis paſtorum ex inſtituto diſputatur (q).

H

S. 30.

(q) Ea diſſertatio publico examini ſubjeſta fuit a viro, noſtra laude majori, J. A. Fabricio, pro Licentia impetrandi ſummos in Theologia honores, Kilonii A. 1699. recuſa ibidem 1714. Tale paſtum etiam Joannes Wilmotus, Roſtæ Comes, cum alio nobili & ſpectatæ dignitatis viro iniit. Verum quum hic nobilis in conſictu navali paulo poſt interemptus, nuſpam appareret, ea res in reliqua vita magnæ illi Comiti fraudi fuit.

§. 30.

Jam nihil amplius superest, nisi ut quædam doctorum de Marsilio Ficino judicia proferamus in medium, omiſſis iis, quæ a Thoma Pope - Blount (r), Tob. Magiro & C. W. Eubenio (†) collecta sunt. In eo laudando prolixus est Joann. Cavalcantes in epistola ad ipsum Marsilium perſcripta (s), ex qua tamen ea duntaxat verba excerpam, quæ felicissima nostrum memoria fuiſſe præditum evincunt: Ad hoc etiam te responde velim, unde memoria illa tot rerum, capacissima, quæ adeo tenacissima est, ut quolibet momento ſibi omnia adſint, quæ unquam vidisti aut audiſti, nec tantum res tenet, ſed quibus eæ geſtæ ſunt meminit

tem-

fuit. Quanquam deinde tandem, Burneti rationibus victus, agnoverit, iniquum eſſe, ſi cogitaret, ſubſtantias, in alio ſtatu conſtitutas, iis legibus ac terminis non fore adſtrictas, ut propriis affectibus non imperarent; ejusmodi autem, quales eas eſſe viſum foret ſummæ poteſtati, ſibi que, qui adeo naturalia veritatis principia corruperat, rem adeo inuſitatam, qua convinceretur, ne utiquam expectandam. Vide Roſtæ Comitæ in extremis *Malayotas* a Gilberto Burneto memoriæ proditam, ac Latinitate donatam a Guil. Gaesbecio, pag. 9. & 10. edit. Ultraject. 1698.

(r) In Censura celebriorum authorum. p. 492. ſqq.

(†) In Eponymologio critico p. 349.

(s) Epist. Ficini L. III. f. 70.

temporum atque locorum.,, Lanselius (t)
 eum lumen ævi sui, varia abundantique do-
 ctrina inclutum; Henr. Cornelius Agrippa
 commendatissimæ doctrinæ virum (††);
 Keckermannus magnum philosophum (u);
 Reusnerus parvum corpore, ingenio ingen-
 tem, linguæ utriusque ornamentum singu-
 ulare, lumen Italiæ, & patriæ decus (x);
 Boissardus Græcæ & Latinæ linguæ peritissi-
 mum, hominem ingenii acuti & vigilantis
 (y); Cardinalis Bona Platoniorum princi-
 pem, qui fere solus ex Platoniciis inoffenso
 pede percurri possit (z); Weismannus Phi-
 losophum, Theologum ac Medicum cele-
 berrimum (a); Arpe Platonis fere demor-
 tui Æsculapium, præclaris ingenii monu-
 mentis immortalitatem adeptum (b), no-
 minant. Ab Octavio Ferrario (c) eruditionis

H 2

ac

(t) Disput. Apolog. de S. Dionysio p. 487. Tom. II.
 Opp. Dionysii Areop. edit. Antwerp. A. 1624.

(††) Epistol. Lib. VII. p. m. 365.

(u) In Syttemate Physico. p. 962. (x) l. c. (y) l. c.

(z) In Notitia Autorum Lib. de divin. Psalm. præ-
 missa.

(a) Introd. in memorabilia Historiæ Eccles. N. T.
 Tom. I. p. 1021.

(b) De Talismanibus & Amuletis p. 121. Politianus
 quoque mortui pene Platonis Æsculapium nostrum
 vocavit Epist. L. VI. p. 226.

(c) Var. Opp. Tom. I. p. 516.

ac sapientiæ, quæ postea ad externos migravit, auctoribus ac principibus accensetur. Natalis Alexander (d) eum magnum nomen sibi inter philosophos peperisse, editis operibus clarissimum judicat. Jacobo Philippo Bergomati (e) audit ingenii eminentissimi & prope divini vir, utriusque linguæ eruditissimus, ac multarum scientiarum locupletissimus Doctor, homo sane memorabilis, moribus videlicet & sanctimonia insignis, ac inter Platonicos doctores facile princeps, qui excellentiam suæ permaximæ eruditionis immortalitati scriptis commendaverit. Matthæus Bossus Veronensis (f) Marfilii Ficini & Angeli Politiani sublimia opera se admirari, neque intelligere ait, quid ullius generis literarum conferri possit eorum editionibus clarissimisque operibus, quæ multa alter, alter vero pauciora, sed gravissima uterque conscripserit. Jo. Franciscus Picus Mirandulanus (g) eum hominem omnifaria literatura redolentem, & maximum ex his, qui tum vixere, Platonicum appellat, ejusque opera patrum (Jo. Picum) in Aca-

(d) Hist. Eccl. Tom. VIII. f. 182.

(e) In Supplemento Chronic. f. 317.

(f) In Dedicatione Recuperationum Fesulanarum, Bononiæ 1493. editarum, ad Joannem Medicem Cardinalem. (g) In vita Jo Pici Mirand. p. 104. collect. Batef.

Academicis sibi vendicandis usum fuisse testatur. Simon Grynæus (*b*) his nostrum dilaudat verbis: Probare vehementer studium conatusque & pietatem Marsilii soleo, viri meo quidem videre optimi, qui ut philosophiam nobis veterem gustandam præberet patefaceretque, cum vires suas non ignoraret, nihil curavit, de nomine & fama sua quid fieret, modo studiis & veritati consuleret bene: cum, qui propter utilitatem publicam ingenio cedere velit, nullus facile reperiatur. Philippus Wannemakerus (*i*) cum inter magna illa nomina, virosque seriis scriptis claros, quos Laurentius Medices fovit, coluit, amavit, refert. Cinellus denique illum maectat elogio di Filosofo maraviglioso e singolare, e nella dottrina di Platone per tutto tenuto in sommo onere (*k*). Nunc rivos claudo, additis, tantum adhuc versibus Angeli Politiani (*l*):

H 3

Mo-

(*b*) In præfatione Platonis Operibus Basil. 1532. editis præmissa.

(*i*) In Triumpho Literatorum Mediolani 1611. excuso. p. 97.

(*k*) Citatus a Jo. Fabricio in Hist. Biblioth. suæ T. III. p. 200.

(*l*) Aliorum etiam in Ficinum poemata leguntur in Reusneri Elogiis, ubi quoque ejus effigies exhibetur, sed talis, quæ hominem potius robustum & procerum, quam

Mores, ingenium, Musas Sophiamque su-
premam

Vis uno dicam nomine ? Marsilius.

Et Joan. Latomi :

Hic, hic Marsilius notissimus ille Ficinus,
Totius Aufoniæ luxque decusque jacet.
In parvo ingentes qui clausit corpore
dotes :

Immo non clausit, sed magis exeruit.
Quare etiam hac parva fama est angustior
urna :

Ni tamen hæc potius, quem replet,
orbis erit.

Nec non Julii Cæsaris Scaligeri :

Sancta anima, & cœlum tibi tu qui sæpe
fuiſti,

Spira in me rari flamina pura boni.
Ter cœli socia es : ter magni civis Olympi :
Ter comes in gremium pulcra re-
cepta Dei.

Cum fluis ex astris : divi monimenta Pla-
tonis

Cum capis : & nunc te cum Jovis aula
capit.

III.

quam tenellum & imbecillum pumilionem referre mi-
hi videtur. Alia illius imago apud Boissardum conspi-
citur.

III.

*Apologia pro Marfilio Ficino, Magie
postulato.*

HAËtenus, quæcunque ad Marfilii vitæ historiam pertinere videbantur, sedulo collegimus: restat, ut an criminis magiæ jure infimulatus sit, nec ne, æquo judicio dispiciamus. In hac autem re versabimur sine ira ac studio, quorum causas procul habemus. Operæ vero pretium facere ii mihi videntur, qui in hujus farinæ accusationum veritatem solícite inquirunt. Sæpiusculæ enim viri, inclutum nomen varia ac multiplici doctrina adepti, obtrectatorum invidia diversorum criminum suspicione sunt gravati immerito, quorum patrociniū suscipere, ingenui esse hominis censeo, ita tamen, ut nulla veritati vis inferatur. Ego sic animatus sum, ut, cum livorem optimis plerumque viris nubila prætereunda crebra me edocuerit experientia, semper de istiusmodi accusationibus judicium meum suspendere soleam, donec argumentis evidentibus & insuperabilibus eas evictas cognoscam, illius Phædrini (a) memor:

H 4

Opi-

(a) Lib. III. Fab. XLIX.

Opinione alterius ne quid ponderes,
Ambitio namque dissidens mortalium
Aut gratiæ subscribit aut odio suo.

Erit ille notus, quem per te cognoveris.

Superfedere vero possemus hoc labore, si Gabrieli Naudæo, strenuo tot præstantium virorum vindici, nostrum ab ea culpa liberare placuisset: sed quum hoc ab illo factum haud sit, a nobis jam tentabitur. Indagandus vero est primo omnium istius criminationis fons, qui, nisi vehementer fallor, liber ejus de vita cœlitus comparanda fuit. Scilicet scripsit Ficinus tres de vita libros, quorum primo de studiosorum sanitate tuenda, secundo de vita producenda, tertio de vita cœlitus comparanda agit. Primo illi junctim prodierunt A. 1489. Licet enim editioni illi, quam in manibus teneo, non adscripta sit anni, loci & typographi nota, eo tamen tempore eam vulgatam esse, ex Apologia isti adjecta, & dicto anno d. 15. Sept. in agro Caregio exarata-conjicio, Recusi sunt deinde sæpius hi libri (†) ac Argentorati quoque in Germanicum conversi

(†) Anno statim 1494. Joannem Menchen, Sacerdotem Colonensem & Juris Canonici Professore novam eorum editionem curandam suscepisse, ipse refert Ficinus Epist. L. XII. f. 193.

versi sermonem cum Hieronymi *Brunschwicks* Arte distillandi A. 1515. lucem viderunt (b), nisi fortan ibi duæ saltem priores ejus operis partes translatae exhibeantur. Haud inficiandum est, varia egregia & suo constantia pondere monita hisce libris inspersisse Marsilium, atque adeo non paucorum laudes inde retulisse. Unum allegabo Antonium Nigrum Uratislaviensem, ad Joachimum Camerarium (c) ita scribentem : *Profuturus tibi esset judicio meo liber Marsilii Ficini, qui de sanitate tuenda post Galenum optime scripsit, multa sane præcepta utilia valetudini tua inde excerpere.* Nec tamen negare ausim, librum cum primis tertium de vita coelitus comparanda, diversa continere paradoxa, quæ variis contra autorem suspicionibus cautam præbere queunt. Ipsi certe Morhofio *liber iste magici aliquid sapere videtur: docet enim*, inquit (d), *in eo, quomodo vita nostra instituenda sit, ut astrorum nobis assignatorum constitutioni sit conformis: in eo libro per imagines astrologicas mira se facturum confidit, quem se refutaturum fuisse dicit Jo. Franc. Picus Mirand. Lib.*

H 5

VII.

(b) Vid. Ehingeri Catal. Bibl. August. f. 347.

(c) cf. L. III. Epistolarum Eobani Hessi & aliorum, a Joach. Camerario editarum L.

(d) Polyhist. Tom. II. L. I. C. VII. n. 15. p. 38.

VII. de rerum prænotione C. 10. *nisi ob singularem cum illo amicitiam intermisset.* An alio adversus nostrum, quem inter magos retulit, armorum genere utatur Leonardus Lessius (e), ii viderint, quibus ejus scripta ad manus sunt. Ex ipsius Ficini Epistolis colligo, ejus inimicos ex hoc de vita cœlitus comparanda libro, cum vix prelo exiisset, illum apud Summum Pontificem suspectum reddere annisos fuisse. Amicorum igitur & Mœcenatum contra hostium insultus patrocinium ipsi implorandum erat. Præsertim vero ab Hermolao Barbaro, ut Papæ vitam suam, h. e. libros de vita de meliori commendaret, suamque strenue ageret causam, literis A. 1490. d. 15. Maji (f) majorem in modum petiit atque contendit. Ad Antonium autem Calderinum, quo ad benevolentiam Marci Cardinalis sibi conciliandam paratio utebatur, eodem mense hæc de iis (g) perscribit: *Quicumque non perturbata mente, sed judicio sano nostra legerit, plane perspiciet, quam sincero consilio, quam pia mente, quanta religionis veneratione conscripserim. Præterea cognoscent literati omnes, quantum debeant favere libris nostris, literatorum*
vita

(e) Vid. Th. Pope-Blount Censuram Autorum p. 493.

(f) Epist. L. X. f. 166. (g) l. c. f. 167.

vita diligentissime consulentibus. Haud vero in levi famam fortunamque Marfilii tum versatam esse discrimine, vel exinde patet, quod superatis difficultatibus de Pontificis gratia certior factus (b), verbis vix exprimere valuit, quantum iis, qui patrocinium sibi præstiterunt, deberet. Ampullosis loquendi formis, quibus alias quoque eum delectatum sæpe fuisse illius me docent epistolæ, vel hac ratione lectu minus jucundæ, istorum in semerita deprædicat. Ut speciminis loco aliqua recitem, en verba ad Rainaldum Ursinum Archiep. Florent. (i); *Salve diu, salve semper pastor bone, salus ovium: pastor bonus animam suam ponit pro ovibus suis, ut eas pascat & tueatur a lupis. Ita tu nuper agnum tuum Ficinum pie admodum ex voracibus luporum faucibus eruisti, & Saturno jam nos graviter invadenti tu quasi Jupiter es oppositus.* — Quoniam vicarius ejus (Jovis coelestis) Summus Pontifex vestra opera nobis aspirare cæpit, opto eum non solum aspirare nobis, verum etiam ipsum spirare diu. Itaque si ejus genesin intelligerem & corporis habitudinem, & a quo morbo medici huic maxime timeant, confectionem vel medicinam aliquam dili-

(b) cf. præcedentis commendationis §. 15.

(i) Epist. L. X. f. 167.

diligenter excogitare diuturnæ vitæ atque prosperæ valetudini profuturam. Ut vero missis ambagibus nunc candide dicam, quod res est: meo quidem iudicio Marsilius Magiæ falso postulari, at ineptæ anilisque superstitionis reus iuste agi videtur. Scilicet idem nostro contigit, quod aliis pluribus, qui Astrologiæ judiciariæ nimium statuere pretium, eique exercendæ operam addixere suam. Non raro ejus generis homines in magiæ suspicionem incidisse ipse fatetur Naudæus (k). Ut autem jam tibi nostræ, quam de Ficino tulimus, sententiæ veritatem probemus, ejus mentem, & quas foverit, opiniones breviter ex libro de vita cœlitus comparanda delineabimus. Eo Plotini de favore cœlitus hauriendo librum illustrare satagit, prout in dedicatione ad Matthiam Corvinum, Pannoniæ Regem, testatur. Timidiori animo Marsilium hoc opusculum divulgasse, colligo ex ejus protestatione, præfationi subjecta, qua in omnibus, quæ hic aut alibi a se tractantur, tantum se assertum velle innuit, quantum ab Ecclesia comprobatur. Evincit id etiam Apologia, huic libro annexa, in qua de medicina, astrologia, vita

(k) Apologie pour les grands hommes Soupçonnez de Magie. Chap. V. pag. 55.

vita mundi, item de magis, qui Christum natum salutaverunt, mentem suam exponit.

Mundum igitur esse animatum cum Platonice credidit Ficinus: hominem porro, idem existimavit valetudini felicitatque tuæ consulere posse vita ea ratione instituta, ut astrorum ipsi assignatorum constitutioni sit conformis: esse quasdam veluti escas, quibus animati mundi & stellarum munera allicere possent mortales, sibi que vendicare. Inter animam mundi & corpus ejus inesse spiritum, eumque necessario requiri tanquam medium, quo anima divina & adsit corpori crassiori & vitam eidem penitus largiatur. Per hunc mundum generare omnia, & illum talem ferme esse in corpore mundi, qualis in nostro noster, hoc excepto, quod anima mundi eum non trahat ex quatuor elementis, tanquam humoribus suis, sicuti ex nostris nostra, sed hunc proxime ex virtute sua procreet, & simul cum eo stellas, statimque per eum pariat quatuor elementa. Hunc ergo mundi spiritum ut sibi quivis, sanitatis ac prosperitatis avidus, insinuet faventemque reddat, suadet. Hauriri autem eum ab homine per suum spiritum, illi suapte natura conformem, maxime si reddatur etiam arte cognatior, id est, si maxime coele-

coelestis evadat. Evadere vero coelestem, si expurgetur a sordibus, & ab iis, quæ inhærent ipsi dissimilia cœlo, & eas quidem sordes non solum inter viscera si fuerint, verum etiam si in animo, si in cute, si in vestibus, si in habitatione & aëre, spiritum frequenter inficere. Hunc nostrum spiritum, rite per naturalia præparatum atque purgatum, accipere ab ipso mundi spiritu plurimum per radios stellarum opportune susceptos, si leniter movearis, quosdam pro viribus gyros agens, vertigine devitata, cœlestia lustrans oculis & mente versans: frequenti item usu plantarum, præsertim si adhuc viventibus recentibusque & matri terræ quasi ad huc inhærentibus nutriaris atque fovearis: inter plantas suaviter redolentes, vel saltem non male olentes verferis quam frequentissime: hoc enim odore quasi flatu spirituque vitæ mundanæ recreari atque vegetari spiritum nostrum, odoribus ejusmodi natura simillimum, perque spiritum medium inter corpus & animam facile corpus quoque refici. Diurno tempore diutissime sub dio versandum esse, quatenus tuto vel commode fieri possit, in regionibus altis & serenis atque temperatis: sic enim solis stellarumque radios expeditius puriusque undi-

undique nos contingere, spiritumque nostrum complere mundi spiritu per radios uberius emicante: & quæ sunt ejus generis alia, a Ficino nobis præscripta.

Magnam vero vim & efficaciam noster in hæc inferiora & ipsum etiam hominem, ejusque tum corpus, animam & spiritum (tribus enim nos partibus substantialibus constare asserit) tum actiones & fata astris tribuit, & errantibus, & fixis: quæ sint cujusque horum virtutes, quid cuiusque subsit, quid boni a quocunque & quando expectandum, quid mali metuendum, prolixè & solícite enarrat. Nihil igitur facile inconsultis astris suscipiendum esse suadet: præsertim vero explorandum, quæ stella, quid boni cuique in genitura promiserit, atque ab ea potius quam ab alia reposcendam esse gratiam, & ab unaquaque non quodlibet donum, & quod aliarum est, sed ejus proprium expectandum: in medicinarum præcipue confectiõne & usu astrorum positum curate observandum, atque hinc astrologiæ cognitionem medico summopere necessariam esse arbitratur. Cumprimis, si vitam producere cupias ad senectutem, quoties septimo cuilibet propinquas anno sive climacterico, diligenter consulendum astrologum, ex eoque
unde

unde immineat tibi discrimen, ediscendum, deinde adeundum medicum monet (1). Præterea spiritum nostrum cœlestibus non per qualitates duntaxat rerum sensibus notas præparari: sed etiam multoque magis per proprietates quasdam rebus cœlitus insitas & sensibus nostris occultas rationique vix notas asseverat. Sic e.g. smaragdum, hiacynthum sapphyrum, topazium, rubinum, unicorni cornu, præcipue vero lapidem bezoar & alia occultis proprietatibus prædita, & idcirco non solum intus assumpta, sed etiam si carnem tangant, ibique calefacta virtutem suam promant, vim inde cœlestem spiritibus inferere, qua se contra pestem tueantur atque venena, memorat. Pluribus etiam de virtute imaginum, certo cœli positu variis modis ad varios mirabiles effectus compositarum (m) ex mente antiquorum astrologorum ita differit, ut parum absit, quin artem conficiendi amuleta & talismanes sive imagines astrologicas docere nos voluisse videatur. Et hinc forsan magiæ nota illi inuri posset, nisi aliquoties hæc a se tantum historice refer-

(1) cf. Libr. de vita longa Cap. XX.

(m) Elegans extat viri doctissimi P. F. Arpe liber de naturæ & artis operibus, Talismanes & Amuleta dictis, cum recensione Scriptorum hujus argumenti, edit. Hamb. 1717. in 8.

referri, non probari ipse testaretur. Fate-
tur equidem, se juvenem adhuc magneti
insculpere cœlestis ursæ figuram, & ferreo
filo collo suspendere voluisse, sed quum à
theologis & Jamblichō imaginum fictores
a dæmonibus malis occupari sapius atque
falli didicisset, intermisisse. Diserte quo-
que, si quam annuli, amuleta & imagines
certa ratione confecti vim habeant, non tam
figuræ, sed materiis, hoc vel illo pacto tem-
poreque compositis eam adscribendam esse
affirmat. Recitabimus nunc quædam ejus
loca: „Cum natura cœlestis (inquit Cap.,
XV.) tanquam inferioris naturæ regula so-
leat tenore quodam progredi naturali, &
ita progredientibus adspirare, merito diffi-
dunt plerique, imagines ejusmodi cœle-
stem aliquam virtutem habere. Ego quo-
que ambigo sapius, ac nisi & omnis antiqui-
tas, & omnes astrologi vim mirabilem
habere putarent, habere negarem. Ne-
garem equidem non omnino. Opinor,
enim, nisi quis aliter persuaserit, ad prospe-
ram valetudinem saltem aliquam habere,
virtutem, electæ præsertim ratione mate-
riæ: tametsi multo majorem inesse phar-
macis arbitror, & unguentis sidereo favore,
conflatis. — Quæ vero ex magorum vel,
I astrolo.

„astrologorum opinione ad Plotinum in-
„terpretandum pro imaginibus allegari pos-
„sunt, deinceps breviter afferam, si te pri-
„us hic admonuero, ne putes probare me
„usum imaginum, sed narrare: ego enim
„medicinis ad cœlum temperatis, non ima-
„ginibus utor, atque ita cæteris quotidie
„consulo. Sic Cap. XVIII. hæc usurpat verba:
„Tutius fore arbitror, medicinis, quam ima-
„ginibus se committere, rationesque a no-
„bis de potestate cœlesti pro imaginibus af-
„signatas in medicinis potius quam in figu-
„ris efficaciam habere posse. Probabile
„enim est, si quam vim imagines habent,
„hanc non tam per figuram acquirere, quam
„per materiam possidere naturaliter sic af-
„fectam. Ac si quid denuo acquiritur, dum
„insculpitur, non tam per figuram compa-
„rari, quam per calefactionem contusione
„quadam proveniente: quæ quidem
„contusio calefactioque facta sub harmo-
„nia cœlesti simili harmoniæ, quæ quon-
„dam materiæ virtutem infuderat, excitat
„virtutem ipsam atque corroborat, sicut fla-
„tus flammam, & manifestam efficit ante
„latentem. Cap. XX. ita fatur: Ego ima-
„gines in rem distantem vim habere ullam
„non satis intelligo, habere vero in gestantem
„non

nonnullam suspicor, non tamen talem,,
opinor, qualem plerique fingunt, & hanc,,
ratione materiæ potius quam figuræ, atque,,
ut dixi, longo intervallo medicinas ima-
ginibus antepono., Sed pergendum est ad
reliqua. Cap. XXI. de virtute verborum at-
que cantus ad beneficium cœleste captan-
dum agit, præterque alia ita disputat :
Difficillimum quidem est iudicatu, quales,,
potissimum toni, qualibus convenient stel-
lis, quales item tonorum compositiones,,
qualibus præcipue sideribus aspectibusque,,
consentiant: sed partim diligentia nostra,,
partim divina quadam sorte non aliter id,,
assecuti sumus, quam Andromachus in,
theriaca componenda diutissime fatigatus,,
ac tandem post diligentiam divina sorte,,
consecutus theriacæ virtutem —. Tres,,
vero potissimum regulas ad hoc afferemus,,
si prius admonuerimus, ne putes nos in,,
præsentia de stellis adorandis loqui, sed po-
tius imitandis, & imitatione captandis.,
Neque rursus de donis agere credas, quæ,,
stellæ sint electione daturæ, sed influxu,,
potius naturali. — Prima regula est, ex-
quirere, quas in se vires, quosve ex se effe-
ctus stella quælibet & sidus & aspectus ha-
beant, quæ auferant, quæ ferant, atque ver-,,

„borum nostrorum significationibus hæc in-
 „serere, detestari quæ auferunt, probare
 „quæ ferunt. Secunda: considerare, quæ
 „stella cui loco maxime vel homini domi-
 „netur, deinde observare, qualibus com-
 „muniter hæ regiones & personæ tonis utan-
 „tur & cantibus, ut ipse similes quosdam
 „adhibeas. Tertia: situs aspectusque stella-
 „rum quotidianos animadvertere, atque sub
 „his explorare, ad quales potissimum ser-
 „mones, cantus, motus, saltus, mores,
 „actus incitari homines plerique soleant, ut
 „talia quædam tu pro viribus imiteris in
 „cantibus, coelo cuidam simili placituri,
 „similemque suscepturi influxum.

Cæterum Marsilius generatim omnibus,
 qui diu feliciterque vivere desiderant, sua-
 det, ut ingenium, sidus, geniumque suum
 & locum eisdem convenientem cognoscere
 allaborent; ut porro in liberis procreandis,
 præparandis epulis, ædificiis & habitatione
 sibi paranda, atque vestibus siderum consti-
 tutionem non prorsus negligant. Sed nimis
 diu & haud sine tædio in campo sentibus
 adeo horrido spinisque rigenti commorati
 sumus: nunc defatigati & nausea affecti egre-
 di rursus anhelamus. Nunquam certe has
 res, parum immo nihil amœnitatis secum
 feren-

ferentes, persecuti fuisset, nisi ad biographiam Ficini perficiendam pertinere visæ nobis essent. Tuum jam erit, an is jure meritoque magicæ diabolicæ a nonnullis accusatus sit, judicium ferre. Ego magici nihil, superstitiosi vero plurimum in his deprehendo: atque multa ex iis, quibus characterem hominis superstitiosi argute & eleganter exhibet Sam. Werenfelsius, Theologus Basileensis, summo ingenio præditus, in nostrum optime convenire existimo. Ita autem ille (n) inter cætera: Nihil hic incipiet, quin prius calendarium inspexerit,

- - capiendo nulla videtur,,

Aptior hora cibo, nisi quam dederit Petrosyris.,

Siderum ignes pejus metuet, quam cum,, proximus ardet Ucalegon. Venam sibi secari non patietur, nisi impetrata a planetis,, venia. Semen terræ non committet, cum,, terra, sed cum luna id jusserit. Caput,, tonderi jubebit, cum Luna est aut in Leone,, ut capilli instar villorum leoninorum rigescant, aut in ariete, ut instar cornuum,, arietinorum crispentur. Quicquid crescere,,

I 3

volet,

(n) In dissert. de superstitione in rebus physicis. p. 633. Operum junctim Basil. 1718. in 4. editorum.

„volet, crescente hoc fidere; quod sensim
 „diminui, decreſcente inchoabit. Cum in
 „Tauro Luna eſt, nunquam adduci poterit,
 „ut medicamenta hauriat, ne animal hoc
 „ruminans medicamentum evomere cogat.
 „Vitabit mare, quoties Mars eſt in medio
 „cœli, ne bellator iſte Deus piratas adver-
 „ſus ſe ſuſcitet. Arborem ſeret in Tauro,
 „ut ſignum hoc, quod fixum aſtologis ap-
 „pellare placet, altius eam in terra deſigat.
 „Si quando adire volet principem, expe-
 „ctabit, donec Luna conſocietur Soli: tum
 „enim ſalutaris eſt minoris cum majore ſo-
 „cietas. — Annum climactericum præter-
 „greſſus non aliter lætabitur, ac ſi ex mor-
 „tis ungulis elapſus eſſet. — Ægrotus her-
 „bis non utetur, niſi fauſta quadam hora
 „decerptis. — Nihil denique tam difficile
 „erit, quod numerorum, quod verborum atq;
 „characterum virtuti non pervium credat.
 Hæc vir eruditiffimus. Conradus Geſnerus(o)
 de Ficini libris de vita ſequentem in modum
 judicat: *Multa in illis ſuperſtitioſa ex aſtologia
 obſervatione traduntur; audio illum jam ſenē in
 Fr. Pici gratiam, ſive argumentis illius perſua-
 ſum, aſtologiam ceu vanam rejeciſſe, qua de re in*
epi-

(o) In Bibliotheca Univerſali, f. 499.

epistolis ejus quadam legisse memini. Gesnerum nostri literas ad Angelum Politianum A. 1494. d. 20. Aug. datas (p) in animo habuisse auguror, quibus, quid de astrologia sentiat, exponit, ita quidem, ut cum Politiano & Pico, strenuis astrologicae vanitatis oppugnationibus, eandem se fovere mentem asserat. De libris vero suis de vita sic ibidem scribit: „In Lib. de vita,„ ubi profiteor medicinam, ac remedia vitae,„ utcunque & qualiacunque possum, undique„ diligenter exquiro, neque despicio pror.„ fus imagines illas (coelestes), neque omnes„ respuo regulas: etsi enim arbitror certam„ iis rationem nullam inesse, tamen ut stu.„ diosissimus humanæ medicinæ curator re.„ media non solum sapientibus certa, sed„ etiam multis probabilia sector, ut subsidia„ passim accumulem, quomodo libet, profu.„ tura. Nequid denique prætermiserim in.„ tentatum, quod ad vitam utcunque con.„ ducturum cuiquam videri possit, nonnulla„ tamen intersero firmiora, multa quoque„ passim congero, quæ & si forte minus spe.„ ro, tamen opto prodesse. Quod autem„ in principio libri tertii dicere videor, ima.„ gines„

„gines ab antiquioribus Platoniceis in cœlo
„dispositas esse, non id equidem volo.
„Non enim consilium ibi meum est, Pla-
„tonicos affirmare cœlestium imaginum af-
„sertores, de quibus aut nihil aut parum
„quid loquuntur: Sed Platoniorum quo-
„rundam fuisse sententiam, mundi animam
„cœlestia sibi corpora peperisse, stellasque
„cum cœlo, atque ultra stellas singulas, si
„modo ibi ullæ sint imagines, ejusmodi
„quoque imagines genuisse. Narrat illic
„dispositiones signorum imaginumque, non
„quales apud Platonicos, sed quales apud
„astrologos observaverim: jam vero quan-
„tum imaginibus vel cœlestibus credam;
„vel arte factis confidam, progressio libri
„declarat., Deinde se inibi, cum philo-
sophicis poëtica miscentem, liberius inter-
dum & forte licentius evagatum, sibi que
haud ingratum esse fatetur, astrologica por-
tenta a Pico Mirand. singulariter confu-
tata fuisse. In his igitur ut nos
acquiescamus æquum & justum
esse censeo.

IV.

Leonardi Lauredani, Venetiarum Ducis, litteræ ad Reip. Memmingensis Procures.

Leonardus Lauredanus, Dei Gratia Dux Venetiarum &c. Magnificis & Egregiis Viris Magistro civium & Consulibus Memminghen, Amicis carissimis salutem & sinceræ dilectionis affectum. Certo scimus, Magnificentias Vestras intellexisse successum adversæ fortunæ contra statum nostrum: quod judicamus ob antiquam inter nos amicitiam & benevolentiam Vestris Magnificentiis vehementer molestum fuisse. Nobis autem ut illis, qui eas amamus summo opere, visum fuit cum eis communicare, quantum nobis occurrit: & præcipue ut ipsæ cognoscant, quanta cum reverentia Cæs. Majestatem prosequuti sumus, & prosequimur. Prætermitemus, quæ semper diximus & scripsimus superioribus mensibus Vestris Magnificentis, quod nostra constantissima mens erat, non modo servare inducias, tam solenniter celebratas & firmatas cum Cæs. Majestate, verum etiam devenire ad perpetuam pacem cum ea &

Sacro Romano Imperio, quoniam semper fuimus & volumus esse ejus obsequentissimi & devotissimi cultores. Et quanquam vestræ Magnificentiae sciant, omne jus divinum & humanum velle, quod induciæ nobis serventur: tamen ut ostendatur singularis reverentia nostra erga præfatam Majestatem Cæs. & Sacrum Rom. Imperium, & ipsa experientia comprobetur, sine alicujus requisitione fecimus consignari repræsentantibus Cæs. Majestatem cuncta loca & terras ipsius Cæs. Majestatis per nos superiori anno acquisitas, quæ loca erant adeo fortificata & taliter munita, quod facilis erat nobis eorum defensio, judicantes placare ipsam Cæs. Majestatem erga nos, & ab ea in gratiam recipi: tamen ejus Celsitudo nunquam se placare voluit, neque admittere oratores nostros, quorum medio sperabamus illi declarare & clare ostendere, quorsum tendant cogitationes Regis Franciæ, qui ad aliud non invigilat, nisi ad surripiendam ejus coronam, & se tandem orbis dominum facere. Non fuit dare modum, ut ejus Cæs. Majestas dignata fuerit suscipere humile & honestum desiderium nostrum, non quia ipsa Maj. non sit clementissima, sed ob malivolorum suggestiones, qui ut satisfiat aliquod

quod eorum privatum commodum, perniciem totius Christianæ religionis non respiciunt, & continue stimulant eam ad arma contra nos movenda, qui sumus ei obsequentiissimi. Unde nobis necessarium est, sicuti omni jure convenit, nos ipsos defendere: quod quærimus facere omni cum modestia & ex minori injuria ejus Cæs. Majestatis, quæ nobis sit possibilis: & in divina bonitate speramus, quæ nos non derelinquet. Hoc etiam Vestris Magnificentiis dicere volumus, quod Resp. nostra, quæ jam tot & tot annis incredibilem auri quantitatem & non minus sanguinis effudit ob conservationem & Christianæ religionis augmentum, sicut omnibus notum est: & quæ semper omni dexteritate quæsitivæ Christianorum Principum unionem contra infideles, nunquam potuit ad aliquam devenire conclusionem: attamen contra nos Christiani Principes se penitus colligarunt in ruinam nostram: unde proveniat, quod una Resp. qualitatis, quæ semper nostra fuit, sit taliter tractata, & a tantorum Principum Majestatibus persequuta, & quod ad hoc sint uniti fuerintque sic stricte concordēs, facilis est conjectura: & ideo nihil aliud Vestris Magnificentiis sapientissimis dicemus, eas exorantes, velint

velint declarare totum hunc successum, cum omni veritate per nos narratum, in nostram justificationem, ubi eis videbitur opportunum: asserentes, quod sumus & volumus esse observantissimi & devotissimi cultores Cæs. Majestatis & Sacri Romani Imperii, sicut semper fuimus, & ob antiquam benivolentiam & commercium, quod semper fuit inter nos & totam Germanicam Nationem, & magnificas præcipue communitates & liberas civitates, velint præstare nobis eos favores, qui videbuntur esse huic rei convenientes, quandoquidem conservatio nostri status non est futura minori beneficio vestrarum Magnificentiarum & totius Sacri Romani Imperii, quam proprio nostro, ob respectus & causas ipsarum prudentiæ bene notas.

Datum in nostro ducali Palatio. die XVI.

Julii, Indictione XII. M. D. VIII.

Inscriptio hæc erat:

Magnificis & Egregiis Viris, Magistro Civium & Consulibus Memminghen, Amicis carissimis.

V.

Nota: Has litteras ex autographo, benevole e tabulario Memmingensi publico mecum communicato, primus vulgo. Scriptæ sunt in membrana: appensum sigil-

figillum plumbeum, in cuius prima facie conspiciuntur S. Marci & Ducis Lauredani, vexillum manibus tenantium, imagines, his in margine adjectis: S. M. VENET. LEO. LAVRED. DVX. In altera facie hæc leguntur verba: LEONARDVS LAVREDANVS DEI GRA DVX VENETIAR. ETC. Exaratae vero sunt eo tempore, quo bellum a Maximiliano I. Imper. Julio II. Pont. Max. Ferdinando Catholico & Ludovico XII. Gallorum Rege Reipublicæ Venetæ illatum fuit, de quo Petrus Bembus Historiæ Venetæ Lib. VII. & seqq. ejusque continuator Paulus Paruta, nec non Adamus Reisnerus in Historia rerum a Georgio & Casparo Fronsbergiis gestarum, Germanice Francof. 1572. in fol. edita, evolvi possunt. Bellum illud vulgo Cameracense vocari solet a foedere, Cameraci inter dictos Principes contra Venetos inito. Peculiarem quoque de illo commentarium conscripsit Andreas Mocenicus, impressum Venetiis A. 1525. in 8. Memmingæ A. 1508. Ordines Imperii, jubente Maximiliano, convenerunt, ibique præter alia de bello Venetis inferendo consultatum fuit: cujus conventus meminit Jos. Scaliger in Confutatione Fabulæ Burdonianæ p.m. 320. Liceat vero mihi heic in Memmingæ, dulcissimæ meæ patriæ, honorem memorare, eam Gloriosissimo Imperatori Maximiliano fuisse in deliciis: Sæpiusculæ enim hic commoratus est, eamque urbem *invasior* ac requietorium suum (*seine Rube-Statt und Rube-Kammer*) appellare consuevit. vid. Christophori Schoreri Chronicon Memmingense pag. 59. 62. Cæterum Bembus Hist. Venet. Lib. VIII. f. 133. elegantissimæ editionis Aldinæ (& pag. 343. edit. Argentor. A. 1611. in 8.) mentionem facit litterarum ad eos, qui creandi Romanorum Imperatorem jus habent, tum ad liberas Germaniæ civitates datarum, quibus litetris Senatus Venetus petierit, ne Maximilianum favire contra Rempublicam, quæ in illum tam liberalis fuisset, ulterius permitterent.

V.

Jo. Christophori Wagenseilii, 7^{cti} quon-
dam & Philologi Altorfni famigeratiss-
imi, Dissertatio hætenus inedita.

de

JOANNA PAPISSA. (a)

Fœminas plurium regnorum legibus ab
omni retro ætate ob inopiam judicii, ob
imbecillitatem & ignaviam sexus non a
publicarum modo, sed etiam civili jure a
privatarum quarundam rerum administra-
tione exclusas fuisse, neminem facile igno-
rare arbitror: ut alias leges, quas funda-
mentales vocant, nunc omittam, extat
omni-

(a) De hac sive historia sive fabella multum ab eo
tempore, quo divinis auspiciis purior religio, umbris
antea merfa, B. Luthero vindice caput iterum efferre
cœpit, in utramque partem ab eruditis magna animo-
rum contentione decertatum fuisse, omnes norunt.
Novissime de ea, in compendio quidem, sed curate
& eleganter eruditi autores *der Verzeichnus einiger
rarer Bücher* P. III p. 263. seqq. egerunt occasione Pe-
tri Mexiæ Hispani Variarum Lectionum Sylvæ, ab ipsis
recensitæ, ex qua is, qui in Gallicum Sermonem
transtulit, narrationem de Joanna Papisfa maligne ex-
punxit, Semiramidis historia in illius locum substitu-
ta. Cuinam sententiæ Wagenseilius, *ἡ πολυμαθὴς ἱστορία*,
album adjecerit calculum, cum aliunde v. g. ex ejus
Histor.

**omnino Gallorum Salica, vetans Regnum
a lancea transire ad colum. Hinc etiam,
quod**

Histor. Univ. Synopf. P. III. p. 128. sqq. & Dissert. de Romanis Pontificibus ex Germanorum gente creatis, tum præcipue ex hac disquisitione, quam integram heic inferimus, elucet. Varia quidem, quæ in ea leguntur, jam II. cc. a Wagenfeilio dicta sunt, quædam etiam ipsis aliorum, præsertim Maresii, verbis hic prolata: vel eo tamen nomine grata Tibi erit hæc exercitatio, quod præstantissima, quæ pro hujus narrationis veritate a Viris eruditis urgentur, argumenta summatim exhibeat, dubiisque, contra illam motis, jucunda brevitate satisfacere allaboret. Præmittimus vero illi pace tua Desiderii Regii, olim Ord. Minor. Phil. & Theol. Lectoris, posthac vero Augustanam Confessionem amplexi, epigramma haud inusitatum, quod in ejus Apocalypsi Nova Babylonis antiquæ, Cassellis A. 1646. in 8. excusa, p. 53. extat:

Papa fuit quædam meretrix, si credere fas est;
Quicquid id est, grande est fama vel ipsa probum.
Quod peperit, laudanda foret, si nupta fuisset,
Petra foret, saltem hac parte, secuta Petrum.
Fama probrosa nimis, si displicet ista, Quirites,
Dicite, non sedit fœmina, sed cubuit.

A. 1720. Hagæ Comitum, prodit in 12. Histoire de la Papesse Jeanne fidelement tirée de la dissertation Latine de Mr. Spanheim, laudata in Biblioth. Hist. Phil. Theolog. Bremens. Class. V. p. 1122. ubi etiam, Jll. Virum Pachelbel von Gehag probationem hujus historię per versus & nummos moliri, memoratur. Si vero scire aves, quinam præterea ex Protestantibus hujus narrationis veritatem de industria adstruere conati sint, insignem eorum catalogum tibi exhibet consummatissimus Theologus Ern. Salomo Cyprianus in Schediasmate de vitiis Paparum adversus eorundem infallibilitatem p. 51.

quod ex aurea Bulla constat, in nostro Imperio eligendus in Imperatorem mas est, non foemina, cum genius Principum Germanorum Imperium muliebri ferre haud queat. Nec aliud in conferendis sacris ordinibus observari, Sacri nos docent Canones. Foeminæ enim incapaces sunt sacrorum ordinum, nec Sacerdotes fieri, nec missam dicere, nec Clericos ordinare, multominus D. Petri Sedem occupare possunt. Attamen historiarum monumentis proditum est, Seculo IX. post Christum natum Imperatore Lothario post obitum Leonis IV. Pontificis electam fuisse foeminam quandam in ejus locum, quæ Joannis nomen sibi sumsit, atque clavum tenuit per annos duos, menses quinque, dies quatuor, quæque ab amasio corrupta & vitiata, publice deinde peperit, & partus doloribus extincta fuit. Atque rem omnino ita evenisse ab omni illo ævo, quo hæc res contigit, ad præsens usque momentum credidere viri cordati, sapientes & ad miraculum docti, credimus & nos indubie, & citra trepidationem defendere sustinemus. Nimirum autores sequimur viros graves & imprimis magni nominis & Theologos & Philologos. Inter Philologos quidem sufficit laudare Ch. Ad. Rupertum, quondam

dam Academiæ nostræ decus magnum; cui subjungimus nunquam satis laudandum J. H. Boeclerum, itemque Claudium Salmasium, stupendæ eruditionis virum. Jam non allegabimus alios. Sed ex Theologis imprimis provocamus ad Megalandrum nostrum Lutherum, venerandum D. Gerhardum atque Georg. Calixtum, virum in historia ecclesiastica maxime sedulum atque diligentem. Cæterum non imprimis pugnamus autoritatibus, quamvis summorum virorum autoritates neutiquam sint contemnendæ, præsertim cum suppetant alia insuper argumenta. Non enim verosimile est, illud verum non esse, quod tot viri cordati & eruditi pro vero agnoverunt. Enimvero accedit quoque ratio, quæ nos compellit, ut solliciti simus de veritate seu falsitate hujus historiæ: neque enim res parva est, utrum Joannes Papa foemina fuerit, an minus; quamvis multi sibi persuadeant, hoc unice ad historiam pertinere: multa enim hic latent, de quibus forte alii nec semel cogitarunt. Voluit nimirum Deus in hac viva imagine pro sua providentia mysticam illam mulierem ostendere, de qua tam multa nobis refert Joannes, quorum veritatem indies magis magisque experimur.

Jam porro si hoc evicerimus contra Pontificios, perit omne illorum argumentum de successione, quam jactant, continua Pontificum ad hæc usque tempora. Nimirum ajunt, vel solo hoc argumento posse nos agnoscere veritatem suæ doctrinæ, quod Sedem Ecclesiæ Romanæ Petrus Romæ fundarit, inque ea serie nunquam turbata confederint Pontifices: at vero hac ratione omnino hiulca evadit Pontificum Successio. Accedit, quod non sine magna veritatis specie nobis obijciunt Pontificii, atque urgent, ostendendum esse nobis, veros atque genuinos reperiri inter nos Sacerdotes. Nam, addunt, requiri, ut, qui veri Sacerdotes audiri velint, sint ordinati a veris quoque Sacerdotibus, veris scilicet Apostolorum successoribus: tales autem nostros non esse, non ordinatos quippe ab iis, qui ordinandi facultatem acceperunt ab Apostolis. Itaque non habere nos veros Sacerdotes, & per consequens nec verum Eucharistiæ Sacramentum: atque hinc rident vulgo Eucharistiæ Sacramentum, quod in nostris Ecclesiis obtinet. Est omnino hoc palmarium argumentum; atque testati sunt viri insignes, hoc quidem argumento sese in summum discrimen fuisse adductos, neque habuisse, quod

quod responderent. At vero si possumus ostendere, sedisse foeminam Papam, hoc quoque perit argumentum. Certum enim nobis est, papatu hujus meretriculæ successionem papalem non solum esse interruptam, sed etiam turpiter deformatam, quia, ut Antoninus loquitur Tit. 16. Part. II. C. I. illa utpote foemina non fuit susceptibilis characteris alicujus ordinis, nec perficere Eucharistiam aut ordinare potuit, nec absolvere a peccatis; unde ordinati ab ea iterum fuerunt ordinandi, quia nihil ab ea receperant. Hierarchia enim apud Pontificios requirit, ut Sacerdos ordinatus sit ab Episcopo, hic ab Archiepiscopo, qui & ipse a Romano Pontifice est confirmandus: itaque cum Romanus Pontifex caput sit Ecclesiæ, ab eo dependet salus omnium, quæ in Ecclesia Romana peraguntur: atque nisi legitimus sit Pontifex, non legitimi possunt esse Episcopi, itaque nec ipsi habebunt Sacramenta vera ac genuina. Si vero unquam Romæ sedit foemina, non potuit esse Pontifex legitimus, non potuit confirmare Archiepiscopos &c. Si hoc non potuit, nec Archiepiscopi potuerunt ordinare Episcopos, nec Episcopi Sacerdotes alios, nec potuerunt Sacerdotes isti Eucharistiæ Sacramentum ad-

ministrare &c. atque ita turbatur ordo ille hierarchiæ, quem tantopere crepant. Pulcherrima denique est observatio Georg. Nigrini L. V. Inquisit. C. VIII. quod ab A. D. 855. quo meretrix illa Anglica in sedem Pontificum est evecta, ad annum 1521. quo Lutherus Wormatiæ in comitiis inter Ordines Imperii Romani coram Cæsare Papæ contradixit, numerentur anni 666. qui fuit character bestię illius Apocalypticę. Resigitur magna, nec patimur alia ratione, nisi vi veritatis, nobis telum hoc eripi: mirumque adeo non est, apud nos magno consensu viros doctissimos hanc sententiam strenue defendisse. Neque temere istis credendum est, qui contrarium nobis persuadere conantur. Nemo sane unquam magni nominis aut clarę eruditionis inter nos ausus fuit, hanc historiam in dubium vocare. Jam vero videndum nobis est de ipsis argumentis: ubi quidem principio illud definiendum est, quid ergo pertineat ad fidem historicam, a qua diversam aliqui faciunt fidem papisticam, inaudita prorsus distinctione. Nos ergo dicimus, ut inter mortales fides historica possit progenerari, atque homo cordatus assensum suum intrepide præbere queat, hæc requiri I. ut historia sit consignata a scripto-

scriptoribus gravibus, qui rei ipsi vel interfuerunt, aut ab aliis fide dignis hæc talia audiverunt. Neque enim profecto semper historici rebus gestis ipsi intersunt. Jam II. requiritur, ut historia sit prodita ab iis, de quibus nulla est suspicio, eos tale quid fingere voluisse: id quod cum primis urget Grotius in Tr. de veritate Relig. Christ. adversus gentiles, si velint inficiari ea, quæ in V. T. de Moyse, in N. de Christo prodita sunt: causam enim dicere debent, quare hæc credant conficta? Apostoli sane nullam habuere causam ea fingendi, quæ scripsere de Christo: non honorem; ab isto enim erant alienissimi: nec famam; fuere enim intenti in finem mundi: jam nec stulti erant; sequitur ergo vera esse, quæ nobis scripta reliquerunt. Itaque si constat, scriptorem aliquem nullam habuisse mentiendi causam, illius sane narratio pro vera erit habenda. III. Requiritur, ut confirmata fuerit historia aliqua consensu quorundam virorum eruditorum & gravium, imo a nemine uno vocata in dubium, atque posteriores prioribus assensum præbuerint. IV. Denique est hoc omnino urgens argumentum, si eandem rem diversæ nationes retulerint in literas. His argumentis (neque enim aliam rationem

habemus) fides historica stabilitur inter homines, atque quod dicit Gerhardus, magnæ audaciæ & impudentiæ est, si quis velit rem, quæ talibus firmatur argumentis, in dubium vocare. Hæc vero omnia quadrant in nostram historiam. Unde sequens fere nobis enascitur argumentum.

Quæcunque historia nititur I. autoritate 70. amplius Scriptorum, & inter hos ab omni fraudis suspicione immunium, quique vel ipsi rei interfuerunt, vel a fide dignis rem, prout gesta est, acceperunt; gravissimorum virorum: quæ II. per 600. annos, quibus perpetuo narrabatur, a nemine vocata est in dubium: quam III. diversissimarum gentium historici in literas retulerunt: quam IV. integrum Constantiense Concilium & ipsimet Romani Pontifices confirmant: quam V. S. P. Q. R. uno ore pro vera habet: & cujus VI. lapidea & alia monumenta memoriam servant: quam denique VII. magno consensu viri doctissimi & veritatis studiosissimi nunquam non pro vera agnoverunt; illa meretur fidem historicam. Atqui &c. Ergo &c.

Nec aliam fidem, quocunque demum nomine vocatur, sequimur. Atque ut hinc potissimum exordiamur, habemus omnino

LXX. amplius Scriptores, qui rem ita evenisse asserunt, omnes Ecclesiæ Romanæ addictissimos, interque hos Archiepiscopos, Episcopos, Cardinales Poenitentiarios Pontificum, & ab omni suspitione immunes, quibus, ut hæc talia confingerent, neque amor, neque odium, neque invidia, neque spes alicujus præmii, quibus ad falsa comminiscenda homines impelli solent, causæ esse potuerunt: potius multum intererat, ne vera hæc essent: factumque hoc fassi, propriam turpitudinem allegarunt, quod quam invite fecerint, nemo non facile agnoscit. Agmen nobis Scriptorum ducat Martinus Polonus, Monachus Cistertiensis, Poenitentiarius Innocentii IV. Pont. postea Archiepiscopus Consentinus, alias Guesnensis, idque haud quidem ob eam causam, quasi ab Onuphrio Pany. & Bellarmino vere proditum sit, primum Martinum rem hanc in literas retulisse: aliud enim ex infra dicendis constabit; sed quia cæteris Scriptoribus melius ac prolixius narrationem instituit (b).

K 4

Sed

(b) En Martini verba: Johannes Anglicus, natione Moguntinus, sedit annos II. menses V. & dies IV. & cessavit Episcopatus mensem unum. Hic, ut asseritur, fœmina fuit, & in puellari ætate a quodam suo amasio in habitu virili Athenas deducta, sic in diversis scientiis

Sed vero ex historicis Martino, cujus vita in Seculum XIII. incidit, antiquiores laudantur, Ranulphus Flaviacensis, Marianus Scotus, Sigbertus Gemblacensis, & Gothofredus Viterbienfis. Enimvero cum horum primus Seculo X. Marianus XI. ceteri XII. vixisseprehendantur, non juniores modo, sed nec istos quoque idoneos esse, ostendunt Pontificii, qui in hac causa testimonium dicant? atque hoc ariete totam sese historiam suspectam reddere arbitrantur, quod nullus autor rei gestæ συγγραφεύς, qualis Anastasius Bibliothecarius fuit, ejus mentionem faciat, nec

tiis profecit, ut nullus sibi par inveniretur, adeo ut postquam Romæ fuit, magnos magistros discipulos & auditores haberet, & quum in urbe vita & scientia magnæ opinionis esset, in Papam concorditer eligitur. Sed in papatu per suum familiarem imprægnatur. Verum tempus partus ignorans, quum de S. Petro in Lateranum tenderet, angustia inter Colosseum & ecclesiam S. Clementis peperit, & mortua, ibidem, ut dicitur, sepulta est. Et quia dominus Papa eandem viam semper obliquat, creditur a pluribus, quod ob detestationem facti hoc faciat. Nec ponitur in Catalogo Summorum Pontificum propter mulieris sexum. In his Wagenfeilius quædam emendat in Hist. Univ. Syn. P. III. p. 130. ex Codice MSto veteri proboque Gymnasii Heilsbronnensis. Scilicet post, & dies IV. omnino ex MSto inferendum esse existimat, & mortuus est Roma. Sic iterum post, Roma fuit, addendum, legens: Denique verba postrema ita rectius in MSto concipi: Nec ponitur in Catalogo Sanctorum Pontificum propter mulieris sexus deformitatem.

nec Ado Viennensis, nec Rhegino Prumiensis, quorum tamen ætas proxima. Ast si nullus autor nisi *αὐτοπῆς* vel rei gestæ *συγχερονος* fidem meretur, ut quicquid ad nostram notitiam nonnisi indicio Scriptorum centum vel ducentis annis recentiorum pervenit, incertum sit: incerta erit potior pars universæ historiæ cum Ecclesiasticæ, tum civilis. Neque vero sequitur, quamquam Ranulpho Flaviacensi vel Mariano antiquior nemo, qui rem literis consignarit, innotuerit, ideo neminem fuisse. Unde enim obsecro Ranulphus Flav. qui tanquam vetustissimus muliebris Pontificatus Scriptor allegatur in Centuriis Ecclesiasticæ Historiæ, quem & Trithemius Chronicum breve, quod illi Poly-Chronicon vocant, scripsisse ait, hæc nisi ab antiquioribus nosse potuit? Unde vero Marianum, qui ex Scotia in Germaniam profectus, in tribus Benedictinorum contuberniis vixit, Coloniensi, Fuldensi & Moguntino, unde, inquam, vel ipsum nomen Joannæ, vel annos, menses & dies Pontificatus ejus ita exacte annotatos, nisi ex libris, qui in monasterio cum primis Fuldensi, ob Bibliothecam semper celebri, deesse non potuerunt, hausisse cum existimabimus? Et videlicet in promptu fuerunt autores, quibus

nos hodie caremus. Nam ut hæc confingeret, nihil utique causæ habuisse videtur: nam profecto nihil gratiæ exinde sperare ei licuit, quin potius summum odium, juxta illud: Obsequium amicos, veritas odium parit. Quanquam non valde necessitate adstringimur, ut huic responsioni vehementer inhæreamus, & magis pronum est dicere, fuisse omnino Joannam Anastasio συγγενω memoratam, verum verba, quibus id executus erat, malas & Pontificum gratiam captantes manus, ex aliquibus Codicibus erasisse: & notum est, quum Pontificiis sit familiare, quælibet in rem suam vel fingere, vel interpolare, vel supponere, id quod luculenter docuit vir in omni scibili versatissimus Gabriel Naudæus in iis, quæ emisit publice contra Monachos Benedictinos circa libros de imitatione Christi. A nobis vero prorsus abest hoc crimen, neque enim causæ nostræ diffidimus, sed semper edimus autores, quales sunt. Extabant sane quondam in Heidelbergensi Bibliotheca Anastasii Codices MSS. duo, in quibus historia de Joanna Papissa legebatur, quos viderunt Cl. Salmasius & Marquardus Freherus, viri cordatissimi. Quamvis enim in vulgari editione desint verba Anastasii, major
tamen

tamen nobis esse debet tantorum virorum autoritas, quam nescio cujus Leonis Allatii, hominis Græci & imposturarum palam convicti. Illud equidem, uti dictum, certum est, quod in Anastasii historia, a Moguntinis edita, nec vola nec vestigium de Joanna reperiatur, quoniam ea temporis computatio observanda est, ut inter Leonem & Benedictum Joannæ nullus locus relinquatur, quod præcipue urget Onuphrius Panvinus ad Platinam, & post illum Blondellus aliique. Verum existimant viri doctissimi, Anastasium ab editoribus Moguntinis corruptum & depravatum esse; quæ conjectura his præcipue nititur argumentis: quia 1. in quibusdam MSS. exemplaribus Anastasii historia de Joanna Papissa reperitur. 2. Quia reliqui codices MSS. mutili sunt, & in elogium Leonis IV. desinunt. 3. Quia corruptionis alia manifesta prostant indicia. Publice sane de ea re questus est Freherus, & iniquitatis ac malæ fidei publice accusavit Jesuitas, qui mussare maluerunt, quam se defendere, unde oportet eos sibi confcios fuisse suæ fraudis, & quod non deessent Frehero testimonia irrefragabilia, quibus accusationem suam suffulciret. Atque eam epistolam in aliquot Bibliothecis reperiri,

riri, Bœclero in Suecia degenti asseveravit illustris Salmasius, cujus verba, prout a laudato Bœclero in commentarium de rebus Seculi post Christum natum IX. & X. relata fuerunt, vide in dissertatione mea de Romanis Pontificibus ex Germanorum gente creatis p. 9. 10. (c). Itaque cum provocarint ad eos codices MSS. Heidelb. Salmasius & Freherus, nec tantum ad hos, sed & ad ipsam editionem Anastasii, quæ excusa Moguntiae atque omnium manibus quondam terebatur, nihil profecto nos causæ habemus, cur Pontificiis magis credamus quam illis,

(c) Verba Bœcleri hæc sunt: Ajebat Salmasius, se Heidelbergæ agente, & incomparabili isti Bibliothecæ operam dante, factum esse, ut Moguntini, Anastasium Bibliothecarium edituri, duos Codices MSS. a Serenissimo Electore peterent acciperentque. Quibus remissis, adjuncta fuisse aliquot exempla novæ editionis, in quibus historia Johannis sceminæ ex MSS. bona fide expressa erat. Id cum aliqui mirarentur, apud cæteros ortam suspicionem dedisse occasionem, ut in cætera exempla per officinas Bibliopolarum inquireretur, tum fraudem manifestam fuisse, dum omissa deprehendebantur in omnibus, quæ paucis inserta diximus. Ea de re clarissimæ memoriæ virum, Marquardum Freherum, epistolam ad amicum exarasse, quam in aliquot Bibliothecis reperiri dicebat Salmasius. Addebatur verba Mariani Scoti (nam is nunc post deperditam aut vitiatam illam Anastasii scripturam antiquissimus rei autor) religiose ex Anastasio descripta, id est, ipsissima Anastasii verba fuisse.

illis, præprimis cum confessio accedat insignis Galli Jo. Launoji, qui etsi Tom. IV. epistolarum, epistola ultima historiam de Joanna Papissa inficietur, tamen non dissimulavit, reperiri nonnullos Anastasii Codices MSS. qui eam contineant. Sufficiat ergo Anastasius, qui vixit illo ipso tempore, cujus testimonium, quod deficit in vulgaribus editionibus, id procul dubio omne a Pontificiis est: credimus enim id Marq. Frehero, de quo Lipsius judicium tulit, vix ullum Seculum daturum talem virum.

Jam secundo accedit, per integros 600. annos usque ad Reformationis tempora, quæ ab initio præcedentis Seculi decurrere cœperunt, neminem unum repertum fuisse, qui negaret vel in dubium vocaret, circa medium Seculi IX. mulierem virum mentitam assumpto Joannis nomine ad papatum evectam fuisse, & ne quid Romæ deesset ad magnæ meretricis elogium, ex scortatione imprægnatam, atque paritudo doloribus dērepente oppressam in solenni pompa publice puerperam obiisse. Novum plane hoc est, & post tempora Reformationis demum exortum, quod fides sollicitatur hujus historię. Nimirum cum viderent Pontificii, rem non esse de nihilo, atque perire hac
ratione

ratione successionem suorum Pontificum, coeperunt denique rem omnem negare. Quare autem nemo inter antiquiores tam sapiens erat, & nasum Rhinocerotis habebat, ut falsitatem hujus historiæ olfaceret? Scilicet antiquiores constituti erant extra telorum jactum, ideoque puræ veritati litabant. Enimvero si hæc tantopere falsa sunt, & si tam levi negotio ostendi potest, conficta hæc esse omnia, quare per 6. & amplius Secula nemo repertus fuit, qui fidem hujus historiæ elevaret? Non dolere sane singulis seculis viri eruditi atque cordati, quibus haud ita facile imponi potuit, qui uti alias narrationes falsas aut suspectas rejicere, idem quoque hic facere potuissent, nisi constitisset de historiæ hujus veritate. Citetur Franciscus Petrarcha testis, vir omnibus modis summus, qui in Chronico Italice scripto & Florentiæ A. 1478. excuso, hanc rem quoque literis prodidit. Jo. quoque Boccatus, Petrarchæ ob ingenii, studiorum & morum similitudinem intimus, recenset ac describit hanc Joannam, prius Gilbertam, ut ipse ait, appellatam, in libro de claris mulieribus C. 99. Primus igitur, quod sciam, Aventinus *συγχερονος* Lutheri nostri eo delatus, ut falsitatis accusare palam hanc

hanc historiam, & fabellam appellare auderet. Verba sunt 4. to. Annalium Bojorum: Adelbertus, locupletissimus Hetruriæ Princeps, Ravennam, Bononiam, Romam in potestate habuit. Ejus Socrus Theodora, Scortum nobile atque imperiosum, Romæ dominabatur: Johannem IX. amatorem suum Bononiensibus primo, dein Ravennatibus, postremo Romanis imposuit, primumque sacerdotem creavit: inde fabellam ortam crediderim, quæ temere vulgavit, hisce temporibus fuisse Sacerdotem maximam, quæ appellata sit Johannes. Secundus ab Aventino est Onuphrius, & primus, qui patrum memoria justo conatu historiam convellere aggressus sit. Quos secuti deinceps alii, quorum ratiunculas & conjecturas laudat Baronius Annal. X. (A. 853.) & additis de suo nonnullis contra Papissam satis prolixè proclamat. Sed vero in omni historia utique magis antiquioribus quam recentioribus credimus. Sane nulla res adeo est certa, quæ non possit vocari in dubium, si quis id velit agere: at non sufficit, an res aliquibus rationibus suspecta reddi possit, sed opus est, illud cum primis accurate consideretur, quibus argumentis narratio aliqua impugnetur. Prope est, ut
pigeat,

pigeat, in hac parte tam diu immoratum esse. Dicendum igitur nunc aliquid de unanimi diversarum Nationum consensu (quod erat tertium argumentationis nostræ membrum). Scilicet si unus atque alter duntaxat hoc scripsisset, posset forte adhuc negari. Enimvero hoc scripserunt non tantum Romani, Galli, Hispani, sed etiam Germani: itaque toto orbe divulgata erat hæc historia. Non certe ita conspirare hi poterant, nisi constitisset de rei veritate. Tempus me deficiet, si omnes, de quibus hætenus constat, Joannæ Pontificatus assertores enumerare instituiam. Recensent illos per ordinem seculorum Calixtus in Tract. de Conjugio Clericorum, Gerhardus Loc. de Ecclesia, David Blondellus, vir inter Reformatos plane eximius, qui ipse tamen peculiari libello totam de Joanne VIII. narrationem suspectam reddere conatus est; Wolfius in Lect. Memorab. Egbertus quoque Grimmius, S. Theol. Licent. natione Anglus, in Vefaliensi schola aliquamdiu Prof. doctissimus, sed præmatura morte ætatis suæ 28. ereptus, anno 1636. edidit paulo ante obitum lingua Belgica Comment. locupletissimum de Joanna Papissa, in cuius parte prima CXXXV. testimonia produxit pro hac
veri-

veritate scriptorum variarum gentium, quorum nemo Protestantium castra secutus est. Nec est verosimile, tot viros eruditos per tot secula plus quam muliebri credulitate admissuros fuisse hunc papatum muliebrem absque accurata, quantum potuit institui, in re tanti momenti, perquisitione veritatis. Illud solum subjungere liceat, Ulricum Huttenum edi curavisse A. 1520. epistolam veterem Academiæ Parisiensis, Oxoniensis & Pragensis, in qua hæc leguntur: Johannes Successor Leonis IV. cœpit circa A. D. 854. & sedit annos 2. & menses 5. foemina fuit, & in papatu imprægnata. Testatur id ipsum Chronicon quoddam Helvetico idiomate conscriptum Constantiæ, pertingens ad annum 1450. his verbis sat quidem lepidis: *Ein Weib, hies Johannes von Mainz, was Papst, und starb an einem Kind, hat sie mit einem Cardinal gemachet*, A. 855. In alio majusculis characteribus Ulmæ impresso An. 1486. legitur: *Der Kaiser Arnolphus (Lotharius legendum videtur) was unter dem Pabst, der eine Frau was, und an offener Straß zu Rom da zersprang sie an einem Kind. Dieselbe Stras meiden noch alle Päbst, das sie nicht daran kommen*

L

men von der Schand wegen. Imo non satis est, eandem rem consignasse Italos, Hispanos, Gallos, Germanos, sed idem factum est a Græcis quoque, vel iis, qui regiones incolebant, alio sole calentes. Ita enim Laonicus Chalcocondylas in historia electionem Pontificis, uti suo tempore celebrabatur, describens: Ubi suffragia, inquit, collegerunt, & Pontifex fuerit declaratus, domi eum continent, explorantes, num & reliquis placeret electio. Pontificem pronunciatum insidere jubent sedili foramen habenti, ut testes ex eo propendentes aliquis, cui hoc muneris injunctum est, tangat, unde appareat, Pontificem virum esse: nam constat, mulierem quondam in Pontificatum esse subiectam, quia sexus ignorabatur. Nam Itali Occidentales pene omnes barbas radunt. Cum autem illa mulier gravida esset facta, & ad festum seu sacrificium prodiiisset, peperit infantem inter Sacrificium in conspectu universi populi: quapropter ne decipiantur iterum, sed rem cognoscant, neque ambigant, Pontificis creati virilia tangunt, & is, qui tangit, acclamat: *Mas nobis est Dominus.* Nomina autem post electionem illico immutant, quasi jam divinioris, quam antea, sint naturæ, & planissime

nissime mutati. Pontificii dicunt, ab interprete inserta hæc esse; cæterum id quidem dictu facile, probatu difficile, longèque facilius & probabilius negatur, quam asseritur. Credibilius etiam ab ipsorum interpretibus, si quos habent, omitti, quam a nostris addi. Gemina certe his sunt, quæ Jo. Pierius Valerianus in sua declamatione ad Cardinalem Hippolytum Medicen pro Sacerdotum barbis, quæ primum Romæ cum Clementis VII. P. M. privilegio emissa fuit, habet: Quid aliarum gentium damna culpasve commemoremus, cum domi opprobria conspiciantur, quæ de barbarum odio perpetuam supremo Sacerdotum ordini ignominiam pepererunt? Eo enim aliquando nostrorum deliciæ processerunt, ut hujus rasitationis ergo confusa quodammodo specie difficulter vir a foemina internosceretur; hinc accidit, ut mulier (si vera est, quæ per omnium ora fabula circumfertur) in sempiternum SS. ordinis opprobrium ad solii Pontificii majestatem eveheretur; in cuius facti memoriam Romani adhuc intento digito indicant, ubi summa illa sacerdos, pontificialem induta trabeam, enixa peperit: quod ne rursus accidere possit, inde institutum plerique omnes credunt, in novi

Pontificis ingressu eam majorum nostrorum imprudentiam publicare. In totius enim populi conspectu pro D. Johannis suggestu, qui latissimam & eo solenni sacro omnium nationum gentibus confertissimam aream despectat, cogitur novus Pontifex virilitatem locupletissimis testibus approbare, resque ipsa sacri præconis voce palam promulgata in acta mox refertur, legitimumque tunc demum Pontificem habere nos arbitramur, cum habere illum, quod habere decet, oculata fide fuerit attestatum. Hæc ille. En quam amice cum Græco conspiceret Latinus Scriptor vel e media Italia, & quod magis est, circa tempora Lutheri. Nec te offenderit vox fabulæ, quæ in textu conspicitur: fabulam enim dixit a fando sensu laxiori pro narratione publica, quæ in omnium ore versatur: imitatus Senecam Ep. 71. in fabellam excessi, non ingratam tibi: at historiam ante recensuerat: itemque S. Hieronymum, cujus in epistola ad Castratium ista sunt: Et ne veteres replicando historias longum faciam, excedam mensuram epistolæ, brevem tibi fabulam referam, quæ infantia meæ temporibus accidit. Quam vero de tota hac narratione non dubitaverit Pierius, tota sermonis series luculenter

osten-

ostendit : nisi etiam forte (quod non immerito suspicamur) hæc parenthesis in editionibus posterioribus addita sit. Sed ut, unde digressus sum , redeam , atque id, quod institui , absolvam, est & alius Græcus, Laonico, ni fallor, antiquior, Barlaam videlicet Monachus, qui in Dialogo de principatu Papæ ἡ ἀκολαση ἐκείνη γυναὶς ἡ γενομένη Παπᾶ, impudicæ illius mulierculæ, quæ Papa fuit, meminit. Autoribus denique, qui Joannæ Pontificatum asserunt, duo Judæi possunt addi, nempe R. Abraham Zacuth in Juchasin, & R. David Gans in Themach David, quorum testimonia refert Grimmus de Papissa P. I. C. 31. quæ ex illo repeti possunt. Quin (ut ad quartum argumentationis nostræ membrum tandem accedamus) ne Patres quidem Concilii Constantiensis, quibus Jo. Hussi libri ad examinandum & excerpendum ex illis errores commissi erant, quique maxima minima, quæ Hussum in odium perducere poterant, sæpe etiam verba detorquendo & pervertendo, sedulo corraferunt, neutiquam tamen dicam illi impegnerunt, quod in libro de Ecclesia, quo nullus alius rigidiori censuræ fuit subjectus, C. 7. & 13. Joannam Papam perstrinxisset : persuasi ergo fuerint necesse

est Patres de veritate hujus historiæ: si enim fictam eam credidissent, poenas certe hoc cumprimis nomine dedisset Hussus. Vid. Dissertat. meam cit. p. 10. 11. Jam accedit ulterius ipsorum & Pontificum autoritas, Miratur enim ipse Bellarminus Chronologiæ suæ parte altera, agens de Joanne XXI. cur iste Joannes Papa dici voluerit XXI. cum nullus præcesserit XX. Non poterat hic Pontifex, viro illo doctissimo judice, Joannem XXI. nuncupare, quin suo loco & ordine Pseudo-Joannem Anglicum i. e. Joannam Papissam restitueret. Hoc ipsum etiam aperte confitetur Ciacionius de vitis Pontificum, ab his, qui fabulosam & commentitiam Joannam foeminam numero Pontificum interferunt, vicesimum primum dictum fuisse. Extat ejusdem 13. Cal. Jun. defuncti in Ecclesia S. Laurentii tale epitaphium: Johanni Lusitano XXI. Pontificatus sui maximi M. VIII. moritur MCCLXXVII. Eadem Joannis XXII. & XXIII. omniumque, qui Joannes tres & viginti agnoverunt, mens fuisse videtur: ut & Æneæ Sylvii, qui Pontifex factus assumpsit nomen Pii II. ut de eo dici posset illud Virgilii: VIR PIUS ÆNEAS, Is nimirum (Epistola 130. A. D. 1451. d. 20. Aug. data circa medium) sentiens sib
obji-

objici hanc mulierem Papissam sub Agnetis nomine contra illam sedis Romanæ infallibilitatem, quam bonis Taboritis ceu caput aliquod Medusæ objiciebat, eo quidem recurrit, ut dicat, historiam non esse certam, sed tam timide, ut satis appareat, eum non loqui ex animi sententia: ut si quid hic putaret incerti, magis forte ad circumstantias & nomen proprium hujus mulieris spectet, quam ad rei ipsius substantiam. Unde doctissimus Blondellus Pium II. accenset iis Pontificibus, qui Joannæ Pontificatum videntur agnovisse, eo quod Joannæ nomen cæteris Pontificum nominibus permixtum in Dominico Senensi, scriptæ ad Jo. Carvajal Epistolæ immemor, vel poenitens perstare passus est. Quin & ipse tandem Pontifex factus hanc historiam exscripsit in sexta mundi ætate p. 170. operis historici, impressi Noribergæ A. 1493. per Kobergerum (d), teste Gerardo Loco de Ecclesia.

Accedit quinto Confessio omnium, qui Romæ habitant: omnes enim uno ore id

L 4 pro-

(d) Digitum intendit Wagenfeilius in Hartmanni Schedelii Chronicon, quod adjectum habet Æneæ Sylvii librum de rebus sub Friderico III Imp. per Europam gestis. Locus vero ille cit. Sylvium non agnoscit autorem, sed vel Schedelium, vel alium.

profitentur, exceptis iis, qui Romano Pontifici supparasitantur. Profecto necesse est, quod non sine ulla causa emanaverit tam vetus, tam constans fama. Unde etiam Hasenm. in Triumph. Papist. 419. Romæ etiam pueris notam esse historiam memorat. Quin sexto fidem adstruant varii generis monumenta, sepulturæ, statuæ, in ipsis Italiæ templis celeberrimis, in Senensi illo, ut inter Pontificum reliquorum istius quoque prostibuli imago, suo loco & ordine collocata, cernebatur adscriptis his verbis: *Fœmina Angla.* Quam demum Clemens VIII. curavit removeri. Statuam quoque scorto illi cum sua prole publice erectam Romæ in perpetuam facti detestationem illa ipsa in platea, in qua peperit, Archiepiscopus Antoninus abunde facit fidem. Diu visam Romæ eam statuam in confesso est, quamvis Jesuitæ, ut aliis ingeniosiores videantur, non mulieris sed sacerdotis eam statuam esse comminiscuntur, quem Clericus rem sacram facturum sequatur. Nec eam tandem Roma suppressisset & abolevisset, uti factum est serius, nisi sibi conscia fuisset, monumentum illud indubitatum esse sui probrum. Vide omnino Mortoni Apolog. Cathol. C. 19. Ipsi denique interpretes, ceu vocantur,

Ro-

Romanarum Antiquitatum, qui peregrinis accepto pretiores in urbe notabiles commonstrant & verbis declarant, eos in Lateranensis Basilicæ porticum deducentes ibi sellam perforatam ostendunt, in qua sessitasse quondam quemvis recens electum Pontificem affirmant, ut quidam Diaconorum sexum illius exploraret, quo faciunt testimonia Brewini & Chalcocondylæ. In Capella Servatoris (inquit Guil. Brewinus) sunt duæ vel plures cathedræ de lapide marmoreo & cupro cum foraminibus in iis sculptis, super quas Cathedras (ut audiui ibidem) est probatio Papæ. Nec aliter e media Græcia Chalcocondylas, qui id ipsum, quod Romæ a Romanis Brewinus didicerat, aliunde hauserat. Nec si dexteritate quadam Italica istæ nunc sedes alii usui adhibentur (ut scil. Papa electus moneatur suæ mortalitatis & infirmitatis, & quo illi dicatur, ut ex ceremoniali Romano refert Bellarm. L. III. de P. R. C. 24. illud Annæ: suscitatur de pulvere egenum, & de stercore elevatur pauperem, ut sedeat cum principibus, & solium gloriæ teneat) inde sequitur, non prius adhibitas illi sexus tentamini, quod nunc cessat, quoniam ut ait ille:

Ante probat sese quilibet esse marem.

L 5

Vel

Vel potius citra jocum, quia valde nunc barbatus sit oportet, qui Petri cathedram conscendere velit, ut adeo non amplius opus sit hac sexus exploratione, quæ olim obtinuit, cum papæ fiebant, qui vix excefferant ex ephebis. Nec vero me nimis movet autoritas Martini Schookii, qui in Fab. Hamel. præf. ad Lectorem eam sellam balnearum fuisse evincere satagit, remque ab imperito vulgo fictam cum nonnullis aliis asserere non erubescit. At enim vero in porticu Lateranensis Patriarchii, qua ad Sancta Sanctorum itur, non datrum nostrorum memoria visam negare ausint? ubi conclave habebatur, quo tempore Pontifices Laterani sedebant. Quis vero ejus usus, & si quam comminiscuntur, cur perforata? Et cur non potius tot autoribus fides? & ante controversiam natam Joannis Pannonii versus, quis nescit?

Non poterat quisquam referantes æthera
claves

Non exploratis sumere testiculis.

Sed quicquid demum sit, ista sive ita se habeant, sive secus, ad caput negotii nihil facere cum B. Calixto intrepide asserere auserim, tantum abest, ut, quod Schookius aliis objicit, sedem stercorariam pro symbolis
aut

aut classico teste hujusce historię agnoscere velim. Substantia potius facti est, quod inter Leonis IV. & Benedicti III. papatum media intercesserit foemina, supremo Pontificatu potita: quæ per sex fere secula a quamplurimis, monachis plerisque & Italis, Papatus alioquin studiosissimis, adserta, a paucis dissimulata, a nemine denique negata fuit: Si quid igitur in circumstantia una vel altera varietur, imo etiam falsi nonnihil deprehendatur, propterea veritatem ipsius facti statim collati dicendum non erit, nisi pari de causa magnam partem universæ historię præsertimque Pontificiæ, qua (uti ex infra dicendis apparebit) nulla alia sub sole incertior, eversum eamus. Poterunt itaque, ut cuique videbitur, salva rei summa vel affirmari vel negari. Temere tamen negare fama aliquot seculorum memoriam pervagata prohibet. Itaque his potissimum argumentis defendere semper viri summi hanc historiam. Contrarium equidem evincere conatus est David Blondellus, sed eidem Samuel Maresius peculiari dissertatione, quam *Papissa restituta* vocavit, abunde satisfecit, quod non diffitetur Autor animadversionum Chronologicarum in Ejusd. Joannam Papissam contra Anacrisin D. Blondelli restitutam, incer-

incertus ille quidem, qui de Maresio ita judicat: Sam. Maresius Theol. & Hist. Eccles. Prof. Gröning, celebris ex officii ratione maleferiatam Blondelli diligentiam castigandam sibi præsumsit, idque si historica respicias, satis plausibiliter præstitit: in chronologicis vero se huic oneri omnino imparem esse ubique ostendit: adeo ut nec præcipuum Blondelli argumentum intellexisse videatur, quod est ex indubia & infallibilibus characterismis temporis demonstrata Imperatorum & Pontificum successione continua & concatenata evincere, nullum dari Papissæ locum. Enimvero quantum huic argumento a Chronologia desumpto tribuendum sit, paulo post videbimus. Interim docuerunt idem, quod hic asserimus, in hac nostra Academia, Christianus Matthias, Georg. Koenig, C. A. Rupertus, qui viri? Idem docent venerabiles Theologi nostri, qui supersunt, omnes, quibus (ut omnes alios taceam) jungendus Clarissimus Salmasius, qualem seculum nostrum non tulit magis eruditum. Cæterum (ut vel unicum hoc argumentum adhuc addam) posset fortassis dubitatio oriri de Joanne VIII. si ea ætate vixisse diceretur, qua probi, pii & Ecclesiæ curam gerentes præerant Pontifices:

Sed

Sed vero ea ætate, qua vixit Joannes noster, summa erat confusio aulæ Romanæ, fatentibus id ipsismet istius aulæ propugnatoribus: ita enim Gilbertus Genebrardus, quo iniquiorem & maledicientiorem hostem Protestantibus vix unquam sunt experti, quarto Libro suæ Chronographiæ, sub initium seculi X. Per annos fere CL. (quanquam revera plures sunt) Pontifices circiter quinquaginta a Joanne scil. VIII. qui Nicolao I. & Hadriano II. sanctis Pontificibus successit, ad Leonem IX. usque a virtute majorum prorsus defecerunt, apotactici potius apostatice, quam apostolici. Platina, cum de Formosi successoribus, qui adversus se invicem exacerbatî alter alterius acta hætenus infregerat, egisset, queritur, in Benedicto IV. peperisse licentiam peccandi, nullo Principe flagitia hominum coercente, tanta portenta, a quibus ambitione & largitione sanctissima Petri sedes occupata fuerit potius quam possessa. Ipse Baronius Cardinalis, * strenuus alias Romani Pontificis atque sedis apostolicæ defensor, ubi horum temporum historiam exponit; Intrusi, inquit, in cathedram Petri & solium Christi sunt homines monstrosi, vita turpissimi, moribus perditissimi, usque quaque scædissimi. Exorsus

ab anno nongentesimo * seculum decimum, quod, ait, sui deformitate ac boni sterilitate ferreum, malique exundantis deformitate plumbeum, atque inopia scriptorum appellari consuevit obscurum; id, inquam, exorsus sub initium monet, ne quid scandali pusillus animo patiatur, si quando videre contigerit abominationem desolationis in templo, i. e. flagitiosum Pontificem in sede pontificia. Habet alia multa ejus generis, quæ vide penes Calixtum de Conjugio Clericorum. Nec alia mens Bellarmini, cujus hæc sunt verba in Chronologia, annexa Catalogo scriptorum Eccles. Hist. e regione anni 970. Vide seculum infelix, in quo nulli scriptores illustres, nulla Concilia, Pontifices parum solliciti de Ecclesia. Si ergo hoc verum, sedisse tum temporis monstra hominum horrenda & tantum non dæmones, quorumve nomina nihil aliud efficiunt, quam ut continuent catalogum Pontificum; quid mirum inter illa portenta in eandem sedem Angelis (si Diis placet) reverendam irrepsisse quoque foeminam sexum mentitam? Ex hoc sane argumento nascitur sententiæ nostræ nova quoque probabilitas, qua uti in plerisque ita hic quoque, nos contentos esse fas est, cum historica ita sint

* A. 900. n. I.

comparata, ut non nitantur omnia certitudine penitus infallibili, & quæ ad evidentiam accedat. Credenda igitur omnino hæc historia fide historica, aut nulla superest fides historica in orbe universo. Vix enim ulla historia tot tantisque nititur argumentis, atque hæc ipsa. Enimvero ajunt, fide papistica credendam esse hanc historiam, quæ est nova prorsus, & aliis præter Schookium & paucos ejus affectas inaudita distinctio. Ignorabat scil. Gerhardus, quid sit historica fides, cujus ea de re verba sunt hæc in Loco de Ecclesia: Si illis fidem historicam denegant, quibus tandem eam adhibebunt? Idem sine dubio noverat B. Calixtus, cujus in Tr. de Conjugio Clericorum hæc sunt verba: Dico itaque tandem, quali fide & probabilitate plerique rerum, quæ inter homines gestæ sunt, narrationibus credimus, talem huic quoque de Papissa historiæ tribui oportet: & quibusdam interpositis: historia itaque Joannæ Papissæ in possessione merito manet, ea fide & assensus certitudine, qua cæteras plerasque res ante aliquot secula ab hominibus & inter homines gestas admittimus, credi digna. Fide igitur historica hæc historia omnino credenda, nisi hoc frontem perfricando tueri velimus, Gerhardum atque

Ca.

Calixtum nescivisse, quid sit fides historica? Atque notanda sunt insuper verba Gerhardi nostri, quæ sibi dicta putent, qui hæc impugnant. Ita autem ille: Summæ igitur impudentiæ & audaciæ fuerit, tam multos & graves Scriptores, quorum consentientium monumentis expressa liquet veritas, mendacii cujusdam arguere! Ajunt tamen, fide papistica hoc credendum esse; quod etsi novum sit commentum, scio tamen, quid sibi velit. Nimirum Pontificios, cum omnia alias deferre consueverint suis historicis, qui hoc de Papissa retulerunt, aut per omnia elevare debere eorum maxime circa miracula, aliasque de sanctis narrationes minus verisimiles, aut simul credere, in cathedra Petri sedisse aliquam meretricem. Verbo: papisticos scriptores retulisse hoc in historiam, ergo papistis, non etiam orthodoxis, credendam esse fide papistica. Enimvero miseret me miseræ hujus explicationis. Neque enim provocavimus solum ad papisticos scriptores, sed etiam ad Græcos & Judæos. Num vero ea, quæ apud Græcos & Judæos literis prodita, fide papistica constant? Itaque hoc quidem argumento nihil hætenus decedit nostræ sententiæ. Sed jam longior, quam par erat, fui. At enim quia
recen-

recentiores nonnulli scriptores ratiunculis quibusdam undique corraſis hanc hiftoriam conati ſunt reddere ſuſpectam, de illis quoque, quantum quidem temporis ratio patietur, videbimus. Principio illud quidem urgent, non extare ſcriptorem *συγχερον*: idcirco falſum eſſe, quod hic aſſerimus. Dicunt, Anaſtaſium, qui hac ætate vixit, nil tale habere, non Rheginonem, non plures alios. Enimvero licet vel uno verbo reſpondere, ab authoritate negative argumentationem non valere. Si enim hoc argumentum conſiſtet, periire nobis omnes omnino hiftoriæ. Unde ne in ſacris quidem negative concludi poteſt. Matthæus, Marcus, & Lucas Chriſti cum Samaritana colloquium ac Lazari reſuſcitationem non deſcribunt: Ergo propterea tota illa res repudianda erit? miſera conſequentia. Quare autem illi nullam Papiffæ facere mentionem voluerint, cauſam nobis aperiat Ranulphus in Polychronio L. 5. c. 32. dedita ſcilicet opera ab illis fuiſſe præteritam, ne qua ignominix labe ſedes inde aſpergeretur. Nec abludit Martinus Polonus, qui, non poni eam in Catalogo Pontificum, ait, tam propter muliebrem ſexum, quam propter deformitatem facti. Non-

nulli (scribit Trithemius) foeminam illam inter Pontifices ponere noluerunt, quasi indignum facinus abhorrentes. Nullus igitur illorum Autorum negat, Joannam extitisse in rerum natura, sed tantum omnes eam omittunt in recensendis Pontificibus, quod non *ὄντως* sed *δοκασικως* tantum Pontifex fuerit. Quare inquit, Sigebertus ipse eam inter Pontifices non numerat. Nonne ipsemet Baronius ad A. 794. n. 1. fatetur, Bonifacium VI. a quibusdam veteribus non numerari inter Pontifices, quamvis sedem tenuerit strangulato Benedicto VI. per menses 3. Regino vero Prumiensis & Lambertus Schaffnaburgensis Pontifices seriatim non recensent, nec Joannam modo, sed alios quoque bene multos silentio praterunt.

Sed vero necesse non est, ut huc deveniamus: habemus enim omnino, ceu pluribus supra probatum dedimus, scriptorem coævum, Anastasium, qui Romæ spectavit rem suis oculis: nisi quis malit fidem derogare viris summis, Salmasio, Frehero, Boeclero & aliis, quos mendacii arguere nemo sine ingenti audacia potest. Ubi non possum, quin de codicibus Anastasii illud adhuc adjiciam, ipso fatente Blondello p. 45. Manuscriptos codices Anastasii vetustiores

stiores passim in Gallia, Germania, Anglia, Italia, Hispania, Belgio mutilos esse, & circa finem Leonis IV. laceros: cujusmodi etiam Lutetiæ in Regia Bibliotheca unum & alterum se vidisse asserit Maresius. Quæ sane mutilatio non potest contigisse aliam ob causam, quam ad suppressendam Joannæ historiam, quæ Leonis vitam immediate con-
sequebatur. Hinc igitur alterutrum sequatur necesse est, aut ultra Leonis vitam Anastasium non processisse, adeoque nullum ex ipso peti posse testimonium contra papatum Joannæ: aut id vulneris ubique accepisse studio hostium veritatis, quorum intererat rei tam obscoenæ memoriam interire. Cui argumento atque observationi quantum insit ponderis, nemo non videt, qui oculos habet. Ajunt, annos, qui Joannæ tribuuntur, non convenire cum temporum ratione. Sed vero hoc argumentum nullius est ponderis. Quid enim incertius est Chronologia Pontificum hujus præsertim & subsequenti seculi. Onuphrius ipse ad Platinam (in vita Nicolai I.): Quum sequentes Pontifices a Nicolao I. usque ad Clementem II. annorum videlicet propemodum CXXC. neque perpetuum quendam habeant scriptorem, & majorem suorum actorum partem amiserint,

tempora adeo incerta & obscura habent, ut neque quo loco, neque quo ordine aliquot Romanorum Pontificum nomina reponeantur, satis liqueat. Discrepantiam igitur Chronologorum hac quidem in parte satis agnoscimus, & quod facilius queat convenire inter magnæ alicujus urbis horologia, quam inter illos: inde tamen non statim sequitur, eos historicos falsa nobis venditare, quorum Chronologiam vel cum ipsismet vel cum aliis nequimus conciliare. Si quem enim ea juvabit imitari, id ex isto sumendo autore, istud ex alio, nulla erit tam certa historia apud veteres, quæ non posset in dubium vocari, imo plane everti. Debebit sane etiam apud nos nutare fides historiæ ipsius Sacræ Scripturæ V. & N. T. in cujus chronologia quædam nobis esse ἀπορροια omnes fere fatentur. Quid? quod Onuphrius in suo Pontificum Chronico, Platinae subjuncto, addit nonnullis Joannam partim præcedentibus, partim sequentibus Pontificibus menses, immo annos, apud Marianum non repertos, e quibus biennium Joannæ facile conficiatur. Non igitur ita faciles sumus ob frigidam aliquas chronologicas conjecturas & vitiligationes, in ea historia rejicienda, quæ tot seculorum consensu & historicorum
alio-

aliorumque scriptorum omnis ordinis præsertim e sinu ipsius Ecclesiæ Romanæ testantium autoritate & fide comprobatur. Quod tertio objiciunt, quoad circumstantias admodum variatum esse a scriptoribus hujus historiæ: misera rursus est consequentia. Si enim propter aliquam in circumstantiis discrepantiam inter scriptores ejusdem historiæ, aut quorumlibet eorum aliquot parachronismos, fides pereat rerum, in quibus narrandis quoad substantiam cæteroquin conveniunt, nihil erit tam constans in historia tum Ecclesiastica, tum Civili, quod hac arte eludi & rejici non possit. Nullum enim mihi dederis veterem historicum, qui nec secum, nec cum aliis ullo modo committi queat. Cujus equidem rei exempla aliquot luculentissima suppeditat D. Wagnerus Institut. Histor. L.I. C. XIV. p.m. 120. ubi etiam NB. caufidicis hanc instantiam suadet esse relinquendam, quippe qui ex minima circumstantiola omnimodam variationem, sæpe inficiationem facti extorquere conantur. Neque desunt huic rei exempla e Sacris deprompta literis. Videatenim quis Genealogiam Servatoris nostri Christi apud Lucam & Matthæum Evangelistas, & deprehendet, pleraque nomina a se discrepare, atque ita

confusam eam esse, ut hæreat fere omnibus eruditis aqua, nec tamen inde falsam eam esse sequatur. Si enim de summa rei constat, non debemus adeo rigidi esse in minoribus. Sic notamus exemplum, quod esse potest instar omnium. 1. Reg. IV. 26. legimus in Bibliis nostris Germanicis: *Und Salomo hatte 40000. Wagen - Pferde, und 12000. Reifige.* In loco autem parallelo 2. Chron. IX. 25. habemus: *Und Salomo hatte 4000. Wagen - Pferde &c.* Eadem res narratur duobus locis, modo tamen plane diverso. Si simile quid repèrent in hac historia, quantopere triumpharent? Sed vero hic universum discrimen est quinque annorum. Habemus aliud exemplum in historia Resurrectionis Dominicæ, in qua cardo salutis nostræ vertitur; neque enim videntur nulla ratione in eadem discrepare Evangelistæ, quis tamen dixerit, eam historiam non esse veram? Absit. Omnia siquidem salvari possunt, atque diversa tantum scripserunt Evangelistæ, non contraria, teste Augustino Episcopo Sanctissimo, qui inde quoque ducit argumentum pro veritate N. T. Ait enim, inde patere, non conspirasse inter se Evangelistas quoad circumstantias, cum in cæteris mire conveniant.

veniant. Et vero cur hoc obtingere non possit etiam in Scriptoribus συγχεροισι? Cite-
tur testis Gustaphus Adolphus Rex Sueciæ,
gloriosissimæ memoriæ: de cujus morte
vix duo Scriptores inter se conveniunt, sed
tot ferme sunt discrepantes sententiæ, quot
scriptorum capita: quis tamen inde negaverit
eum nunquam extitisse? Et hæc locum ha-
bent etiam in aliis: deprehendemus enim in
reliqua historia universa de bello Germaniæ
(ubi tamen plerique Scriptores συγχεροισι)
tantum discrimen, quantum potest esse ma-
ximum. Neque etiam semper vera sunt,
quæ a Scriptoribus coævis scribuntur. Jam
ulterius instant, aliquos Scriptores Leoni IV.
statim subjungere Benedictum III. excluso
Joanne VIII. itaque verisimile esse, Joan-
nem non fuisse in rerum natura. Sed nos
potius dicimus, adesse Anastasium. Atque
hæc Herculis clava, quam nobis eripiet ne-
mo. Nec valet hæc argumentatio: Qui-
dam Scriptores negligunt Joannem VIII.
Ergo nullus fuit in rerum natura. Omiserunt
enim plerique ob deformitatem facti, veriti
scil. supercilium Pontificis, uti in anteceden-
tibus pluribus fuit demonstratum; qua ipsa
ratione etiam adductus Platina (quippe me-
mor carceris, e quo haud ita pridem sub

Paulo II. evaserat) non sine trepidatione & deprecatione. Hæc, inquit, quæ dixi, vulgo feruntur, incertis tamen & obscuris autoribus, quæ ideo ponere breviter & nude institui, ne obstinate nimium & pertinaciter omisisse videar, quod fere omnes affirmant. Erremus etiam nos hac in re cum vulgo. Quanquam apparet, ea, quæ dixi, ex his esse, quæ fieri posse creduntur. Sed vero (ut ex diverticulo hoc in viam redeam) constat, Luitprandum, Scriptorem antiquum, Joannem duodecimum statim subungere Joanni Ravennatensi, omisisis Leone VI. ac Stephano VIII. nec tamen quispiam dixerit, eos non fuisse in rerum natura. Insurgunt tamen amplius atque causantur, Scriptores de hac historia dubitanter admodum loqui, adhibitis formulis dubitativis, Fertur, ajunt &c. Sed rursus nihil in recessu habet hoc argumentum. Primo enim dicimus, falsum esse, quod omnes ejusmodi formulis utantur. Anastasius certe, qui primus hanc historiam consignavit, non utitur tali aliqua particula, sed citra dubitationem ac trepidationem asserit, sedisse hanc foeminam annis duobus, mensibus quinque, diebus quatuor. Platina quoque (cujus verba paulo ante recitavimus) fatetur omnes fere hoc affirmare.

Deinde

Deinde vero agnoscimus equidem, Scriptores aliquos adhibuisse tales particulas ; sed vero respondemus primo , cum certum sit , multos reverentia aulæ Romanæ permotos plane omisisse hanc historiam , verosimile omnino evadere , alios maluisse emollire nonnihil hanc narrationem , ne graviter nimis incurrerent odium aulæ Romanæ. Amplius, quis ignorat, frequenter, Ajunt, Dicunt, Ferunt, dicere Scriptores etiam in re, de qua minime ambigebant, eamque loquendi formulam sæpe præ modestia, alias ad invidiam declinandam , nonnunquam solius elegantiae ac transitionis causa in re verissima & manifestissima ab iisdem adhiberi, ceu curate demonstravi in Diff. de Imperatoribus Francicis. Magnum vero sibi commentus videtur Baronius , dum urget & vehementer quidem, quomodo id exprobrare præteriissent Romanæ hostes Ecclesiæ? Nihil enim tale dicere Michaelem, qui tum temporis Orientale moderabatur Imperium, atque nonnullorum stimulis in eandem Romanam Ecclesiam concitatus, omne genus convitiis in eam contumeliosus valde conjiciebat : non Photium etiam Constantinopolitanum Patriarcham, sedis Romanæ infensissimum hostem , qui cum sede cen-

seretur indignus, quod esset Eunuchus, optimo utique jure potuisset, imo debuisset regerere, quod etiam foemina thronum Romanæ Ecclesiæ conscendisset. At enim vero ut certi esse possemus, id probrum ab Imperatore Græcorum Michaelē & Patriarcha Photio vel aliis Romanorum Pontificum adversariis objectum nunquam fuisse, necesse foret, extare omnia omnium scripta. Baronium igitur ea protulisse oportuerat, si argumenta nonnullarum virium esse debebant. Et sane extat quidem hodie epistola Nicolai I. Pontificis, qua Imperatori Michaeli respondet: Michaelis autem Epistola non extat. Ex pluribus tamen Nicolai ipsius responsionis locis satis apparet, Michaelē multa objecisse, quibus respondere Nicolaus subterfugerit: quandoquidem expostulat, quod ab injuriis scribens inchoaverit contra primam & magistrā omnium Ecclesiarum, & causas reddens, quare omnibus non responderit, primam facit suam ipsius ægritudinem, alteram legati Constantinopolitani festinationem, tertio inquit, quia cum eadem, quæ superfuerunt in ipsa Epistola, ad quæ nihil respondimus, sed potius philosophando contempsimus, plena essent omni pravitate & blasphemia, non vestra esse verba, quæ
tam

tam perperam sonabant, credidimus. Epistola licet hæc in justum volumen excreverit, unde meretricem illam ei objectam non immerito quis suspicetur, quam porro Nicolaus, ejus memoriam sibi extinguendam ratus, ut ex fastis erasit, ita & in hac sua responsione silentio præterire maluit. De Photii vero contra Romanos Scriptis docet nos ipse Baronius A. 868. n. 39. Adrianum II. A. 866. quod Nicolaus I. prædecessor consequi non potuerat, ab Imperatore Basilio Michaelis Successore obtinuisse, ut liber Photii, in quo Michaelis Epistola continebatur, Romam mitteretur, qui synodali judicio combustus, magna, inquit, sua gloria, sedisque Apostolicæ honore: hocine Nicolaum & Adrianum tam enixe satagisse frustra existimes? Quid causæ fuisse arbitramur, quare in Epistolam Michaelis & scripta Photii tantopere isti sævierint, & omni ope atque consilio, ut e rerum natura sublata posteritatis memoriæ subducerentur, enixi sunt? Quare non credamus, & alia multa, & foeminam Romano throno insidentem haud ita pridem, aculeatis verbis objectam fuisse? Quemadmodum postea sane a Barlaamo Græco Monacho factum esse supra audivimus. Sicuti autem ob calcatum
a Tul-

a Tullio paternum cadaver, sceleratum dici vicum, Romæ veteris exegit dolor, ita nemini sane mirum videatur, si ob violatam per inauditum antea scelus, ab impurissimo prostibulo sedem pontificiam tanta Clerus urbanus indignatione exarsisse dicatur, ut execrandum posteris imo nec visu dignum tanti piaculi locum duceret! Audiamus in hanc rem verba Boccatii, qui Lib. de Claris Mulieribus C. 99. hunc in modum scribit: Ad cujus detestandam spurcitiem & non continuandam memoriam in hodiernum usque summi Pontifices Rogationum cum Clero & populo sacrum agentes, eum locum partus, medio ejus itinere positum abominantur, eo omisso declinant per diverticula vicosque, & sic loco detestabili posttergato reintrantes iter perficiunt, quod coepere. Declinatæ hujus viæ Martinus quoque Polonus meminit. Is enim, quippe Papæ Pœnitentiarius, cum diu Romæ egerit, mirum non est, si ex sibi visis & observatis in urbe comprobaverit, quod tot alii ante se de Joanna narraverant. Hinc est, quod Antoninus, Archiepiscopus Florentinus, in Catalogum Sanctorum ab Adriano VI. relatus, & declinatæ viæ cum Martino, & statuz cum Theodorico meminerit. Quia igitur
viam

viam etiamnum obliquare Pontifices negare non sistent, causam aliam comminiscuntur, quod recta via tantæ turbæ excipiendæ angustior sit. Attamen qui ex peregrinis & indigenis Romanis considerabunt pompam papalem, sive processionem etiamnum hodie perseverare in transeundo per aliam plateam, quæ nec latior est, & iter processionis prolixius facit, non poterunt sibi imaginari, quod per hosce anfractus procedant alia de causa, quam in memoriam, adde detestationem infamis accidentis suæ Joannæ. Rei sane veritatem agnoscit Boccatius, ipseque adeo Platina, de primo, inquit, non abnuem.

Instant vero constare ex Onuphrio, Pontifices non habitasse in Vaticano, sed in Lateranensi palatio usque ad tempora Bonifacii IX. qua igitur ratione dici possit, Joannam peperisse in itinere, cum ex Vaticano invisere vellet Ecclesiam Lateranensem? Enimvero Martinus Polonus, qui hanc loci circumstantiam annotavit, non dicit e palatio Vaticano in Lateranum ivisse, sed cum de S. Petro, e templo scilicet, ubi statio fuerat & sacra celebrata erant, in Lateranum tenderet. Num ergo negare poterunt, & tunc & multo ante, templum D. Petri extitisse,

tisse, a quo in Lateranum processionaliter, uti loquuntur, itarent? Incredibile tamen illis videtur, quod novem mensium spatio nemo ex tot familiaribus, nemo ex tot aulicis, qui Romanum Pontificem comitari semper solent, rem tam claram animadvertit. Imo quid frequentius? quasi non quotidie usu veniat, ut mulierculæ arte & vafritie Joanna longe inferiores, ad ipsum usque partus momentum uterum celent. Quin apparet ex obitu puerperæ, foetum tempore parum congruo & justo maturius editum esse, ut casum consilio prævertere foemina alioquin vaferrima nequiverit. Breviser nihil profuit versutæ sua versutia, quia justo Dei judicio venerat summa dies & ineluctabile tempus. Huc tamen evadunt, ut dicant foeminam aliquam Moguntiaë claruisse, atque id sibi sumsisse, ut in rebus Ecclesiæ aliqua pro arbitrio disponderet, atque ab hac ortam fabulam. Sed Deum immortalem! Quis sanæ mentis hoc diceret? Sed hoc est miserum effugium Leonis Allatii, hominis inepti, & qui, dum hæc scriberet, senio tantum non delirabat. Quæ enim consequentia? Moguntiaë foemina quædam magni nominis fuit, Ergo illam Romani, Græci, Germani & Judæi unanimiter pro

pro Pontifice venditarunt. Sensum communem in his desidero. Sed si hanc quis nolit admittere, quippe vix nomine cognitam, substituunt Theodoram, scortum impudens, quæ, quod dictu etiam foedissimum est, Romanæ civitatis non inviriliter, ut ait ille, monarchiam obtinuit, atque ex ea exsculpunt, si Diis placet, Joannam Papam foeminam. Enimvero qui hæc fingunt, quare non alia quoque nobis supponunt? Omnes norunt, quam potestatem exercuerit Romæ Olympia tempore Innocentii X. Quare igitur ex ea Papam non fecerunt? vel ex Mathilde, quæ vixit Gregorii VII. temporibus, cujusve eximia in civitate Romana erat potestas? Imo si ex Theodora Pontifex prodiit, quare non item ex ejus filia Marozia? cujus major omnino erat, quam matris ipsius autoritas: Pontificem enim Joannem X. a matre Theodora olim evectum ipsa deiecit atque e medio sustulit, substituto in ejus locum filio Joanne, quem ex Sergio Papa meretrix ipsa genuerat. Vid. omnino Baronius A. 928. n. 2. A. 931. n. 1. A. 933. n. 5. Sunt equidem plures hujus generis conjecturæ miseræ satis, imo ridiculæ (e) quas sciens

(e) Qualis est Stephani Forcatuli, cujus Lib. VII. de Gallorum Imperio & Philosophia p. 477. (edit. Paris.

sciens lubensque prætereo, cum istas vel recitasse sit confutasse. Neque enim tam obtusa gerimus pectora, ut hisce fidem habeamus. Denique non movet nos autoritas Leonis Allatii, hominis fidei plane suspectæ: provocavit iste quidem ad Archiva Pontificis: sed vero cur non concedunt potestatem ea inspi-

paris. 579.) hæc sunt verba: Quid si Joanni forte accidit, ut sexum mutaverit? Sicuti e diverso T. Livius asserit, eo tempore, quo T. Gracchus Proconsul apud Beneventum contra Hannonem Pœnum pugnavit, proposita servis libertate, qui caput hostis retulissent, ex muliere virum factum Spoleti — Sed ii non credent, hoc evenisse, qui non recordantur, uxorem Loth in Salem versam, & Deum mira facere oblitum suspicantur &c. Idem Pontificis recens electi sexum explorari ad hoc suspicatur, ut se hominem Sacer Pontifex meminerit pro castimonia adversus naturæ stimulos luctaturum.

Sed vel hoc solo commento se dignum reddidit elogio Forcatulus, quo illum non ita pridem profectus est Vir Celeb. Henricus Brenemannus, eum hominem ampullosum ac nugivendum nominans in Historia Pandectarum Florentin. Lib. I. C. X. p. 63. Quædam hujus farinæ exceptiones, sellam præcipue stercoreariam, quam alii testiculatricem vocare malunt, spectantes, false & lepide perstringuntur a personato Hieremia Pelegrino, Seraphici ordinis Professore, in Decisionibus Gratiani redivivi de Pontificali catholomania & inverso morum & sacrorum Romanorum ordine, obscurorum virorum stilo scriptis, & A. 1607. in 8. impressis, p. 9. sq. Verbis ejus ipsis recitandis supersedeo, cum nonnulla ab obscœnitate prope ab-


inspiciendi? Scilicet norunt omnes viri docti, quantopere scriptores bonos corrumpant Pontificii, atque supprimant. Plura igitur in hanc rem proferre non attinet. Atque hæc quidem sufficiant hac vice de historia Joannis VIII. Papæ foeminæ, cujus veritatem indubiis, ceu speramus, argumentis evicimus. Credamus igitur hanc historiam fide historica, quia majores nostri (f) crediderunt, credent quoque filii, credentque nepotes!

N

VI.

(f) Antiquis autoribus, qui Joannæ Papatum asseruerunt, accensendus quoque est Anonymus scriptor Historiæ Romanæ ab U. C. usque ad tempus Constantini M. cui templorum LXXXVI. Romæ existentium descriptio annexa est. Eum Romæ A. 1499. olim editum luci publicæ restituit Arnstadiæ A. 1722. Gotfrid. Tenzelius. Verba ejus de nostra Joanna hæc sunt p.77. Item habetur in serie Pontificum Romanorum, quod Joannes Anglicus post Leonem sedit annis II. mensibus V. diebus IV. vacavit sedes mense uno. Ut asseritur, Foemina fuit, & juvenili habitu ab amasio suo Athenis ducta in diversis scientiis tantum profecit, ut Romæ tandem legeret triennium, & magnos magistros discipulos haberet: nec aliquis sibi par ibidem inveniretur. Magnæ itaque scientiæ & opinionis existens in papam concorditer eligitur. Sed in papatu per familiarem imprægnatur. Verum tempus partus ignorans, de S. Petro in Lateranum tendens, angustata peperit inter Colisæum & S. Clementem, & ibi-

ibidem, ut dicitur, mortua fuit. Hanc viam quando Papa obliquat, dicitur a plerisque, quod propter detestationem facti hoc fiat. Nec ponitur in Catalogo Pontificum, propter mulierem sexum, quantum ad hanc difformitatem. Huic opusculo eruditam præfationem de Joanna præmisit Vener. Jo. Christ. Olearius. Legi quoque merentur, quæ occasione hujus loci in Biblioth. Bremens. Class. VII. p. 934. seqq. observavit vir eximius, qui sub Irenæi Bibliophili nomine hætenus latere voluit, & celeb. D. Th. Hafæus. Variorum etiam, qui hanc pontificalis puerperii historiam commemorarunt, testimonia, per Eliam Ehingerum congesta, non ita pridem commentationi eleganti de ejus vita & scriptis subjecit p. 163. seqq. Vir
Clar. Jac. Bruckerus.



VI.

Argumenta potiora, quæ a Viris eruditis contra historiam de Joannæ Papissa afferri solent. (a)

A Sexcentis, & quod excurrit, annis de Joannæ Anglicæ, Moguntia oriunda sermo percrebuit, quod sexum mentita virilem eo successu Romanis imposuisse feratur, ut communibus post Leonis IV. obitum votis ad pontificale solium evecta fuerit. Hæc narratio per tot secula communi omnium consensu pro vera habita, nostro demum & superiori seculo in dubium vocari coepit, nonnullisque elegantiori doctrina præstantibus viris ansam dedit, accuratius in veritatem hujus historiae inquirendi, eo successu, ut quidam ex iis quoque, qui ab Ecclesia

N 2

Ro.

(a) Quis ea consignaverit, ego juxta cum ignarissimis scio: hoc tamen novi, seculo superiori in Academia Altorfina conscripta esse. Haud vero ingratum fore Lectori, mihi persuadeo; heic in epitomen redacta conspiciere fortiora argumenta, quibus Joannæ papæ destructui alias solet. Per me quis suo utatur judicio. Plures, a Romanæ Ecclesiæ communionē alienos, qui hanc narrationem fabellatum in censurâ retulerunt, enarrat Jo. Christianus, L. Baro de Roineburg, in Epistolis ad Jo. Contr. Dietericum p. 67. sq. Et 234.

Romana divortium fecerunt, quicquid de Joanna narrarunt historici veteres, pro commento & fabula publice habuerint. Horum itaque argumenta, cum non plane nullius ponderis esse mihi videantur, in compendium referre, atque in medium producere adversus sententiam communem placet. Primo igitur ita argumentor: Quæcunque narratio a Scriptoribus coætaneis plane omissa, ex locis solummodo quibusdam recentiorum probatur, nec satis cum Chronologia convenit: illa pro vera non est habenda. Atqui hæc de Joanna Papissa talis est. Ergo.

Minor tribus absolvitur membris, 1. hanc narrationem a scriptoribus coætaneis plane omissam fuisse. 2. eam ex locis quibusdam supposititiis nonnullorum recentioris ævi scriptorum probari. Et denique 3. cum Chronologia male convenire. Quæ omnia nunc ordine erunt probanda. Sed prius quidem membrum quod attinet, hanc historiam a nemine coætaneorum commemorari, de eo nos dubitare non sinit scriptorum, qui tum temporis vel paulo post vixerunt, inspectio. Inter hos merito familiam ducit Anastasius Bibliothecarius, quem sequuntur Guilielmus Bibliothecarius, Anna-

Annales Bertiniani, Ado Viennensis, Regino, Luitprandus, Lambertus Schaffnaburg. Flodoardus, Hermannus, Conradus, qui omnes memorabilis hujus historiæ, quam procul dubio non omisissent, nullam plane mentionem faciunt, sed omnes miro consensu Leonem IV. A. 854. denatum, & Benedictum III. A. 855. eidem successum scribunt.

Objiciunt I. non statim ab omissione Scriptorum coætaneorum ad falsitatem historiæ alicujus concludi posse, cum de multis rebus coætanei deficiant, quæ tamen nihilominus pro veris habeantur ab omnibus. E.g. de ortu & excidio Romæ nullus extat scriptor coævus, nec tamen sequitur: Ergo quæ de eo scribuntur, vera non sunt. Sed respondeo: verum id quidem esse, & non semper tale valere argumentum, sed id tum demum obtinet, quum nulli amplius coætanei scriptores supersunt: tunc enim, dummodo narratio absurda non sit, credendum est, scriptores recentiores rem ab antiquioribus fide dignis, quorum monumenta amplius non extant, accepisse. Ast ubi de tempore historiæ alicujus, quæ recentioribus commemoratur, antiqui scriptores coævi extant, iique omnes silent, illiusque demum

mentio apud recentiores occurrit, merito fides illorum in dubium vocatur, maxime cum præsumendum non sit, scriptores *συγγραφες*, qui alias bona fide omnia narrant, rem inprimis memorabilem omisso fuisse.

Objiciunt 2. in gratiam aulæ Romanæ illos hanc historiam omisisse. Respondeo α. Hæc conjectura est, adeoque nil firmiter probat; neque enim facile credendum est, scriptores hosce rem tam memorabilem, & quæ in memoria ac ore omnium fuit, omisso fuisse, qui alias satis libere de vitis Pontificum scribere. β. Non solum scriptores hosce nullam plane hujus historiæ mentionem facere, sed contrarium non obscure innuere. Dum enim omnes Leoni IV. immediate Benedictum successisse scribunt, Joannam plane excludunt. γ. Utut de Latinis historicis hoc dicemus, quis quæso Latino clero infensissimis ultionisque avidissimis Græcis, Photio & Nicephoro in mentem venire potuisse putet, ut indicto sibimet sponte silentio Romanorum Pontificum, quos undecunque quæsitis criminationibus odiosissime exagitabant, famæ parcerent, vel Anastasium, Hincmarum, Adonem Viennensem, Luitprandum id sese confe-

cutu-

cuturos sperasse fingat, ut illarum dedecus tacendo dissimularint? quod tamen famosa statuarum palam erectio, scrupulosa in processuum solennibus sceleris consciæ viæ declinatio, stercorariæ sedis ad explorandum Paparum sexum in posterum infessio, orbi indefinenter ebuccinabant. Quomodo itaque Scriptorum in gratiam Romanæ sedis studiosum silentium cum hisce factis, quæ magis, quam omnia scripta, quotidie cuivis facti turpitudinem in memoriam revocabant, stare possit, non video.

Provocant 3. ad testimonium Anastasii Bibliothecarii, & licet quidem extra omnis dubitationis aleam positum sit, in omnibus Codicibus impressis, quibus hodie utimur, tum quoque plerisque MSSis de memorabili hac historia ne *γεν* quidem extare; dubium tamen de ingenuitate modernorum exemplarium jam olim movit æternæ memoriæ Vir Cl. Salmasius, qui extitisse quondam in celebri Heidelbergensi Bibliotheca MSSos Codices duos, in quibus historia de Joanna nostra legebatur, frequenter amicis suis narrare solebat; unde ea conjectura, non omisisse Anastasium celebrem hanc historiam, eam tamen, cum parum ad Romæ sedis dignitatem facere videbatur, ab

iis, quibus summorum Pontificum auctoritas curæ cordique fuit, mala fide fuisse expunctam. Ita si res se haberet, jam de veritate hujus historiæ nullum amplius superesset dubium: at vero cum locum hunc, qui quibusdam Anastasii codicibus insertus cernitur, suppositum, & recentioris cujusdam manu contra veterum exemplarium fidem interpolatum esse, non levis sit suspicio, operæ pretium erit, accuratius paululum in locum hunc, a quo vis omnis hujus argumenti dependet, inquirere, & quantum ipsi tribuendum sit, dispicere. Ante omnia autem afferenda erunt ipsa Anastasii verba, quibus hanc rem in nonnullis exemplaribus narrat: & licet quidem præter supra memoratos duos Codices Palatinos nullus fere alius hætenus cognitus fuerit, qui detestandæ hujus historiæ mentionem faceret, repertus tamen est codex MStus Bibliothecæ Regiæ, in quo locus ille interpolatus habetur. Verba ipsa ope Puteanorum fratrum exhibet vir summus David Blondellus. Sunt autem hæc: Post hunc Leonem Joannes Anglicus, natione Moguntinus, sedit annis duobus, mense uno, diebus quatuor, & mortuus est Romæ, & cessavit episcopatus mense uno. Hic (ut asseritur)

ritur) foemina fuit , & in puellarietate a quodam suo amasio in habitu virili Athenis ducta sic in diverſis ſcientiis profecit , ut nullus ſibi par inveniretur , adeo ut poſt Romæ legens , magnos magiſtros diſcipulos & auditores haberet ; & cum in urbe vita & ſcientia magnæ opinionis eſſet , in Papam concorditer eligitur : ſed in papatu per ſuum familiarem idem imprægnatur. Verum tempus partus ignorans , cum de S. Petro in Lateranum tenderet ; anguſtiata inter Coliſæum & S. Clementis Eccleſiam peperit , & poſt mortua , ibidem (ut dicitur) ſepulta fuit. Et quia Dominus Papa cum vadit ad Lateranum , eandem viam ſemper obliquat , creditur a pluribus , quod ob deteſtationem facti hoc faciat ; nec ponitur in Catalogo Pontificum , propter muliebriſ ſexus deformitatem quantum ad hoc. Hic locus ille celebris Anaſtaſii , qui in quibusdam exemplaribus manu exaratis , a recentioribus impoſturam paſſis , habetur , qui ſi curioſius paululum conferatur cum verbis , quibus rem narrat Martinus Polonus , ad oculum apparebit , illum per omnia fere cum verbis Poloni convenire , manifeſto argumento , locum hunc a Scriptore quodam imperito Codici Anaſtaſiano contra reliquo-

rum antiquorum Codicum fidem insertum, & cum, quisquis fuerit interpolator ille, nihil de celebri hac historia in Anastasio reperiret, ex nimio fortassis & inepto curiositatis studio ex Martino Polono esse exscriptum, adeo, ut injurii videantur in manes Anastasii, qui illum inter Papissæ præcones familiam duxisse volunt, de qua ille procul dubio ne per somnium quidem cogitavit.

Putant equidem nonnulli 4. verba, quæ habentur in Martino Polono, esse ipsa Anastasii, adeoque Martinum Polonum historiam hanc ipsis Anastasii verbis in genuinis & tunc temporis adhuc incorruptis Codicibus repertis narrare. Verum enim vero huic opinioni primo repugnat omnium vetustissimorum exemplarium consensus, in quibus de Joanna Papissa nec vola nec vestigium extat, paucos vero illos Codices, in quibus mentio rei habetur, recentiores esse, nec ipsi quidem dissentientes negare audent. Ad sunt præterea, quod ad conficiendam rem præcipuum est, manifesta quædam argumenta, quæ firmiter evincunt, locum hunc non Anastasii, sed vel illius Martini Poloni, vel alius alicujus interpolatoris esse. Perlegenti loci occurrunt primo hæc verba :

Hic

Hic, ut asseritur. Hæc verba apertæ falsitatis hunc locum convincunt: nam si revera hæc contigit historia, quomodo Anastasius, qui tum temporis Romæ vixit, adeoque testis oculatus esse potuit, factum ignorare quivit, & ex incertis aliorum rumusculis (quod per verbum *asseritur* innuitur) rem enarrare? Certe verbis hisce, *creditur, asseritur, dicitur*, & similibus tum demum utimur, cum rem, de qua certo non constet, enarrandam suscipimus; quæ autem vel ipsi vidimus, vel alias indubitata fide nituntur, alio dicendi genere proferre solemus, adeo, ut verba hæc Anastasio *αὐτοῦ* minime conveniant. Hoc primum est. Pergit interpolator: *Athenis deducta.* Constat autem eo tempore neque Athenis, neque usquam in Græcia fuisse ulla Gymnasia literaria. Scribit enim Synesius in Epist. ultima ad fratrem suum, suo tempore Athenis non fuisse nisi nomen Academiæ. Fuit autem Synesius paulo post tempora Basilii & Nazianzeni. Scribunt etiam Cedrenus & Zonaras in vita Michaelis & Theodoræ Imperat. circa finem imperii Michaëlis, cum nimirum solus regnaret, matre Theodora amota, bonarum literarum & philosophiæ scholas fuisse restitutas a Barda Cæsare, cum
usque

usque ad illud tempus per annos plurimos ita fuissent extincta omnia studia sapientiæ in Græcia, ut ne vestigium quidem ullum extaret. Constat autem imperium Michaelis solius, Theodora amota, incidisse in tempora Nicolai I. qui successit Benedicto III. Ex quo sequitur, post mortem Joannis istius coepisse in Græcia reviviscere studia sapientiæ: ante hæc vero tempora penitus fuisse quasi sepulta, adeoque & hæc verba locum hunc maxime reddunt suspectum. Pergit interpolator: *Cum de S. Petro in Lateranum tenderet*: quæ iterum tempori, quo Joannam sedisse volunt, male conveniunt. Certissimum enim est & eleganter demonstratum ab Onuphrio Panvinio Lib. de VII. Ecclesiis, Romanos Pontifices non habitasse in Vaticano usque ad tempora Bonifacii X. quomodo ergo, si in Laterano habitabat, voluit ex Vaticano invisere Lateranum? Cum itaque extra Lateranum degentes Pontifices non viderit Anastasius, novum argumentum est, locum hunc esse supposititium. *Tenderet*: credibile non est, quod mulier uterum gerens jam tot menses, tunc maxime voluerit procedere, quando maximum periculum erat, ne detegeretur. Sed pergamus ad reliqua: *Angustiata inter Coliseum*

seum — mortua ibidem, ut dicitur, sepulta est. Hic rursus habetur certa: ut dicitur, dubiæ narrationis nota. Quodsi enim in via peperit & periit & sepulta est, quomodo Anastasius scriptor συγχερονος testisque oculatus & Romæ præsens de hoc dubitanter scribere, & rem tanquam minus compertam inque incerto sitam ex fluctuantibus aliorum rumusculis tradere potuit? Pergit: *Quia Dominus Papa, cum vadit ad Lateranum, eandem viam semper obliquat.* Cum jam dictum fuerit, iis temporibus Pontifices in Laterano nondum habitasse, necesse est, hæc verba non Anastasii esse, sed recentioris cujusdam, qui post constitutum in Vaticano Pontificum ordinarium domicilium vixit. Porro: *creditur a plerisque.* Hæc rursus recentioremanum testantur. Anastasius certe rem, cui præsens aderat, ex aliorum narratiunculis discere necesse non habuit.

Uterius: *Nec ponitur in Catalogo Pontificum.* En novum imposturæ & interpolationis documentum! A recentiore enim manu hæc profecta esse, facile perspiciet is, qui secum reputabit, nonnisi ab eo hæc scribi potuisse, qui post auctum plurium capitum accessione Paparum catalogum vixit. Ex

iis

illis omnibus satis, opinor, manifestum erit, exemplaria illa MSSa Anastasii, in quibus Joannæ mentio habetur, sincera & incorrupta non esse, sed a recentiori quodam interpolata. At non ipse solum locus arguit, falsum illum & supposititium esse, sed & reliqua, quæ in eodem codice sequuntur, pessime inter se cohærent, & magis adhuc imposturam probant. Scilicet imprudens ille, quisquis fuerit, interpolator, postquam Martini verba contra Anastasii mentem codici huic inseruisset, sequentia genuina verba, quæ omnem narrationis de Joanna Papissa fidem evertunt, stolidè retinet; ita enim pergit: Leo quidem hac luce substractus Præsul occubuit, mox omnis clerus istius a Deo protectæ Romanæ sedis &c. quæ verba totam hanc fabellam penitus convellunt. Si enim, quod Anastasius scribit, nec interpolator correxit, mox post substractum hac luce Leonem Benedictus electus est, quomodo Joanna media inter Leonem & Benedictum esse potuit? Sed nec quæ sequuntur, melius cohærent: Hæc & similia dicens, & ipsi Imperiales ibidem conveniunt legati &c. (b). Quæ verba iterum sunt inter-

(b) Integra hæc verba, ut & priora legi possunt in Blondelli, quem potissimum sequitur noster Anonymus,

interpolatoris, non Anastasii, in cujus quippe codicibus genuinis non habentur. Expresse hic dicitur, Imperatores Ludovicum & Lotharium post factam Benedicti electionem legatos Romam misisse. Jam vero consentiunt in eo chronologi omnes, Lotharium Imper. die 74. post Leonis dormitionem diem supremum obiisse. Si itaque inter Leonem & Benedictum media per biennium & quod excurrit sedit Joanna, quomodo Lotharius potuisset mittere legatos ad Benedictum, qui secundum illam computationem post annum demum mensesque novem ab obitu Lotharii fuisset electus. Unde ita argumentor: Si Imperator Lotharius legatos misit ad Benedictum Pontificem, non potuit Joanna media sedere inter Leonem & Benedictum. Atqui verum est prius. Ergo & posterius. Prius ipse interpolator scribit: Ratio connexionis ex chronologia & ratione computandi patet. Nam consentiunt in eo chronologi & historici omnes, Leonem obiisse A. 855. d. 17. Julii. Idem testatur Martyrologium Romanum, Anastasius,

mus, *Anaxagoræ* famosæ quæstionis: An fœmina ulla inter Leonem IV. & Benedictum III. media federit, p. 181. editionis a Samuele Maresio Groningæ 1658. curata, qui eam suæ Joannæ Papissæ Restitutæ inseruit.

sius, Marianus, Annales Bertiniani, Sigbertus, Honorius Augustodunensis, Luitprandus, Albertus Stadenfis, Gothofridus, alii-
que. Lotharium vero die 29. Sept. ejusdem
anni, adeoque d. 74. post Leonis mortem
defunctum esse, iterum testatur epitaphium
a Rabano scriptum, Ado, Annales Bertin.
Metenses, Hildesheimenses, Fuldenfes,
Rhegino, Hermannus, Lambertus, Maria-
nus, Sigbertus, & universa historicorum tur-
ba. Joannam autem biennium sedisse vo-
lunt illius patroni, quæ nullo modo simul
stare possunt. Ex his iterum apparet impe-
ritia & fraus impostoris. Nam nec illud ve-
rum est, quod Lotharius Imp. ad Benedi-
ctum legatos miserit, quod itidem ex chro-
nologia patet ad oculum. Benedictus enim
secundo aut tertio demum die post Lotha-
rium inthronizatus est. Post Leonem enim
vacavit sedes dies 77. Lotharius vero obiit
die 74. post Leonis dormitionem, adeoque
tribus diebus ante Benedicti electionem:
legatos igitur ad Benedictum mittere non
potuit. Hoc ideo retuli, ut appareat impe-
ritia & fraus, & impostura interpolatoris,
qui codicem tot mendaciis, fraudibus, &
commentis corruptit, ut nulla ipsi probandi
vis attribui, aut quicquam firmi argumenti in
eo poni possit. MA.

MARIANUS SCOTUS.

Mariani Scoti testimonium, cum is per duo integra post ea tempora, quibus Joannam sedisse volunt istius patroni, secula vixerit (obiit enim A. 1086. 230. a Leonis obitu annis) non adeo magni faciendum esse putamus, maxime cum satis hactenus fuerit probatum, nullum scriptorem coævum, vel qui proxime post illa tempora vixerit, memorabilis hujus historiæ vel verbo mentionem fecisse. Examinabimus tamen locum Mariani, & quam bene cum chronologia conveniat, dispiciemus. Et quidem primo licet negari non possit, in hodierni Mariani exemplaribus fere omnibus Joannam reperiri, testatur tamen editor Metropolis Alberti Cranzii, quæ Coloniae A. 1574. prodiit, in antiquissimis Mariani exemplaribus MSSis mentionem nullam de Joanna haberi: idem quoque Bellarminus Cardinalis asserit: sed hæc obiter. Jam ad locum illum Mariani, quem antequam examinemus, illud adhuc dicendum occurrit, non satis scilicet sibi semper constare Marianum, virum alias sua laude dignum, multosque passim, præprimis in temporum computatione, comisisse errores,

qualis etiam in tempore, quo Joannam sedisse putat, deprehenditur. Scribit nimirum ad annum 847. Marianus: Sergius Papa obiit, huic successit Leo annis 8. Postea vero ad A. 853. sic pergit: Leo Papa obiit Calendis Augusti. Jam quomodo annos octo sedisse dici potest Leo, qui tamen juxta mentem Mariani A. 47. electus est, & agere inter homines desiit A. 853. adeoque sexto Pontificatus anno? unde jam in chronologia sibi ipsi contrarius est Marianus. Deinde contra mentem omnium historicorum & Chronologorum συγχεστων Leonem obiisse memorat A. 853. quem demum A. 855. d. 17. Jul. abisse ad plures, certum est. Nunc ad Joannam. Ait Marianus: Leo Papa obiit Kalendis Aug. huic successit Joanna mulier annis duobus, mensibus 5. diebus 4. Jam vero A. demum 857. Benedictum Joannæ successisse scribit, adeoque Joannæ pontificatus non biennium, sed quadriennium durasse necesse est, quod nec Marianus, nec quisquam e sequacibus ejus hactenus somniavit. Ex his satis superque constare puto, aut fœde corruptos & interpolatos esse Codices Mariani, aut ipsum Marianum temere omnia turbasse, ut nulla ipsi, quantum quidem ad hanc historiam, fides haberi possit.

SIG.

SIGBERTUS GEMBLACENSIS,
obiit A. 1118.

Sequitur inter assertores Joannæ Papissæ Sigbertus Gemblac. scriptor circa A.C. 1100. adeoque tertio fere post Leonem seculo florens. Quantum vero ipsius testimoniotribuendum sit, videbimus. Ac primo quidem illud monendum erit, codices impressos, quibus hodie utimur, dubiæ admodum fidei esse, multaque in iis reperiri, quæ fidei MSSorum exemplarium repugnant: & de scriptore hoc in genere testatur immortalis memoriæ vir Gerh. Jo. Vossius in aureo & nunquam satis laudando opere de Historicis Græcis & Latinis p. 395. reperiri in Bibliotheca Gemblacensi vetustum, & si non autographum, saltem ex eo exscriptum codicem, in quo desiderantur aliqua, quæ legas in plerisque etiam MSSis. MSS. Codices aliqua etiam recentiori manu adjecta habent ad oram: ut autor est, qui eum cum aliis codicibus contulit, Aubertus Miræus Disquisitione de Virginibus Colonienfibus. Sed speciatim de loco, qui Joannæ mentionem facit, testatur Jo. Molanus & Bellarminus, qui ipsum codicem manibus tractarunt, de hac historia nec volam nec

vestigium in eo extare. Idem de Codicibus in Bibliotheca Vaticana perhibet Leo Allatius. At nec levis suspicio interpolati & supposititii hujus loci exinde quoque oritur, quod in Vincentio Bellovacensi & Guilielmo Nangiaco, quorum uterque tamen Gemblacensem tantum non ad verbum exscripsit, nulla Joannæ mentio habetur. Præterea consentiunt in eo seculi nostri Critici alique eruditi ad unum omnes, nullum fere rerum Germanicarum Scriptorem adeo corruptum & varie interpolatum esse, quam Sigbertum, & in multis ineditis exemplaribus alia manu, alio atramento ad marginem, quæcunque in editis falsi arguuntur, verba apposita deprehendi: Unde ab initio statim non adeo firmum argumentum in hujus testimonio poni videri possit. Tentabimus tamen, annon fortassis ex ipsius Sigberti verbis falsitas hujus historiæ demonstrari queat. Ita autem Sigbertus, seu ejus interpolator ad annum 854. Fama est, hunc Joannem foeminam fuisse, & uni soli familiari tantum cognitam, qui eam complexus est, & grvida facta peperit Papa existens. Quare eam inter Pontifices non numerant quidam, ideo nomine numerum non

non facit &c. (c). Vix quicquam hic sani, ita omnia confusa sunt & depravata. Nam primo non convenit Sigberto, Benedictum A. 854. electum fuisse scribenti, cum Mariano eundem A. 857. inthronizatum fuisse memorante, utroque vero in Chronologia turpiter errante. Deinde scribit, electo in Pontificem Benedicto Anastasium præsulatum invasisse: illo vero a legatis Imperatoris Lotharii dejecto, & in carcerem tracto, Benedictum honorifice esse revocatum. Hæc verba impacto quasi ariete concutiunt sedem Joannæ. Dabimus enim id Gemblacensi, sedisse Joannam post dormitionem Leonis, qui obiit 855. & partum edidisse post exactum biennium, quod volunt contrariæ sententiæ propugnatores, A. scilicet 857. & Benedictum postea fuisse electum; quomodo, quæso, Lotharius Imperator ad Benedictum legatos mittere potuit, qui omnium historicorum & chronologorum calculo jam ante biennium A. scilicet 855. diem obierat supremum: nullum itaque temporis superest spatium, quo sedere potuisset Joanna. Egregius quoque & memorabilis est locus apud Hincma-

O 3

rum

(c) Haud opus esse duximus, integrum Sigberti textum hic repetere, cum Autor noster ejus sensum exacte tradiderit.

rum Rhemensem Episcopum, qui totam hanc narrationem non procul a fabula abesse manifeste evincit. Is in Epist. II. ad Nicolaum Papam A. D. 866. d. 25. Aug. data hæc habet omni exceptione majora: Cum ista epistola, inquit, & cum legatione Lotharii Imperatoris per præfatum venerabilem Episcopum, Petrum Aretinum, missos meos cum literis, quarum exemplum habeo, de petitione Episcoporum & de aliis meis petitionibus Romam direxi, quibus in via nuncius venit de obitu Papæ Leonis, pervenientes autem Romam cum præfatis literis & intervenientibus prædictis Episcopis Dominus nomine & gratia Benedictus privilegium inde direxit. Quod si itaque Hincmari legatis in via de morte Leonis nuncius venit, illique Benedicto jam electo Romam pervenire, quomodo media per biennium & quod excurrit sedere potuerit Joanna, non video, cum a sana ratione remotum videatur, legatos in tam brevi itinere biennium & ultra consumpsisse.

MARTINUS POLONUS.

De Martini Poloni narratione licet minor hætenus apud eruditos fuerit dubitatio, non levis tamen quoad hanc historiam quoque
est

est suspicio, verba illa, quibus enarratur Joannæ papissæ historia, supposititia, & a recentiori quodam contra veterum exemplarium fidem codicibus quibusdam inserta erroris causam dedisse. Sane in editione Martini Poloni, quæ a Joanne Fabricio Cæsare, Canonico Gladbachensi, ex vetustissimo quodam & ipsi autori fere coætaneo codice MSto A. 1616. Colonix Agrippinæ typis Gerhardi Grevenbach in fol. publicata est, omnino deest, quicquid in reliquis Codicibus & speciatim in Basileensi & Antwerpiensi de Joanna Papissa legitur. Et ne quis arbitretur, fortassis omissa ea esse in hac editione studio illorum, qui aulæ Romanæ favebant, non absque ratione forsan provooco ad Codices MSSos vetustissimos, qui ad unum omnes prorsus carent Joannæ papissæ indicio atque vestigio, & ut de codice, ad cujus exemplar editio Colonienfis prodiit, nunc nihil dicam, refert Cl. vir Leo Allatius, in Bibliotheca Vaticana adservari Codicem MStum, reliquis omnibus, qui ibidem habentur, vetustiorē, in quo post vitam Leonis nulla fit Joannis Papæ mentio, sed Leonem immediate Benedictus sequitur. Et ut eo minus de veritate relationis doctissimi viri dubitetur, non abs re erit, quæ de

Codicibus quibusdam MSSis Martini Poloni refert Illustris Vir P. Lambecius Tom. II. Commentar. Bibl. Vindobon. (neque enim est leve, quod ad Augustissimam Bibliothecam provocat Lambecius, at tot judicibus obnoxium se facit, quot Italis, Gallis, Germanis, Belgis aliisque ex toto terrarum orbe confluentibus ad hunc usque diem insignis illa Bibliotheca patuit) p. 863. adservari scilicet in Augustissima Viennensi Bibliotheca Chronici Martini Poloni antiquos Codd. MSSos quatuor optimæ notæ ac fidei, quæque ac Vaticanus ille omni prorsus carent Joannæ Papissæ indicio & vestigio. Fretus itaque ac munitus fide ac autoritate jam memoratorum Codicum MSSorum quatuor incorruptorum Augustissimæ Bibliothecæ Cæsareæ, & congruentia illorum cum codice Vaticano & Fabriciano, non immerito affirmarem, Martinum Polonum quoque pro approbatore historiæ de Joanna papissa falso haberi, & chronicon ejus hac labe ab initio carens nonnisi aliquanto post ejus mortem commento hoc contaminatum esse. Codicem Heilsbronnensem quod attinet, nolo equidem in dubium vocare judicium Excellentissimi D. Wagenseilii, non leve tamen nulliusve ponderis esse existimo, quod tum
men-

mentem meam subibat, cum inspiciendi ejus copiam mihi faceret singularis illius in me benevolentia. Scilicet memoriæ adhuc hærebat, quod olim de hoc scriptore notatum inveneram a viris doctissimis & præstantissimis: non vetusta esse illa Martini MSSa exemplaria, in quibus procemium de IV. Monarchiis, de Romanæ urbis exordio, incremento, ædificiis, palatiis & regimine usque ad Augustum Imper. satis prolixum habetur. Cum enim ipse Polonus in initio operis dicat, se omissa præcedentium temporum historia statim ab Augusto initium facere velle, facile apparet, ea quæ ibi procemii loco habentur, supposititia esse, & a recentiori quodam contra aliorum Codicum fidem addita, codicesque illos multo recentiores esse iis, qui hisce prolegomenis carent. Unde factum quoque est, quod nec Codex Vaticanus, nec Viennenses illi, neque Colonienfis quicquam de hisce prolegomenis habeant. Insuper testatur Clariss. Lambecius Tom. I. Comment. Bibl. Vindob. p. 48. & sq. extare in eadem Bibliotheca Vienn. exemplar Chronici Martiniani Antwerpiense, collatum cum antiquo Codice MSto Monasterii Carthusiani Gaminensis ab Illustrissimo Viro Richardo Streinio,

Barone Austriaco , in quo is propria manu in margine testatur, prolegomena illa de IV. majoribus regnis & urbe Roma ibidem defuisse. Hoc autem procemium cum in codice quoque Heilsbronnensi habeatur, & præterea Codex ille pertingat usque ad Hadrianum III. Pontificem , qui demum post Martini Poloni obitum ad pontificatum pervenit, non adeo vetustus, sed corruptus esse videtur Codex ille , interque recentiores fortasse numerandus.

Sed abeamus ad alia, quæ superius jam a nobis dicenda fuissent. Nimirum putavit Clarissimus vir Salmasius , verba Mariani Scoti esse ipsa verba Anastasii : sed quod pace tanti herois dixerim, si verba , quæ Mariano attribuuntur, cum locis quibusdam Anastasii conferantur, falsitas hujus asserti liquido apparebit. Scribit scil. Marianus ad A. 853. Leo Papa obiit ; huic successit Johanna Anglica mulier. Anastasius vero ad A. 853. quo sedisse Joannam dicit Marianus, meminit, Leonem IV. A. 53. Synodum congregasse. Et secundum computationem ipsius Anastasii Leo demum A. 855. adeoque biennio post tempora illa , quibus sedisse Joannam voluit Marianus , diem obiit suum. Porro Anastasius scribit, Clerum Ro.

Romanum decretum electionis destinasse Lothario Imperatori, qui eodem A. 855. obiit. Itaque si inter Benedictum & Leonem per biennium media fuisset Joanna, adeoque ad A. 857. vixisset, quomodo Romani decretum electionis destinare potuere Lothario, qui A. 855. decessit?

Denique 5. objicitur omnium historicorum consensus. Sed respondeo, jam supra monstratum, nullum autorem coætaneum historiæ hujus mentionem facere, eorum vero, qui demum diu post illa tempora illius meminerunt, loca dubiæ esse fidei, & si non supposititia, tamen cum Chronologia & temporum computatione mire pugnantia: quos deinde cæco impetu secuti sunt magno numero recentiores Scriptores, quod in illis temporibus, ubi omnis elegantior doctrina sepulta jacebat, mirandum vix est. Præterea non testimoniorum multitudo in historiis primario spectanda, sed quomodo testimonia inter se cohæreant, & cum chronologia conveniant, inprimis attendendum est, & plus utique roboris ponitur in uno scriptore coætaneo, fide digno, quam in centum, qui diu post illa tempora vixere. Et, quod coronidis loco addo, tot ad minimum scriptores, qui nullam papissæ mentionem

tionem faciunt, sed Leoni immediate Benedictum subjungendo aperte contrarium innuunt, præsto nobis esse. Regino Prumiensis, etsi Pontifices seriatim non recenscat, non omissurus tamen procul dubio fuisset memorabilem hanc historiam, si illa revera contigisset: quod de aliis quoque notandum venit.

Varias vero illas circumstantias, e quibus Joannæ papatus probari quoque solet, quod attinet, non male etiam huc quadrare videtur illud Jctorum: non omnium, quæ a majoribus dicta sunt, ratio reddi potest. Testantur hoc tot fabulosæ narrationes, quæ passim in historia sunt obviæ. Scilicet oritur primum fabula ab imperito scriptore literis consignata, sequuntur hunc alii, ut demum fabula pro historia venditetur: & locum habet hic elegans effatum Q. Curtii, scriptoris, communi omnium eruditorum suffragio, & rerum pondere & dictionis majestate omne seculum provocantis, qui L. IX. Histor. C. I. Equidem plura, inquit, transcribo, quam credo. Nam nec affirmare sustineo, de quibus dubito, nec subducere, quod accepi. Idem in hac historia contigisse, quis non videt? In rumore vulgi parum momenti situm esse, quilibet novit:
nam

nam & aliarum fabularum hinc inde monstrantur vestigia, quas tamen nunquam contigisse, apud omnes in confesso est. Nonne passim statuæ Rolandinæ, illius gladius, cassis, & reliqua arma peregrinantibus ostenduntur, quem tamen nunquam extitisse, jamdudum demonstrarunt Conringius & Gryphiander peculiari tractatu. Monstrantur Norimbergæ arma & alia vestigia famosi illius Apellii a Gaillingen, sed quis ideo affirmabit, ea, quæ de ipso narrantur, vera esse, ac istum unquam extitisse? His ita disputatis, jure eruditissimi Blondelli (d) verbis finem facere posse mihi videor: Patet, fieri nullatenus posse, ut Joanna ulla, ullo inter Leonem Benedictumque tempore sedisse dicatur, adeoque imposturam vel fecisse, vel passos, quicumque tandem illi sint, decantatæ per secula propemodum sex fabulæ sive parentes sive amatores. Eat igitur tandem aliquando, quo digna est, *ες χοραν.*

VII.

(d) I. c. pag. m. 135.

VII.

*De secunda Editione Novi Testamenti
per Erasmus Roterod. curata.*

„**N**ovum testamentum omne, multo quam
„ antehac diligentius ab Erasmo Roterodamo
„ recognitum, emendatum ac translatum, non solum ad Græcam veritatem,
„ verum etiam ad multorum utriusque linguæ
„ codicum, eorumque veterum simul & emendatorum
„ fidem, postremo ad probatissimorum
„ autorum citationem, emendationem & interpretationem,
„ præcipue Origenis, Athanasii, Nazianzeni,
„ Chrysostomi, Cyrilli, Theophylacti, Hieronymi,
„ Cypriani, Ambrosii, Hilarii, Augustini, una cum
„ annotationibus recognitis ac magna accessione
„ locupletatis, quæ lectorem doceant, quid
„ qua ratione mutatum sit. Quisquis igitur
„ amat veram theologiam, lege, cognosce, ac
„ deinde judica. Neque statim offendere, si
„ quid mutatum offenderis, sed expende, num
„ in melius mutatum sit. Nam morbus est,
„ non iudicium, damnare, quod non inspe-
„ xeris. Salvo ubique & illa befacto Ecclesiæ
„ iudicio. Addita sunt in singulas Apostolorum
„ epistolas argumenta per Erasmus Roterodamum.

Hæc

Hæc tituli & prologi galeati loco præfixit Erasmus secundæ suæ Novi Testam. editioni, quæ ex officina Frobeniana A. 1519. mense Martio prodijt. Quinque magnus ille scientiarum atque literaturæ politionis vindex & instaurator (a), dum viveret, emisit N. T. editiones A. 1516. 1519. 1522. 1527. & 1535. in singulis nova diligentia usus. Omnium vero rarissimæ sunt prima & secunda. In laudanda ex merito prima multus est Vir celeberrimus & de Erasmi manibus optime meritis Hermannus *von der Hardt* (b), quam præter alia hoc præconio ornat: „Primi illius vere augusti codicis,„ operis memorabilis omnium optimi maximi exempla supersunt rarissima, quotlibet centenis vel millenis imperialibus pretiosius, pretio cum seculis majore futuro.„ Est profecto in foro literario codex hic,„ Erasmi antiquus ducentorum jam annorum, verus thesaurus, novem vetustis, MSSis, unde haustus, æquiparandus. A,„ primo typographiæ exordio, quinquaginta,„ illis

(a) Quo elogio ipsum merito lætat S. P. Q. Rotterodamensis in statua ei in sinu quasi & meditullio urbis patriæ posita, vid. M. T. Inscriptionum Monumenta publica, Gedani 1696. edita, p. 25.

(b) In Historia literaria Reformationis P. I. passim, præcipue p. 33. sqq.

„illis primis circiter annis, nullus nobilior
„prodiit Codex, argumento & editionis stu-
„dio. Omnia Scholasticorum opera, ser-
„monum congeries, Patrum Latinorum
„segmenta, Poëtarum & Historicorum quo-
„rundam prima rudimenta, in typographiæ
„ortu publicata, cum hoc opere collata,
„vix umbra ad lucem. Si quis ex illa ætate
„servandus liber, dignum Bibliothecæ apud
„posteror ostentum, vel unus ille præ omni-
„bus dignus, salutandus eminus, & colen-
„dus decenter, vel aureo vestiendus habi-
„tu &c. Idem deinde elogia primæ edi-
„tioni, cum vix e prelo exiisset, tributa, hi-
„storiam liticulæ, a Budæo motæ Erasmo,
„ejus conflictationem cum Fabro Stapulensi
& varias variorum in nostrum calumnias,
„ab ipso explosas, curate persequitur: deni-
„que (c) de secunda editione paucis ita dis-
„ferit, ut plenius de ea aliquando se dictu-
„rum spondeat. Id an a viro literatissimo
„præstitum jam sit, me quidem fugit. In-
„terim tenues ego ducturus lineas, brevem
„ejus recensum instituam, strictim simul illa,
„quæ ad hujus editionis historiam pertinent,
„enarraturus, cum ejus præsertim & Jacobus
le

le Long, in ipsa etiam recentissima Bibliothecæ Sacræ editione Parisiensi, paucissimis duntaxat meminerit. Post breve igitur, quod vocant, Leonis X. Pont. max. quo laudantur Erasmi in N. T. lucubrationes, & dedicationem ad Leonem comparet editoris paraclesis ad Lectorem, qua ad SS. literarum studium magnopere omnes excitantur. Hanc excipit ejusdem ratio seu compendium veræ theologiæ, egregiis scatens præceptis, genuinique theologi requisita pulcerrime delineans. Sequitur deinde duplex apologia contra obtrectatores, qui Erasmi labores suggillaverant, convitiisque oneraverant plastris. Multa in his continentur lectu dignissima de necessario fontium sacrorum studio, vulgata N. T. versione, variis lectionibus, sacra crisi, divini codicis interpretibus, quorundam theologastrorum arrogantia rixandique libidine &c. Post hæc exhibet Erasmus varia, quæ in vulgato potissimum interprete, ipso judice, censuram merentur, per certas classes disposita. I. Notantur solœcismi ab interprete commissi manifestarii & inexcusabiles, e plurimis pauci decerpti. II. Loca obscura, & in quibus lapsi sint magni nominis interpretes, ex innumeris pauca. III. Loca manifeste depravata, ex infinitis, ut

P

occur.

occurrerant, pauca. IV. Ad placandos eos, qui putant in SS. literis nihil neque superesse, neque deesse, quædam excerpta, quæ manifestius depravata sunt in hoc genere, quam ut negari possit. V. Quæ sint addita in nostris exemplaribus. VI. Quæ per interpretem commissa. VII. Ubi interpres ausus sit aliquid immutare de verbis Apostolorum aut Evangelistarum (*d*). Post illa conspicitur figura, ligno incisa, tres divinæ essentiae personas, angelorum choro stipatas (*e*), rudi tamen delineatione adumbrans, cui decem piæ antiquitatis aphorismi Cræci de SS. Triade subjiçuntur, addito etiam eadem lingua Symbolo Nycæno (*f*). Hisce Arianismi suspitione levare se voluisse Erasmus credo. Porro sequuntur Eusebii Epistola ad Carpianum & Canones harmoniæ Evangelistarum, quos excipiunt ordo seu numerus librorum N. T. vitæ Evangelistarum ex Hieronymo, & Capita Evangeliorum

(*d*) Sed hoc ipso, quam parum ipsi perspecta fuerit translationis vulgatæ natura atque indoles, ostendisse Erasmus monet Millius in Prolegomenis Novi Testamenti. 1125. p. 113. atque multa, in hisce septem classibus observata, censoria virgula notat.

(*e*) Seorsim quoque adjecta est imaguncula viri, per nubes ambulantis.

(*f*) Hæ figuræ in tertia jam editione omissæ sunt.

rum juxta antiquam divisionem. Singulis Evangeliiis præmittuntur Græco idiomate cum Scriptorum vitæ ex Sophronio, tum argumenta ex Theophylacto: Actis vero Apostolorum Paulini itineris & martyrii descriptio: Epistolis denique, exceptis secunda & tertia Joannis, argumenta veteris cujusdam Scriptoris Græci & Erasmi. Ad latus textus originalis semper posita est Erasmi versio Latina: margini Evangeliorum adscriptæ divisiones Ammoniacæ, cum tabulis Canonis Eusebiani collatæ: superiorem vero foliorum oram ornant majora κεφαλαια, in quæ olim divisa erant Evangelia. In Epistolis ad Romanos & Corinthios ad marginem interiorem notatæ sunt, negligenter admodum, judice Millio, literis numeralibus κεφαλαια sive sectiones, in quas divisas voluit quispiam (fortasse Theophylactus, ut idem suspicatur Millius) has epistolas. Textus integer continuo filo nexus sine capitum spatiis aut intervallis conspicitur, numero capitum ad marginem duntaxat Latinæ versionis adpicto: quod institutum summopere probatur Hermanno *von der Hardt* (g). Hæc editio, censente Millio (b), priore longe

P 2

longe

(g) l. c. p. 36.

(b) l. c. num. 1124. p. 112.

longe emaculatio & castigatio, veram & genuinam lectionem in priori depravatam locis amplius CCXXX. restituit, sed & ab ea recedit locis circiter LXX. in lectiones interpolatas & minime probandas.

Notum est, in ea non comparere locum 1. Jo. V. 7. quem in Græcis codicibus haud invenisse se monuit in Annot. Erasmus. De instituti sui ratione in priori Apologia p. 64. hæc memorat: „Restituimus, quæ
 „temporum & librariorum vitio fuerant depravata, obiter indicatis & his, quæ vel
 „ambigue vel parum attente reddidit interpretes (nam non recte mihi religio est dicere, etiamsi id non veritus est aliquot locis Hieronymus) idque fecimus, neque
 „levi, quod dici solet, brachio, neque temere, sed primum ex Canonum consilio, ad Græcæ originis fidem examinatis exemplaribus Latinis, neque tamen fidentes
 „paucis aut quibuslibet. Laurentius Valla septem bonæ fidei codices se secutum fuisse testatur. Nos in prima recognitione quatuor Græcis adjuti sumus, in posteriore
 „quinque. Deinde consultis tum pervetustis tum emendatis aliquot Latinæ linguæ voluminibus; nec hoc contenti, discussis & exploratis probatissimis autoribus, non
 „osci-

oscitanter observavimus, quid citarent, quid,,
legerint, quid emendarint, quid interpre-,,
tentur. Atque hisce rebus omnibus, qua,,
licuit vigilantia, certe summa fide, colla-,,
tis ac pensatis, quod optimum judicavi-,,
mus, secuti sumus, & hac lege in medium,,
contulimus, ut nihilofecius suo quisque,,
judicio frueretur., Quanti vero hoc in
opere Erasmo fuerint exantlandi labores,
quantæ molestiæ devorandæ, quot convitia
& criminationes, quibus consilium hoc laude
dignissimum perstrinxere insulsi ignorantia
fratres, tolerandæ, ipse passim, in epistolis
potissimum suis, meminit. Operæ pretium
erit, ex his nonnulla huc spectantia decer-
pere. Utor autem editione, quæ A. 1521.
in fol. cura Jo. Frobenii juri publico con-
cessa est. Prima N. T. editione in se con-
citaverat bilem rabiemque elegantioris li-
teraturæ & cœlestis veritatis hostium, quo-
rum intererat, ut orbis spissis illis inscitæ
tenebris septus quovis modo detineretur.
Fuere tamen quoque, qui avidissime divina
illa munera Erasmi exceperunt. Horum
in gratiam hunc lapidem ulterius movere,
& quod semel cœperat, opus sensim sen-
simque summa adhibita industria ad matu-
ritatem perducere statuit. Hinc nova erat

paranda editio, foetus lambendus & relambendus, initiisque egregia adjicienda incrementa. Ad os vero Sycophantis obturandum conducibile sibi fore duxit Breve Papæ, quo opus hoc ipsi gratum esse testetur. Literis igitur suis, Basil. 1518. d. 7. Cal. Sept. datis, p. 271. Antonium Puccium, Pontificis maximi apud Helvetios legatum, rogavit, ut hoc sibi a Papa impetraret. Non injucundum tibi, spero, erit, ex ea epistola heic quædam excerpta legere : „Pestilentia
„undique gliscens nos hinc abigit, opere non-
„dum absoluto, cujus studio vitam etiam
„hactenus contempsimus, non modo pecu-
„niam. Adeo mihi studio fuit, ut quod semel
„Leoni X. dedicaram, illo dignum redderem.
„Nam editio prima mihi non per omnia satis-
„fecit, licet & illa ab eruditissimis quibusque
„doctissimisque probetur. Tantum initio
„oblatrabant pauculi sycophantæ, sed indo-
„cti, deinde qui nunquam opus legerant,
„postremo in absentem duntaxat, coram
„nemo verbum. Nunc exhibit, ni fallor,
„sic elaboratum, ut sperem futurum, ut
„nec Leone, nec posteritate videatur in-
„dignum. Frustra narrem, quando nemo
„crediturus est, quantis mihi constiterit su-
„doribus, utinam parem adferat utilitatem
„Reip.

Reip. Christianæ: nihil enim aliud spectavi-
mus — . Collatis multis Græcorum
exemplaribus, quod sincerissimum videba-
tur, secuti, vertimus Latine, nostramque
translationem Græcis adjunximus, quo le-
ctori promptum sit conferre: & ita verti-
mus, ut primum studuerimus, quoad li-
cuit, integritati sermonis Romani, sed in-
columi tamen Apostolici sermonis simpli-
cite: deinde dedimus operam, ut quæ
prius lectorem torquebant vel amphibolo-
gia, vel obscuritate sermonis, vel oratio-
nis vitiis aut incommodis, jam explanata
sint ac dilucida: parcissime interim rece-
dentes a verbis, a sensu nusquam, quem ta-
men non ex nobis ipsis somniavimus, sed
ex Origene, Basilio, Chrysostomo &c. peti-
vimus — . Si optandum est, ut divinos li-
bros habeamus quam emendatissimos, hic
meus labor non solum amolitur mendas-
s. voluminum, verum etiam obstat, ne
posthac queant depravari. Si optandum,
ut recte intelligantur, plusquam sexcentos
locos aperuimus, antehac nec a magnis in-
tellectos theologis. Fatentur ipsi, negare
non possunt. Si optandum, ut huic dispu-
tatri theologiæ, quæ pene plus satis pol-
let in scholis, accedat fontium cognitio, huc,

„peculiariter hoc opus conducit &c. Voti vero sui hac in re compotem factum esse Erasmus, Breve Leonis nostræ editioni & sequentibus præfixum comprobat. Non-dum tamen irarum rabidi ita requievere fluctus. Satis enim causæ fuit & posthac Desiderio nostro, de obtrectatorum invidia acriter conquerendi, plumbeosque & infru-nitos adversarios, prout digni erant, false exagitandi. Nostrum est, quædam ejus rei specimina ex epistolis huc transferre, sed pauca e plurimis, ne prolixi simus. Cum hanc editionem adhuc parturiret, erant, qui ipsi vitio verterunt, quod, prima vix in lucem egressa, novum statim moliretur opus, atque ita primum laborem sibimetipsi displicere testatum faceret. Hinc in literis ad Marcum Laurinum Lovan. 1518. his præter alia utitur verbis p. 155. „Quod cavillan-
„tur, ob id me parare novam editionem,
„quod prior mihi non satisfaciat, fingamus
„ita esse, quid est, quod reprehendant? Si
„studeam me ipso melior esse, & id facere,
„quod ab Origene, quod ab Hieronymo
„factum est & ab Augustino, præsertim cum
„id ingenue testatus sim in prima editione,
„me facturum, si foret usus? Nunc non hoc
„ego, verum idem molior, quod jam tertio
„factum

factum est in edendis proverbiiis. Ad hæc,,
 in translatione priore parcius mutaveram,,
 ne nimis offenderem istorum animos ni,,
 mium morosos. Nunc adhortantibus eru,,
 ditis plusculum hac in parte sum ausus.,
 Deinde locos imutatos crebriore autorum,,
 nomenclatura communio, ne quid habe,,
 ant, quod tergiversentur *οἱ δυσπισθεῖς*. Po,,
 stremo loca tum festinanti præterita adjicio.,
 Quodsi quid interim inciderit, quod eru,,
 ditos ac pios offendat, non dubito mutare.,
 Neque me diffitebor hominem esse &c.,
 Nunc producemus querelas Erasmi de ca-
 lumniis, quibus ipse, postquam editio pro-
 diisset in publicum, oneratus fuit. Ad
 Hermannum Buschium A. 1520. pridie Ca-
 lend. Aug. Lovanio hæc inter cætera per-
 feribit (i): „Staudicius concionabatur in,,
 cœmeterio divi Pauli Londini. Cumque,,
 sermonem exorsus esset a charitate, subito,,
 pudoris omnis simul & charitatis oblitus,,
 cœpit debachari in nomen & famam me,,
 am, testatus imminere Christianæ religio,,
 nis *πανελεσθῆσαν*, nisi novæ translationes,,
 omnes subito de medio tollerentur. Ne,,
 gavit rem diutius ferri posse, posteaquam,,

P 5

„ Erasmus

(i) Epistol. p. 483. sqq.

„Erasmus ausus esset corrumpere Evange-
„lium divi Joannis, qui, cum ecclesia tot
„annis legisset, in principio erat verbum,
„nunc novam lectionem induceret, in prin-
„cipio erat sermo. Hic existimabat sibi da-
„tum esse telum, quod nullo pacto mihi
„liceret effugere. Addebat Augustinum
„alicubi magis probare vocem verbi, quam
„rationis, & rationes adducere, cur ita sen-
„tiat. Verum eas, inquit, Græculus iste
„non intelligit. In hanc sententiam cum
„multa stolta & ἀπροσδιονστα deblaterasset,
„cœpit homo facundus movere affectus,
„deplorare sortem suam, se, cum esset, tot
„annorum doctor, & hætenus semper legis-
„set, in principio erat verbum, nunc huc re-
„digi, ut cogatur legere, in principio erat
„sermo, suspicans fore, ut hac tam flebili
„querimonia lacrymas excuteret populo.
„Mox magnis obtestationibus obsecravit ur-
„bis præfectum (nam is ex more aderat,)
„magistratus omneis, & universam civium
„multitudinem, adessent in tanto discrimine
„religioni Christianæ. Credebat se divini-
„tus dicere, & tamen nulli placuit. Quot-
„quot aderant vel mediocriter eruditi, de-
„mirabantur hominis stultitiam &c. In-
tegra

tegra fere hæc epistola exscribenda foret, si omnes stolidorum hominum ineptias, huc pertinentes, oculis tuis sistere animus esset. A. 1521. 5. Cal. Febr. Lovan, sic scribit ad Anonymum, quem virum præpotentem vocat p. 542. „Conjurati quidam fœdere isto, inter pocula semper illius (Lutheri) nomen cum meo conjungunt in concionibus, publicis, quo videlicet me degravent invidia communi, quem ob id hostem judicant, quod alicubi scripserim, eos non recte facere, qui sic argutiis Scoticis incumbunt, ut non attingant fontes divinæ sapientiæ, quod aliquoties a Thoma dissentiam in annotationibus meis, quod admonerim non esse pelliciendos ad vincula vitæ monachalis, priusquam & sibi noti sint, & intelligant, quid sit religio, quod admonuerim, veram pietatem non esse sitam in ceremoniis, sed in affectibus animi, quod defendam bonas literas, quibus illi jam olim indixere bellum (k). Cum rogantur a concione, quid offenderint in libris meis hæreticum, respondent se non legisse, sed tamen periculum esse propter obscuram Latinitatem. Hæc respondent, idem

(k) Hæc omnia Erasmus in annotat. suis in N. T. data occasione egregie & graviter præstitit.

„iidem & theologi & monachi & scurræ ;
 „& nonnunquam Episcopi. Per hujusmodi
 „rabulas defenditur majestas pontificia, ful-
 „citur ecclesia. „ Præcipue insulsus homo,
 Nicolaus Egmondanus, juratus Erasmi ho-
 stis, qui primam jam editionem convitiis
 proscindere laboraverat, in eum fingere op-
 probria, rabidoque ore famam ejus vulne-
 rare nunquam destitit. De illo in literis
 ad Gotschalcum Rosemundanum (1) hæc
 memorat noster: „In hos inquit (Nic. Eg-
 „mondanus) prodigiosos errores incidit Lu-
 „therus ob studium rerum novarum. Et
 „cum ante usque ad vomitum blaterasset
 „de novis ac veteribus: Hærete, inquit,
 „veteribus, fugite nova, adhærete veteri
 „Evangelio, satis aperte denotans Novum Te-
 „stamentum, quasi vero ego dederim novum
 „Evangelium, ac non potius vetus & instaura-
 „rim & illustrarim. „Satis prolixæ de Egmon-
 dano ad Thomam Morum extant Erasmi li-
 teræ in ejus epistolarum corpore, quas le-
 gisse te haud poenitebit (m), sicut & alias
 ad

(1) Literis Lovan. A. 1520. d. 15. Cal. Nov. exaratis. p. 586.

(m) p. 589. His in litteris Erasmus facete & jucunde describit concertationem, quæ ipsi cum Egmondano coram Academiæ Lovaniensis Rectore fuit, lege, & ridebis.

ad quendam, quem in titulo obtrectatorem suum pertinacissimum vocat, in quibus calumnias haud paucas magna animi virtute excipit, atque pro more suo egregie ac solide diluit (n). Non autem in pulpitis solum sacris & familiaribus congressibus lectionibusque academicis traductus fuit Erasmus, verum etiam publicis scriptis. Naetus enim est adversarios, qui libris cum impetiere, Jac. Lop. Stunicam, Eduardum Leum, Sutorem, Natalem Bedam, alios, non omnes prorsus illiteratos. Cum primis in Stunica insignis linguarum orientalium peritia laudatur, qui ad opus biblicum Complutense inter ceteros a Cardin. Ximenio adhiberi meruit. Hujus annotationes contra Erasmus Tom. VII. Criticorum SS. p. 1229. sqq. cum nostri Apologia (o) insertæ sunt. Ipsum vero Leonem X. Pont. Max. ejus vehementia & mordaci stilo offensum fuisse ex eo elucet, quod Paulus Bombasius A. 1521. d. 18. Jun. nostrum certiozem fecerit, illum Stunicam, in scripta ejus procaciter invectum, graviter monuisse, ne quid in posterum edere velit, quod nomen Erasmi pro-

scin-

(n) p. 601.

(o) Erasmi contra reliquos Apologiæ habentur in operibus ejus junctim editis.

scindat (*p*). De cæteris nihil addo, nisi hoc unum, Eduardi Lei librum, adversus Erasmus scriptum, a Germano quodam in Bibliotheca Minoritarum Lovaniensium in autoris contumeliam stercore fuisse oblitum de quo lepidio facinore extant Conradi Goclenii epigrammata (*q*). Sicuti vero Erasmus multorum odiis atque cavillis fuerat expositus; ita quoque haud pauci veræ eruditionis amantes sacras ejus lucubrationes, prouti merebantur, miro amore exosculati, magnis ipsum laudibus certatim cumularunt. Duos saltim exempli causa producemus, qui, cum editio hæc secunda preli jam morderet carceres, eam manibus volvere summo desiderio cupierunt. Jo. Faber, Episcopi Constantiensis vicarius A. 1519. 6. Cal. Maji ita ad nostrum (*r*): „Novum testamentum de-
„nuo a Te magnifice, quod nihil dubito,
„locupletatum cupidius sane expecto, quam
„ulla mater filium charissimum peregre
redeun-

(*p*) Vid. Erasmi. Epist. p. 646. De Stunica etiam conferenda est Erasmi ad Petrum Barbirium epistola f. 594.

(*q*) Refert hæc Lomejerus de Biblioth. p. 136. collect. Schmid. Ad Leum vero hunc extat Erasmi Epistola, 1519. id. Jul. data Lovanii p. 622. de eodem etiam verbose in litteris ad Thomam Lupsetum agit p. 623.

(*r*) p. 308.

redeuntem: nam quicquid usquam tempo-
rum superest ab officii mei occupatissimi,
molestiis, id omne tuis libris decies per-
legendis impendo. Sic Guil. Latimerus,
A. 1518. 3. Cal. Febr. (s): ut varias hu-
jus N. T. antiquorum editiones omittam,
quarum aliqua adhuc vestigia apud Scripto-
res extant — quis quæso maiorem ex-
optet diligentiam, quam te in ista recogni-
tione N. T. adhibuisse ostendis? ante omnia,
ad probatissimorum autorum citationem,
emendationem, enarrationem: in his,
paucis verbis quantus labor, quanta cura,
quanta demum sollicitudo? transeo tot
præclara nomina Origenis, Chrysostomi &c.,
quos pauci theologorum nostra ætate le-
gunt, nemo intelligit: deinde ad Græcam
veritatem: h. e. omissis rivulis ad fontem
recurrare — Nec his contentus addis
vetustissimorum codicum sinceram & in-
corruptam fidem, sine qua frustra fortassis,
in alijs sudaveris. Qua tamen in re nescio,
certe quid magis admirer, diligentiamne in
inquirendo tuam, an in inveniando felici-
tatem? — Quamobrem post istam tuam
tam raram & exquisitam diligentiam, qua-
lem

„lem nemo, credo, alius tali operi adhibuisset, non est profecto, quod debeas a me quicquam expectare &c. Obsecraverat enim Latimerum Erasmus, ut nonnulla, quæ ipsi desideranda, corrigenda, & addenda viderentur, in secundæ, quam tum parabat, editionis ornamentum, libere mone-
ret, sibique suppetias ferret. Liceat vero hic etiam adscribere Thomæ Mori Epigramma (†), quo primam jam editionem ornaverat?

Sanctum opus, & docti labor immortalis
Erasmi

Prodit, & o populis commoda quan-
ta vehit!

Lex nova nam veteri primum est inter-
prete læsa

Scribendum varia post vitiata manu.

Sustulerat forsan mendas Hieronymus
olim,

Sed periere pigro tam bona scripta situ.

Tota igitur demtis versa est jam denuo
mendis,

Atque nova Christi lex nova luce ni-
tet.

Nec

(†) Extat hoc inter Epigrammata Mori, cum ejus Utopia & Erasmi epigrammatibus per Jo. Frobenium Basileæ A 1518, in 4. edita, pag. 268.

Nec tamen ambitiose singula verba notavit,

Sanctum habuit, quicquid vel mediocre fuit.

Quo fit, ut hæc celeri si quis prætervolet ala,

Huic nihil hic magni forte putetur agi:
Idem si pressò relegat vestigia gressu,

Censebit majus commodiusve nihil.

Nobis eo charior debet esse hæc editio, quod ipsa cum prima (quanquam hac secunda potissimum, utpote emaculatiore) & Aldina in concinnanda N. T. versione Germanica Megalander noster Lutherus usus fuisse videtur: quod haud ita pridem luculenter evicisse arbitror Virum, elegantissimæ doctrinæ laude florentissimum, P. A. Boyse-
nium in Diff. Critico - Theol. de Codice Græco N. T. & consilio, quo usus est B. Lutherus in conficienda interpretatione Germanica. Huic scripto occasionem præbuerunt Viri Clar. Tobia Eckardi conjecturæ de codice Græco N. T. quo usus est Lutherus in conficienda Germanica interpretatione, qui Nicolai Gerbelii Hagenoensem A. 1521. editionem B. virum secutum fuisse suspicatus erat. Idem deinde Boysenio Epistolam opposuit, qua suas conjecturas erudite, &

Q

quod

quod majorem laudem meretur, modeste illustrare annisus est.

Cæterum Erasmi annotationes in hac secunda editione auctæ insigniter & locupletatæ sunt. Quam vero eruditæ elegantesque eæ sint, quantaque utilissimarum rerum copia refertæ, neminem paulo humaniorem latere potest. Hinc Jos. Scaliger, iniquus alias multorum censor, eas optimis nostri operibus accenset, multaque doctissima habere judicat (†). Erasmus certe hic ubique est vere ἐρασμιος; licet enim haud raro excursus instituat prolixiores, qui ab annotationibus exegeticis alieni videri possunt, ii tamen semper sunt eruditi, ac dulcedine mira, animum jucunde adficiende, repleti. Sive monita inspergat, sive errores castiget, sive temporum calamitatem deploret, sive arrogantis inscitiae dominatum evertere conetur, sive adversarios refellat, sive disputationes immisceat; ubique & simul delectat & prodest. Acerbe, fateor, interdum invehitur in eorum scripta, quos monachorum greges tum oraculorum instar venerabantur. Scilicet ægre tulit vir laudatissimus

(†) In Scaligeranis p. 102.

tissimus & bono publico natus, methodicam illam, aridam, mortuam, ligneam, stramineam, artificiosam & φιλοσοφολογικὴν theologiam (u), hactenus unice tyrannidem & dominatum exercuisse, posthabitis ac rejectis veris divinæ sapientiæ fontibus. Quid igitur mirum, quod libertate sua atque candore irritaverit crabrones? Nec inficias eundem est, quosdam etiam viros, alias cordatos & sinceros, nugarumque, quæ nimium diu jam regnaverant, pertæsos, sed præjudiciis antiquitatis & autoritatis nondum prorsus liberatos, dentatis Erasmi invektivis fuisse offensos; qualis fuit Paulus Langius, Ordinis Benedicti monachus, vir certe egregius, & veritatis testibus alias jure suo accensendus, cujus de Desiderii nostri annotationibus judicium ex Chronico Citizenensi (x) libentius nunc recito, quod non facile inibi illud quæstiveris. Male nimirum habuit eum, quod Hugonis Cardinalis errores nugasque subinde aculeato confutaverit stilo. En ejus verba:

Q 2

„Hu-

(u) Quo elogio ipsam afficit Michael Neander in dedicatione Theologiæ Megalandri Lutheri.

(x) p. 804. Scriptorum aliquot Rerum Germanicarum, quos Joannes Pistorius Francofurti 1583. in fol. edidit.

„Hugo primus postillator extitit totius Bibliæ
„adeo pure & fideliter textum quadruplici
„sensu exponendo, ut eatenus vix habuerit
„secundum; licet Erasmus, novus scriptura-
„rum interpres, eum ob Atticæ linguæ insci-
„tiam, & exin ob dissonam ineptamque quo-
„rundam e Græca Græcanicarum dictionum
„expositionem plerumque reprehendat irri-
„deatque, cum sapientius tanto viro con-
„doluisset, quam exprobrando taxaret, quem
„in ea tempora incidisse noverat, quæ po-
„litiores literas, præcipue Græcas, totam &
„per Galliam & per Germaniam prorsus in-
„compertas & inauditas habuerant. Ve-
„runtamen plurimum laudandus est iste ve-
„nerabilis Hugo, quoniam non per philo-
„sophorum & poëtarum dicta, non per Ari-
„stotelis, non per Averrois sophismata di-
„vinam probat, ne dicam contaminat,
„scripturam, sed verba legis per legem ex-
„planat, juxta quod dicitur Levitici XIX.
„Agrum tuum non seres diverso semine, id
„est, dictis philosophorum & poëtarum
„agrum dominicum non conspergas, quia
„hoc est nil aliud quam zizania & lolium
„seminare inter triticum &c., Idem ta-
„men Langius deinde (y) Erasmus divina-
rum

(y) l. c. p. 895.

rum literarum summum & consummatum interpretem nominat. Forte æquis rerum æstimatoribus dandum hic aliquid esse magni nostri Desiderii ingenio, ad jocos & irrisiones aliquantum procliviori, videbitur, si consideraverint, quam inique, quam atrociter ipse vicissim exceptus fuerit ab inimicis, qui omnem suam sapientiam ex istiusmodi libris hauserant, summoque nisu literis paulatim resurgentiis adversabantur. Præterea adeo frigida, ineptæ atque insulsæ sapius erant istæ, quas refellit, exegeses, ut vel Heraclito risum extorquere, vel Democrito etiam renitenti lacrymas, indignationis testes, elicere potuisse credendum sit. Ut ex solo Hugone capiamus exempla quædam, inspicere sodes Erasmi annotationes in Matth. V. 16. XIX. 2. Joann. V. 2. Actor. XXVII. 12. 2. Tim. III. 2. Tit. I. 7. 1. Pet. II. 24. &c. ac judica, num Cardinalem istum his in locis injuria castigaverit noster. Præterea Hieronymi verbis ex Apolog. L. I. sese tueri poterat Erasmus: Hoc obsecro, ut si mordacius quippiam scripsero, non tam meæ putetis austeritatis esse, quam morbi: putridæ carnes ferro curantur & cauterio, venena serpentina pelluntur antidoto. Sed quo dilabor? Jam finem his imponam elegant

Q 3

ganti epigrammate, quo Julius Cæsar Scaliger, Erasmi alioquin æmulus & adversarius, at quantus vir! ei mortuo parentavit:

Tunc etiam moreris! ah, quid me linquis
Erasme,

Ante meus quam sit conciliatus amor?

Tunc etiam? cui tam parvus fuit orbis,
ut altæ

Expleres mentis fulmina torva tuæ,

Ergo fidereis postquam est subvecta quadrigis

Atque Dei læto lingua recepta sinu;

Ille ego, qui insanæ ridebam vulnera
mortis

Conditæque Ætnea tela trifulca manu,


Ad quodvis stupeo momentum, ac territus
adsto:

Maxima cum videam numina posse
mori.

Cum vero superius inter Erasmi hostes mentio etiam facta sit Nicolai Egmondani, bona forsàn cum gratia lectoris epistolam A. 1520. in 4. vulgatam, integram, cum rarissime obvia sit, jam adjicere lubet, quæ ejus impudentiam & furorem acri sale perfricat. Lutheri etiam nostri heic partes aguntur, aculeato quidem dicendi genere:
sed

sed in memoriam tibi revocato, quæso, istius ætatis conditionem & mores; ac mecum, scio, confiteberis, difficile tum fuisse, satyram non scribere. Adjuncta illi epistolæ est, quam nos hic non exhibemus,

Vita S. Nicolai (Egmondani scilicet) sive stultitiæ exemplar.



VIII.

*Epistola de Magistris nostris Lovanien-
sibus, quot, & quales sint, quibus
debemus magistralem illam damna-
tionem Lutherianam.*

G. N. N. D. VDALRICH O ZUINGLIO
Helvetio, apud Tigurinos Conciona-
tori eruditissimo. S. D.

PUDOR obstat, optime mi Zinli, quo mi-
nus tibi perscribam, quæ non pudet hic
designare quosdam Theologos, absque per-
sona, tam stulta, ut nullus histrio, quan-
tumvis impudens, ausit similia facere perso-
natus. Hujus fabulæ præcipuas agunt par-
tes Joan. Briardus Atensis, homo vix bipè-
dalis, sed idem fucatissimus simul & virulen-
tissimus, denique Galliculus; est enim ex
illa hominum colluvie, ex Germanis simul
& Gallis conflata, & ob hoc infensior est no-
stræ Germaniæ, quæ nunc præter cæteras
nationes feliciter amplectitur non modo bo-
nas litteras, verum etiam pristinam scribendi
libertatem sibi usurpat.

Hic cum sit seniculus, & semper abundet
pessimis humoribus, quæ nunc pedes, nunc
latera, aliquando etiam caput obsident:
tamen

tamen medicum habet Joan. Winckel juvenem egregie indoctum, sed sibi ob divitias ad insaniam usque placentem, præterea nihilominus lingua sycophantica, quam sit Atensis ipse, qui nihil est nisi venenum merum. Eum adhibet cum laborat mala pilita. Is hominem ex insano facit insanio-rem. Sunt & præter alios instigatores non paucos, duo præcipui M. N. Jacobus Latomus, qui ex infima fece, & collegiaticis pediculis, ubi emerfit ad notitiam Reverendiss. Cardi. de Croy, cujus optimam indolem suo morbo, hoc est suis naniis Sophisticis, in quibus bonam partem vitæ perdidit, inficere conatur, factus est intolerabili arrogantia. Præterea Ruardus Encusanus, homo miserabili balbutie, & tamen maledicentissimus, ingenio, forma, vultu, incessu, doctrinaque fratri etiam si non sit frater. Hi veluti Polypi transmutantur ad omnem habitum, cum Atensi ægroto ægrotant, cum insaniente insaniunt. Contemplatus sum omnes per otium diligenter, animi morbum ipsa corporis specie præ se ferunt. Aliorum nominibus prudens in præsentiarum parco, quanquam & illi veluti publico furore phanatici vociferantur acriter in optima quæque, cum est opus. Sed omnium stolidi-

Qs

diffimus

diffimus est ac maxime perfriatæ frontis Nicolaus Egmondanus dignus, qui ob insignem stoliditatem camelita vocetur. Hunc ipsa natura plane genuerat ad monachatum sive fratralitatem. Nihil enim habet frontis, minus mentis, linguæ & loquentiæ plurimum, eloquentiæ nihil omnino, & cum omnia stultissime & dicat & faciat, vix tamen dici possit, quam sibi in omnibus placeat, ut mirum sit non verti in rosam, quicquid calcaverit ille. Indialectica parum feliciter versatus est ob plumbeum ingenium, sed tamen per gradus illos solennes hæc belua pervenit ad magistrum nostratum. Atque ut interim tegeret stoliditatem asini-næ mentis, voluit videri textualis, cum illi non sit opus acumine ingenii. Ergo factus M. N. tanquam regnum assecutus, coepit de splendore vitæ cogitare. Nec erat misero, unde vel famem sedaret. Nam antehac ut-cunque ex conviviis solennibus, ex pecu-niola, quæ a miseris scholasticis sordide ab-raditur, sustentarat ventrem. Vidit autem apud nullos stoliditatem & impudentiam esse felicior, quam apud monachos mendicantes titulo, re Sattrapas ac tyrannos: Inter quos Prædicatores comprimis placebant, quorum ordo semper habuit egregie sedi-tiosos,

tioſos , & ad omne facinus imperterritos. Quam quidem laudem adhuc cæteris invident , dum nobis ſuos Aluaros , Thomas , ſuos Sylveſtres , ſuos denique Hochſtratos , quaſi formidabiles obtrudunt. Sed ex Scotiſta Thomiſtam fieri erat difficile. In Minoritis diſplicebat nuditas & vita non admodum delicata , in Auguſtinienſibus paupertas abſque hypocrifi. Videbat Carmelitas in his regionibus ἀβελτέροις pulcre regnare , maxime favore mulierum. Ergo Camelus camelita factus eſt Mechliniæ , quæ civitas , quia forma gignit inſignes , Veneri ſacra eſt. Nec ob aliud mulieres hic favent adeo his nebulonibus , quam quod vocentur FRATRES DOMINÆ. O felicem ſacram virginem , quæ tales tauros complectitur ſub pallio ſuo. Hinc tamen colligebit , hanc beluam non religionis gratia factum Carmelitam , cum eodem anno , quo profeſſus eſt carmeliticam vitam , factus ſit Terminarius , ut vocant , Lovanienſis , ut pariter & ibi caſeos & ova colligeret , & a ſolennibus illis prandiis & honoribus , quibus aſſueverat , non abeſſet. Nusquam enim lautioribus conviviiis mulſtantur , accepturi gradum , neque alibi magiſtri noſtri potant liberius , quam Lovanii. Deinde regnum

iſti

isti videbatur, invitari per Bidellos, quos vocant, salutari Magister noster, sedere sublimis in schola, ut crepitus & pector pedum perveniat ad capita Baccalaureorum, ac magistrorum non nostrorum. Hæc homo mundo mortuus scilicet contemnere non potuit. Et vide hominis impudentiam, qui ipse fugit domum & religionem suam, reformet alia monasteria? alios includet? quum ipse non potest ferre claustrum domus suæ. Sed tamen interea prospectum erat edaci ventri, & bibaci gulæ, atque etiam falaci πῆσι. Nam nunc jucunde deliciatur, vel cum sacris virginibus, si desunt matronæ. Et vide quam homo strenuus non defuit professioni suæ. Mox magna pecunia congesta ex interversis testamentis, ex impudenter prædicatis veniis, ex compositionibus, ex intempestivis adulationibus, quibus inter concionandum mulierum, & maxime vularum animos sibi devincit. Ex hypocrisi, ad quam se totum componit, nidum extruxit Lovanii, futurum monasterium Carmelitarum. Quasi parum sit hujusmodi mendicabulorum ociosorum, quibus mundus gravatur nimium. Nec his contentus cauponem agit, alit domi non paucos, alit pueros, quos doceat nihil scire; siquidem
pro

pro Grammatica prælegit ille Salomonis Proverbia. Et hunc quæstum, qui multos alit, Lovanii homo insatiabilis præripit. Enarrat idem domi psalterium, in quo novum præbet artificem. Nam psalmos, nec ab eodem, nec eodem tempore scriptos ita obtortos connectit, veluti linum lino connectens, quasi contextus sit continuus, eas enarrationes condit suo more virulentis obtreptionibus in oratores, in policiem dictionis, in Græcas literas, & literarum studiosos semper aliquid evomens, tali stipite dignum. Quodam die apud Vestales virgines: Quid est (inquit) poëtria? nihil aliud quam sic loqui, ut loquuntur in lupanari. Hoc portentum & oderunt & rident etiam alii Theologi. Sed tamen postquam conspirassent in meliores literas, visum est illis utile, ut ad hanc agendam fabulam, hunc histrionem, aut potius Cyclopen adhiberent, stupidum, impudentem, clamosum, pertinacem, furiosum. Nam animi furorem non solum verbis, sed & ipso vultu, ipsoque incessu declarat: in summa, si cucullæ adderentur auriculæ cum tintinnabilis nihil in eo desiderares. Hoc igitur Morione sunt abusi in his partibus fabulæ, quas putabant sibi indecoras fore. Tam stolide frequenter hic

hic clamavit apud populum in linguas, in poëtriam, sic enim ille vocat poëticam, ex Catholiconte opinor, in novum testamentum Erasmi, quod interim confitetur, se nunquam vidisse neque velle videre. Omnes suas conciones, quas, ut in loco sacro, sacras esse decet, infecit & conspurcavit hujusmodi sycophantiis, oblique perstringens etiam viros eximios, & de bonis literis bene meritos. Et cum hujusmodi factis homo sibi videtur sani capitis, nec medicum adhibet, nec poscit Elleborum. Cum Lutherii opera prodirent, misere metuebat suo quæstui, memor quantam vim pecuniæ collegisset, & veniis Apostolicis. Nondum legerat ullam pagellam, & ob ingenii stuporem frustra erat etiam lecturus, sed audierat inter pocula a conbibonibus Theologis, inesse, quæ obfisterent illi quæstui. Illico profiliit ad populum, & insanis clamoribus omnia commiscuit, nihil habens in ore nisi seductores, hæreses & Antichristos, clamabat perituum mundum, nisi ipsius humeris fulciretur. Non sum is, mi Zinli, qui Lutherii libros intelligam ob quæstiones aliquot remotiores, nec me causæ illius misceo, cum ipse non egeat talibus patronis. Tamen adeo hebes non sum, quin hujus stuporem

porem admirer. Ex hoc uno cætera conjicito, quam hic asinus intelligat Lutherii dogmata, plus centies clamavit apud populum, Lutherium docere, non esse necesse confiteri peccata mortalia, nisi manifesta. Lutherus sensit manifesta nobis, id est, quæ judicaremus esse mortalia, quod certe (ut ego puto) non est cujusvis, ista bellua putat non esse manifesta, nisi quæ designantur in foro. Quid facias, quæso, hujusmodi bardis fratribus? Constanter etiam nunc vociferatur in Lutherium, & tantum profecit, ut passim emant libros Lutherii, sibi persuadentes esse aliquid boni, quod huic Casuario tantopere displiceat. Et postea queruntur, esse, qui emant Lutherii libros, cum ipsi non solum irritent emendi appetentiam suis adeo ineptis vociferationibus, verum etiam ecclesiæ tranquillitatem in periculosum vocent dissidium. Putat hic monachus se valde sanctum, si die Mercurii non vescatur carnibus, sed ovis & piscibus sese expleat ad vomitum usque, & tam manifestis mendaciis, tam sceleratis calumniis famam boni viri proscindere, talibus Syco-phantiis inficere animos & aures auditorum non putat esse peccatum. Clamat Latomus, clamat Edmundanus, balbutit Ruardus

in

in Lutherium hæreticum, in indoctum, in ineptum, & tamen nemo illum commonet, nemo docet, nemo redarguit, cum ille doceri postulet, cum audiri cupiat & audire. Qualis sit Lutherius nescio, nisi quod libri, quos hætenus edidit, testantur, eum esse in literis theologicis, non tam veteribus quam recentioribus exercitatissimum, præterea ingenium arguunt sanum, & pectus multis variisque dotibus vere Christianis instructum. Hos vero novitales, ut si non essent alii Christiani, cum his, ita me Deus amet, Christianus esse nollem. Siquidem avaritiæ addicti sunt & ambitioni. Nulli profunt, nulli benevolunt, nisi sibi ipsis, nocent plurimis & timeri volunt sub religionis prætextu. Neque enim hoc offendit eos in Lutherio, quod non satis molliter tractat pontificiam majestatem, de qua & ipsi non admodum magnifice sentiunt. Quod vellicat venias, quas nec ipsi probant, cum inter sese veris agunt. Sed ideo his est hæreticus Lutherius, quod Thomam despicit, quem prædicatores quintum Evangelistam videri volunt, quod incessit Magistros Nostros, quorum auctoritatem sacrosanctam haberi postulant, quod scholastica dogmata non habet præ oculis, quibus, ut nihil aliud dicam,

dicam, debet mundus tot monachorum discrimina, tantum ceremoniarum, & Christianam religionem, si non extinctam, certe misere afflictam, infectamque, tot indoctos theologos, & bonorum autorum neglectum, de quibus dogmatibus M. N. Latomus promisit tertium librum, sed ubi videt, primos duos tanto risu doctorum omnium exceptos, consultius putat esse premere, quam tanto scholasticorum doctorum dedecore iterum prodire in proscœnium. Hinc est, quod clamitant, hoc ulcus illis dolet, hinc illi tumultus insani. Malunt (opinor) obrui doctrinam Christi, quam aliquid decedere de majestate duorum aut trium Magistrorum nostrorum. Certe Carmelitis & prædicatoribus, quos tantum inversio vestium sejungit, minus indignor, ventri serviunt, & ventris negotium agitur. Demiror magis, cur his belluis alii subserviant. Edmundensis putat, timeri stultissimam illam linguam suam (nam hoc subinde jactat e suggestu, quod Huttenus noster arcem impudentiæ vocare solet) propterea quod boni nolunt adversus rabientem rabire. Nunc audi, quæso, horum dementiam, audi, expectant, ut Lutherius capiatur. Quid hoc aliud est, quam

R

quam sitire humanum sanguinem. Quandoquidem docere non possunt, & tamen perdere volunt. Utrum hoc est, carnifices agere an Theologos? Quanta indignatio posteritatis, si legerint, Lutherium virum fuisse bonum, & vitæ ad miraculum usque inculpatæ, acutum, eruditum, ingeniosum, bene Christianum, præterea Germanum; & tamen, quod primus in tanta Theologorum perversitate, in tam detestabili monachorum tyrannide, ausus fuerit, libere monere, & Christum jam olim constitutiunculis humanis indigne foedatum, imo conculcatum, vindicare, oppressum, non argumentis neque Scripturæ sacre testimoniis, quibus innocentiam suam usque tuebatur invictus, sed arte & conspiratione nebulonum plane tyrannica. Quodsi quidam haberent tantum insanix, quantum isti, brevi mundus totus sciret, quæ probra, quæ dedecora, quæ flagitia, quæ facinora lateant sub illis albis & nigris palliis, qui faverent religioni, citius alerent Urso aut Simias aut etiam Viperas, quam multos istorum generum, nolo enim gravare omnes, quos tamen opinor esse perpaucos. Unde nobis hæc prophana religio? unde hæc impia pietas? unde indocta doctrina? unde spurcissimus iste
coeli-

coelibatus? Indigne fero, hanc urbem elegantem, hanc Academiam cum primis celebrem, & egregiis ingeniis abundantem, sic infici per hos paucos nebulones, virulentos & indoctos. In cæteris literis non est omnino indoctus Atensis, sed ira huic prorsus dominatur. Quid autem iudicet iratus? quid diiudicet inimicus? Egmondanus plane stolidior est, quam ut vel de re culinaria ferat iudicium, quod tamen affectat & quidem sedulo, & ob hoc Frater olla a quibusdam vocatur, quod plus palato quam ingenio valeat. Et nunc ea damnat, quæ nec legit nec intelligit. Si sapiunt bonarum literarum cultores, in hos omnes acuent suos calamos, indigni sunt, quibus parcat, feræ sunt non homines, proferrantur horum mysteria, quandoquidem ipsi finem insaniendi nullum faciunt. Et audio esse in manibus quorundam volumen quoddam, cui titulus sit de memorabilibus Prædicatorum & Carmelitarum, cuius gustum nobis præbuit Nicolaus Quadus in epistola quadam sua longe elegantissima. Et Dii faxint, ut ne torqueat nos expectatio longa. Si moveret eos negotium fidei, ut simulant, inquirerent in libros Aluari, in libros Sylvestri, in libros Thomæ de Vyo, sed

sed de prædicatorum erratis nullum verbum. Quantum equidem conjicio non tendunt in Lutherium, qui satis tutus erit contra horum tyrannidem, sed in omnes bonas literas, quas ipsi non didicerunt & piget discere, sed prætexunt splendidum titulum homines ad hypocrisim nati educatique. Quod si conatus eorum successerit, id quod superi prohibeant, videbis, quo sit evasura rabies sceleratorum. In hanc rem scio conjurasse quosdam, omnes insignite sceleratos, quorum nomina brevi, ut arbitror, cognoscet & detestabitur mundus. Hos tyrannos retundere magis puto esse e re Christianæ religionis, quam profligare Turcas turcissimos, aut his etiam sceleratiores Judæos. Demiror lenitatem Erasmi, quod suo stilo felicissimo non sæviat in istos, sed ille, ut est pure Christianus, abhorret ab omni dissidio, & interim studiis vere sacris sese consolatur, reversus ad Paraphrases in Paulum, quas hac hyeme perficiet. Et ut ille in re quidem optima occupatus est, ita non convenit alios studiorum causam deferre. De his satis hætenus; proximis tuis literis respondi superioribus nundinis. Hic quoniam & præter spem & certus oblatus est nuntius, nolui te nescire, quid hic ageretur,

retur, & placuit, stomachum meum apud te effundere. Hutteni postrema foetura mire probatur doctis omnibus, utinam ille vivat ultra Nestoris annos: ita semper vincit se ipsum, felix illud & foecundum ingenium. Carinus noster plenis (ut ajunt) velis ad utriusque linguæ fastigium contendit; spes est fore, ut brevi Germaniam nostram, non modo Helvetiam ingenii sui opulentia sit illustraturus. Hic locus & tota fere Brabantia satis tuta est a peste, sed laboramus alia peste nocentiore, quam sit ista vulgaris. Vale optime. Lovanii apud Sycophantas M. N. & Fratres. Tu perge, eruditissime Zingli, purum Christum tuorum populorum animis inserere. Anno

M. D. XVIII. Mense
Aprili.



IX.

OBSERVATIO

De Epistolis Caroli Ludovici Electoris Palatini & Degenfeldia Baronissæ amatoriis.

Serenissimum quondam Electorem Palatinum, Carolum Ludovicum, Principem incomparabilem, in tenerrimis habuisse amoribus Louisam, ex illustri Degenfeldiorum Baronum stirpe natam, inter omnes constat. Eam conjugali forma sibi desponsatam in thori societatem accepit, repudiata legitima uxore, Charlotta, ex Serenissima Landgraviorum Hassio-Casselatorum gente orta, illamque ad mortem usque constanter & effusissime dilexit. Inter homines ea agere desit A. MDCLXXVII. d. 18. Martii, cum jam ex Electore decimam quartam prolem utero octavum in mensem ferret, quinque filios ac tres filias superstites relinquens. Ipse ille literatissimus Princeps epitaphio, suamet Minerva conscripto, & summum amorem spirante, monumentum ejus sepulchrale decorasse perhibetur, quod Germanico & Latino idiomate insertum est Inscriptionum Monuments publicis, in itinere col-

collectis atque editis a M. T. Gedani, 1696. in 8. pag. 16. sqq. Circumferuntur vero Electoris atque Baronissæ epistolæ amœbæ, amoris parariæ ac nunciæ, Latina lingua exarata, illius tres, hujus una responsoria, quas præter alios exhibet Jo. Christianus Lunigius, Vir clarissimus, in Literis Procerum Europæ Part. I. p. 699. sqq. & Anonymus, qui paucis abhinc annis vernaculo sermone ejus rei memoriam renovavit (a). Suas habent venteres, nec inelegantes sunt illæ epistolæ, aculeum, nescio quem, in legentium animis relinquentes. Fuerunt tamen, qui earum γυναικίσκη in dubium revocavere. Ego quum primum illas in Lunigiana collectione attentis perlustrarem oculis, in utrisque idem prorsus dicendi genus agnoscere mihi visus sum, hinc omnes ab uno eodemque autore & scriptore profectas esse hario-latus. Nec mea me fefellit conjectura; posthac enim deprehendi, non quidem personatum Daphnæum Arcuarium, sive, qui sub hoc nomine latere voluit, Laurent. Begerum, quæ nonnullorum est suspicio (b),

R 4

eas

(a) Titulus libelli est: *Die durch Unlust vergallte Lust des Ebelichen Lebens &c. von neuem ans Licht gestellt durch L. V. A. Gießen.* 1720. in 3.

(b) Vide præfationem tractatus Germanici modo citati.

eas composuisse, sed Æneæ Sylvio, vel qui idem est, Pio II. Pontifici maximo acceptas esse ferendas. Absona forte me loqui existimabis, cum is non Carolo Ludovico Palatino & Degenfeldiæ, verum Friderico III. Imperatori olim fuerit a secretis epistolis, atque ducentis propemodum annis ante mortalitatem expleverit, quam istæ literulæ amatorix in Palatinatu utrinque missitarentur. Forsan, inquires, ex inferis rediit Æneas, & amoribus illis, a quibus ipse, dum viveret, haud alienus erat, fovendis operam navavit. Non prorsus erras, mi Lector: immo vivit adhuc in scriptis suis & eruditorum memoria Vir, Spondani judicio, literis, eloquentia, dexteritate & prudentia nulli secundus. Inter opera ejus extat libellus haud inficetus. De Euryali & Lucretiæ amoribus, qui seorsim etiam aliquot vicibus prodiit. Hunc fabularum Romanensium in censum referrem, nisi cum ipse Sylvius rem vere sic esse suo tempore gestam asseveraret, tum Jacobus Philippus Bergomas eam testimonio suo (c) confirmaret. Ad morem tamen fabularum Milesiarum exornatam esse illam, in propatulo

(c). In Supplemento Chronic. f. 282.

tulo est. In hoc igitur libello conspiciuntur quædam epistolæ amatoriae, utrinque missæ, & ab Æneâ effictæ. Reperies vero inibi etiam eas, quæ Serenissimo Electori atque Baronissæ vulgo tribuuntur, ita quidem, ut posterioris epistola totidem verbis ex Sylvii libro sit repetita, prioris autem literæ paululum immutata legantur, quibusdam ex iis, quas Æneas Euryalo adscribit, relectis, quæ scilicet electoralem dignitatem decere minus videbantur. Speciminis loco integram exhibebo epistolam ex memorato libello, quæ secunda est inter eas, quas Carolo Ludovico adjudicare solent. Magno mihi gaudio fuit epistola tua, quæ,, finem querelis fecit de Iena. Sed angit,, quod amorem parvi pendas meum. Nam,, etsi plures te amant, nullorum tamen ignis,, comparandus est meo. At tu hoc non,, credis, quia loqui nequeo tecum: id si daretur, non me contemneres. O utinam,, fieri possem hirundo, sed libentius transformari in pulicem vellem, ne mihi fenestram clauderes. At ego non quod,, nequeas, sed quod nolis, doleo. Nam quid,, ego nisi animum respicio? Ah, mea Lucretia, quid dixisti te nolle? An si posses,, me nolles, alloqui, qui tuus sum totus,,

R 5

,,qui

„qui nihil cupio magis quam tibi gerere
„morem, quæ si jubes in ignem ire, citius
„obediam, quam præcipias. Mitte obse-
„cro verbum hoc. Si non datur facultas,
„adsit tamen voluntas; ne me verbis one-
„ra, quæ vitam mihi oculis præbes. Si
„non placet, me alloquimur petere, quia
„non sit impetrandum, obsequar. Sed
„muta sententiam, qua meum laborem
„vacuum dixisti futurum. Absit hæc cru-
„delitas: mitior esto amanti tuo. Si pergis
„sic loqui, fies homicida, nec dubita, fa-
„cilis tu me verbis interimeres, quam qui-
„vis alius gladio. Desino jam plura posce-
„re, ut redames tantum postulo. Nihil
„hic est, quod objicias: nemo potest hoc
„te prohibere. Dic te me amare & beatus
„sum. Munuscula mea quovis modo apud
„te sint, est gratum. Illa te aliquando mei
„admonebunt amoris: sed parva illa fue-
„runt, & minora sunt, quæ nunc mitto: tu
„tamen noli spernere, quod amator donat.
„Majora, quæ indies ex patria mihi debent
„afferri, cum aderunt, ex me recipies. An-
„nulus tuus nunquam ex digito meo rece-
„det, & illum vice tua crebris osculis red-
„dam madidum. Vale delictum meum, &
„mihi, quod potes, solatium dato.

Pote-

Poteris itaque ex memorato Sylvii libro petere illas illustris Degenfeldiæ responsorias, quæ desiderantur. Fateor mihi omnes istas, quæ & Serenissimo Electori & Baronissæ adscribuntur, confictas & supposititias videri: nisi hoc unum obstaret, quod a Serenissima Electrice Charlotta in literis supplicibus, ad Imperatorem Leopoldum gloriosissimæ memoriæ A. 1661. d. 26. Julii Heidelbergæ datis, pro genuinis venditæ sint. Tuum ergo esto hac de re iudicium.

Non possum vero non heic paucula ὡς ἐν παραδοῇ adjicere de Æneæ Sylvii, postea Pii II. Pont. max. amoribus, cum in ejus jam mentionem inciderim. Inter ejus epistolas extat una, ad genitorem Sylvium scripta (d), qua illum, licet matrimonii exsortem, ex foemina quadam Angla filium progenuisse edocemur. Satis prolixa ea est, inque defendendo isto facto ita occupata, ut mirandum oppido sit, illam posthac a primis editoribus non fuisse suppressam. Animum quoque ejus, lascivis amoribus deditum, loquuntur verba, quæ in præfatione ad supra dictum opusculum usurpat, sequentia: *Quid est*

(d) Quæ decima quinta est in mea editione, omnium, nisi fallor, prima, anni, loci & typographi indicio destituta.

est toto terrarum orbe amore communius, quæ civitas, quod oppidulum, quæ familia vacat exemplis? Quis trigesimum natus annum amoris causa nullum peregit facinus? Ego de me facio conjecturam, quem amor in mille pericula misit. Ago superis gratias, quod structas insidias millies fugi, felicior astro Martis, quem Vulcanus cum Venere jacentem ferreo illaqueavit reticulo, deridendumque Diis ceteris ostentavit. Sed alienos quam meos amores attingam, ne dum vetusti ignis cinerem evolvo, scintillam adhuc viventem reperiam. Hæc Sanctissimus ille Pater, cum adhuc Æneas Sylvius esset. Quodsi talia excidissent aliquando Luthero nostro, quantos quæso clamores tollerent, quam vociferarentur Ecclesiæ Romanæ promachi?



X.

JULI CÆSARIS SCALIGERI
EPISTOLIA DUO ^(a)
LECTU DIGNISSIMA,

Nunc primum edita,

Cura ac Diligentia

JOACHIMI MORSI ^(b)

Lugduni Batavorum

Excudebat Jacobus Marci. clō 15 c XIX.

(a) Hæc integra hic recusa Tibi non displicitura esse mihi persuadeo, cum inter epistolas Scaligeri junctim editas Hanoviz 1612. in 12. (quæ editio est plenior cæteris) non extent.

(b) Joachimus Morsius Patricius Hamburgensis, natus est A. 1593. denatus 1639. Brevis ejus vitæ descriptio nuper Hamburgi A. 1723. in 8. Germanico sermone prodiit cum vitis Lindenbrogiorum &c. Præter ea, quæ ibi pag. 78. sqq. vulgasse memoratur, possideo Antonii Florebelli Panegyricum, Carolo V. Romanorum Imperatori dictum, eo curante impressum Lugd. Bat. 1619. in 4. Aliquot ibi etiam centurias Epistolarum virorum celebrium se publicaturum esse spondet. Extat quoque una ejus epistola, in collectione Antonii Matthæi, quæ Lugd. Bat. 1695. prodiit. De aliis, quæ luci exposuit publicæ Morsius, vid. Vinc. Placcii Theatrum Anonymorum f. 241. & Pseudonymorum f. 500. conf. quoque Appendicem Epigrammatum Jo. Oweni.

Gratia quam peperit, Charites
auxere, Minerva
Absolvit, MORSI fama peren-
nis erit.

Immortalitati nominis & famæ, Nobilis
Patricii, & præclari juvenis-Viri,

DN. JOACHIMI MORSI,

CHRISTIANUS S. LONGOMONTANVS,

*Mathematicus Regius ac Professor in
Academiâ Hafniensi, amicitiae
causâ L. M. P.*

Amplissimo ac Celeberrimo Viro,
DN. MELCHIORI GOLDASTO,
 Philologo, Politico & IC. de Rep. lite-
 rariâ literatisque summè præ ca-
 teris merito,

Confiliario diversorum Germaniæ Principum
 dignissimo,

JOACHIMUS MORSIUS S. P. D.

AB utroque SCALIGERO patre & filio, Am-
 plissime ac Celeberrime GOLDASTE, ni-
 hil unquam profectum judicare te mecum
 existimo, quod non dignissimum sit, ut ad
 omnem posteritatem transmittatur. Quæ
 certè mihi horum Heroum incomparabilium
 divina scripta in itineribus meis singulari fe-
 licitate obtigerunt, suppressere, publicæque
 luci invidere, hominis parum religiosi sem-
 per arbitratus sum. Et jam ante quidem
 posthuma nonnulla opuscula filii vulgare
 cœpi, cui duo hæc lectissima Epistolia pa-
 rentis, à Clarissimo Galliarum Regis Cosmo-
 grapho, PETRO BERTIO, Professore Acade-
 mię nostrę nunquam satis laudato, mecum
 com-

communicata , quin subjungerem , prætermittere non potui. Daturus & reliqua eorum , quæ apud me exstant, occasione prima, si labores meos pios in horum celestium virorum, quorum

— *umbris tenuem & sine pulvere
terram*

*Spirantesque crocos , (†) in urnâ
perpetuum ver*

precamur, meditationibus è tenebris erundis, tuo, tuorumque similium accuratissimo judicio placituros intellexero. Libenter itaque primitias hæc vide, & me, illustrium tuarum virtutum cultorem ac admiratorem maximum, cum illis, patrocinio tuo dignare. Vale virorum optime, & me, serio Tuum , ama. Dabam festinanter Lugduni Batavorum , A. C. MDCXIX. XIX. Mart.

EX
JULII CÆSARIS SCALIGERI
XVI. Libro

Exotericarum Exercitationum, qui CARDANUS inscribitur.

I.

POSTEAQUAM mei fati sævitia tam miserè mihi favit, ut cum meâ unius gloriâ publici luctus conjunxerit acerbitatem, atque tam egregios meos ac officiosos conatus tam dita calamitas sit consecuta, non putavi committendum mihi, quin quanta est ob lenissimas castigationes affectus molestia *Hieronymus Cardanus*, tantum me ex ejus interitu capisse mœroris, testatum relinquerem posteritati. Nam tamen si ejus vita mihi terrori esse posse videbatur: tanta tamen in omni genere literarum extabant ejus merita, ut ego quoque, qui me unum ex hisce civibus profiteor, cōmunem omnium utilitatem meis cōmodis debuerim anteferre. Orbata est enim Resp. literaria viro maximo atque incomparabili; eamque jacturam fecit, quam fortassis nullis posthac sæculis reparare possit: Ego vero privatus

S

sum

fum & teste & iudice, atque etiam (proh
 dii immortales!) laudatore lucubrationum
 mearum. Eas enim ita approbavit, ut spern
 omnem defensionis suæ in declinatione solâ
 posuerit, in desperatione potentia suæ, in
 suarum virium ignoratione: quibus ille tam
 pollebat, ut eum nullus modus, nulla ratio
 latere potuerit, qua meas quoque castigatio-
 nes posset ad celebritatem nominis sui com-
 parare. Atque ille quidem talis tantusque
 fuit, ut ostendere potuerit studiosis se eadem
 sensisse, quæ ego tanquam contraria scripse-
 rim, si bona iudicaret: sin aliter sentiret,
 eadem animi præsentia corroborare aliquan-
 do, quæ semel statuisset, qua statuerat ea,
 quæ corroborari posse iudicasset. Ego vero
 qui eo animo ac spe ad eum virum scripsis-
 sem, quem equidem omnium mortalium
 ingeniosissimum atque eruditissimum vulgo
 prædicarem, ut me invictum illi fore con-
 siderem: ex ejus vitâ operosam laudem
 propter assensiones, non ex interitu ignavam
 quietem ex hac quasi causæ desertione mihi
 expectasse quis non videt? Profecto viri il-
 lustrissimi, & quem ego acerrimum, atque
 suæ fidentem magnitudini cognovissem, be-
 nignitate atque beneficio frui licuisset. Fa-
 cile enim, ut erat omnium humanissimus, ad

amicitiæ jura communia vel simplicissimis literulis evocabatur, me qui in præliis diu exercitatus ad pericula omnia audaciam meam objecissem: qui in assiduis disputationibus penè attritus, in diuturnis scribendi ærumnis penè consumptus essem, disputare tam supinè de tanto Heroe, in tanto conflictu, tanto pulvere, & somnolentum victoriam concupisse, haud verisimile est. Neque solum abest a ratione rerum, & ab opinione hominum judiciosorum abesse debet, verum etiam ab omni utilitate nominis mei. In eo enim semper adhærescere voluit animus meus, ut putaret omnem hominem (ut sane omnes nihil aliud quam penè nihil sumus) adeo errare posse, ut etiam sibi licere posse contendat. Quod si consummatissimo viro contigit aliquando: quod si sæpè mihi, & nonnunquam aliis usu venit, prolapsiones illas non esse errorum censibus adscribendas, nisi si quis postea porro eas tueri velit: pro constantiâ enim pertinaciam, pro humanitate veritatem profiteri necesse est, neque enim erat is, cui aliquid excidit paulo importunius: sed si quando suam culpam propriam facit ex infami defensione. Igitur illo vivente si ex conscientia rerum silentium esset consecutum, quid mihi potuit

honorificentius evenire? nempe tanquam præceptorem aut patrem modestissimis assensionibus excepisset. Quod si ad pertinaciorē disceptationem rem revocasset, quotusquisque nunc jam non intelligit, ex priorē mentis agitatione futurum, ut ad insaniam propius accederet? Id quod divinus ille vir cum acutissime perpendisset, quod non potuit ferre, tulit. Id est animi constantiam ad vivendum afferre non potuit: ad moriendum potuit: & quod potuit ferre, non tulit, hoc est communionem animorum nostrorum atque judiciorum ad publicā studiosorum utilitatem. Quamobrem doleo vicem meam, qui ad prælium hoc luculentissimas susceperim rationes, ad conflictum habuerim explicatissimas, ad victoriam, quam speraram, eas quas neque sperare licuit constanti viro. Quis enim talem eventum rei exspectasset? quem neque concupiscere viri fortis, cujus laus in hostium laude penitus posita est. Doleo vero vicem totius Reip. cujus doloris causas vulgus quidem literatorum pro suo captu capere potest: pro meritis illius divinitatis nullo modo potest. Cum enim in homine doctores tres partes omnino excellere debeant, eruditio varia & multa, ingenium summum cum acerrimo judicio

con-

conjunctum : tria hæc ille puncta adeo plenè tulerat , ut ad unum modo totus pro se , solus pro omnibus factus à Naturâ esse videretur. Nemo enim humanior cum minimo quoque , nemo apparatior ad omnia cum maximis quibusque viris inventus est. Lenitas Regia , celsitudo animi popularis non solum omnium horarum , sed etiam omnium locorum , omnium hominum , omnium fortunarum homo. Quod vero attinet ad eruditionem , circumspiciamus quæso totum hunc hujusce felicissimi sæculi consummatissimum orbem literatorum , multos magnos viros efferent merita cujusque sua , cæterum hos unâ tantum aut alterâ in parte philosophiæ occupatos. Ille vero cum profundissimis Naturæ Dei que arcanis humaniores literas ita conjunxerat , easque tam eloquenter explicarat , ut nihil aliud toto ætatis tractu professus fuisse videretur. Magnus vir sane , magnus : etiam si hoc hoc solum præstiterit : cæterum si ingeniî expromptam celeritatem , igneam ad omnia vim , æqualem ad minima & maxima quæque , vel laboriosam diligentiam , vel invictam constantiam , consideremus , propior impudenti fuerit is , qui se illi comparare ausus fuerit. Non igitur vel infensus animus ; cujus ego vestigia

ne novi quidem ; neque livor, cujus ne umbra quidem attigit unquam umbram meam : sed tot tantæque illius monumentorum illustres notiones ad hoc me impulerunt , ut de illis aliquid sentirem , & absolutis de subtilitate commentariis exiisset priorum appendix quasi quædam eruditissimus liber de varietate rerum. Atque ego illico, antequam de ejus morte quicquam allatum esset, exemplo sane meo me ipsum imitatus , triduo excursus in brevissima capita , congeissem. Posteaquam de ejus interitu rescivi, in unum congei libellum , ut ejus sane adjuvarem labores. Sed ita quemadmodum adjutum se ille voluisset, si quando mecum aut alio doctiore viro de rebus suis conferre debuisset.

Exceptum manu

JOSEPHI II. SCALIGER.

Sua viffimo, doctiffimo, optimo,

GERVASIO MARSTALLERO ,

Medico Brunsvicensi , Pater

Filio S.

Quantum moeroris capiebamus ex discessu tuo (propterea quod hoc tempore non sine maximis difficultatibus te incolumem

eua-

evasurum barbarorum immanitatem videbamus) tantum attulit voluptatis reditus, quam etiam suavissimis tuis litteris cumulaſti. Ego præter cæteros vehementer gaviſus ſum, te reſtitutum nobis, noſtris votis, noſtris ſtudiis, à quorum dignitate non parum decedere neceſſe erat, te amiſſo. Illud quoque auxit commendationem profectionis tuæ: cum novas herbarum facies, novas piſcium te attuliſſe ſcribis. De herbis non miror. Eſt enim πολύχους natura ut ſcis. Cujus portiunculam quantillam nobis notam putas? Quæ fuit cauſa, ut poſt infinitas penè mentis exagitationes provexerim me ipſum ex ejusmodi fato atque jactatione in portum, quem unum proſpiciebam. Is fuit: Cum per paucis medica res agi, peragi, conficique poſſit, quæ apud nos ſint etiam moroſiſſimè exquiſita: non eſſe abducendos animos noſtros à melioribus ſtudiis ad ea cognoscenda, quæ iisdem viribus prædita eſſent, ſi cognoscantur. Quæ cum ſint controverſa, in periculis vitæ noſtræ pro ignotis relinquenda ſunt. Quæ denique iis tantum apparatus ſunt à natura, qui aliis careant nobis cognitis. Neque exiſtimo easdem vires aliis atque aliis plantis ab opifice ſummo impartitas, niſi propterea, quod non ubique

omnes, non omnes eodem tempore, esse poterant. Generosi tamen animi est, omnia velle, etiamsi pauca possit. Tam enim Deo simillimi sumus quàm maximè sapimus. Quò tibi multum debeant studiosi, qui tot laboribus, tantis impensis rerum naturam nostro orbi hætenus incompertam aperuisti, ut hic aditus tuæ laudis cum nostra utilitate conjunctus pateat viris doctis ad se ipsos componendos, acuendos, confirmandos in exercitatione ingeniorum judiciorumque suorum. Nam mihi id demum vivere videor, quod datur artium cognitioni, novisque inquisitionibus. Quare jucundum atque etiam gratum adventum fuisse reor non solum juventuti sed etiam optimatibus principibusque Academiae, cum illis novæ eruditionis copias tecum longinquis allatas commeatibus ostendisti. Quod nisi me ipsum consolarer spe, vel tuarum aliquando migrationum, vel illorum commentariorum, vitam mihi acerbam putarem. Sed neque tu pati poteris labores tuos atque etiam ærumnas, quas in naturæ indagatione exequutus es, cum tuæ vitæ cursu finiri, neque illi tam præclaris institutis tuis etiam adjungere verebuntur, quæ ad summam rei deesse videbuntur. Nihil igitur aliud

aliud, quam exspecto. Laudo te de consilio tuo, quod cæpisse te scribis, de dicendi æquabili ratione. Nihil quidem libertate divinius esse puto, quæ versatur in media simplicitate, neque in licentiam effusa, neque oppressa alieni studii superstitione. Nunquam mihi probatum est genus illud imitationis, quod tanquam datis vadibus hæreret aliorum judicio, suum amittens. Quâ væcordiâ inter aucupia verborum res ipsæ intereunt. Legi προπεμπλικον, quo prosequeris epistolam tuam. Valde sum delectatus facilitate, promptitudine & quasi sinceritate sententiarum, in quibus matronam mihi intueri videbar sine fuce nitidam, sine fastidio comptam. Et illud quo ait & sua venire Claudianus. Sed & ille natus calor a se ipso incitatus assurgit interdum ad urbanitatem salesque: aliquando innuit majestatem; nusquam languet tamen, vegetus, vividus, sibi instans, seipsum parturiens. Neque hoc dico, quod istis candidissimis numeris illustrior factus sim. Antequam ea légerem idem sentiebam, nec me mutavi. Ago igitur tibi gratias immortales: non prius tanti beneficii memoriam depositurus, quam tibi vicissim ostendam re ipsa me esse animo & grato & liberali.

Scito

Scito me desiderio torqueri Panegyrici, non est ad nos perlatus. Leniit tamen ipsum lectio Elegiæ, qua solis defectum lueulentissimè simul atque doctissimè canis. Georgius noster agit Villæ novæ non obscuris conditionibus. Cæterum ne absenti quidem officiis desumus, quæ ad eum ornandum ab amico & populari proficisci potuerunt. De Orstano miram tibi narrabo fabellam, verissimam tamen: Is ex arce Basentii, ubi agit cum Episcopo designato, huc venit me salutatam. Nosti hominis os probum & germanum. Cubiculum ingressus, nihil ille, sed è comitibus unus. Hic (inquit) Cæsar, huc venit officii gratiâ. Facie & vultu potius, ac mediocri gestu ostendi id mihi percarum esse. Accedit proin ac loquitur. Ego qui sederem, non potui quin assurrexerim: manu benignè apprehensum rogavi, ut frueretur lectuli commoditate. Itaque, quod proximum erat, ambo conscendimus. Parcè ille & pure, ac non sine moderato pudore, aditum quærere ad prolixiorem orationem. Ego meo more pauciora, ut scis, & animo constantiore. Vbi sermo processit aliquantum (testor tibi Dominum Jesum) quem nunquam vidissem, quem Lutetiæ ut audieram, ita esse existimarem,

marem , nescio quo colore aut martiâ potius inflammatus altiore voce , tu es Orstanus meus inquam. Sicenim eum tunc appellavi. Quod ille miratus annuit. Tunc utrumque stupor invasit : unde id meum in animum sese dedisset. Sæpè hic mecum est, levatque tædia feræ barbariæ , quæ me excruciat. Et cùm primùm videro, tuis verbis salutatum dicam. Tu meis velim gratuleris Fontanovo , cujus progressus in studiis nostris communibus felicissimos Christus oro fortunet. Qui ejus patris nomen, monumenta, sapientiam colui, ei valdè benè volo. Agoque gratias, pro honorificentissimis verbis, quibus me appellavit in Epistolâ ad Bergium. Obsecro te saluta omnes istos primarios viros, quos præceptorum loco habeo. Nullum nomino , ne quem cuiquam videar anteponere. Honoratum valdè atque etiam impensè amo. Rondelletium colo ac suspicio. Scerroniam admiror. Te etiam atque etiam, tuasque divinas manus, tam care scribentes exosculor , mi fili. Vale.

IN
CLARISSIMI MORSII

Symbolum Optimum

*Deo auspice, Doctrina duce, Virtute
comite.*

GERHARDVS MEIERVS

P. L. C.

*Salve MORSIADUM, clarissima gloria, stirpis,
Praesidium Musis dulce, JOCHIME meis,
Incomptamque hilari nunc suspice fronte Ca-
mœnam,*

*Hancque patrocínio protege, quaeso, tuo.
Quaegsit laudes inculto carmine vestras
Dicere, si faveat mitis Apollo lyra,
Flagitat hoc merito in vatem tua prodiga
dextra*

*Postulat hoc pietas, poscit amicitia.
Ast mea humi serpens rudis ac inculta Thaleia,
Cantandis vestris sufficit baud meritis.
Te tantum dicet felicem, teque beatum,
Te fortunato sidere progenitum.*

*AVSPICE namque DEO, COMITE & VIRTUTE
probatâ,*

*Et DVCE DOCTRINA, cuncta, JOCHIME,
geris.*

JVPITER *auspicium, medium tibi, terminus
idem,*

Cunctorum, qua tu hoc auxiliante facis.

JVPITER *in medio fluctu tibi portus &
aura,*

Currentemque tuam dirigit ipseratem.

*Hic quoque quod summo volvis, JOACHIME,
labore,*

JVPITER *optato sine coronat opus.*

VIRTUTEMQUE *simultu cum PIETATE
Tonantis*

Jungis, & Heroum facta imitaris avum.

Ac insistis iter celebris quo gloria ducit,

Famaque in aeternos non peritura dies.

*Cumque duplex via sit, quam monstret vi-
vida virtus,*

*Quarum aliam ostendit Mars, aliam
Clarius.*

Tu potius Clarii sequeris vexilla parentis,

*Quo te dia trabunt munera Melpome-
nes,*

*Quae fovit, qua te primis nutrit ab an-
nis*

Instillans labris roscida mella tuis.

*Et sua dona dedit Patareus tibi laurea
serta,*

Quamvis mortali non redimita manu.

Nam

Nam Vera haud titulos, virtus affectat in-
aneis,

Nec cupit ut sese sarcina dura premat.

Ergo ventosa non tu suffragia plebis

Venaris, MORSI, nobilis arte tua.

Illustris potius fama, titulisque decorus,

Gloria virtutis, qua tibi habere dedit.

Ergo tuis donis, sic AUSPICE macte IEHOVA,

Et DVCE DOCTRINA & IVSTITIA

COMITE.



XI.

Epistolæ quædam hætenus ineditæ.

A.

Eximia eruditione, virtute ac humanitate præstanti Viro, Domino Joanni Mer-gellio, Medicinarum Doctori & Phy-sico nostrati, Domino ac vicino suo ob-servandissimo S.

EVolvi per hos dies subcesivis horis Irenici Exegesis de rebus ac situ Germaniæ scriptam (a), quam tu mihi, Vir Clarissime, com-

(a) Francisci Irenici Ettelingiacensis Germaniæ Exegesis publicata est primum Hagenoæ, typis Thomæ Anselmi & sumtibus Joannis Kobergii Norinbergenfis A. 1518. in fol. Recentior quidem etiam extat editio, sed prima illa rarior est & præstantior, cum in secunda quædam sint resecta, tabulæ præsertim Genealogicæ. vide Celeb. J. Fr. Reimanni Historiam Litterario-Ge-nealogicam Sect. II. p. 166. sqq. Varia equidem in hoc opere desiderantur & censura perstringuntur ab eruditis & a nostro quoque Bruschio; laudem tamen suam me-retur etiam Irenicus, qui inter primos fuit, qui Ger-maniæ nostræ descriptionem, antiquitates & historiam in justum redigere systema conati sunt. Hinc non abs-re Thomas Fritschius, Bibliopola Lipsiensis, deside-ratissimo Thesauro Antiquitatum Germanicarum hanc Exegesis inserere statuit. Irenicum in politicis crebro de-

communicasti. Inveni ibi quædam, quæ mihi profunt in labore meo, agnosco igitur me tibi debere multiplices gratias protalis libri communicatione. Sed quantum errorum sit in hoc ipso autore, nemo novit, nisi qui Germaniam perambulavit. Ego, qui Germaniæ quingentas vidi civitates, & inter peregrinandum plurima annotavi & observavi, multa deprehendi errata, quædam etiam notavi. Video, bonum Irenicum multa scripsisse,

defecisse, notissimum esse tradidit Frid. Tilemannus in Discursu Philologico de historicorum delectu p. 183. Jacobus autem Schopperus, Theol. olim Professor Heidelbergensis in Chorographia & Historia Germaniæ, A. 1582. Francof. edita, ita de eo judicat. : *Franc. Irenicus hat viele Müb und Arbeit unserm Vatterland Teutscher Nation zu Ehren zugebracht, und ein herrlich Lateinisch Buch von Teutschland geschrieben, welches er aus allen Scribenten zusammen gesamlet hat: bedunckt mich doch, das er in etlichen Orten geirret habe, welches er ohne Zweifel würde geändert haben, wann er länger gelebt hätte.* In Catalogo Historicorum Fresnojo-Merkeniano p. 122. Irenicus hoc in opere priscos Germanos cum recentioribus per quam jucunda ratione comparare, multaque memoratu digna de Germanorum Principum familiis annotare dicitur. Cæterum sub Francisci Irenici nomine patrum nostrorum ætate laterè voluit Philippus Andreas Oldenburgerus, cum A. 1670. Collegium Juris Publici in Burgholdensis (qui idem Oldenburgerus est) discursus ad Instrumentum Pacis Cæsareo-Suecicum vulgaret. Vid. Vinc. Placcii Theatrum Pseudonymorum. fol. 397.

scripsisse, non ut viderat illa, sed ut ex aliis referentibus ac mentientibus audiverat. Sicut etiam nostra ætate vidimus Sebastianum Francum ingentia historiarum volumina sine & judicio & experientia confarcinasse, de quo sæpe memini exclamare Philippum Melanthona in publica prælectione Vitebergensi: Indoctræ Francus conditor historiæ (b). Debe-
mus tamen in Irenico, homine docto, ea ætate, quæ adhuc rudis & eruditionis expers erat, agnoscere & venerari bonam voluntatem: in Franco vero reprehendere, quod ille indoctus homo doctissimo seculo suas ineptias obtrudere & aliis anteferre non dubitarit. Sed quid ego ita disputo? Tibi pro libri communicatione gratias ago maximas, & una Catalogum etiam Bibliothecæ tuæ remitto. In eo invenio annotata sub titulo Artium & litera N. Glareani librum de Helvetia, & sub lit. Q. Res gestas Bojorum ab Aventino scriptas: & sub lit. Y. Erasmi Stellæ libellum de Borussia antiquitatibus. Eos libros quaeso, ut legendos mihi exhibeas: habebis me ad omnia pietatis & amoris officia vicissim paratissimum. Bene vale Vir Clarissime,

T

&

(b) Magnus hic nugator vernaculo sermone Cosmographiam, & Chronicon rerum ab orbe condito gestarum edidit.

& me in eorum numero esse existima, qui
Tibi ac Tuis omnibus ex animo bene vo-
lunt. Datum in Musæolo meo 14. Aug.

Tuus

Bruschius Poëta. (c).

B.

*Venerabili & dignissimo Viro Magistro
Joanni Magenbucbio (d) Medicinæ
alumno in Witteberga amico suo charis-
simo Wolfgangus Rychardus (e) salutem
dicit.*

AUsum fui tandem tuo suasu meis ineptiis
& Lutheri & Melanchthonis aures dignis-
simas obtundere. Mitto tamen Epistolas
ambas

(c) Caspar Bruschius, historicus & poëta, egre-
giis ingenii monumentis Clarissimus, natus Egræ Va-
riscorum A. 1518. sclopo trajectus in sylva Schlingen-
bacensi, Rotenburgum ad Tubarim & Winshemium
interjacente, interit, insidiis nobilium quorundam,
in quos scriptum aliquod se editurum esse imprudens
comminatus fuerat. A. 1559. Vid. Melch. Adami Vitas
Philos. German. p. m. 182. & J. C. Zeltneri Correcto-
rum in Typographiis eruditorum Centuriam p. 95.
nec non Hamburgens. Biblioth. Historic. Centuriam II.
p. 120. sqq. Epistolæ, quam heic damus, sequentia
duo epigrammata adscripta sunt:

1. Bru-

ambas ad te : quod si interea aliter decreveris, liberum esto pro tua voluntate omnia moderari, sive reddendas sive occultandas censeas, tuum sit. Dedissem copias ad te prælegendas, sed negotia me aliorum avocarunt : summam tamen perstringam.

T 2

Cum

1.

Bruschius æterna redimitus tempora lauro
Historiæ multum nomine laudis habet.

2.

Facta, urbes, populum Germanum, Irenice, scribis
Pene puer: cessas addere plura senex ?

(d) Jo. Magenbuchius, Medicinæ tandem Doctor, patria Blaubyrensis, Luthero & Melanchthoni charissimus fuit. Docuit primum Wittebergæ, deinde artem medicam Noribergæ professus. Eobani Hessi amicitia ipsum esse gavisum, ex ejus epistolis a Joach. Camerario editis perspicio. Melchior Adamus, qui ejus vitam breviter descripsit in Vit. German. Medicorum p. 77. illum Megobacchum nominat, & a cura valetudinis Philippo, Hassiæ Landgravio, cum prius Marpurgi Cattorum aliquandiu docuisset, fuisse refert. conf. p. 53. Idem Spangenbergensem illum fuisse conjicit: sed Rychardus, cui notior erat, alicubi in Epistolis MSSis Blaubyrensem appellat.

(e) Fuit hic Richardus Geislinga oriundus, Medicinæ Doctor, & Poliater Ulmenis, vir egregie doctus, & elegans Carminum struendorum artifex. Inter primos erat, qui Ulmæ Evangelicam lucem, Luthero ministrante orbi restitutam, exosculati sunt avidissime. Cum eruditissimis sui ævi hominibus commercium habuit literarium. Duas ab Urbano Regio ad eum scriptas epistolas exhibet Bibliotheca Historico-Philologico-Theo.

Cum Luthero egi de fide & operibus, quorum alterum a Paulo justificatione, alterum autem ab Evangelio regno patris donatur: an scilicet justificatus sit regno Dei dignus, cum Evangelium solis operibus illud præscribat. Quodsi Lutherus dignetur meam mediocritatem juvare, tuum erit ejus hac de re sententiam mihi perscribere. Non etenim æquum duxi, Lutheri Calamum flagitare, qui tamen auro mihi gratior esset futurus. Melanchthoni gratias egi jam per epistolam pro suis lucubrationibus, quibus lectis animula mea tanta gratitudine est affecta, ut magis non possit. Testatus sum te apud eos, mi charissime Magenbuchi, me nullas cudere fabas: quoniam non immerito ignoti hominis, ex cordeque blandientis literas in suspicionem vocant: procul dubio multis cuniculis hi viri summates clanculum impetuntur. Itaque non ausus fuif-

Theologica, quæ, curante summæ eruditionis maximiq; nominis Viro, Theodoro Hæzæ, ad magnum rei sacræ & literariæ incrementum Bremæ editur, Class. VI. p. 1013. Integrum istiusmodi epistolarum volumen manu exaratum benevole mecum communicavit Vir plurimum Reverendus Christianus Ehrhartus, oraculorum divinorum in Ecclesia Memmingensi Interpres facundissimus, ex quo plures, argumento notabiliores, sequentibus hujus nostri opusculi partibus inferemus.

fuissem eos accedere, nisi te comite & patrono. Tu igitur tam humaniter meam causam coram illis age, quam germano sensu me hæc scribere noveris. Vellem aliqua fortuna te redderet saltem visendum nostræ patriæ. Si diutius apud nos morari tibi non foret ex usu, rependerem omnibus nervis vices meas tuæ humanitati, qua me absentem tam devote amplexaris : & quoniam in præsentia magis non possum quam redamare, id faciam quam lautissime. Pollicearis itaque tibi meam observantiam, quam totam tibi dedo. Facias rem mihi non minus gratam quam jucundam, si de omni tuo statu me reddideris certiolem. Hi enim, qui ad nos veniunt, multa egregia de te nunciant, id quod faventissimo percipio animo. Utinam esses jam Tubingæ, ubi indubitato honestum stipendium assequeris ad Græcas literas. Habuerunt hætenus quendam Anglum, qui pentaglottus esse voluit, Græcus præsertim & Hebræus, legitque ambas lectiones annuatim conductus in vicem Reuchlini 104. aureis. Is in Græcis literis multo te est inferior, si etiam non plus calleres, quam cum hic docebas. Hebræas autem tam infideliter tradit, ut omnibus cœperit esse nausæ : non dignantur eum bono titulo :

abiturus est jam ad futurum pascha, forsan ad vos concessurus, quod tum fiat, sis admonitus; ajunt enim exordia apud eum plus præ se ferre, quam habeat in recessu. Nihil est novi apud nos, quam quod Udalricus Zwinglius, Turicensis parochus, strenuus Evangelii adsertor, disputationem adornavit, de qua re habes hic libellum, quem ad te mitto. Dicunt, Reutlingæ sacerdotem quendam de Anti-Christi familia nuper, cum in suggestu verbum Dei simularet, a plebe sellis esse deturbatum. Lovanienses theologastri Ministrum Minoritam Gasperum Schazgerum, qui multos sudores habuit in expugnando Luthero, quum nonnihil contra stomachum Lovaniensium decoxisset, pariter ut olim Lutherum damnaverunt. Ajunt Regem Franciæ diem obiisse. Rhodienfes adhuc ægre repugnant Turcis. Augurantur suppetiis Pontificis & Regis Angliæ Georgium, Ducem Saxonix, contra Christianissimum Principem Electorem Fridericum machinari propter Lutherum. Precor Deum favere justitiæ. Filius Zeno jam pro bacca-laureatu descendit in arenam, promovebiturque nonis Martiis, qui scribit, in pago quoque Reutlingam, cui nomen Gomerin-ga, suam enixam porcellos caninis capitibus
& pe-

& pedibus. Ferdinandus Dux Austriæ, Sturgardiam cum uxore migrabit: multi existimant, hoc fieri, quo securior sit a Mahometho. Et quo ad te redeam, audio, te medicis artibus operam dare, facis tu rem totam ex animo meo, esque mihi eo calculo charior. Nam ego veteranus & emeritus jam miles Hippocratis, nihil lubentius video invalescere post Christum quam medicinam, quæ nullos nisi inscios habet æmulos. Belle fecit magnus Martinus, qui reliquas disciplinas taxavit omnes, solam tamen medicinam liquit intactam. Perge igitur mi charissime Magenbuchi, & si quid unquam in me erit, quod tibi usui esse possit, habebis me in promptu. Facies mihi rem pergratam, si quid certi habes de Duce Georgio, quid moliatur contra vestrum Principem. Nostri monachi lascivjunt & gratulantur, in omnium aures susurrant de Lutheri interitu, quomodo propediem sit delendus cum hospitali religione. Vellem aliquando audires hos miseros homines, qui dum nihil possunt masculis viribus, ignari cujus sint spiritus filii, spem posuerunt in cædem. Ego autem nuper in pulpito suggesti clandestine feci hoc distichon cum cera affigi, quo concionator eorum legeret, etiam

poëtaſtros ſuis votis eſſe adverſos. Clamaverat enim pridie cerbereo boatu minitans gladium futurum non ſolum Dei, ſed etiam Regum in capita omnium, qui Lutheranis libellis aſſentirentur. Falluntur, qui putant gladio ferreo fidem ſtabilitum iri : concione opus eſt ;

Verbis non ferro Chriſtum defendere
faſ eſt :

Pſeudo fides, cujus pendet ab enſe
ſalus.

Vale ex Ulma, tertio Calend. Martiar.
Anno ab adventu Spiritus Helix quinto.

C.

*Venerabili ac digniſſimo Viro Magiſtro
Joanni Magenbuchio amico ſuo ſingulari
W. Richardus S. P. D.*

O Bviis in manibus tuas humaniſſimas excepi literas, quibus me de ſtatu tuo & rebus veſtratibus miro modo lætificaſti. Scis enim, quam avidus ſim ea ſcire, quæ apud vos geruntur: nec id abs re. Nam ſi omnino buccam meam in ſinum tuum auſim exonerare, non dubitarem, omnipotentem Deum Helix & Enoch ſpiritum in Lutherum atque
Mc-

Melanchtona irrigasse, asseveranter credere, qua de re cum hic una essemus, sæpius verba fecimus. Vix dici queat, quam gratus audiverim, te & Lutheri & Melanchtonis proprias ad me cum Franco Giengerio misurum esse epistolas. Soleo enim heroum chirographa religiose thesaurizare: quare cum hisce epistolis me locupletaveris, Attalicas quasdam mihi accessisse divitias existimabo. Advigila mi charissime Jane: Luthero atque Melanchtoni me commendanda; illudque mihi operæ pretium apud eos fiat, quod certo ipsis affirmare queas, nullum esse in nostra patria, qui pluris fecerit usquam & jugiter faciat eorum honorem & profectum, & non tam eos quam in eis Christi Evangelium amplexetur. Dedi ad te literas longiusculas duobus Blauburensibus Nicolao Balneatori, & Joanni Fieslino Hadermendlio, qui finxerunt, se Wittebergam tui causa ituros, sed Lipsiæ resederunt, meamque ad te epistolam retinuerunt, quam vellem igne esse assumptam: egi enim tecum in ea epistola, quæ nollem aliis patefieri oculis, præsertim de Domino Luthero disticha duo, quæ & in privata scheda hisce literis inclusi, illi addideram, quæ si aliis, præsertim malevolis, in manus venerint,

T s

non

non essem omnino tutus a quæstoriis multis. Ulmeneses nostri privatim per omnes tribus divulgant de periculo, quod possit Lutheranis obtingere, & quamvis ipsi coniveant, veruntamen si quis propter Lutherum a censoribus male sit auditurus, ipsemet suam acturus sit causam, a civitate nulum præstoletur auxilium. Venit ad nos Eckius, Murnarus & reliqui Luthero Zoili in bestias picti, quos ego mihi denuo depingi curavi: pictor autem ille a monachis nostris prædicatoriis inquisitus, clanculum me prodidit: censori ego Noribergæ delatus in hunc diem pendeo, nescius quando me citet, quamvis fautores, quos illic habeo, bene consolentur, spondeantque, sua opera missionem mihi impetraturos. Sed hæc ad te scribo, quo intelligas, quam occulati sint venatores Antichristi, & quam opportunam rem mihi faceres, si meas literas prius ad te missas per Blauburenses ingenio, quo posses, solertissimo in tuas manus vendicares, vel Vulcano injiciendas curares. Sic ego non mediocri levarer sollicitudine. Aditæ sunt etiam Brassicani (f) epistolæ, qui
æque

(f) Intelligit Jo. Alexandrum Brassicanum, Jctum & Poëtam non incelebrem, quem Luthero ejusque causæ favisse, ex epistolis aliquot ejus manu exaratis novi: de quo forte alias.

æque ac ego metuit, id quod accidit, intercepti literas, quibus etiam nescio quid arcani ad Dominum Melanchtonem inscripsit. Sed hac de re satis. Novi ego tuam diligentiam, & quod per te non stabit, quin omnia ex animi nostri sententia efficere coneris. Tuas jam binas ad me datas literas, sinceriori theologia refertissimas, omnibus amicis legendas dedi: agunt tibi gratias nostri, qui se plus nuclei ex gemina hac tua charta elicuisse fatentur, quam aliorum foliatis libellis. Spondes præterea aliquid de symbolo & de Magistri Martini (g) palinodia ad nos scribere: Hoc mi Jane omitas, sed pollicita aliquando redde, & talentum a Luthero acceptum non terra obruas, sed foenerato redde: quod tum facies, si ad nos dederis, qui te atque tua veneramur. Salutat te plurimum custos Ecclesiæ nostræ Georgius Schramius, qui nuper ligno Guanico sive Indico vitam suam longius prorogavit, semisanus adhuc. Sunt multa & varia apud nos nova, quæ & partim tibi non ignota esse reor. Franciscus (b) a Sikinga Pala-

(g) Martinum Edelhuferum indigitat, de quo mox.

(b) De fortissimo hoc heroe, cujus arx Ebernburgum portus & receptaculum fuit veritatis testium eru-
ditio.

Palatinis faciles obnunciavit literas: nec res ejus est floccifacienda: habet apud nos ac ubique bene cupientes ex animo parti ejus. De Helvetiis non aliud quam de Africa dicere possum: quotidie aliquid horni monstri parturiunt, sed non mures, verum elephantos: jam denuo exercitum conscribunt, quem ducturi sunt in Mediolanum. Veneti & Galli suppetias adornarunt validissimas, & quo res Helvetiorum prosperius succedat, non verentur cum maxima Reipublicæ imperii sotularem comminisci. Nec falsa est fama. Nudius tertius Ulmam venit nuncius Eysbrucka, alius ex Yberlinga, tertius a Stutgardiano Magistratu, quī συμφωνως dicunt, Bernæ apud Helvetios nuperis diebus in aërem volandum expositum esse vexillum de panno Damasceno purpureo, in quo sotularis (i) sit pictus, & deauratus Phoebus radiis

ditionisque vindicum, vide Hub. Thomæ Leodii Historiam de ejus rebus gestis & calamitoso obitu, quæ Marqu. Freheri Tomo III. Scriptorum rerum German. indita est. Passim etiam ejus laudes celebrat, resque strenue gestas enarrat Vir Celeb. Jacobus Burckardus in Commentario de Ulrici Hutteni vita, præsertim Part. II. p. 223. sqq.

(i) Sotularis genus calceamenti est: vox corrupta more Italico, ubi sotto est sub, ut sottolegare accipitur pro subligare. Vide Martinii Lexicon Philologicum, in voce Subtel.

radiis micantibus cæsareatus, & propter ipsum literis aureis rithmus talis: *Welcher ganz frey will seyn, der zieh unter dieser Sonnen-Schein.* Nec desunt, qui ajunt esse undiquaque ab Helvetiis descriptas schedas, quæ publicitus decernant promptum auxilium contra Cæsarem & Pontificem omnibus pressis. Hæc res multum favere videtur Francisco a Sickinga, & Duci Udalrico exturbato a sua ditione. Nostri gentiles contra salutem suam omnes somniant & vigilant Ducem Udalricum. Non est difficile judicatu, quam altercosus sit annus futurus. Sunt multa & inexpiabunda in stamine bella: Antichristi scilicet cum Helia, Turcæ cum Christianis, Hispanorum cum Gallis, Helvetiorum cum Mediolano, Suevorum cum Francis, & alia plura. Quod si propius hanc scenam quispiam intueatur, non aliud quam regnum adversus regnum &c. videre potest; quare non ambigo, quin dies Domini sit jam maturus, & autumnus seculi oriri incipiat. Quod pene oblitus præterissem, in regno Granati maximus terræ motus sæviit: unam totam urbem solo æquavit, omnes firmiores muros labefactavit. Evangelium apud nos etiam ruptis iliis Codro bene gliscit. Ventres nostri in sug-

gesti.

gestibus debachantur , sed nequicquam : Deus noster sua misericordia aperuit oculos cæcorum, & manifestavit parvulis verbum suum , ita ut etiam cerdones & lixæ audeant cum nostris Pharisæis manus conferere. Nec est mihi parvuli miraculi loco habendum , illam Christi doctrinam in hac solitudine & in hoc squalido deserto domesticam indies magis atque magis fieri. Nam apud nos est nemo , qui in publicis acclamationibus ad populum Christi concionatur Evangelium. Omnesusque ad unum resistunt : singulis concionibus millies lapidatur Lutherus. Sed Emmanuel noster nobiscum Deus suo brachio adminiculatur , & simplicium corda erudit : quoniam quidem quo plus nostri antichristi & pseudapostoli veritatem premunt , eo validius palmari nisu assurgit. Vale , ex Ulma , idibus Dec. Anno ab ortu Spiritus Helix quarto.

D.

*Venerabili & multiscio viro Magistro Joanni Magenbuchio amico singulari S. D.
Rychardus.*

QUamvis cum proximis duobus scholasticis Blauburensibus, qui istuc concesserunt,

runt, omnem meam mentem literis tibi explicavi, non potui tamen tam opportunum nuncium pati omnino vacuum mearum literarum ad te ire. Nec habeo, quod in præsentia amplius significem, quam ut te omnibus modis obsecrem, novi si quid apud te habes ad me scribas: & ego literas tuas ubique circumferam singulis nostris amicis visendas, quo tui saltem honestam mentionem multis concitabis, præsertim si de Luthero & Melanchthone aliqua auditu digna adscripseris. Sunt enim multi apud nos rumores, sed tua verba nobis perinde atque ex Apollinis tripode hausta certissima forent. Nam tutum non est omni famæ aures accommodare. Cum hæc ad te scriberem redierunt Mercurii nostri ex nundinis Frankfordiensibus, qui Francisci fortunam prædicant, quomodo Treviros obtinuerit. Nostri tribuni Baal horrent & febriunt, somniantes etiam vigiles hanc fabam in eos cudi, suntque in suggestu pacatiores facti, quamvis per omnes conciones merum ventrem triumphare audiam. Insaniunt monachi, delirant sacrificuli, nihil autoritatis præ se ferentes, quam juramenta, quorum sunt omnino prodigi, jurantes in animas, in conscientias, per crucem & mortem Christi,

per

per extremum tribunal, Lutherum esse hæreticum, ejusque dogmata evangelio contra ire, & ita manifeste mentiuntur, quod etiam *εχθεν δε ις νηπιος, εγνω.* Minoritanus nuper hujusmodi verborum portenta morose in populum proclamavit: ego aliquot secreto subordinavi, qui in exemplar hunc sermonem redigi expeterent, sed obtinere non poterant: denegabat enim *αλωπηξ*, dolum subesse ratus. Hunc ego sermonem si habere potuisssem, illico ad te cum his literis ferendum curasssem, quo & videres, quibus fallaciis hæc ventris mancipia rudem popellum circumvenire annituntur. Rogo meo nomine salutem Luthero & Melancthonius dicas: eo enim me feliciorem nomine esse ducam: si non facietenus hæc duo fidei tympana salutavero, verbis tamen per internuncium alloquar. Tu vale, & nos certiores redde, quam belle degas. Ex Ulma. 13. Cal. Oct. Anno a misso spiritu Helix quarto.

E.

Dignissimo & venerabili viro Magistro Joanni Magenbuchio amico suo singularissimo.

Salve

SAlve mi suavissime Magenbuchi. Literas tuas omni melle etiam Hymettio dulciores quater atque amplius pellegi, parchoque nostro legendas obtuli, qui ferme in alium hominem ex his commutatus plurimum laudavit eam sententiam, quam tu ex Helia Luthero de auriculari confessione ad me scripsisti: plurimum rogo, si aliquando per otium liceat, ad me scribas, quæ apud vos sunt noviora. Nihil hic habemus, nisi quod omnes in Luthero simus Christiani, occulti tamen propter metum Antichristianorum. Martinus Idelhuser vocatus Constantiam, ad palinodiam redactus Ulmam rediit, instructus scheda, in quam recantationem horribilem ex suggestu ad populum declamare debuit; sed tantus fuit in plebe rumor, tantus tumultus, quod sacrificuli nostri olfacientes, si talis recantatio publice fieret, vix Baal vulgus a periculo mortis evaderet, eum timorem statim Deo suo Episcopo Constantiensi significarunt, qui illico proprio nuncio misso Martini revocationem omnino retractavit. Nihilominus Martinus cunctis est odio & nausæ: nemo bonus hominem alloquitur: omnes clamant, prius mortem obire debuisse, quam in hoc nefas assensisse. Contra Martinus

U

plu-

pluribus se purgat. Res igitur utcunque habeat, ego Martinum & facta ejus horreo; nullum interea verbum vel commercium cum eo mihi intercessit. Monachi & omnis turba Baal Lutherum fortissimis, quibus possunt, arietibus impugnant, nihil tamen, Deo gratia, proficiunt. Fuit multis diebus minister Minoritanorum, hic in monasterio suæ factionis libellum contra Lutherum devotis parturivit: sui palam in vulgus sparserunt famam, Spiritum Sanctum sedulo huic tam docto & sancto patri in capite sedere, interea dum contra Lutherum machinetur. Nos autem perinde ac fabulam anilem hæc verba risimus: monachosque adeo perosi, ut nisi ex Söflinga panem & victum mendicarent, fame perirent. Ille sanctus libellus jam in nundinis Frankfordianis vendetur, qui utinam faciem attingat, & suos luat colores. Est hodie apud nos Brassicanus, perendie Ingolstadium petiturus, ubi Græcas profitebitur literas. Ostendit mihi hodie epistolam Erasmi, in qua conqueritur de fama super Philippo, quod ille nescio quid dentatis libellis moliatur: multum deprecatur Philippi odia. Velim mi Joannes, si aliquando Philippum a bello Erasmico dehortari possis, ne differas: redibit olim cum scœnore Erasmus, & pri-

& pristini amoris memor totus in Lutheri,
imo Christi partem palam manibus pedi-
busque ibit. Magister Franciscus amicus
noster mutuus stat Christo: In cœnobio
Blauburensi & item Elchingensi pullulat
Evangelium. Saluta meo nomine Luthe-
rum & Melanchtonem facietenus ignotos,
lucubrationibus tamen suis mihi familiaris-
simos. Ostende aliquando Luthero, si li-
cet, hæc duo disticha, a me olim, cum esset
Wormatiæ, edita (k):

I.

Sceptrum, Bulla, Scholæ, Regis, Papæ,
monachorum.

Hæc tria Luthero nil nocuisse queunt.

2.

Lutherus vincet iusto sub iudice solus
Pontificem & Bardos, sceptrigeramque
manum.

Tu vale ex Ulma, 3. Non. Sept. Anno a
manifestato Helicæ spiritu quarto.

U 2

F.

(k) Ultima verba prioris distichi melius alias sic sunt
expressa: nil sociata nocent. Franciscus Lambertus
Avenionensis duo hæc epigrammata, elegantia & acu-
mine haud destituta, cum aliis subjunxit Commenta-
riis in Minoritarum regulam, A. 1523. in 8. vulgatis,
nomine reæque priori apposito. Literis heic retro
lectis habebis Rycharti nomen, quia seipso alicubi quo-
que in epigrammatibus, manuscripto epistolarum vo-
lumiini insertis, Trachyr vocatur.

F.

Evangelii assertores Ulmenses salutem & Christianam charitatem dicunt Domino Petro (1) scholasticæ theologiæ præconi ad monasterium Prædicatorum.

QUum die Lunæ nuper ad populum ex-
suggesto verbum tuum seminares, inter
cætera omnes hic Evangelii assertores nascutos
& se.

(1) Fuit hic Petrus Nestler, furibundus purioris religionis adversarius, qui Henrico præsertim Kettenbachio, strenuo veritatis evangelicæ testi, se opposuit, Ulma tandem eiectus. Conferri de eo potest Vlr plurimum venerandus, Jo. Casp. Funcius, V. D. Minister & Mathematicum Professor, de Ecclesia & Gymnasio Ulmensi præclare merens, in historia Reformationis in compendium redacta Cap. XI. §. 4. p. 691. seqq. Alius etiam ex eodem ordine Prædicatorio Monachi, qui Ulmæ Evangelicam lucem paulatim exorientem restinguere annifus est, conatu tamen frustraneo, mentionem instituit Henr. Cornelius Agrippa Epistol. Lib. VII. p. 365. edit. Lugdun. 1600. cujus verba adscribi merentur: Qui nunc apud vos (Colonienses) est Hostiati in hæreticorum magistratu successor, magister noster Conradus (p. 378. Conradum Cullon eum vocat) non multo infelicius, ut accepi, & ipse rem Lutheranam promovit, præsertim apud suos Ulmenses, ubi tam docte, tam pie contra Lutheranos clamasse dicitur, ut totam illam insignem urbem cum admodum amplo adjacenti territorio effecerit Lutheranam, etiam cum universi conventus sui excidio, fratribus suis omnibus una secum propulsis. Nonne

& seductores cognominans, hoc ænigmate quasi triumphator quidem compellabas: Ubinam ex evangelii placitis adstruere valeamus nos nasones, fidei nostræ christianæ scopum illos duodecim apostolicos symboli articulos ex ore duodecim Christi nunciorum prodiisse: id quod nunquam monstratu possibile rebaris. Nos victos & quasi protervos hoc uno scommate tecum cachinnabas. O hominem sterilis ingenii! Non secus tuum illud apud nos ænigma ponderat, ac si quæsiisses, ubi bipedem hominem omnibus etiam cernuum ex evangelio probaremus. Præ mirabilibus supra te, quibus misere oberras, non animadvertis, manifeste veris non opus esse interprete.

Quam insulse itaque urgebas, non omnem in evangeliiis esse veritatem occupatam, quin multa credenda ab ecclesia audire nos oporteat: quæ forsitan etiam buccellicus aliquis olitor dixisse poterit. An ecclesiam opus est audire laterem lavando, omne oleum perdendo? An ignem esse calidum ex evangelio opus est probare? injice manum, & periculo tuo caliditatem experire &c.

U 3

G.

Nonne satius esset huic monacho sui conventus curam gerere, suis fratribus ova & caseos præmendicare, non excitare turbas & querelas, labefactare famam bonorum virorum, agere ardelionem alienorum negotiorum?


G.

*Wolfgangus Rychardus Doctor Magistro
Martino Edelhusen in Constantia in mo-
nasterio Zofingen S. P. D.*

PERterre fecisti me majorem in modum
tuis jam ultimis literis, ex quibus liquido
intellexi, te omne factum tuum & pariter
spem reposuisse in palinodiam, quam tu
sponte tua non coactus videris adornare.
Facis tu Martine irrecuperabilem famæ &
nomini tuo injuriam atque contumeliam.
Exploravi a nonnullis, quidnam sentiant de
his tuis coeptis: non invenio, qui non aper-
to ore fateatur, se velle, te nunquam vixis-
se. Non ausus sum ego animum meum
tibi describere. Vaticinor tamen, te in-
tentare revocationem, quam tu nunquam
ex hominum memoria abolebis. Quæ, in-
quam, causa tuæ tam immaturæ revocatio-
nis? Quis cogit, nisi forsan avaritia? metuis
vel cuti vel pecuniis. Qualis posthac ha-
bendus eris inter mortales, si veritatem &
Christum ipsum abnegaveris deliberatissimo
etiam animo? Nolo jam amplius loqui
quoniam nuncius non quadrat, nimiumque
serus ad te scribere videor. Piget me pie-
tatis

tatis Comitiss, cujus ope tu mea persuasione frueris. Sed spero, postquam tuum tam antichristianum animum acceperit, te non secus ac diabolum explodet. Quam misere, heus Deus! nos tractamur, qui unquam parti tuæ favebamus! Resipisce, si potes! Ex Ulma idibus Julii

A. 1522.



XII.

De vetusta quadam editione Lactantii.

E^{πιμνησ} loco breviter jam recensebo antiquam operum Lactantii editionem, de cuius raritate vel exinde iudicium fieri potest, quod nullam ejus mentionem fecerint Viri præstantissimi, J. A. Fabricius (*a*), J. G. Walchius, (*b*), J. Lud. Bünemannus (*c*) & Mich. Maittaire (*d*). Prodiit ea in folio A. 1471. Venetiis, quod, licet urbis nomen expressum haud sit, facile ex his versibus in calce adjectis cognosci potest :

Arguit hic hominum sectas Lactantius
omnes,

Septeno falsus codice, vera docens.

Sive Deum tanget, turbato lumine cer-
nens

Ira furor : gemino pernotat inde libro.

Et

(*a*) In Biblioth. Lat. Vol. I. p. 730. & Vol. III. p. 394. ubi more suo diligentissime Lactantianas editiones cæteras enarrat.

(*b*) In Diatribe de Lactantio ejusque stilo editione Lipsiensi 1715. præmissa, Cap. VI. p. 43.

(*c*) In speciminibus Lactantii ex LX. amplius MSS. & editionibus illustrati, quæ inserta sunt Miscellan. Lips. Tom. III. p. 115. sqq.

(*d*) In Annalibus Typographicis.

Et volucrum verſu phoenix comprehenditur
una,

Quæ noſtro nunquam paſcitur alma
ſolo.

Hincque Redemptoris noſtri non carmina
deſunt,

Quæ poſitum e tumulo dulce canendo
vocat.

Preſſerat hunc primo mundi caput inclyta
Roma,

Poſt regina premit quippe colenda
maris.

Hos verſus in fine ſuæ editionis, A. 1472.
curatæ, repetiit Vindelinus Spirensis, addito
hoc diſticho :

Impreſſum formis juſtoque nitore co-
ruſcans

Hoc Vindelinus condidit artis opus (e).

Noſtra hæc editio, quam Bibliotheca
publica Memmingenſis poſſidet, typographi
indicio deſtituta eſt, niſi forte is nomine
Adam, quod poſt Anni M. CCCC. LXXI.
numerus legitur, ſignificetur. Artem vero
excenſoriam eo anno exercuit Adam Rot

super secunda parte Decretalium (*f*), loco non indicato : anno autem 1474. Romæ Petri de Ankarano Consilia juridica impressit (*g*). Eodem fere tempore inter typographos innotuit Adamus de Ambergau, qui A. 1472. sine loci mentione Ciceronis orationes excudit, his versibus ad libri calcem positus :

Hoc ingens Ciceronis opus causasque forenses,

Quas inter patres dixit & in populo,

Tu quicumque leges : Ambergau natus
ahenis

Impressit formis ecce Magister Adam (*b*)

Quisquis vero tandem nostram adornaverit editionem, eum sua dignum laude esse cenſeo. Characterẽ usus est Romano, nec ineleganti ; ἀποσπασματία, ex Græcis autoribus a Lactantio allegata, suis jam expressit literis, præter illius ævi morem satis legibilibus. Bonæ notæ codices eum fuisse secutum, vel hinc colligo, quod istam plerumque lectionem exhibeat, quam Vir πολυμαθής, mihi que faventissimus C. A. Heumanus in editione Florentina A. 1513. sumtibus

(*f*) Vid. Maittaire l. c. p. 93. (*g*) l. c. p. 105.

(*b*) l. c. p. 97.

bus Philippi de Giunta curata (*i*), & Clarissimus Bünemannus in codicibus manu exaratis & editionibus optimis suo probarunt calculo, quod ex sedula locorum collatione animadverti. Quin & conjecturas, quas Heumannus *νεπινοήσας* sola ingenii perspicacissimi facilitate ductus sine MSSorum editionumve auxilio (*k*) protulit, pollicem premit. Nimirum Institut. Divin. Lib. I. Cap. III. n. 21. (*l*) cum eo legit: Ita eos (Deos ethnicorum) præesse singulis rebus ac partibus dicunt, ut tamen unus sit rector eximius. Sice ejusdem correctioni favet Lib. II. C. I. n. 5. ita legendo: Homines autem ipsos ad tantam cœcitatē esse deductos, ut vero ac vivo Deo mortuos anteferant, terrenos autem in terraque sepultos ei, qui fundator ipsius terræ fuit. Perperam tamen *to* autem posteriore loco exhibet, quod jure rejecit vir laudatissimus (*m*). Cæterum post
libro.

(*i*) In Symbola Critica ad Lactantium, ejus symposio five eniorammatibus ænigmaticis adiecta D. 221. f. 64.

librorum & capitum argumenta in hac editione præmissi sunt Lactanti errores per fratrem Antonium Raudensem theologum collecti & reprehensi, quos excipit hoc fratris Adami Genuensis carmen :

Hic male corripuit stolidis Antonius ausis
Auctorem : in variis causa pianda locis.
Non erat in tenebris errantis imaginis
astrum

Dicere, vel nitidum luce carere jubar.
Denique cum sanctæ ecclesiæ pia lumina
constet

Obsequio ex tanto conticuiffe viro.
Tu vero eloquio lingua interdicta Latino

I cubitum : nam te pensitat elleborum.

De Antonio illo Raudensi, qui circa medium fere seculi XV. floruit, hæc habet Jac. Philippus Bergomas (n) : Antonius Raudensis, natione Mediolanensis, ordinis minorum professus, clarissimus Theologus, & omni-

(n) In Supplem. Chronic. f. m. 280. Hoc opus, quod obiter annoto, suis non caret nugis fabulisque, nec a comto sermonis genere commendari meretur : attamen vel eo nomine mihi gratum est atque acceptum, quod virorum cruditorum notitiam haud contemnendam interdum suppeditet, quam sæpe frustra alibi quaesiveris.

omnibus disciplinis non mediocriter eruditus in Cisalpina Gallia floruit: qui ut in omnibus se doctum ostenderet, singulorum quorumcunque tam oratorum paganorum, quam theologorum opera explanare præsumsit, & quam maxime Lactantium Firmianum, virum doctissimum, emendare tentavit, quod melius & dignitati & religioni suæ fuisset, ab illiusmodi scribendi genere se continuisset, quam contra tantum virum, doctissimum & præ omnibus disertissimum, invehere. Eam ob rem & quasdam inventivas in se provocavit. In margine vero hæc verba sunt apposita: Vide præsumptuosum hominem! Epistolam Francisci Philippi, qua Raudensem ob censuram in Lactantium latam castigavit, Fabricius (o) exhibet.

(o) Bibl. Lat. Vol. III. p. 395.



VAI 1526297



